



X. 3.



6-41-c-44

P. Bondi Chapelle

DE CONSCRI

BENDIS EPISTO
LIS OPVS



Hunc. 1^o m^o May 1842. R. M. 1842

VIRTUTE DVCE,



COMITE FORTVNA.



LVGDVNI APVD SEB.
GRYPHIVM,

1542.

6-41-c-64

ERASMVVS ROTERODAMVS
NICOLAO BER-
RALDO
S. P.



OSTEAQVAM Holonius ille desiderat esse apud superiores, eruditissime Beralde, non putabam mihi quenquam alium metuendum, qui nenas, quas iuuenis uel exercendi styli gratia, uel obsequiundans amicorum affectibus scripsissem, in uulgus ederet, in quiduis potius, quam in hoc natus. Et ecce de repente apud Britannos exortus est alter Holonius, qui librum de componendis epistolis excudit, quem annis ab hinc ferme triginta Lutetiae scribere coepera, cuidam amico parum sincero, cui simili munere gratificari uolebam, uidelicet ut haberet similes labra laetucas. Lectioni simul et compositioni, non plus temporis tributum est, quam dies uiginti. Atque adeo non erat tum animus hoc opus absolucere, ut archetypum illi tradiderim auferendum (nam adornabat longinquam profectiorem) nullo antigrapho apud me seruato. Aliquantum post, amici quidam, qui, nescio quo casu, nati, nugae eas descripserant, precibus adegerunt me, ut operis rudimentum absoluerem. Erat enim non solum rude, uerum etiam truncum ac mutilum. Receperam in manus, sed quum ne retractanti quidem arrideret, in totum abiecti, nequam fore suspicans quenquam tam effrontem, qui me ui-

no & reclamante schedas meas euulgaret. Verum, ut ui-
deo, nihil iam pudet typographos. Postea quàm expe-
riuntur nihil auidius rapi, quàm nugacissimas quasq; na-
tias, neglectis interim priscis ac probatis autoribus, per-
fricta fronte, sequuntur illud è Satyra: Lucri bonus est
odor ex re Qualibet. Proinde nos tametsi sic essemus affe-
cti, ut nunquàm antehac eque senserimus, quomodo fue-
rit animatus Flaccus, quum scriberet carmē illud: Vt nox
longa quibus, &c. nam agnoscis reliqua: tamen sepositis
operis sacratioribus, quæ ut magis decēt hanc ætatem, ita
magis iuuant hunc animum: dies aliquot in recognoscen-
dis quæ iam exierant, perdidimus, nescio quanta iactura
studiorum grauiorum, certe maximo meo tædio. Quod
ne mihi sæpius accidat, etiam atque etiam te rogo mi Be-
ralde, effice quouis pacto, ut iuuenis iste, nimium, ut ap-
paret, amans mei, librum, quem, uti scribis, à callido uen-
ditore magno emit, aut aboleat, aut certe tibi tradat ad
me transmittendum, quò mihi liberum sit de eo statue-
re. Typographis quid imprecer, nisi mentem meliorem
ipsis dari? Cæterum iuuentutem studiorum cultricem, li-
bens admonuerim, ut in hisce nugis quàm minimum ope-
re perdat. Video, discruciorq; animo, bellum hoc inter
Germanos & Gallos in dies magis ac magis incrudescere.
Quanta totius rei Christianæ calamitas, duos poten-
tissimos orbis monarchas, sic feralibus disidijs inter se
conflictari? Tolerabilius esset malum, si res eorum, quo-
rum interest, monomachijs finiretur. Sed quid cōmeruere
ciues & agricolæ, qui spoliantur fortunis, exiguntur se-
dibus, trahuntur captini, trucidantur, ac laniantur? O fer-

BIBLIOTECA NAZIONALE
ROMA
VITTORIO EMANUELE



reos principum animos si hæc perpendunt, ac ferunt: o
 crassos, si nō intelligunt: supinos, si non expendunt. Erat
 nonnulla spes in hoc nouo pontifice, primam theologo,
 deinde spectatæ à primis annis integritatis. Verum haud
 scio, quo pacto fit ut pontificum autoritas longe plus ualeat
 ad excitandum inter principes bellum, quàm ad componendum.
 Sed hi tumultus non dirimunt musarum societates,
 nec hæc commercia nobis intercipere possunt bel-
 lorum leges. Non conuenit Cæsarianis et Gallis, sed pul-
 chre conuenit honestissimorum studiorum sodalibus.

Quare ualebis uir humanissime, simulq; quum
 dabitur opportunitas, Budeum, Deloi-
 num, Brixium, ac reliquos amicos
 meo nomine salutabis diligēter.

Basilæ VIII. Cal. Iun.


ANNO

M. D. XXII.

D. ERASMVVS

ROTERODAMVS, DE RA
TIONE CONSCRI-

BENDI EPI-
STOLAS.



Quis epistolæ character.



VI in epistolis unum aliquē cha-
racterem uel requirunt, uel præ-
scribunt: id quod ab eruditioribus
etiam quibusdam uideo factum: ij
mibi nimirum de re tam multipli-
ci, propeq; in infinitū uaria nimis
anguste atq; arctè uidetur agere.

Neq; sanè ita multò minus absurde facere eos existimo,
quàm si sutor omni pedi ad eandem formā crepidam uelut
consuere: aut si pictor quoduis animal ijsdem liniamentis,
ijsdemq; coloribus conetur effingere: aut sarcinator con-
similem uestem pumilioni ac gigāti tribuere studeat. Ne-
gant epistolam ferēdam esse, nisi quæ intra exilem dicendī
figurā sese contineat: nisi quæ illaborata dissolutaq; fluat,
& omnibus contētionis neruis careat: nisi quæ uulgo mu-
tuatis uerbis contexta: nisi deniq; quæ breuitate ipsa epi-
stolæ nomen mereatur potius, quàm uoluminis. Hanc for-
mam si quis suo quodam instituto sequi maluit: ut sepe-
numero pro ingeniorum uarietate, aliud scribendi genus
aliq magis arridet: cum hoc equidem non admodum pu-

gnabo. Sit enim per me suum cuique pulchrum. Verum si eam nobis ita præscribit, ut uel solam, uel optimam haberi uelit, cum argumentorum species non minus sint innumerales, quam mundi illi Democritici: & nullum serè argumenti genus non recipiat epistola: & nusquam oporteat orationis habitum cum argumenti genere disidere: quì quæso potest tam infinitæ rerû uarietati, simplex sermonis character accommodari? Quem quidē, ut uel maxime alioqui per se optimū deligas, fieri tamen non potest, ut idē ubiq; optimus esse uideatur. Ego tum unanquamq; orationis figurā optimam existimo, cum maxime in loco adhibetur: tum pessimā, quoties iuxta priscum Græcorum adagionem, τὸ ἐν φανὴ μὲν ὄν: hoc est, in lente unguentum admiscuerimus. Atq; hæc quidem eruditis abunde satis in summa dicta fuerint. Cæterum literatoribus istis quibusdam triuialibus, ut multò indoctioribus, ita non paulò magis importunis, pinguiore (quod aiūt) Minerua, & per partes satisfaciendum est. Quibus etiamsi (ut solent esse pertinaces) fieri satis non poterit, tamen eos coargui uel puerorum interest, ne horum autoritate decepti, ea rudibus annis discant, atq; imbibant, quæ grandes iam de discere aut pudeat, aut nolint, & ut maxime uelint, non possint. Atqui hoc indoctum doctorum genus & illiterata literatorum turba, literarijs in ludis hodie præcipue regnat, & tanquam in sua tyrannide Phalarismum quendam exercet. Illic mihi blatero quispiam arrepta censoria uirgula, Solonis leges dictabit, clamabitq; delendam esse epistolam, quæ non intra duodecim uersiculos constiterit: hanc enim epistolari modo præfixam esse me-

tam. Obliteremus igitur hoc censore plerasque Platonis,
 Ciceronis, Plinij, Senecæ, D. Hieronymi epistolas, ὡς
 τὰ ἰσχυρὰ πηδῶτας, & contemptis istorum limitibus
 in iustum usq; uolumen porrectas. Quid si argumentum
 uarium & amplum obiectū erit, tu nihilo minus me co-
 hibebis, & circulum istum tuū magicum egredi uetabis?
 Agesilaus haudquaquā probum cerdonem sibi uideri di-
 cebat, qui paruo pedi magnum induceret calceū: at quā-
 to molestior, qui magnum pedem arctiore calceo stringit
 torquetq;? Recte Fabius scribit, absurdū fore, si quis Her-
 culus personam, & cothurnos infanti tribuat, uerū multo
 uidetur absurdius, si infantis fasciolas, calceolosq; Hercu-
 li coneris accommodare. Neq; paulò grauius est tum flagi-
 tium, tum etiam periculum, in re copiosa contrahi, quā
 in re non ampla copiosiorē fieri: propterea, quòd super-
 uacua fortasse cum tædio leguntur: certe necessaria non
 nisi magno utriusque dispendio prætereuntur. Porro si
 omnino propositum est, delicatis quorūdam ingenijs cō-
 sulere, quibus omnis epistola longa est, nihil esse scriben-
 dum præcipiamus. Neque rursus hæc dixerim, quòd eos
 probem, qui ridicule copiam affectantes, emendicatis uo-
 culis & male consutis sententiarum centonibus, epistolam
 infarciunt: quiq; cum omnino scribere nesciant, tamē scri-
 bendi finem inuenire nunquā possunt (nihil enim infan-
 tia loquacius) sed ut puerorum causa, eorum stultitiā re-
 fellam, qui suam infantiam Laconismi nomine prætexunt,
 cum interim nec ipsa breuitatis ac copię uocabula, quid
 sibi uelint, intelligant, cum unius atque eiusdem artificis
 sit utrunq;. Etenim quemadmodum apud Platonem So-

Brevem effe
quid.

Pauca scri-
bere.

crates, cum demum optime uerum dicere posse colligit,
qui sit idem artifex mentiendi optimus: ita nemo breuita-
tis nomine recte laudabitur, qui non idem quam copiosis-
sime scribere possit. Nam quid tandem est breuitate præ-
stare? Nempe maximam rerum uim, quoad fieri potest, in
pauca conferre, non pauca scribere: quod alioqui uel in-
doctissimus quisq; desidiosissimusq; facillime possit. Omne
igitur ad copiose dicendum supellectilem in animo præ-
parari oportet, si Laconismi, hoc est breuiloquentiæ lau-
dem auferre uoles. Ea autem pro argumenti oblato modo,
utq; sese dabit ocium uel scribenti, uel lecturo, ita ute-
mur: modo rei satis fiat. Neque interim ulla epistola non
breuis uidebitur, in qua præter argumēti dispendium ni-
hil adimere queas: quæ sic est scripta, ut iterum atq; ite-
rum relecta, tamen non satiet: cum tua interim, uel intra
duodecim uersiculos consistens, adeo breuis non sit, ut
Iliade quoq; uideatur proluxior. Quandoquidem in hac
tametsi longissima, nullus ex tot uersuum milibus redun-
dat, cum ex tuis illis undecim uersiculis, septem possint
ressecari: atq; ita sanè ressecari, ut reliqui quoq; ob sermo-
nis ineptiam, immixtæ prolixitatis nauseam faciant. Quæ-
re si quem in scribendis literis impendit delectat hic La-
conismus, per me quidem licebit, si rei ocijq; modo, non
chartarum spatij, ac uersiculorū numero breuitatem me-
tiatur. Nec ita scribat paucissima, ut ex ijs ipsis supersint
quædam, sed ut uelut è diuite rerum aceruo optima quæ-
que decerpta fuisse appareat. Meminisse tamen debemus,
nonnihil interesse inter uolumen & epistolam, propterea
quòd hæc ad temporis, rerum, personarumq; præsentem
ratio

Volumen &
epistola, quid
differant.

rationem, quantum licet, est accommodanda. Volumen quoniam omnibus scribitur, ita temperandum est, ut optimis atq; doctissimis placeat.

De illaborata epistola.

Sunt qui non ferant epistolam nisi inelaboratam: et hac de causa figuratam esse nolint, ne si quid in ea phaleratum fuciue appareat, lucernam olêre dicatur. At ego citius feram epistolam, quæ lucernam oleat, quàm quæ temetum: quæ myrothecia, quàm quæ hircum. Quis porro tam iniquus censor, qui non eas ueterum epistolas optimas iudicet, quæ sint omni cura, arteq; elaborate? Quid unquam exquisitius, accuratiusq; scripsit Cicero, quàm illam prolixam ad Lentulum: rursus illam, qua Curi-
oni commendat Milonem, et plerasque ad M. Varro-
nem: præcipue uerò eam, qua Luceio persuadere cona-
tur, ut res ab se gestas, literis mandet: quam ipse uelut accuratè, feliciterq; scriptam, Atticum uti legat hortatur? An lector his anteponat eas, quas scripsit ad Terentiam, Ciceronem, Tironem, aut Acilium? An Plinius dum Aria-
no suo scribit, quid sit actum in causa Marij Prisci: dum Gallo Laurentianum suum describit: dum Minitiano nar-
rat, quid rerum gesserit in prouincia Betica: dum Apola-
linari Tuscos agros suos depingit, num decem uersibus absoluit epistolam? Atque is testatur eas potissimùm à se collectas, quas scripsisset accuratius, nimirum ut posteri-
tate digniores. Sed interim habenda ratio, cui scribas. Sunt qui neglectam et illaboratam epistolam sui contem-
ptum interpretantur. Sed ut dicam in genere, quemad-
modum incidere potest, ut pro persona cui scribis, proq;

argumenti ratione, nullum ornamentorum aut dignitatis genus non deceat epistolam: ita ferè congruit simplicitas quedam orationis, sed elegans. Non effragito phaleras, sed idem non fero pannos. Non desidero calamistros, modo adsit mundicies. Pigmenta negas, at sordes ut absint facito. Non requiro curam anxiam ac morosam, sed rursum nolo scopas dissolutas. Postremo, si libet, scribito ex tempore: scribito quicquid in buccam uenerit, sed ita ut ad Atticum fecit Cicero.

De grauitate epistolæ.

NAm istos, qui nusquam uolunt assurgere epistolæ phrasim, sed quotidiano sermoni proximam esse oportere contendunt, uel una Ciceronis epistola facile reuicerit: uimirum ea quam scripsit ad Octauium Augustum: quæ adeò non repit humi, ut non solum attollatur ad orationum procellas, uerum etiam in tragædiam exeat. Et arbitror atrocissimam eius epistolæ partem esse resectam ab ijs, qui hoc uel Octauij, uel Ciceronis interesse putabāt. Quid enim illa, Quid illis interrogantibus, quid agat nunc Respub. respondebit aliquis nostrū, qui proximus in illam æternam domum decesserit? à quo accipient de posteris suis nuncium ueteres illi Aphricani, Maximi, Pauli, Scipiones, quid de patria sua audierint, quam spolijs, triumphisq; decorarunt, et cætera quæ consequuntur. Num remissiora tibi uidentur illa Albanorum tumulorum obtestatione, qua nihil in oratione uehementius inueniri posse putat Fabius? Efferuescet igitur uel in tragicam usque uociferationem epistola, si quando res ita postulabit, sumetq; ampullas, et scsquipedalia uerba. Neque

que de bello, paceq; simili stylo loquetur cruditis magnatibus, quo de macerandis salsamentis, aut coquendis holentibus mandaret famulo. Ceterum in mediocribus argumentis, si non incidet quod aliud suadeat, non displicebit Atticismus in epistola: nec hic requiram fulmina aut tonitrua Periclis, si modo sermo uelut è fonticulo limpidis aquis, grato leniq; murmure perstreptentibus fluat, non uelut mortuus, stagni in morem torpeat, omnium expertum affectuum.

De perspicuitate epistolæ.

Ecce autem maxima pars eorum qui hoc iuris uel etatis, uel fortunæ prærogatiua sibi uindicant, ut de literis quas non didicerunt, censuram agant, magnis etiam conuitijs à nobis efflagitant perspicuitatem. Graue flagitiū esse clamitant, si uerbum ullum misceatur epistole, quod legentem uel tantisper remoretur. Memini quum ipse puer annos natus quatuordecim scripsissem tutori cuidam meo, quem magis etiam puer habueram institutorem: & ex lectione librorū, quæ tum suppetebant, admississem nonnihil: rescripsit homo, non minus superciliosus, quàm indoctus, ut si posthac esset animus tales epistolas mittere, eadem opera commentarium adiungerem: sibi semper hunc fuisse morem, clare, & punctuatim scribere. nam his flosculis sibi placebat. Non hæc dico, quòd negem in quauis oratione præcipuam esse laudem perspicuitatis. Quid enim est oratio, quæ non intelligitur? Sed quemadmodum pro re non solum probanda, uerum etiam necessaria est perspicuitas, facilitasq; sermonis: ueluti, quoties serium quippiam petitur ab homine semidocto,
moroso

moroso'ue, aut etiā uehementer occupato: ita incidit non-
 nunquam, ut non aliud genus excusatiſ admiſſat obſcu-
 ritatem: uelut cum eruditus cum erūdito uelitur literatiſ
 iocis, quos nolit à quouis intelligi. Quemadmodum nos
 olim luſimus cum eruditifſimo uiro Thoma Linacro: cui
 ſcripſimus epiſtolam metro trochaico tetrametro, ſed ita
 temperata compoſitione, ut aliud agenti nō ſuboleret eſſe
 carmen. Admonueram in epiſtolæ frontifpicio, ut ſibi ca-
 ueret: nam mihi in animo eſſe ipſum hac epiſtola fallere:
 & in calce, adieci iam me ſefelliſſe, ni falleret ipſe. Non
 ſenſit homo fraudem, niſi monitus à me. Mihi nō diſplicet
 illud Octauij Cæſaris, nō aliter in ſermone fugiendum uer-
 bum inſolens, quā in curſu ſcopulum. Et meritō riden-
 tur hoc noſtro ſeculo quidam Apuleiani, & obſoletæ an-
 tiquitatis affectatores. Arridet uſitatis uerbis cōtexta ora-
tio, ſed ab iſtis lubens quaſierim, quæ tandem appellent
uſitata. Num è compitis, ac triuijs ſumpta? Recte ſanè ſi
 Gallice, aut Germanice ſcribendum erit. Verum ſi Græ-
 cè aut Latine, quid minus conuenit, quā eius ſermonis
 mundiciem ab his autoribus petere, apud quos præter
 meras ſordes nihil eſt? Olim hoc iuris erat conſuetudini
 publicæ, ut quaſdam uoces antiquaret, alijs gratiam no-
 uitatis adderet. Quāquā ne tum quidem omnia place-
 bant doctis, quæ uulgo in conciliabulis, theatris, aut ca-
 ſtris iactarentur: & erant in libris eruditorum, ad quæ
 reſiſteret plebeius lector. Nunc uerò Latine loquēdi con-
 ſuetudo, non à foris aut cōciliabulis idiotarum, ſed à pro-
 batis autoribus petitur. Itaque nullum uerbum inuſita-
 tum uideri debet, quod extet in elegantis mundiſ ſcri-
 ptoris

ptoris literis. Quid Ciceronis oratione candidius, quid apertius? At hic nonnullis uidetur Cimmerijs tenebris obuolutus. Quid Terentiano sermone luculentius? At hunc ne commentarijs quidem adiuti, complures intelligunt. In sordidis autoribus uersatus, si quando inciderit in Quintilianum, clamat omnia sibi uideri Græca, aut Arabica. Danda est opera, ut simus aperti, sed eruditis. Neque quæquam commoueat obscuritatis crimen, quod sit illi cum Cicerone, aut Tito Liuiο commune. Clammas tenebricosam esse Flacci dictionem, sed eruditis uel in primis admirabilis est erudita perspicuitas. Proinde colligis, opinor, in te tenebras esse, non in autore. Tu in quemcunque scriptorem incideris, modo laudatum, noctem istam tecum circumsers. Vociferaris spinosum esse librum, sed tui pedes spinas habent, non locus: caligas in sole, & lux ipsa tuis oculis noctuinus pro caligine est. Mutandus est, inquis, stylus: qui quoquo modo accidat, tamen non intelligitur. At quanto iustius est, & tibi etiā utilius, tuum mutare uitium, quàm eruditos omnes suam orationem tuo uitio accommodare? Barbare loquendi mille sunt species, ac subinde exoriuntur nouæ. Itaque simplicius est ac facilius, ut unam emendate loquendi rationem discant omnes, quàm ut omnes barbare dicendi formas singuli. An æquum censes, ut docti Romanam linguam, cui tot egregiæ disciplinæ, cui Christiana religio concredita est, sinant intermori, ne quid offendant istorum indoctam arrogantiam? Num par esse iudicas committere ut intercant, non dicam Cicero, Quintilianus, & huius generis ceteri, sed Cyprianus, Hieronymus, Augustinus, ut pro his legatur Catholicon, Holcot, Briçot, &

Gorra? An luscinia cōmutabit cum cuculo modulos suos, propterea quòd asello iudici planius & intelligibilius canit cuculus? At iniquius sit, si docti cogantur rectum sermonem dediscere, ut cum istis sordè balbutiant: præsertim cum eis in manu sit, imò cum eis tot nominibus expediat ea discere, quæ suo magno malo fastidiunt. Ego uerò qui semper discendi sum cupidus, nec his succensere soleo, qui priscas uoces, & à Ciceronis etiam consuetudine semotas eruūt. Fortassis & his usus erat Cicero, si extaret quicquid scripsit. Non indignor obiectum esse, quod non intelligam, sed oblatū gaudeo, quod discam. Tu contrà maius alienam eruditionem reprehendere, quàm tuam ipsius inscitiam uel agnoscere modestè, uel mutare prudenter. Maudis scetem in crimen uocare, quàm lippientes oculos tonsori Licino committere. Ac uide interim, quàm studiose in nos iniquus sis: tu qui tuis in literis sordidissimi sermonis portenta inculcas, quum uere tenebricosus sis, sanis etiam oculis: dilucidus tamen uideri postulas, & alios obscuritatis accusas. Paria certe facere debueras: & si oculis tuis irasci non potes, saltē nostras falsas dissimulare tenebras, quum tuas, quæ teterrimæ uerissimæq; sunt, cupias & laudari. Non dignatur tua prudentia Latinam linguam discere, quò possis D. Hieronymum (nam unum hunc plurimorum uice nomino) intelligere, & nos uis fecem istam sermonis in tua culina nati, perdiscere, ut te tuosq; sodales delirantes, ac miserè balbutientes intelligamus? Nō uero hæc, optime lector, in hoc tot uerbis disserimus, quòd cruditam sermonis simplicitatem contemnamus; quæ mea sententia, sæpenumero plus habet artis, quàm

quàm operosa structura: Sed ut ueram perspicuitatem, à ueris tenebris separemus. Seruiendum est auribus, sed eruditis: in his duntaxat, quæ cupimus ab eruditis legi. Quod huic obscurum est, illi dilucidum est. Sed hic lusciosus, ille puris oculis. Est tamen aliquid suapte natura dilucidum, ad cuius sensum repurgandi sunt oculi. Cæterum, ut ad institutum sese referat oratio, quanquam obscuritas quoties officit, ubique uitanda est uel dicenti, uel scribenti: tamen haud scio, an ullo in genere plus inueniat uenia, quàm in epistolis (modo non indocta) in quibus uel Ciceronis exemplo, licet subinde Græca miscere Latinis, obscuris allusionibus uti, amphibologijs, significationibus, paræmijs, ænigmatibus, clausulis de repente præcis. Tantum habenda ratio, qua de re, cui scribas. Non damnetur libertas, si non destituat nos consilium, cui deest cet artem ubiq; cedere.

Decompositione.

Porro qui compositionem in hoc genere damnant, equidem non adeò demiror, quum uideam fuisse per multos, qui eam ne in orationibus quidem æquo animo tulerint. Quanquam mihi nunc cum ijs potissimum res est, qui quid sit in oratione compositio, prorsus ignorant. Cæterum quàm eiusdem sit artificis, orationis numerum uel adhibere in tempore, uel negligere: et hanc partem scriptoris arbitrio relinquo: nisi quòd uelim adolescentem, qui tantum exercendi styli gratia scribit, aliquandiu compositionem etiam elaborare: ita fiet, ut si res postulet orationem numerosam, aptè moduletur: sin neglectam, tamen uitet illud Ciceronis conuicium, scope dissolutæ.

De habitu epistolæ.

Magna olim inter eruditos sententiarum uarietas fuit, quod dicendi genus maximè probaretur, Atticum, Rhodiense, an Asiaticum. At Fabius existimat cum optimum dicendi genus sequi, qui pro re, pro loco, pro tempore, pro qualitate auditorum quàm appositissimè dicat: ut inepte faciât, qui dictionem ad certas leges astringunt. Itidè & ego eam epistolam optimam iudico, quæ à uulgato hoc & indocto literarum genere quàm longissimè recedat: quæ sententijs exquisitissimis, uerbis electissimis, sed aptis constet: quæ argumento, loco, tempori, personæ quàm maximè sit accommodata: quæ amplissimis de rebus agens, sit grauißima: de mediocribus, concinna: de humilibus, elegans, & faceta: in iocis, acumine delectet, ac lepore: in encomijs, apparatu: in exhortando uehemens sit, & animosa: in cõsolando, blanda sit, & amica: in suadendo, grauis sit, & sententiosa: in narrando, lucida, & graphica: in petendo, uerecunda: in cõmendando, officiosa: in rebus sequundis, gratulabunda: in afflictis, seria. Denique (ne quæ sunt infinita, persequar) sit uersipellis, ac polyplus quemadmodum semet ad omnem subiecti solum habitum, ita sese ad quemuis argumenti, reliquarumq; circumstantiarum habitum, attemperet. Neq; enim rei solum obsequiabit epistolæ stylus, uerum ut dignum est egregio quopiam Mercurio (nam nuncij uice fungitur epistola) temporum personarumq; rationem habebit: nec eadem de re quouis tempore, nec apud quosuis loquetur: alia specie sese offeret senibus, alia iuuenibus, alia tetricis ac seueris: alia ijs, qui festiuore sunt ingenio: alia aulicis: alia philosophis: alia

alia familiaribus, alia ignotis: alia uacuis, alia negotio-
sis: alia fidei sodalibus, alia fictis amicis, ac parū bene uo-
lētibus. Sed interim & illud spectabit, unde ueniat, nō so-
lūm ad quem ueniat, aut quibus de rebus legata. Proin-
de Mercurium quendam aget, semet pro re præsenti in
omnem transfigurans habitum: sed ita tamen, ut in tanta
uarietate, unum quendam tenorem obtineat: uidelicet ut
semper munda sit, semper crudita, semper sana. Ab his si
non fuerit recessum, nullum est præterea delictum in epi-
stola cui non sit parata uenia. Erit loquacior, scripta di-
cetur tum auido, tum otioso. Elaboratior erit, & lucernā
olens, scripta est crudito. Habebit artificium, talem dece-
bat mittere artifici. Carebit artificio, scripta putabitur ei,
cui placebat simplicitas, aut imperitiori. Raconismum ha-
bebit, occupatus scripsisti occupato. Fucator erit, ac pi-
cturatur, scripta dicetur curioso: priscis uerbis, antiqua-
rio: blandior, amico: licentior, famuliari: asperior, impro-
bo: adulantior, ambizioso putabitur. Deniq; quicquid ali-
bi non uacasset crimine, hic uel à re, uel à persona scribē-
tis, uel à moribus, fortunaq; uel ætate eius, cui scribitur,
defensionem inueniet. Quin & aliās dānanda phraseos,
& argumentorum uarietas, & inæqualitas, hic uel præ-
cipuam habet gratiam. In Noctibus ac Miscellaneis ar-
gumēto subinde nouo datur uenia, stylo subinde diuerso
non datur: in epistolis iuuat etiam uidere, quantum ora-
tio iuuenilis differat à senili, quid uel ætas stylo uel adie-
cerit, uel detraxerit. Quare qui unam quampiam formam
ac faciē huic generi tribuere conantur, hi non solūm
inanem, uerum etiam ridiculam operam sumunt.

Peculiaris epistolæ character.

Fortassis erunt, qui quasdam epistolas semoueunt ab hoc ordine: quod genus sunt epistolæ ad exercitacionem, uel ostentationem ingenij confictæ: ueluti Phalaridis, quas cruditi tribuunt Luciano: & amatoria Philostrati sanè quàm elegantes, si perinde essent castæ: ad hæc heroicarum, autore Nasone, aliæq; consimiles: quas si quis malit appellare declamatiunculas, equidẽ non admodum refragabor. Sunt in quas magis libri nomẽ uidetur competere: quales sunt aliquot Platonis, Senecæ omnes: pleraque Hieronymi, Cypriani, & Augustini: Tertulliani pauca. Sunt quas aliquis malit orationes appellare, nimium quæ ad principes aut magistratus, arduis ac perplexis de rebus prolixè scribuntur. Tunc enim epistola, non confabulonis, aut nuncij, sed oratoris uice fungitur. Quod si quis non dignatur epistolæ uocabulo, nisi quæ priuatis de rebus inter amicos obambulet: quanquàm ne hic quidem certa forma præscribi potest: tamen si qua peculiaris est huic generi, uideor mihi non maiore compendio quæ sit indicare posse, quàm si dixerò talem oportere esse distinctionem epistolæ, quales sunt amicorum inter ipsos confabulationes. Est enim (quod scitè scriptum est à Turpilio comico) epistola absentium amicorum quasi mutuus sermo, quem neq; agrestem, aut asperum, neque fucatum esse oportet, neq; una de re, neq; ad fastidium usq; multum. Eoq; simplicitatem, candorem, festiuitatem, argutiam amat hoc epistolarum genus. In his igitur omnia leporem genera confectabimur, nisi quum res, aut personæ diuersa postulabunt. Neque diu sermonem eundem urgebimus

gebimus: & quod solemus cum amicis confabulantes, mi-
 scebimus, si uidebitur, non solum multa, uerum etiam ua-
 ria. Huic generi magis congruet Atticismus, ac stylus hu-
 milior, comœdiæ propior quàm tragœdiæ, aut siquid
 etiam humilior phrasi comica, modo docta sit humilitas:
 meminere uisq; non inferioris esse facultatis, cum laude
humiliter serpere, quàm cum Dadalo uolare per aëra: & ui-
 cinum littus legere contractis uclis, quàm sublatis an-
 tennis, medio ferri pelago. Amica est huic generi breui-
 tas, maxime si uel de multis, uel de minutulis negocijs
 agetur: & si aut ipsi qui scribimus, aut ij quibus scribitur,
 occupationes erunt. Cæterum quibus rationibus præstan-
 da sit breuitas, indicauimus in opere de copia. Quòd ad
 hoc institutum attinet, breuiloquentiam præstabimus; si
 quando, ita ut sit in comœdijs, statim mediam in rem ag-
 grediemur: si præfationes superuacaneas uitabimus: si
 uerbis quàm significantissimis utemur, si rerum exitus ita
 proponemus, ut ex his conijciantur ea, quæ præcesserunt:
 si epistolæ, cui respondemus, argumentum recensere su-
 perfedebimus, quæ res nonnunquam bonam epistolæ
 partem occupat: sed hoc è nostris diuinandum relinque-
 mus. Quod genus sunt illa: Quid narras? Antonius epi-
 scopus? Quem lupo, quod aiunt. Hæc tempestas magis de-
 siderabat Aurelium. Ille quid aliud, quàm nullus, ma-
 gnus, malus, piscis. Tu uerbo, sed absolutius totum homi-
 nem depinxisti. Occideras de ualetudine fratris: sed opti-
 mo medico quantum debeam, breui re ipsa declarabo.
 Fœcunditas uxoris mihi iucundior esset, si res unà cum
 prole cresceret. Cum Laurentio homine furiose maledi-

co, satius arbitror nullo pacto contendere. Quid enim aliud quàm irritabis crabronem, aut si quid crabrone pestilentius? Ex his enim uerbo notatis perpendet lector, quid ille scripserit, cui rescribitur. Sunt qui alienam epistolam penè totam recensent, ac propemodum uerbosius, quàm is qui scripsit. Si res postulet, ut repetatur argumentum, id dextra quadam, ac commoda breuitate fieri conueniet. Qua quidem in re Politianus mirus est artifex, quì hoc in plerisque epistolis facere consuevit, nimium lectori consulens, ne quid desideraret, si fortè non extarent epistolæ, quibus respondet: aut si tales essent, ut non liberet legere.


Elegantia.

Iam admonere, ut sermonis uitij careat epistola, tametsi hoc in arte sua præcipiunt rhetores, tamè mihi uix opere præcium uidetur. Nec enim tam ad rem attinet admonere, ne fiat, quàm dedocere nostrâ etatē quæ passim id facit. Nihil breuius præcipitur, quàm ut sit elegans epistola: at nihil maiore negotio discitur: nec usquam peccatur aut turpius, aut frequentius. Hoc uitium intolerabile reddit infelix affectatio. Quid enim tam portentosum, quam oratio, quæ quum munda non sit, tamen ornata uideri uelit: & quum sana non sit, tamè formosa uideri gestiat, purpuris ulceribus illinens: ueluti is qui nostra etate maluit dicere, sagio quid portendās, quàm, sentio quid tibi uelis. Multa lectione, multis præscriptionibus, accurata scriptorū obseruatione, multo scribēdi, dicēdiq; usu paratur sermonis mūdiciēs. Erit hic igitur primus ac præcipuus labor, si suppetet orationis puritas, atq; etiam ingenij

ingenij sanitas. Artem in epistola non admodum efflagi-
tabimus: sin decriit, risum etiam mouebit artis affectatio.

Exercitatio, & Imitatio.

NE illud quidem hominum genus errare sinemus,
 quos ipse non parum multos deprehendi, qui tri-
 bus præceptiunculis, ceu magicis uerbis, recte scribēdi scien-
 tiam dari posse credāt: quorum stultitiæ utinam olim
 non obtemperassent. Talis enim erat is, in cuius gratiam
 ante annos uiginti quinque opus hoc deliniarum, non tam
 ex animo, quam mea facilitate cupiens obsequundare fla-
 gitanti: quē mox expertus sum, et ingratum discipulum,
et perfidum amicum. Is in principum aulis meliorem ac
 maiorem ætatis partem contriuerat, nisi quod sacerdotijs
 optimis onustus, iam serō sapere cœpit, et de literis cogi-
 tare, quæ marsupii non consequuntur. Sed huius generis
 non parum multos comperi, qui simul atque à prophanis
 negocijs, et à sordidissimis coaceruandæ pecuniæ curis,
 ad literas sese appulerint, huiusmodi quasdam compen-
 diarias recte scribendi leges à nobis flagitare solent: quas
 et ita breues esse uolunt, ut tertiam paginam non totum
 impleant: et ita efficaces, ut intra mensem non totum è
 muta pecude reddant oratorem eloquentem. Aiunt sibi
 opus esse omni compendio, propterea quod et sunt igna-
 uissimi, ut quàm minimum operæ sumant in rebus hone-
 stis, et ætatis bonam partem iam alijs in nugis perdidere-
 runt: postremo quod ad sordida illa negotia redire festi-
 nant: literas igitur uelut obiter secum rapere studēt. Hos
 si ridere libeat, iubebo semel ex Musarū fonticulo bibe-
 re, atque in Parnasso somniare, quò repente nobis pro-



deant ex asinis lusciniæ. Cæterum de quibus aliqua bona spes effulgebit, hos admonendos censeo, ne errent. Neque enim committam, ut hæ præceptiones, quas studiosorum adolescentium industriæ promouendæ paramus, aliorum stultitiam augeant. Augerent autem, si quis tantum his tribueret, ut citra uariam eruditionem, citra studium uigilantissimum, citra multum usum ex his sibi facultatem recte scribendi polliceretur. Cæterum delicatos istos, & indociles senes quibus pluris sunt pecuniæ, quàm literæ: quibus uacauit tot annis arcas onerare nummis, nec uacauit animum onerare honestis disciplinis, in Parnassum, ut dixi, mittamus: ut post quàm illic unam noctem cum Ennio somniarint, magno omnium stupore, subito pro Midis redeant Cicrones. Aut certe legemus illos ad talem præceptorem, qualem rhetorices doctorem depinxit Lucianus. Porro iuuenes industrios, ac meliore mente præditos, ad uigilias, & exercitationis assiduitatem hortabimur: quam quum in omni re, tum in hac potissimum tenere primas, & à grauioribus autoribus dictum est, quàm ut sit dubitandum: & sæpius repetitum est, quàm ut hic sit admonendum. Neq; tamen inficiabor, bonam laboris partem, doctoris comoditate posse detrahi: quem ut assiduum & indefatigatum, ita quàm doctissimum esse uolo: ne quod præcipit, ipse præstare non queat: & iuxta prouerbum, Sus suem docere incipiat. Quod si ob nostrorum temporum infelicitatem, non temere talis contingit, ut exquisita doctrina præpolleat, ferendus tamen erit, modo ne sit ex horum numero, qui falsa persuasione doctrinæ turgidi, magna (ut inquit Fabius) confidentia, stultitiam suam

perdo

perdocent: illiteratiores, quàm ut alios docere possint: clatiores, quàm ut ab alijs doceri se patiantur. Cuiusmodi pestes procul ex urbibus deportandas curarent ubique magistratus, si quidem aut partes agnoscerent suas, aut ulla omnino Reipub. cura tangerentur. Ampliſſimis salarijs aluntur tot tibicines ac tubicines: at nemo potius erat ampliſſimo salario accersendus, quàm eruditus ludimagister. Verum hoc salarium nolim esse certum ac perpetuum, ne magnitudo mercedis improbos inuitet, & indoctos, quibus semper minus est frontis, & plus audaciæ, quàm eruditis. Conueniet salarium arbitrio doctorum, & spectata fidei uirorum, pro meroito eius, qui asciſcitur, præstitui, atq; etiam augeri, minui uè, si is sua doctrina, suaq; industria uinceret expectationem de se, aut contrà. Alioqui periculum erit, ne usu ueniat, quod in ampliſſimis sacerdotijs uidemus accidere: quæ quò sunt magis opima, hòc ab indignioribus occupantur. Extant apud nos, si Musis placet, etiam uolumina non exigua de conscribendis epistolis, ad unamquamq; formam additis aliquot exemplis: sed ò Deum immortalem, cuiusmodi. Sed hæc prodigiosa barbaries illi seculo imputanda est, quo prorsus extinctis omnibus bonis literis, impune regnabat inscitia, publice simul ac priuatim, quum grauis & copiosus autor esset Mammetrectus, opulentu quoddam Copiæ cornu Catholicon. Iam apud Italos coeperant reuiuiscere bonæ literæ, quum Louanij magno cum applausu legerentur epistolæ Caroli cuiusdam, qui multis annis moderatus est pædagogium Liliense, quas nunc nemo dignetur sumere in manus. Apud Hollandos, or=

bis lumen habebatur Engelbertus quidam, qui suis epistolis nihil aliud docebat pueros, quàm inepte scribere. At nisi me fallit animi præsagium, breui ueniet ætas, quæ nec his monitis erit opus, nec meis præceptionibus iuuentus egebit. Sed interim ut mediocriter literatos didascalos industria nostra nonnihil adiuuemus, postea quàm suis tradiderit compendio artis rhetoricæ præcepta, studebit illos breuibus, & epistolaribus argumētis frequenter exercere. In his delectum habebit & curam, ut ea potissimum proponat, quæ ætati illi amœnitate uelut illecebæ blandiantur. In his enim pueri ut libentius, ita & utilius exercebuntur. Id fiet, si uel noua sint, uel faceta, uel alioqui puerorum ingenuis affinia. Ea uel è poëtarum fabulis, uel ab historicis erunt petenda, nisi quid nouæ rei, ut ferè fit, suggesserit uita mortalium. Frequenter enim & nostris temporibus eueniunt indigna quæ nesciat posteritas. Et primi quidem generis sunt amatorię Nasonis, in quibus fortasse tutum non sit, rudem ætatem exerceri. Quamquam heroinarum sunt castiores, neque quicquam uetat & hoc genus caste uerecundeq; tractari. Veluti si procius blandis literis ambiat nuptias puellæ. Si Helena Paridem ab amore non permissio deterreat. Nam Penelope ad Ulysssem epistola tota pudica est: quemadmodum & Acontij ad Cydippen. Si uxor marito peregre cessanti scribat, uti domum properet. Si Nestor uir natu grandis & facundus, hortetur Achillem epistola, ut Briseida ereptam ab Agamemnone, magno animo ferat: ostendens regi etiam improbo parendum esse, tum publicum commodum priuato dolori anteponendum: postremo uehementer

menter indignum esse, Achillem uel genere clarissimo, uel animo generoso, uel factis egregijs, ob barbaræ ancillæ amorem uirtutis obliuisci. Vbi simul etiam amœnus sese locus aperit, aduersus uoluptatem inhonestam, rursum alter pro immortalitate gestis eximijs apud posteros paranda. Si Phœnix eidem scribat, ut cum Agamemnone redeat in gratiam, et periclitantibus Græcis subueniat. Aut si Antenor Priamo suadeat, ne grauetur raptam Helenam suo Menelao reddere, uel quia per se iustum sit, uel quia stultissimi regis sit, committere, ut ob turpissimum effœminati iuuenis, et uix uiri Paridis amorem, tot fortissimi uiri dimicationem suscipiant: tot populorum fortuna, simul et uita, in extremum discrimen pertrahatur. Aut si Agamemnon suadeat Menelao fratri, ut negligat potius Helenam, quàm ut ob mulierculam uita indignam, tot procerum milia in uitæ periculum adducat, et eam totius orbis tumultu repetat: quæ etiam si ultro rediret, non esset recipienda. Aut si Linus Herculem duabus conspectis deabus, utram potius sequatur hesitantem, ad uoluptatis contemptum, et uirtutem amplectendam extimulet. Aut si Menelaus Paridi uiolatū hospitium exprobrat. Si Amphion fratrem ad musices studium adhortetur, contra ille ad suum inuitet. In hoc genere plerique Græci non infeliciter luserunt, sed nemo felicius Luciano. Ex his tamen deligenda censeo, quæ non omnino sint ociosa, sed habeant aliquid ad uitam communem conducibile. Otiosa sunt illa Luciani, de Ioue cerebro prægnanti, et implorante secusrim Vulcani. De Neptuno per Mercurium non admissio, cum recens Iupiter peperisset è cerebro Palladem. Nam

huius generis quæ sunt, ut sunt amœna, & ingenij felicitatem arguunt, ita non multum faciunt ad uitam communem. Huc propius conducunt, quæ è comicorum argumentis ducuntur. Quod genus fuerit: si Phædræ sodalis illi scribat, ut Thaidis amorem penitus excutiat ex animo, ac pristinae suæ seueritatis memor, ineptire desinat: præsertim cum magno famæ, reiç; dispendio sit alenda, quæ nec amet ex animo, nec uni sui copiam faciat. Si quis diuiti illi Plautino suadeat, ut Euclionem pauperem probum, potius quàm diuitē illum procum asciscat generum: aut contrà, diuiti potius colloceat filiam, quàm pauperi. Si Demea fratrem ad suum uitæ institutum uocet, hoc est, ab urbana uita, ad rusticanam: à cœlibatu, ad matrimonium: ab indulgenti liberorum educatione, ad seueriorem. Si è diuerso Mitio Demeam, ad suum uitæ genus adhortetur. Et hæc quidem pueris gratiora. At illa quæ ab historiographis sumuntur, propius etiam ad uerum accedūt, eoç; plus frugis adferunt, nec ita multo minus iucunditatis. Veluti si Horatius iam capitis damnatus patris opem imploret, suamç; fortunam tam repente mutatam deploret. Si Cicero Milonem, ut forti animo ferat exilium, hortetur. Si quis Catonem à literis Græcis, quas iam senex appetebat, deterreat. Si quis Ciceroni secū deliberanti, an mortem sibi consciscat: an fuga saluti consulere properet: an exustis Philippicis, uitam ab Antonio redimat: quodlibet horum trium, uel suadere, uel dissuadere conetur. Si quis Qu. Curtio gratuletur, tam fortem ac pium animum, qui priuatam salutem posthabuerit suæ ciuitatis incolumitati. Si quis Delphicis sacerdotibus suadeat, ut Phalaridis

ridis taurum recipiant. Si quis Lucretiam ui constupratam, à uoluntaria morte reuocet. Si Ionathas Saulis filius, Dauid amicum regis metu latitantem, uagantemq; consoletur, ut promissi diuinitus imperij expectatione mentem in rebus tam afflictis fulciat. Si Plato Dionysium regem ad philosophiæ studium adhortetur. Rursus si alius quispian dehortetur. Si Respub. Romana Camilli exulis uirtutem, aduersus Gallos extrema molientes, imploret. Si Aristoteles Calistheni ad Alexandrum Magnum proficiscenti rationem præscribat, qua debeat regis consuetudine uti, docens cum regibus aut quàm rarissime loquendum, aut quàm iucundissime: quò uel silentio tutior sit, uel sermone grator. Si Calisthenes Aristoteli respondeat, consilium futurum fuisse philosopho dignius, si potius autor fuisset non proficiscendi in eiusmodi principis aulam, in qua philosopho uel seruiliter esset tacendum, uel turpiter adulandum: sibi magis curæ fore, quæ sint honesta, quàm quæ utilia aut tuta. Si Alcibiades Socrati suadeat, ut uxorem rixosam ac procacem domo eximat. Aut si Callicratides, ut omisso philosophiæ perenni studio, ad mores cõmunes, & Reip. administrationem sese conferat. Si Crito eidem suadeat, ut elapsus è carcere, uitæ suæ consulat. Huiusmodi copiosissimam uim Valerius Maximus, alijq; scriptores, qui res memorabiles, ex historicorum libris decerpserunt, citra uestigandi tedium suggerent. Quin ex una quapiã historia, uelut è uita Catonis, aut Antonij, aut Iulij Cæsaris, plurima themata duci possunt. Quare nos rem & infinitam, & cuius promptam non prosequemur plurimis uerbis. In hoc genere uariè, diligenterq;

conue

conuenit exerceri iuuentutē: quòd præter styli fructum, uetustas ac inemorabiles historias, hac ratione uelut aliud agentes imbibent, ac penitus insigent memoriæ: hominum & locorū nominibus assuescēt: ad hæc decori uim & probitatis naturam, præcipuas orationis uirtutes ita potissimum cognoscent. Quare doctoris erunt partes, prius quàm epistolæ formam proponat, rem gestam, unde necesse erit repetitam, & quemadmodum conueniet, accuratissime pueris exponere, indicatis & temporum momentis, & personarum proprietatibus, reliquisq; circumstantijs: ne aut aberrent à decoro scribentes, aut parum consentanea dicant. Denique ut sint parati fontes, unde ducant uel argumenta, uel argumentorum confirmationes: quam ad rem non uulgariter adiuuat circumstantiarum cognitio. Tum locos aliquot indicabit, ubi ea tractentur apud autores, ut ipsi uerborum ac sententiarum uim inde uel colligant, uel imitentur, ex alijs similia coniectantes. Iam qualia argumenta suppeditant historiæ, talia licebit & consingere, cuiusmodi pleraque sunt declamatoria, ueluti Luciani de medico abdicato: & Auli Gellij de puerpera, cui suadet Fauorinus, ut proprio lacte nutriat infantulum, de quo genere mox nonnihil attingemus. Sed est & illud breuius, ac puerorum ingenijs appositius exercitationis genus, uarios locos communes, aut excogitados, aut ab autoribus traditos, arte tractare. Hi frè sumuntur uel ab apophthegmatis ueterum celebratis, uel à Prouerbijs, uel ab apologis, uel à similibus, ac metaphoris. Siquidem ex horum unoquolibet potest argumentum epistolæ compingi. De apophthegmate

gmate sit hoc exemplū: Socrates bibiturus cicutam, uxori Xanthippæ uociferanti, quòd innocens esset moriturus: Quid ais, inquit, mulier, num me malle nocentem mori? Id ualebit in epistola consolatoria. Si unusquispiam esses de turba uulgi, merito grauiter ferres exilium, quod longe aliter pro merito contigit: sed quoniam scio te uirum cordatum, ac philosophiæ quoq; præceptis non uulgariter institutum, hoc ipso leniter ferre debes fortunā tuam, quòd indigno obtigit. Ea demum grauis & acerba est calamitas, quæ accidit commérito. Nunc ista fortunæ procella, quid aliud, quàm integritatem tuam, ac in Rem-
pub. merita illustrat? Sub hæc narrabitur apte, quod modo retuli de Socrate. Prouerbij exemplum esto: Si me audies, desines cum tam multis coniuratis contendere. Nec tu Hercules es, nec res ista uirtute geritur. Et tamen si prouerbio credimus, ne Hercules quidem aduersus duos, & tu cum tot cancris, cum tot hydrys congregieris unus? Apologi exemplum erit: Si quem admonebimus, ne periculoso negotio se temere admisceat, nisi prius perpensa ratione, qua confici possit, quod instituit, adhibebit apologum de capro, quem siti periclitantem uulpes pertraxit in puteum, unde postea non dabatur exitus. Item si quis admonebit amicum, ne pendeat ex officio quorundam, qui magnifice polliceantur, sed ipse coram suum agat negotium, eleganter accommodabit fabulam auiculæ castiæ, quam in Noctibus suis refert Aulus Gellius. Parabola uerò sit hoc exemplum: Si quem admonebimus, ne pertendat obstinate, quod per se quidem optimum esse iudicat, sed præsentibus rebus semet accommo-
det

not det, similitudinem adhibebimus de prudente nauclero, qui
non semper rō dirigit clauū, quō recto cursu cuperet ire,
sed frequēter obsequundat aestui, frequenter uētis: ac uelis
flexis, eū portū petit, non quō cursum instituerat, sed quē
præsens tēpestas cōcedit. Hæc mihi uidētur aliquanto plus
 cōducere ad parandā orationis facultatē, quam quadam,
 quæ in suis progymnasmatibus tradit Aphthonius. Ceterū
 quod de apologis diximus, idem habebit locū in poëtarum
 fabulis, ad seriam rem uel confictis, uel detortis. Veluti si
 quem à negotio maiore, quā ut ipsius uiribus cōueniat,
 deterrere pares, Icarī, aut Phaëtontis casum accōmodes.
 Si quem à studio congerendæ pecuniæ reuocare studeas,
 in tempore adhibetur Tantali fabula. In huiusmodi the=
 matis præludat ætas illa rudis, ut, quod diligenter admo=
 net Fabius, teneræ adhuc mentes, ueluti sub nutricibus
 mollius alantur, & uberiore quodā iucundioris discipli-
næ cibo lacteq; saginentur. Cæterum adultiore iam, ad
 materias uero proximas paulatim sunt adducendi. Eas
 præceptor uel aliunde sumptas proponet, uel ipse commi=
 niscetur, ex omni genere causarum uarias, maximeq; sæ=
 cundas. Alioqui fiet, ut pueri nihil aliud discant, quā
 inepte scribere: si, quēadmodū in plerisq; ludis fit, litera=
 tor indoctus pro themate proponet friuolū stulti capitis
 somniū, in quo neq; sit ulla sentētia, neq; quicquā cohæ=
 reat, ne sermonis quidē ulla gratia. Porro in castigando
 tantū notantur insignes solœcismi: ueluti si deprehendāt,
 admonco uobis, pro admoneo uos, quā alia quæ dissimu=
 lantur, magis etiam ad rem faciant. Nam ista uitia uel
 usu dediscuntur. Illa neglecta hærent in omnē usq; uitam.
 Quomodo

Quomodo proponenda materia.

AT doctor nec absolute pertractatam materiam proponet, ne nihil relinquatur inuentioni puerorum: neq; nudam tamen, uerum circumstantijs aliquot circumscriptam, ut assuescant, uelut ad certum scopum dirigere sagittas, & ex his sententias, argumenta, & argumentorum probationes, amplificationes, aliasq; figuras comminisci. Veluti si quis suadeat puerperæ, ut suo lacte alat quod peperit: addat, puerperam esse puellam, puerum elegantem, ac patri similitimum. Quanquàm uix aliud argumentum reperies, quod alienius sit à circumstantijs. D. Hieronymus in epistola, qua matri recôciliat filiam (nàm ipse propemodum fatetur, hoc argumentum ab se scholastico lusu confictum) non nudè proponit, filiam indecore diuulsam à matre: addit matrem uiduam, filiam uirginem, cui frater esset monachus: filiam adolescentulam, corpore uegeto, relictâ matre, contempto fratre, in monachi cuiusdâ nulla propinquitate coniuncti, formosuli & adolescentis, domesticum contubernium concessisse, cum hoc côiunctissime uiuere: nec aliud incusare, quàm maternorum morum difficultatem: cognatos suspectum conuictum grauitè ferre, fratrem in primis, nec tamen adduci puellam, ut cum matre redeat in gratiam: fratrem contemptum, ordine rem omnem Hieronymo denarrasse. qui sic proposuit, non ne eadem opera multam orationis supellectilem suppeditauit? Ad hanc imaginem multa licebit confingere. Quod genus sit: Lucius & Antonius utrique adolescentes, sed alter mediocri fortuna, alter beatissimis parentibus natus, à primis annis sese non secus ac fratres

fratres amarāt. In lusibus, in conuiujs, in compotationibus, in amoribus, alijsq; uoluptatibus, & uitijs, quibus ea frē laborat ætas, uterq; alterum & consciū habuit, & sodalem. Natu maior Lucius, re male profligata, & infāmiæ iam prouulgate, & amoris infelicis tædio, clām patriā profugit: Lutetiæ, forte fortuna, quendam amicum paternum nactus, ab eoq; excitatus, simul & adiutus, bonas literas non minus ardere cœpit, quàm antea scortorum amoribus æstuauerat. Hic Antonio sodali Brugis relicto scribens, & sibi de mutato feliciter animo gratulatur, & ueterem sodalem à perdita uita ad literarum studium pertrahere conatur. Sit hæc propositio totius argumēti, non sine circumstantijs. Mox ostendet argumenti genus, quod est suasorium. Deinde demonstratis partibus, quæ solent in hoc genus incidere communiter, quæq; traduntur ab artis rhetoricæ scriptoribus, quæ sint huic themati peculiæres, indicabit. Admonebit totius epistolæ caput in hoc esse, ut corruptæ illius uitæ turpitudinem, infamiā, pericula, incommoda diligenter enumeret, atrociter exagget, dilucide subiiciat oculis Lucius. Tum innoxie uitæ, & honestorum studiorum commoda, cum amplificatione recenseat: quantopere hominem deceant: quàm ad beate uiuendum conducant: quantum item ornamenti, quantum solatiij in utraq; fortuna præstent: quàm solæ nominis immortalitatem, ac nunquàm intermorigurum honestæ famæ decus largiantur. Deinde per collationē doceat has ueras & solas esse opes: in his uera esse uitæ oblectamenta: ex his ueros honores proficisci. Et hæc erunt futuræ epistolæ, ceu liniamenta quædā, ueluti carbone denotata. Addet deinde

deinde ad unanquamq; partem diuitem supellectilem , rationum, cōfirmationum, similitum, exemplorum, sententiarum. Ostendet qua parte possint cōmode succurrere loci communes, & quomodo tractari. Siquidē hic locus communis esse potest : Peregrinatione corrigi sæpenumero, quos patriæ delitiæ corrumpunt. Alter: Nihil homini felicius accidere posse , quàm fidum & amicum consilium. Deinde exordiēdi rationes aliquot aperiet: Iucundissimū conuiētus memoriā, cum uoluptate renouabit. Dicit suam charitatem ob intermissam uitæ consuetudinē neutiquam refrixisse erga ueterem sodalem, uerum id optare se uotis ardentissimis, ut ea charitas quæ puerilibus auspicijs, & ineptis uoluptatibus alita fuisset, quò uerior ac diuturnior esse possit, adamantinis uinculis astringatur. Id futurum, si quam in stultis uoluptatibus habuissent societatem, & coniunctionem animorum, eam in honestis studijs obtinerent. Et hic statim incidit locus communis, de uera falsaq; , de firma & infirma amicitia. Negabit se satis sibi etiam felicem uideri, quòd ab illa insania resipuerit, quòd honestissimis disciplinis, pro turpissimis delitijs fruatur, nisi & alteram sui partem, è similibus malis exēptam, suæ felicitatis participē uiderit. Nec id difficile futurū: si quidem ille sodalem his auribus audiat, de cōmuni salute disserentem, quibus sæpenumero audiuit de suis flagitijs pueriliter garriētē. Rem agi neq; leuem, neq; summis auri-
bus hauriendā, sed in intima pectoris penitus demittendā. Et huiusmodi quidem exordiēdi ratio poterit indicari. Quòd si quid erit causæ, cur malit obliquo ductu uti, finget se nihil dubitare, quin ille quoq; totus sit immutatus:

c atq;

atq; illi ueluti ad meliorem frugem immutato pro suo in illum amore gratuletur, prædicans ab eo fieri, quicquid ab eo fieri uellet. Tum suasionis ingressus quidam, ac ueluti transitus ostendetur. Negabit Lucius Antonium suum mirari oportere, si quæ nunc scribit, longissime à pristina uita dissideant: imò si frequenter in falsis bonis, uerisq; malis sodali gratulatus est errans erranti, nunc demum iustissimam esse gratulandi causam, qui stultissimas, ac pestiferas uoluptates, cum felicissimo studiorum amore permutarit. Deinde tanquam diuisione proponet, se duo quædam in ea epistola conari: alterum, ut prorsus illi persuadeat, quanta sit ipsi gratulandi causa, id est, quantum effugerit malorum, & quid felicitatis sit assequutus. Alterum utriusque interesse, ut Antonius, abiectis nugamentis, quibus iam nimium ætatis datum sit, ad eadem studia totum se conuertat, & ipse saluus, Perithoum suum tanquam ab inferis reuocatum, conspicietur. Id erit uelut argumentationi uestibulum. Sub hæc propositiones indicabit argumentationum, ceu bases totius negotij. Quarum excogitatio, ut longe omnium difficilima est, ita cum primis necessaria: adeò, ut nisi his repertis, reliqua futura sint ociosa. Et non aliud est quod minus arte præscribi possit. Quæ de re peculiaria quædam tradidit Fabius Quintilianus, proposita controuersia Thebanorum ac Thessalorum: & nos in commentarijs de copia, rem, si non crudite, certe crasse explicamus. Huic igitur argumentum huiusmodi propositiones generales constituere licebit. Liberalibus studijs nihil esse pulchrius: Ea sumitur ab honesto. Nihil gloriosius: Ea sumitur à laudabili, quod

quod natura quidem ab honesto separatum non est, sed persuadendi causa separatim tractatur. Nihil suavius: Ea sumitur à iucundo: Primæ quæ generalis est, huiusmodi secundariæ subseruiant. Maxime secundū hominis naturam esse scire, eoq; nec hominis uocabulum mereri, qui literas nesciant. Proinde si literæ nihil adferrent momenti ad famam honestam, nihil ad uitæ iucunditatem, nihil ad opes aut dignitates parandas: tamen propter sese expetendas. Altera fuerit, Ad perfectam uirtutem, solas literas esse duces, ac ueluti pædagogas. Cuius ut semina proficiuntur à natura, ita à literis petitur absolutio. Ab his præstari cognitionem rerum expetendarum, ac fugiendarum: has mederi morbis animorum, trāquillare mentes mortalium. Ab his compeisci sequundis in rebus insolētiā: ab iisdem peti lenimē ac robur in rebus afflictis. In priore propositione cōfirmanda adhibebitur argumēti uice, quod puelli quoq; natura gaudemus, si proposito enigmatē sensum coniecimus, aut si quid nouæ rei discere contigit. Contrā falli moleste scimus. A philosophis ceu propriam notam tribui, rationalem esse: at hæc non in illum cōpetit, qui nihil ratiocinatur, sed pecudum more sensibus & usu ducitur: Esse uero, qui negent hominem à reliquis animantibus differre rationis specie, sed gradibus dūtaxat: ita fieri posse, ut paulatim adiectis inscitie stultitiæq; incrementis, homo deducatur usque ad pecudem. In hoc natura finxit hominem erectum, & in seuit cognoscendi studium, ut in rebus à Deo conditis philosopharetur: simulq; & Deum omnium opificem, & seipsum, & reliquam huius mundi machinam contempleretur. Ad hæc locupletanda pote-

runt adhiberi, quæ poëtæ, Platonici, reliquiq; scriptores, de hominis conditione prodiderunt. De luteo Promethei simulachro, cui igniculus ille cœlestis inditus fingitur: de luto quod Deus summus ille figulus, afflatu suo animauit: de particula diuinitatis, iuxta quosdā corporibus humanis addita. Quidā enim arbitrati sunt animam nihil aliud esse, quàm scintillam ex igni, aut radiolum è luce illa diuina. De mentibus è stellis petitis, aut certe è thesauro Dei. Huc pertinebit illud Platonis figmentum de animabus in terram delapsis, quibus hic scire nihil est aliud, quàm cœu per somnium reminisci eorum, quæ quondam libera corporibus uiderunt apud Iouem. Hæc, aliq; multa, diuinitatem quandam animi declarant. Declarat & illud, quòd unus animus exiguo corpusculo inclusus, tot, tam uarias ac difficiles disciplinas intellectu complectitur, memoria retinet. Id prodigiosum uidebitur, si quis perpendat, quot hominum ac rerum uocabula tenet, qui unam modo linguam didicit: quanto prodigiosius, quòd Mithridates unam & uiginti linguas calluit? Et hæc est minima portiuncula mentis humanæ. Addendum his quod Plato negauit, corpus ad hominis naturam pertinere: nihil enim aliud esse, quàm instrumentum, domicilium, aut uehiculum animi: animum esse totum hoc, quod hominem nominamus. Item illud quod dixit Seneca, ni fallor: Vita sine lictis mors est, & uiui hominis sepultura. Quid minus est homo, quàm hominis cadauer? Iam enim corpus, non corpus est, sed sepulchrum: animum etiam ipsum à natiuo uigore cohibens: & hinc philosophi σῶμα dictum putant, quasi σῆμα, hoc est, sepulchrum. Nec aliò spectat quod

quod Plato scripsit, philosophiam nihil aliud esse, quàm mortis meditationem: Nam si abduci à corpore, dicitur animæ mori: & philosophia abducit animū à rebus corporis & crassis, ad res æternas & intelligibiles: iam incipit animus uiuere, quum ab hoc sepulchro emicat. Ex historia sumi potest, quòd Diogenes accensa in meridie lucerna rogatus quid ageret, respondit se hominem quærere. Rursus aduocata concione populi hac uoce: Audite homines, audite homines. Quum iam satis magna multitudo congregata, rogaret, quid uellet dicere, respondit sese homines aduocasse, non illos qui nihil haberent hominis. Adhiberi poterat & illud Minu cuiusdam dictum de homine crasso & indocto: Nullus, magnus, malus, piscis. Nullum appellabat nullius pretij, nihilq;: magnū, onustum obeso corpore, atq; abdomine pigrum: malum, nulla uirtute præditum: piscem, infantem & elinguem. Huc referri potest, quòd uulgò quoq; iactatis prouerbijs stupidis & indoctis adimūt hominis uocabulum. Quid enim aliud sibi uult, quòd stupidum & indoctum appellant statuam, ueluti figuram duntaxat hominis, nō hominem? Item, Asinum ad lyram, suem: Suem Bæoticū, asinum Antronium, nihilo dissimilem elephanto: ouem, belluam, pecudem, fungum, stipitem, caudicem, plumbum, somnium hominis, monstrum hominis. Adhibebitur & parabola: Vt auena uitio soli in lolium degenerans: ut triticum simili de causa degenerans in siliginem, nomen sui generis amittit: ita homo pecus esse incipit, si neglectis honestis studijs, uentris tantum & inguinis curam agere cœperit. Rursum alia: Et sicut materia sculpendo simulachro habilis,

tamen signum non dicetur, nisi forma artificis industria accesserit: ita natiuitas nō facit hominem, sed humanæ naturæ capacem. Quod nascitur, ceu rudis quædam materia est: institutio formā inducit. Tertia fuerit: Vt maxime sequundum naturam est, surculum insitum, eius arboris referre saporem, unde decerptus est: ita nō oportet animum hominis cuius est origo cælestis, à suo genere degenerare. Et ut natiuum est igni nostro sursum niti: trahitur enim ui genuina ad fontē originis: ita hominis ingenium, quanquam est his uaporibus corporeis immersum, tamen principij non potest obliuisci. Rursum alia similitudo: Vt ursus non esset ursus, si mens hominis sub ursi figura latēret: quemadmodum nec Apuleius uere asinus erat, quum incolumi mente formam asini circumferret: ita nec homo diceretur, si mens pecudis humanam animaret figuram. Item si statua figuram hominis per omnia representans, quales ferūt fuisse Dædali, non statim homo dicetur, quòd mente uacet: nimirum figura non facit hominē, sed scientia. Hinc est quòd poëtæ ueteres, nimirum homines prudentissimi, fabulis non ꝓciosis prodiderant: hos, quibus nulla colendi ingenij cura fuisset, sed pecuinis uoluptatibus sese totos dedidissent, in ferarū naturam abiisse. Contra, qui sapientia cæteris præcelluissent, eos ut dijs genitos, in deorum consortium à morte reuerti. Et demones, quos illi deos inferiores existimāt, aut uant dictos, quasi δαίμονας, hoc est, doctos, aut scientes. Et Horatius imperitum hominem appellat corpus sine pectore. Huiusmodi suppellectilis uariam copiam pueris suppedabit præceptor. Nam mihi interim satis est rationem ijs, qui docent, indicare

casse. Et quod nos in una propositione locupletanda tenta-
 uimus, id ille faciet in singulis: & in harum unaquaque
 parte, si quid erit tractabile: non ut omnes pueri reddant
 omnia, sed ut ex multis suo quisq; ingenio cōsentanea ra-
 piat: & ex his quæ tradita sunt, similia consuescat affina-
 gere. Sed iam nunc quosdā exaudire uideor, præceptiun-
 culis meis obstrepentes. Hui, inquiunt, nā tu dura mones,
 & negotij plena: tum autem puerorum animis, atque in-
 genijs maiora. At ego iam ab initio non asinum, sed præ-
 ceptorem mihi requirebā, nec ineruditum, nec laboris fu-
 gitantem. Nam si indoctus est, qua fronte doctoris nomē,
 ac locum occupat? Si ignauus, cur negotium tam ope-
 rosum suscipit? Hæc est literatoris professio: hæc fabula
 quam agendam suscepit. Nemo uinctum colendum susci-
 pit, nisi statim animum suum ad inexhausti, & ut inquit
 Vergilius, in orbem redeuntis laboris circulum præpa-
 ret. Pueri uerō quid possunt audire uel iucundius, uel
 utilius? Ab his exercitamentis prodibunt, qui facunde con-
 cionentur in templis: qui prudenti eloquentia moderen-
 tur senatum: qui cum laude obeāt publicis de rebus lega-
 tiones: deniq; qui quauis in re, & iudicio ualeat, & ora-
 tione. At ista, inquiunt, nondum illis annis sapiunt. Vestro
 sanē uitio, à quibus bonorū autorum loco, modos signifi-
 cādi, & id genus glossemata, nō minus stolidi quam pro-
 lixa didicerūt. At antiquitus pueri à nutricibus in ludum
 missi, statim ab optimis autoribus, literarum studium au-
 spicabantur, neq; detinebantur decem annis in dediscen-
 dis nanijs. Liceat quæso, per uos, o molesti, uel adolescen-
 tibus discere, quod uos pueros docere debueratis: sinite

ut prima statim ætate hauriāt, quod semper meminisse sit pulchrum. Imbibat testula recēs succum purissimū, quem diu resipiat. Discant ista in promptu habere, & in uarios usus, ut res hortabitur, accommodare. Quid enim docendo agitur, nisi ne semper sint docendi iuuenes? Quibus si quando optima traditurus es, quur ea non statim tradis? si nunquam, quid doces? An hoc agitur, ut tu semper doceas, illi semper sint docendi? Ne pigeat bonum uirum, ac de Rep. uel gratis benemereri cupientem, huius operæ, discentibus quidem necessariæ, cæterum nec ipsis qui docent, sterilis & infrugifera. Ergo postea quàm totius operis, ad hunc modū imaginē quandam, ac syluā subministrauerit, affectus deniq; & epilogum ostenderit: tum indicabit idem argumentum alia quoq; ratione tractari posse. Quod genus sit, ne à proposito recedamus exemplo: Si docebit omnē literarum cōmendationem tractari posse per cōparationem, itidē & inscitie uituperationem. Huius generis hæc erit propositio: Inter omnes res quas mortales tantopere nūrantur, ac per fas nefasq; sequuntur, nihil est quod cum cruditione sit conferendum. Nam honores istos, in quibus ambitio mortaliū finem boni constituit, multo periculo peti, maiori possideri, ne honores quidem ueros esse: quippe qui pessimo cuiq; se penumero cōtingere soleāt, nec esse perpetuos, etiam si ueri sint: atq; adeo nō perennes, ut ne diuturni quidē sint: quippe quos fortunæ temeritas, ut interdum insperantibus obijcit, ita frequēter inopinatō tollit. Contrā, literas in otio parari, summa tranquillitate possideri, non nisi sua cuiq; industria contingere, ueram & immortalem parare gloriam.

Et hic

Et hic primus differendi campus, multis locis cōmunibus undiq; amœnus est: multa exēplorum, similiumq; uarietate fecundus. Deinde aperiendus alter: Bonam mortalium partem, aurum, argentū, gēmas, & alias hoc genus opes, per saxa, per ignes, magno capitis & uitæ periculo persequi, quum ista sint aliena bona: quippe quæ & ociosis obueniant, & à cæca fortuna passim ut dantur indignis, sic etiam dignis adimantur. Proinde extra hominem esse, nec in hominis potestate: quippe quæ infinitis casibus intereant, ueluti naufragio, incendio, bello, furto, carie, situ: quorum si nihil accadat, certe usu consumi. Quòd si non utaris, nihil habere pulchri quāobrem sint expetendæ. Ad hæc ut affatim contingant, tamen non explere mentem hominis, sed tantum irritare miseram cupiditatem. Postremo nec animū, nec corporis morbo mederi posse, sed potius utriq; hominis parti malorum omnium seminaria suggerere: & adeò per se nō esse honestas, ut à uirtute uel in primis auocent: benignitate exhauriri, parsimonia putrescere: magno sudore congeri, maiore cura congestas seruari, maximo dolore diu seruatas amitti. In literis contrā hæc omnia. Nam alteram cōtentionis partem omitto: partim ne sim æquo longior, partim ut aliud aliorū inuentioni reliquum faciam. Atq; hic sequendus porrigitur campus, latissime patens & uariius, nec inamœnus. Tum tertio loco proponet: Formæ dotem plerisq; magnum quiddam uideri, & omnibus uotis expetendum: uerum hanc nemini sua cum laude contingere, ut neq; culpa negari. Ab ijs enim quæ nobis adsunt à natura, neq; laudē meremur, neq; reprehensionem: neq; etiam

num sciri, si bona cōtingat : utrū ab irata natura, an propitia detur: propterea quòd multis eximia species corporis perniciē attulit, & ipsis qui possident, & ijs qui spectant. Nam possessori quid adfert formę uenustas, præter solitudinē, metum, suspiciōē, rumorem parum sequendum, materiam peccandi, libidinis fomitem, & copiam? Quod si hac præditus, pudicus esse cupiet, hoc ipso miser est, quòd formosus. Multas enim pellicit in perniciem, sollicitatur ab innumeris : atq; hinc est quòd legimus quosdam sibi faciē cicatricibus defœdasse, quòd sentirent alios sua forma periclitari. Sin impudicus est qui forma præcel-
lit, quid tandē debet suo bono, nisi ut facilius perditiusq; pereat? Itaq; sua forma neminem pudicum delectari: alienam qui amet libidinosum esse. Tum ut hoc magnum sit bonum, tamen corporis esse tantum, fluxum, caducum, & adcò non perpetuum, ut uel febricula, uel macie, uel alio quouis casu, subito marcescat, certe atatis progressu deflorescere, certe morte perire. Diuersa in literis, hoc est, animi bonis omnia. Vides & hic aperiri cāpum mire fœcundum, si quis conetur hāc partem omnibus suis numeris tractare. Quarto loco proponet, Nō paucos mortaliū corporis uoluptates, uti præcipuū quoddā uitę bonū mīre complecti: uerum istas insanias esse, falsò iucundas, non uoluptates, nec aliud quàm risum, ut aiunt, Sardonium. Quir enim ei uoluptatis bonum tribuas, qui sui sensu caret? Ad hęc obscœnas esse, belluinas, ac prorsus homine indignas, quę nos in feras trāsferāt. Tum insynceras, multo plus aloēs habere, quàm mellis: magno constare, & rei & fime dispendio, quibus admixtum sit fastidium, comes
pœnītudo

pœnitudo: malorum omnium escas, laudis ac uirtutis ini-
 micas: infidas his à quibus adamantur, quos tandem dese-
 runt, etiam si non deserantur ipsæ. Exhaurire loculos, of-
 fuscare famam, corporis ualeitudinē atterere, ebibere suc-
 cum uitalem, accelerare senium, morborū omne genus ad-
 ducere, sui iustissimas ultrices: deniq; totum hominem in
 Tartara demergere. At longe feliciores oblectationes ex
 honestis studijs colligi: tantò nimirū meliores, quantò cor-
 pori præstat animus, & homo belluis antecellit: tantò ho-
 nestiores, quantò uirtutis decus turpitudinē superat. Fe-
 liciter parari, felicius possideri, quæ nos nobis nō eripiāt,
 sed restituant: quæ nos non ex hominibus in feras, sed ex
 hominibus in deos transforment. Ad hæc synceras esse,
 nullo fermento uitiatas: quæ omnem animi, si qua resedit,
 amaritudinem edulcent: quæ regustando fruēdoq; dulce-
 scant: quæ liuorem nesciant, hōc suauiores, quò cum plu-
 ribus communes, quæ nos ad extremum usq; rogam non
 deserant: quæ annis quibus omnia deteruntur & obsole-
 scunt, efflorescant: nauseam, satietatem, ac pœnitudinem
 nesciant: quæ præstant, ut non uni aut alteri, sed omni se-
 xui, omni ætati simus iucundi: quæ præstant, ut ipsi nobis
 etiam uoluptati simus: quæ faciunt, ut senectus etiam mo-
 lestia careat: quæ nos in omnem regionem, in omnem for-
 tunā comitantur. Deniq; quæ delectant eam hominis par-
 tem, qua uere sumus homines. Sed parcam hæc longius
 persequi. Neq; enim hæc sunt omnia, & innumera sunt,
 quibus hæc locupletari possent. neq; nos aliud in præsen-
 tia, quàm uiam indicamus. Poterat hoc genus & alio co-
 lore tractari: uidelicet ut literas alijs bonorum generibus
 ante

anteponamus. Præclara res opulentia, ad quam mortales infatigabili studio contendunt: quanto par est acrioribus studijs eniti ad honestas literas, quibus ditescit animus? Et in hunc modum de cæteris partibus quas proposui, aut alijs his similibus: cuiusmodi sunt iuuentus, uires, nobilitas, & si quid aliud sit, in hominum uita uehementer expetitur. Quin & per fictionem tractari poterant. Eruditionem esse rem per se præclarā ac magnificā, adeo, ut si nihil etiam adferat emolumenti in hac uita, tamen sua ipsius causa sit expetenda: quod attigimus in initio. Quis enim non optet perfectam omnium rerum cognitionem, etiam si nunquam esset uicturus inter homines? Nunc instrumēta sunt ad iuandam Remp. ac priuatim amicos, ut etiā si citra doctrinam ipsi possemus feliciter uiuere, tamē quoniā uir bonus nō solum sibi nascitur, uel in hoc cōparanda sit eruditio, ut alijs possimus esse subsidio. Verum in epistola seria non lim has partes nimium extare. id quod etiam in orationibus nonnunquam expedit dissimulare. Sed oportebit alia quadam epistolari facie obduci, nonnunquam data opera perturbari: sed tamen hic ordo profuerit animo, magnam rerū ac uerborū uim cōgerenti: ex quibus licebit optima seligere, si locus postulabit breuitatē. Ita fiet, ut non sit ieiuna breuitas. In hoc argumēto poterit & illud admone-
 ri, blandiorem oportere fingi epistolam, quam adolescens adolescenti, congerro congerroni, amans scribit amanti. Tum quod qui suadet, inde sibi plusculū fidei conciliabit, quod suum errorē simpliciter agnoscat ac damnet: & ueterum uoluptatū memoriam ita reficabit, ut declaret animum etiam à cōmemoratione abhorrere. Ab ætate sumet
 occasi

occasionem : quæ si grandior est, dicet conuenire, ut plus sapiat, qui uincat annis. Absurdū fore, si qui dux huius instituti debuerat esse, nunc recuset esse comes: sin minor, dicet nullam ætatem magis idoneam disciplinis : propterea quod sanguine calente, magis ingenio uigeat, quodq; tenacius hærent, quæ primis annis hauriuntur. Hoc magis esse properandū, ne pars eius optima frustra effluat. A' forma item: quæ si præstans est, dicet minime cōuenire, ut in formoso corpore, animus inhabitet deformis: sin minus, dicet hoc magis excolendum bonis studijs animum, ut cum corporis forma paria fiant. A' genere: quod si fingitur illustre, dicet olim nullos magis incubuisse liberalibus studijs, quam claro genere prognatos. In alijs aut latere, aut negligi doctrinam, fortunæq; sordibus obscurari : in benenatis habere suū decus. Tum obscuri hominis literas fortunæ adnunculus destitutas, perpaucis esse præsidio: nobiles, quoniam ferè ad ciuiles magistratus, aut ecclesiasticas dignitates uocentur, maximā adferre perniciem, si ad tractandam Rempub. citra doctrinam accedāt: si contrā, maximam adferre publicè simul ac priuatim utilitatem. Sin obscuro genere fuerit, excitandus est, ut sibi suis ipsius præsidijs pariat nobilitatem, non paulò ueriores, quam qua uulgò tument claris orti natalibus. Ab opibus: Si rem familiarem habebit amplam, demonstrabit illi tanto magis enitendū ad honesta studia, ne quum fortuna cætera supeditarit, ipse sibi defuisse uideatur : magnū adiumentum ad consequendas liberales disciplinas esse diuitias: sed has tum demum esse splendidas, ac salutare, si possessor his norit uti, atque hoc præstare doctrinam. Alios plerosque felici

felicibus quidem ingenijs præditos, sed ob rei familiaris angustiam, frustra consecrari liberalia studia: ipsi ob rem amplissimam nec ocium, nec librorum uim defuturam, et optimi cuiusque præceptoris futuram copiam. Sin erit tenui fortuna, tanto enixius oportet incumbere parandis literis, quæ et rem, et famam pariunt, sed insignes. Nam diuitibus satis est, uel infra mediocritatem esse doctos. Hæc quidem à nobis fusius ac loquacius dicta sunt, uerum in tantum necessaria, ut uerear ne multis hæc etiam tam multa non sufficiant. Fateor, ad docendum sunt perpauca, sed ad rationem ac uiam indicandam, non inerti, nec indocto præceptoris arbitror fore satis. Nam his doctorem magis instruximus, quam pueritiam.

De emendando.

IAm uerò in emendandis his quæ pueri reddunt, exactissima diligentia est adhibenda. Neque enim sat habeat doctor manifesta sermonis uitia castigare, uerum si quod uerbum parum elegans, si minus ornatum, si sordidum, si durius translaturum, si qua contra ueterum consuetudinem orationis figura, si quid absurdius compositum, si quid asperum, si quid hiulcum, id notatum emendabit, mutabitq;. Tum si quid alio loco dictum, quod alio magis quadrabit: si quid additum, quod non cohereat: si quid præteritum, quod inferi oportebat: si quod argumentum futile, uanum, translaturum, aut alioqui uitiosum: si quod decus parum feliciter affectatum: si iocus sit frigidior: si languidius dictum, quod acrius oportebat: si ubi à decore fuerit recessum: si tractationis color parum pudenter sit delectus: si uerbosius tractatum, quod oportebat breuius:

aut

aut si breuius perstrictū, quod fufius erat tractandū. Neq; simul tamē omnia reprehēdet præceptor: sed aliās alia, ne pueri despōdeāt animū. Quæ fieri non poterūt, ea nō statim aspere, & cū cōuitio reprehendenda: & his uerbis, eo uultu, quasi discipulū oderis. Nā ea res teneros animos in odium studiorū trahit, sitq; ut prius oderint literas, quā norint cuiusmodi sint. Verū quæ tolerari non poterūt, ea blādus quidē, sed tamē diligēter corrigēda: quæ ferri ut cūq; poterunt, aut dissimulāda interim, aut ingenio collaudato uertenda in melius. Cōtrā, quæ scitē excogitata, tractata uē uidebuntur, ea nominatim probabit, & quāobrē placeāt, exponet. Atq; interim iubebit & reliquos omnes attētis auribus accipere thema cuiuslibet quod recitatur: ac diligēter obseruare, si quid animaduertant reprehēdendum, aut etiā imitandū. Neq; illud inscite monet Quintilianus pueros ipsos percontationibus excitandos esse, & quid illic uideant uitij, & qua ratione mutādum: & quid sequutus sit, qui feliciter affectauit. Hoc satius est, quā si non periclitante illorū iudicio, tantum indicet ipse, quid damnet aut probet. At huiusmodi percontationibus, uide quātum cōmoditatū cōsequemur. Primum audientibus securitas aberit, ut ait Fabius, neq; perfluent aures quæ dicentur, simulq; perducentur ad id, quod ex hac re queritur: nimirū ut aliquando hæc inueniant citra indicem, & intelligant ipsi. Sunt autē quædā uitia, quæ præceptoribus in adolescentulis non debeant displicere, ueluti sublimior spiritus, & orationis luxuries: quòd hæc indoles promittat perfectā maturitatē. Ego in nostris & alia pro tempore ferenda censeo, puta uoculas, aut etiam clausulas

ex auto

ex autoribus sublektas: poëtarum uersiculos, aut hemisti-
chia subinde intertexta: translationū licentiam: apertio-
rem artis affectationem: compositionem curiose numero-
sam, ac propè carmen exprimentem. Hæc enim omnia,
tametsi in adulto scriptore uitia sunt, in proficiētibus ta-
men necessaria sunt. Porro siue quid laudes, siue repre-
hendas, utrunque & cum modo, & uarie faciendum.
In alijs inuentionis nerui, in alijs argumētandi subtilitas
probanda, in alijs sanitas, in alijs grauitas: in his lepos,
in illis uarietas. In nonnullis dispositio, in nonnullis con-
siliū, ut ad quancūq; uirtutem quisq; uidebitur accedere.
Hæc laudis ac reprehensionis dispensatio faciet, ut neque
quisquam de se desperet, neq; despiciat quenquam: tum
emulatio quædā inter omnes excitata, dum iritatis omni-
bus, alterius quisq; laudē affectabit, dictū mirū quantum
calcar addet ad studium. Quorundam putidis ingenijs,
& rustico pudori, priuatis ac blādis admonitionibus erit
succurrendum. Profuerit & illud, præmiola quædam pue-
rilia proponere ijs, qui primas tulissent: Victores collau-
dare modice: uictos ad conandū hortari, quasi industria,
non ingenio sint præteriti. Hic rursus mihi cachinnum
tollet grammatista quissiam ex isto ordine, qui Michaë-
lem Modistam pueris solent prælegere, meq; clamitabit,
è ludo theatrum facere. Atqui cum ipse è suo ludo carni-
ficinam faciat, mihi concedat, si ueterum consuetudinem
renouare studeo, apud quos in scholis huiusmodi concer-
tationibus iuuentutem exerceri solitam, uel ipse D. Au-
relius Augustinus testis est. Siquidem is in libris, qui-
bus titulum indidit, Confessionum, narrat sibi frequenter
accla

acclamatum fuisse, ubi Iunonis apud Maronē in Troia
 nos stomachatis, uerba & affectus ceteris felicius adum-
 braſſet. Agnoſcis theatricum uerbū acclamandi in ludos
 literarios fuiſſe receptū, & tu putas ſchola nihil cōueni-
 re, niſi plagas, & eiulatus? Fabius haud uulgaris forman-
 de pueritiæ artifex non uno in loco præcipit, iuuenum
 ſtudia nō aſperitate deterrenda, ſed blandis applauſibus,
 modetiſq; laudibus alenda, atq; exacuenda: uultq; docto-
 rem in parentis abire affectum: contra diſcentes, præce-
 ptorem non horrere ut carniſicē, ſed obſeruare ueluti pa-
 rentem. Nec obſcurum, quid ſibi uelit Horatianū illud:

— Quondam pueris dant cruſtula blandi

Doctores, clementia uelint ut diſcere prima.

At contra hic Arcadicus quiſpiam aſinus, leonis indutus In ludi magi-
ſtros plagos.
 exuuiō, quum & indoctior ſit, quā ut admiratione ſui
 pueros habere poſſit attentos; & inſuauior, quā ut a
 quoquam poſſit amari, uel amare quenquam, tumultuoſa
 carniſicina menſes eximit: pueroſq; ingenuos, quos neq;
 meliores poteſt reddere, quippe uir ſtultus & improbus,
 neq; literatiores, ipſe illiteratiſſimus, flagris excarnificat
 miſeros: clamoribus & conuitijs obſurdeſcit, ut optimis
 illis annis ſine fruge contritis, magnam crudelitatis ſue
 mercedem percipiat. Vtinā tibi, o ſacrilege (nam barbari
 leuius ac dilutius eſt uocabulum) dignus tuus factis honos
 aliquando cōtingat, compellariſq; pileum iſtum, quem ut
 nō promereriſ, ita nec intelligiſ, cum cuculla permutare:
 pro ueſte iſta lacinioſa, ſagum aut rhenonē accipere: pro
 ſoleis ac ſandaleis, perones: pro ſerula ligonem, aut ſcutia-
 cam: iſtoq; ornatu ē ſcholis, in quibus nihil aliud eſ, quā

d

canis

Schola.
Ludus.

canis in balneo, rus extrudaris: aut stiua, cui natus es, alli-
gandus, aut, quod malim, in compedibus fossurus: aut si
omnino sine imperio durare non potes, boues & asinos
ista tua uoce territaturus: Tu ne audes, o clurinu pecus, ut
Plauti uerbis utar, docedi literas occupare munus, quum
ipse nihil unquam didiceris? tu ne audes stolide carnis ex,
bene natos & ingenuos, atq; ingeniosos adolefcetes la-
niare flagris, quos citius occidere possis, quam docere?
Tun' in eo loco, quem Græci ab otio scholam, Latini à
uoluptate ludum appellandū censuerunt, plus quàm Pha-
laridis tyrannidē exerceas? Tun' hominis monstrū ab his
etiā mercedem, si superis ita placet, exigis, de quibus peius
sis meritis, quàm scelestus ille Faliscorū literator de sua
pube? Siquidē ille dolo peccabat, tu palam, & cōfidētis-
sime perdis bonæ spei pueros. Ille clementi hosti tradidit,
ueluti pacis obsides, à quo sunt citra fraudē restituti. Tu
hosti crudelissimo, teterrimoq; prodis, uidelicet inscitiae:
à quo ferme nullus elabatur qui semel in illius ius uenerit.
Sed efferrī me uideo longius dolore iustissimo quidē, uti-
nam perinde utili. Regnare iam passim uideas plagosum
hoc, & indoctū grāmatistarū genus: antra illa in quibus
deblaterāt, ceu furiarū regnū, misero ciulatu undiq; per-
sonare. Et credimus istam uerberandi cōsuetudinē Quin-
tiliano, uiro tum prudēti, tum erudito, adde etiā castissi-
mo, sine causa tātopere displicuisse. Et quod uir ethnicus
ut seuū ac perniciosum explosit, nos Christiani libenter
recipimus, seuientes non solum in pueros, uerum etiam
in etatem penē uirilem. Quod si plagoso illi compotatio
contigerit largior, iam pueris etiā instat ultæ periculum.

Rideatur

Rideatur hoc, nisi nostra ætate permulta sint exēpla inſe-
 licium, quos doctoris temulenta ſæuitia plagis occidit. Et
 poſtea deligimus equis noſtris idoneum curatorem, libe-
 ros cuius aſino committimus. Sed hanc cæden di, ſciuen-
 diq; neceſſitatem in puerorū ingenia transferunt, qui ceu
 Phrygū filij, niſi plagis concifi, non emendantur. At quo
 tandem ore, dic quaſo bellua, tu flagris à pueris officium
 diſcipuli requiris, quum tu doctoris officium non præſtes?
 Effice ut merito te amet grex tuus: ut miretur, primum
 ſtudia, deinde te quoq; ſtudiorū gratia: poſtremo utrunq;
 alterius cauſa. Quòd ſi nec amari potes homo ſtolidus ac
 ſeuus, nec admirationem meretur triuiſialis iſta, ſic dicam,
 culinaria doctrina, uel inſcitia potius, quid etiam in ludo
 ſedes impudēs? Sin ueterem morem tuo damnas inſtituto,
 age proſter iſtos egregios artifices, quos tu nouus magi-
 ſter ſic inſtitueris, ut cum ueterum uel inſimo certare poſ-
 ſint. Quòd ſi qui ſunt ad literas indociles pueri, præſtat
 eos ablegare rus, ac parētibus reddere: ſed interim docto-
 ri decreſcant redditus. Et ideo bonam uirum oportet eſſe,
 qui ſuſcipiat erudiendam iuuentutem. Sed iſtis non alia ra-
 tio eſt, quàm tyrannis principibus, qui malunt inperio,
 quàm æquitate retinere populum: non quòd illud melius
 ſit, ſed quòd hoc difficilius. Sed iā dudam tempus eſt, ut ad
 id quod inſtituerat, noſtra recurrat oratio, iamq; finis
 ſit cum iſtis Boeoticis ſuibz rixādi. Ergo præceptor ido-
 neus, et iſtorum diſſimilimus, poſtea quàm annotarit, quid
 in ſcriptis puerorū placeat aut diſpliceat: tum exemplar
 aliquod à ſe ſtudioſe elaboratum proponet, aut etiam di-
 ſtabit: neque pigebit in marginibus, quid ipſe ſit ſequen-
 d 2 tus

tus annotare. Indicabitur ordinis ratio, transitus commo-
 dus: si quod schema speciosius, si quod argumentum noue
 tractatum: ut in eo perinde ac speculo uideant, quid ipsos
 suffugerit, quid assequi non quiuerint, ubi dormitauerint,
 aut cacutierint. Alioqui quod isti faciunt, prauam epistolæ
 formam proponere, quid aliud est, quàm docere perperam
 scribere? Dicent, quotumquenque reperias, cui sit stylus?
 Calceolariam non docet, nisi calcifex: coquum non insti-
 tuit, nisi coquus: gubernandi rationem nemo tradit, nisi
 nauclerus, & miraris si literas docere non queas, quas ne-
 scis? Quid docet Grammaticus, qui loqui nescit? Expediet
 aliquoties & nudum thema proponere, ac totum inuen-
 tionis laborem, ipsorum ingenijs relinquere, quò uirium
 suarum periculum faciant. Magis autē blandiuntur etiam
 nobis, quæ ipsi quasi peperimus ingenio: uerum id rarò
 fieri uelim. Nos olim quum Senæ Alexandrum archiepi-
 scopum, titulo D. Andreae, Iacobi Scotorum regis filium,
 rhetorum studijs exerceamus, isq; qui sibi iam uidebatur
 nonnihil profecisse, rogaret, ut tantum indicatis proposi-
 tionibus summis, reliquam omnem inuentionem ipsi relin-
 querem, paruimus adolescenti ingenioso, miræq; speci. Ad-
 nisus est summa ui, fortasse sperans fore, ut tametsi sermo-
 nis ubertate uinceretur, tamen ob ingenij uigorem, non
 multum esset à nobis relinquendus. Primum collaudabam
 hominis industriam, & passus sum illum sibi aliquandiu
 placere. Mox ubi indicassem, quàm multa illum fugissent,
 quàm multa non suo loco dixisset, cristas demisit, & agno-
 uit, quantum adhuc abesset à meta. Illud in genere memi-
 nerit doctor, ut pro sui quibusque ingenij uiribus præcat.

Rudibus

Alexander ar-
 chiepiscopus
 D. Andreae,

Rudibus tota erit epistola præformanda: progressis sat erit liniamenta quedam prænotare: adultis suffecerit nudū indicare thema: ut & hac in parte parentum curam doctor imitetur, qui primum infantibus cibum præmansum in os inserunt: deinde sat habet in manū dare: mox mensis tantum admovent: postremò etiam domo extrudunt, ut suapte industria ipsi sibi querere consuescant, & quod dici solet, nare sine cortice. Conducet & illud, si iam ad mediocritatem progressus, proponemus idè argumentum iterū ac tertio, alijs uerbis, aliq; sermonis figura tractandum. Quæ res potissimum conferet ad parandam orationis copiam, ac facilitatem. Id autem cōmodius fiet in breuioribus thematijs. In hoc genere Ciceronē legimus cum Roscio suo certare solitum, utrum ille sæpius eandem sententiam, uariatis gestibus repræsentaret, an ipse mutatis uerbis efferret. Extant etiamnum & Maronis in hoc genere progymnasmata, ueluti de aurora, & anni partibus: sed hac de re tēpestiuus ac pluribus dictū est in libello de Copia. Cæterum ad inuentionis facultatem pertinebit, ut palinodijs exerceantur: ut quod modo suaserint, rursus dissuadeant: quod in cœlum laudibus tulcris, id uituperando ad inferos deiicias: ad quod sis adhortatus, rursum ab eo deterreas. Quæ quidem in facultate plurimum ualuisse fertur Carneades. Hæc erunt propemodum similia locis, quos rhetores cōmunes appellāt: ut pro amore, quemadmodum apud Platonem dicunt, præter Socratem, multi: & contra amorē, quēadmodū apud eundē Lysias: pro literis, contra literas: pro diuitijs, contra diuitias: pro monastica uita, & contra: pro linguis, contra linguas: pro

matrimonio, contra matrimonium: pro monarchia, contra monarchiam. Eiusdē generis sunt quæ per collationem seu contentionē tractantur. Vtra uita præstantior, ciuilis, quā practicam uocant Græci: an contemplatiua, quam theoricam illi uocant. Cælibatus potior, an coniugiū. Ad dicendum utrum ars plus possit, an natura. Vtrum recens hoc theologie genus præstantius, an priscū illud. Vtrum plus ualeat ad parandam famā militia, an literarū studium. Ad rem parandam, utilior ne sit iuris prudentia, an studium medicine. Idem fit in personis. Vter dux melior, Annibal, an Scipio. Vter philosophus excellentior, Plato, an Aristoteles. Vter poëta doctior, Vergilius, an Hesiodus. Vtrius facundia mirabilior, Demosthenis, an Ciceronis. Hæc incidunt in consultationibus. Verum quum deliberabit aliquis, utrū Romæ citius paretur fortuna, an in patria: utrum satius sit literarum gratia adire Italiam, quā Lutetiā, præterea quæ sunt locorum communium, ex proprijs circumstantijs multa ducet argumenta. Vtrum expediat pueros statim admouere studio literarū, an parcere tenerioribus illis annis, donec ætatis progressu nonnihil roboris collegerint. Neq; semper necesse est, ut præceptor se thematis inueniendi labore fatiget: Ex historijs, ut dixi, sumere poterit. Ex epistolis cruditorum, si quas pueri nondum legerunt: ueluti ex epistolis Ciceronis, Plinij, Cæcilij, Symmachi; Apollonij, Angeli Politiani. Quur enim hunc in hoc genere non cum quolibet ueterum cōframus? Sed tamen è Symmacho rem peti malim, quā phrasim. Promptissimā huius generis uim, epistolæ diuersæ Græcorum suppediant. Ex omnibus degustatis præceptor optima quæque propo

proponet. Semper enim ab absolutissimis exordiendum. Proinde Plinium illis statim obijci malim, quàm Franciscum Nigrum, Mariũ Philclphum, etiam si pater in epistolis nonnihil habet laudis: Aeneam, Gasparinum, Campanum: multo minus Carolum Virulium Louaniensem, cuius scripta cito gratiam exuerunt. Non quòd negem in his esse, quod aliquis possit imitari, sed quòd mediocribus, aut tolerabilibus tantum anteferri malim eximios. Ceterum cui palma debeatur in hoc genere, non est huius instituti pluribus uerbis persequi. Si quis omisis Graecis, patiaturs quencquam ullo in genere anteponi, M. Tullio, Plinio & Politiano primas detulcrim. Sed hac sanè in re fruatur suo quisq; iudicio.

De consuetudine unum multitudinis numero compellandi.

IAm uero consuetudinem insulsissimam quidem illam, sed aliquot iam seculis mire receptam, unum hominem multitudinis numero compellandi, non tam dedocendi sunt iuuenes, quàm animandi, ut ausint contemnere: certe quoties cum his agitur, unde nihil sit periculi. Mea certe etate iam hæc ineptia magna ex parte obsoleuit, paulatim subolescentibus bonis literis. Quanquàm super sunt & hodie non pauci uosiffatores, qui quod pueri male didicerunt, non solum ipsi mordicus tenent, uerum etiam ab alijs exigunt. Inexpiabili cõtumelia se putant affici, si quis unum singulari numero saluter: ac plañe rem putant iniuriarũ actione dignam, ac legibus uindicandam. Tu pro tua prudentia quid sit optimum dispi cito. Hic mihi cõtino Tragicum uociferans in re nihili:

d 4 Quid

Quid tu, inquit, me tuissas? tuissa famulos tuos: ego sum
 & te, & tuis omnibus melior. Quid ais hominis mon=
 strum, tu sic appellari dedignaberis, quomodo olim reges
 suos appellabant parasiti? quomodo summos orbis mo=
 narchas olim affabantur libertini, aut è plebe cerdo qui=
 libet? Deniq; quomodo tu ipse deum Opt. Max. compel=
 las? Quur non ut unum alloquar, quum unum uideam,
 etiamsi Polyphemo maior esses? An ideo Athonè montes
 dicam, non montem, quòd ingens sit? An ideo non est
 mare Oceanus, quòd uaste pateat? Adeò qui uix sunt ho=
 mines, ijs nò satis est, si unius hominis loco ducantur. Cæ=
 sari totius orbis monarchæ loquimur: Superi bene uer=
 tant quod agis Cæsar. Et hic indignatur, nisi dixeris: Be=
 ne uertat quod agat uestre dominationes: perinde quasi
 non unum hominem, sed Hecaten quampiã triformem, aut
 Hermetè trismegistum, aut Geryonè tricorporè alloqua=
 mur. Hoc fortassis in muli:re grauida sit tolerabilius, aut
 etiam, si mauis, in scrophæ. Quur à grammaticis distincti
 sunt numeri, singularis, dualis, & pluratiuus, nisi ut ute=
 remur? Honoris, inquit, gratia abutimur. Apte dictum
 abutimur. Nam istud est planè abuti, perinde quasi quis
 soleam utranq; eidē inducat pedi. Sed quis istud iuris uo=
 bis donauit? An æquum putatis, ut honoris uestri gratia,
 præter ueterum consuetudinem barbaræ loquantur homi=
 nes? Quòd si tyrannidem occupatis, ut nouæ etiam lin=
 guæ nobis sitis autores, quur non saltem constatis uobis?
 Etenim si numerus mutatus honorè habet, quur non ead=
 em opera uidetur honorificū, plures singulari numero
 compellare? Quur non idem fit in tertijs personis? Ho=
 norifi

norificum est, si quis Marcolpho dicat, gratulor uobis:
 quì minus honorificum est, saluta eos, cum unum iubeas
 salutari, sed honorabilem? Quur hic honos tantū in pro=
 nominibus situs est? Honorificum est, saluto uos domine
 episcopo: quì minus, saluto uos domini episcopi? Hono=
 rificū est, uidi uos ambulantem: quur non uidi uos ambu=
 lantes, si uni, sed honorato loquaris? Nimirum aucta plu=
 ralitate, crescit honos. Quur in re diuina, edituus non
 hunc in modū respondet sacrifico: & cum spiritu uestro?
 Quur is deo loquēs, audet dicere: presta quæsumus omni=
 potēs deus? Quur nos homunculi nō ueremur illi dicere:
 remitte nobis debita: & ne nos inducas, si tantum honoris
 est in abusu numeri? Certe primus honos debetur deo:
 quur hunc tanto fraudamus honore? quur huic præfiri=
 mus homuncionem? Quid hic respondebunt isti? an nobis
 obijcient heterosin? Audio, sed hac non utantur emēdate
 loquentes, nisi in prima persona, uel modestiæ, uel festi=
 uitatis, uel euphoniæ gratia. In sequunda nunquā, nisi
 quum genus significamus, non personam. Quale est illud
 Nasonis: Quæ uestra libido est. Taxat enim uirorum ge=
 nus, ueluti si quis uni meretrici dicat, uos estis perniciēs
 adolescentum, non unam notans, sed totum ordinem.
 Huic similitimum est illud in tertia persona: Quum ad
 uxores uentum est, tum fiunt senes. Vnde quod olim mo=
 destiæ erat, aut inuidiosum, nūc repēte honorificum esse
 coepit? O imitatores seruum pecus, ut mihi sæpe Risum,
 sæpe iocum uestri mouere tumultus. Istos sefellit, opinor,
 quod ueterum quispiam magistratu fungens, hunc in mo=
 dum scripserit: Considerauimus, retulimus, statuimus, ni=

mirum munus publicū cum suis collegis cōmunicans, & potestatis inuidiam declinare uolens. Hoc, ni fallor, exēplo reges & episcopi cōperunt & ipsi scribere: Nos Ioannes episcopus Cameracensis: Nos Carolus rex Galorum. Nec dubium quin & hoc qui primi cōperunt, modestiæ causa fecerint, uidelicet quò tyrannidis speciem fugerent. Tyrannicum enim uidebatur, potestatem cum nullo prorsus habere communem. Verum is scribēdi mos simul atq; regius haberi cōpit, à nostris honorificentæ causa certatim usurpatus est. Ridicule sanè, nam si modestiæ laus est, ubi quis pro, ego Ioannes episcopus, scribit, nos Ioannes, qui uos Ioannes dicit, pro, tu Ioannes, contumeliosus sit oportet. Nam se deiicere, uirtutis est: alterum contemnere atq; extenuare, maligni est atq; inuidi, si id fiat in absentem: si in præsentem, procacis & cōtumeliosi. Romanus pontifex in suis diplomatis, admiscet nonnunquam, hanc Petri sedem, quam indigni tenemus. Quis ferat, si quis idem dicat illi: Cōfugimus ad istam Petri sedem, quam indignus tenes? Quòd si hæc sermonis ineptiam, idiotarum stulta ambitio cōmentata est, qui deditur orationem habere cum alijs cōmunem, cur cruditi hanc ineptam ac muliebrem inanitatem assentando alunt? Scio deberi honorem magistratibus, parentibus, præceptoribus. Sed hic ridiculus est honos, quem præstat solacismus. Verum largiamur interim, ut tantū ualuerit consuetudo. Neq; enim me fallit in epistolis decimi libri, qui Plinianis per Aldum adiectus est, legi semel atq; iterum sermonem huiusmodi: Vt primum me domine, uestra indulgentia promouit. Quanquā & hic tergiuersari licuit,

licuit, eas epistolas non esse Plinij: deinde hoc ipsum tam raro fieri illic, ut mendum uideri possit. Postremo cum uestra dicit, uoluit senatus auctoritatem cum Cæsaris uoluntate coniungere, quòd sciret hoc esse gratum imperatori modestissimo. Sed ut onussa tergiuersatione, largiamur quod isti uolunt: sit sane ciuilitatis hoc honore blandiri maioribus: sit rustici & inurbani, hoc honoris non reddere: certe nouum insolentiae genus est, non esse còtentum, si quis cui decedat de uia, si caput aperiat: si genus flectat, nisi ridicule etiam loquatur honoris gratia. Scripserit aliquis Traiano, uestra indulgentia: at idem non offenditur, cū toties repetitur, tua pietas, pro uestra pietas. Deniq; non sic illi loquitur Plinius, quum consul illius laudes prædicat, quam orationem oportuit quàm maxime honorificam esse. Isti tam insolitum honorem etiā conuicijs, atq; adeò flagris exigunt à nobis. Domitianus imperator, uir prodigiøse arrogantiae, se deum ac dominum scribere solitus est in suis diplomatis, atque ita se compellari in aliorū instrumentis edixit. At is nemini unquam succensuit, quòd singulari numero compellaretur. Ferri poterat res, si modo sint unico solœcismo contenti: uix duplicatus istorum ambitioni satis facit. Nam oro uos, simplex erat solœcismus, quem istorum insolētia iandudum ut plebeium, nimisq; popularē fastidit, ac renuit. Oro uestrā humanitatē, sesquimendum erit: nihil adhuc nisi uulgaris honor. Oro reuerendissimas humanitates uestras, bene conminatum uitium, mediocris honor est, & serēdus. Adde tertium solœcismū, & plenā inieris gratiam: Oro reuerendissimas paternitates uestras, domine præstantissime. Cumu-

latissi

latissimam uis inire gratiam, quadrigam solœcis morum
facito hunc in modum : Oro reuerendissimas paternitates
uestras, domine præstantissime, domine præsul. Euge euge.
Iste demum honorificentissimus est sermo, dignusq; quo
solenniter adeantur reuerendissimi præsules, ac potentissi-
mi monarchæ. Magis enim ridiculum, quòd quidam ho-
noris gratia personam quoque uertunt dicentes: Manda-
uerat mihi reuerentia sua, pro, uestra, siue tua. Huius ser-
monis ineptiam si quis non uidet, illiteratissimus sit oportet : si quum sentiat, non expuit, patientissimus: si tam ab-
surdam assentationem libentibus etiam auribus haurit, glo-
riosissimus sit oportet. Et hæc sermonis portenta cuius-
quam principis aures ferunt? Et huiusmodi non solum fe-
runt quidam, uerum etiã efflagitant Christianæ modestiæ
columina: ac non parentibus homines seuerissimi grauiter
succensent: adeò ut quibusdam hac de causa dicam fuisse
scriptam sciam, non de asini umbra, quod dici solet, sed de
iniuria nò adhibiti solœcismi. Nuper etiam quidam, gra-
ui nimirum exemplo, ultus est huiusmodi contumeliam, ad
hunc quidem modum. Ab amicis magnus studijs agebatur
apud episcopum quendam, ut quidam spectatis moribus,
egregia doctrina uir, sacerdotio, quod tum forte demor-
tuus uacuum fecerat, in auctoraretur. Negabat uigilantissi-
mus pastor, temere sacerdotia committi oportere inexploratis.
Ipsum qui commendabatur, accersi iubet, uidelicet
de doctrina, prudētiaq; uiri periculum facturus. Adest ille
uir sane antiqua literatura probe præditus, sed syncerus
ac simplex, qui nondum nouum hunc eloquentiæ florem
attigerat: postremò qui præsules omnes putaret didicisse
se lite

se literas. Salutat numero singulari: Salue reuerende præsul. Vix totam salutationem dixerat, auertit se præsul atq; abijt, indignabundus non aliter, quàm si quis in faciẽ illius conspuiſſet. Admirantibus, & causam rogantibus qui salutatorem commendarant, negat se illos conspectu colloquioq; dignari suo, à quibus sic in os contemneretur. Frustra quidam rem purgare nituntur: planeq; surdo canitur fabula. Iratus ille, sacerdotium in alium quẽdam disertioreẽ transtulit, qui quadruplicato solocismo humanissimas reuerentias domini domini salutaret, & qui unum hominẽ in multis, rursus in uno multos uideret. At quanto falsius isti nobis talionem reponerẽt, si ipsi singuli singulariter appellati, nos uicissim binos aut ternos singulari uoce conuenirẽt? Etenim si honorificum est, uni multitudinis appellationem tribuere, ueluti *ὁ ἄνθρωπος ὁ ἅπλος*, quàm erit insignis contumelia, plures singularibus uerbis alloqui: Tibi Paule, nos abbas dicimus: tanquam plures in unum conflati, uix efficiant hominem alii cuius precij. sic erat par pari referendum. Dices optime lector: Rides tu quidem iandudum, & nimis uncis naribus indulges. Quid aliud faciã in re tam ridicula? Nam si plañe contendunt, honoris significationem esse in catachresi numeri, cur frequẽter unicam rem, eamq; friuolã, nihiliq; tricas, apinas, quisquiliãsq; uocamus, multitudinis numero? Quir unicũ instrumentum quo uerrimus pauimentum, multitudinis numero scopas uocamus? Non inuidendus honos istorum, quem cum quisquilijs et scopis habent communem. Hoc etiã interest, quòd nisi multitudinis uocabulo, nemo scopas rectẽ salutauerit, nisi dixerit, saluete scopæ:

scope: quum istis interim studiosa barbarie gratificemur, omnibus quidem grammaticis, ac grāmaticorū filiis iratis. Quid quòd interdum non sine periculo pluratiue conuiciamur etiam, nimirū assueti? Quid enim si strabus quispiam, dubijq; contuitus, uni è multis cōuicium dicat, multitudinis numero: non ne quum oculis quem petit, non distinguat, periculum erit, ne tanquam cōmune maledictum in se quisq; rapiat, & pro uno omnes in miserum strabum conuicia regerant? Id uerò periculosius etiam fuerit cœco. Proinde genus hoc sermonis, quibus est hoc uitij, magnopere fugiendum censeo, ne forte oculorum morbo, plures pro singulis cernere putentur. Sic enim nuper quispiā istiusmodi saluatorē apertè derisit, & asperè potius, quā urbanè: nisi forte uidebitur recte, malo nodo malus questus cuncus. Is enim solus cum esset in conclauis, & à strabo quodam multa cum pluralitate adiretur, iterū atq; iterum circumspectans, respondit, ceteros abiisse, se solum esse: si quid uellet, opportuniore tempore rediret, dum illi adessent. Ille uerò negat se quenquā præter ipsum unum quærere. Tum alter hominem percōtatur, quot illic lectos uideret. Quum unum duntaxat respōdisset, Et quæ tandem, inquit, intēperie te agitant, aut è qua popina nobis probe potus ades, ut ego tibi non unus uidear, sed multi? Et sunt etiam qui rem tam absurdam tueri conentur rationibus philosophicis, ut aiunt. Siquidem Aristoteles scripsit, regē ut ceteris rebus præcellit populū, ita sermone quoq; differre debere. Itidem par esse ut quos conditio, dignitas, opes, cultus, & insignia discernant, discernat & sermo. Nec prorsus alia nota rectius dignosci à priuato magistratum

stratum, quàm abusu numeri, propterea quòd ille unus sit è multis, hic nò simplicè sustineat personā. Papæ, accipio cōmentū: quanquàm apud Græcos istud fiet commodius, quibus tres sunt numerorū differētiæ. Ergo cui geminus sit episcopatus, aut cuius episcopatum abbatia quæpiam opima cōduplicarit, huic dicemus, *χαίρετε*. Quòd si tres sint episcopatus, aut duobus addita abbatia, ternarium illum sacrum ac mysticum expleat, huic dicemus, *χαίρετε*. Hac quidē lege, si *τρεῖς* aut *ἑξάς* numero sacerdotiorum sint prætergressi, æqui dent ueniam, si nostram distinctionem sua ambitione cōfuderunt. Nec uideo qui minus liceat ad hunc loqui modum: Nos episcopi, nos abbates, cui uni plures sint episcopæ, aut abbatiæ. Sed dubitari iandudum potest, isti ne stultiores, qui à re tam absurda, tamen abduci non queant: an ego qui in nugacissimis nugis tantum operæ sumpserim, nisi quòd ut hoc facerem, plurimæ res me cohortabantur, sed due potissimum: tum ut istos apertius irrisos, aliquando suæ stultitiæ pudeficeret: tum uti eos qui plane depudiissent, iuvenes partim ucterum exemplis animati, partim nostris uerbis moniti, non dubitarent cum sua ambitione contemnere. Desinet offendere, postea quàm desierit esse insolens, et aliquando placebit omnibus, quod nunc placet eruditibus.

De salutatione.

Nunc ad præceptiones huic argumento peculiare reuertemur: sed si paucis admonuerimus, quæ sint in salutatione fugiendæ, unde solemus epistolā auspicari, ne pessimi gubernatores uideamur, si statim in portu, quod aiunt, impegerimus. Est enim hæc ceu prima frons epistolæ,
in qua

in qua delinquentē non solū imperitiæ dedecūs, uerum
etiam religionis neglectæ piaculum maneat. Nam à ue-
teribus superstitiose obseruatum uidemus, ut è primis illis
forte congregientium uerbis, futuri sermonis uelut omen
quoddam arriperent. Eoq; qui sibi forte fortuna uenirent
obuiā, quīue quapiam de re inter sese tractaturi congre-
derentur, quò faustus esset occurfus, ac bene ominatus ser-
mo feliciter utriq; uerteret, mutuā salutē dicebant. Et sa-
cerdos quoties prodibat ad populum, salutabat, ac resalu-
tabatur. Ea consuetudo è medijs hominū moribus, in epi-
stolam, quæ, ut dixi, colloquiū est inter absentes, translata
est. Eamq; semper ueteres à dicēda salute sunt auspicati.
Idq; tam à Græcis, quā à Latinis, tertia persona facti-
tatū uidemus: siue quòd usus sermonis rex, personam mu-
tauit: siue quòd studio festiuitas quædā, quam adfert per-
sonæ hypallage, uidetur affectata: siue quòd olim saluta-
tio non adderetur epistolæ, sed in tergo tituli uice adde-
retur, uelut ab eo recitanda, qui literas perferret. M. T.
Cicero Trebatio imperatori S. D. Græci ferme ad hunc
modum, πλάτων ὁ δ' Ὀδῶν ὁ πατήρ. Quæ uerba non
hoc sonant Græcis, quod quidam existimāt, quasi iubea-
mus illos, quos ita salutamus, bene uiuere, sed quòd felici-
tatem precemur. Nam quibus res sunt sequundæ, ij Græ-
cis ὁ πατήρ dicuntur. Quidam pro ὁ πατήρ dicunt
χαίρειν, quod apud nos sonat gaudere. Vtrūq; uno uersu
expressit Flaccus: Celso gaudere, et bene rem gerere Al-
binouano. Latini in hunc ferme modum salutant: M. Tul-
lius Cicero M. Varroni S. D. Plinius suo more addit,
suo, opinor quòd non scribat nisi amicis: C. Plinius Sabi-
no suo

no suo s. d. Hebræi uulgato gentis suæ more, pacē optāt salutantes, siue quòd sentiant belūm ac discordiam esse malorum omnium compendium: siue quòd pacem appellant summam rerum prosperitatem, ubi nihil est quod offendit animū. Auctor est Plinius Auūculus religiosum antiquitus fuisse, nominibus salutare, ne preces, opinor, ambiguae ad alienum auertantur: quemadmodum in deuotionibus nomen addebatur, uelut irrita futura execratione, nisi urbis aut gentis uerum nomen apponeretur. Ergo ne dirum omen habeat epistola, utriusq; nomē in ipso statim ingressu præfandum est, priore quidem loco illius, unde uenit epistola, posteriore eius, ad quem mittitur: etiam si longe sit honoratior cui scribitur, quàm qui scribit. Puerilis mihi uidetur illa nominum honoris gratia transpositio, nisi nobis placebit illa Gnathonis salutatio: Parmenonē suum summū, plurima salute impartit Gnatho. Aut nisi si quis adhuc modum loquatur: Idem equus portabat Cæsarem & Augustam, existimemus hominē læsæ maiestatis reum peragendum: quòd plus honoris habitum sit equo, quàm Cæsari, & eius uxori. Sed extra iocum, mihi probatur ueterum simplicitas, quam utinam per nostræ tempestatis corruptissimos mores ubiq; liceret æmulari, ut nos inuicem nudis nominum titulis salutaremus: C. Plinius Caluo suo s. d. Quid enim erat uerius aut purius? siquidē ubi quis nomē audit, omnes pariter uirtutes suas audit compēdio. Habet præterea nescio quid peculiariter blandum proprii nominis appellatio, quo audito delectari uidentur & animātia bruta. Quo magis istos admiror, qui uocabulum suum quod inditum est in baptismo, non

alijs auribus accipiunt, quàm si atrox ingereretur conu-
 uitium. Stultius, quòd aulici quidam non ferunt, ut libe-
 ri patrem patris, aut matrem matris appellent uocabulo:
 donuus ac domina malunt audire, quum illis uocabulis
 neque sit quicquam honorificentius, neque charius affe-
 ctibus: adeò nihil illis placet cum plebe commune. Porro
 nominum uocabulo, prænomena, agnomina, cognomi-
 naq; complectimur. Prænomena serè à maioribus mutua-
 mur, Marcus Tullius. Cognomina pleraq; gentilia sunt,
 Bruno Amorbachius. Agnomina solent ex euentu quo-
 piam accrescere. Scipio Aphricanus, Cato Vticensis. Ho-
 die cognomina aut gentilitia sunt, quemadmodum apud
 Italos, Medicum, Baptistarum, Balborum. Aut à loco du-
 cuntur, Angelus Politianus. Nam præter ueterum con-
 suetudinem faciunt, qui paternum nomen cognominis ui-
 ce subiiciunt: ut si quis Antonium Dionysij filium, Anto-
 nium Dionysium appellet. Cæterum qui parentis uoca-
 bulum, gignendi casu subnectunt, magis refrût Hebræo-
 rum consuetudinē, quàm Romanorum: Iacobus Alphæi,
 Ioannes Zebedæi, Petrus Simonis. Iam barbara, nonnun-
 quam & sono absurda uocabula uel hominum, uel loco-
 rum, uel familiarium, aut Latinis Græcis'ue uocibus red-
 denda sunt, aut in Latinam faciem commode deflecten-
 da, ut ab idiotis etiam uulgatum nomen agnoscatur: ut
 quum pro Barbir, quod uulgo tonsorem sonat, Barbiriū
 dicimus, pro Buscid, Buslidium, aut pro Lang, Lan-
 gium. Quod idem in Græcis & Hebræis sibi permittunt
 eruditi: ueluti cum pro elephas, dicunt elephantus, pro
 Adam Adanus, pro Abraham Abrahamus. Quibusdam
 reli

religio est, cognomen gentis immutare. Sed sunt quædam adeo barbara, ut stridores sint uerius, quam uoces: præsertim nonnunquam apud Germanos monosyllaba quinque conferta consonantibus, quæ ne sonari quidem possint ab eius linguæ rudibus: quæ si molliri non poterunt, in Græcas aut Latinas uoces uertentur. Cognomētis quæ ducuntur à loco uel originis, uel domini, quidam dure addunt præpositionem, Picus de Mirandula: Latinius est, Picus Mirandulanus: tolerabilius putant, Picus à Mirandula. Ac fortasse licebit unum aut alterum exemplum apud autores inuenire, ubi addatur, de: sed pueri quod optimum est primum assuescant imitari. Non abhorret à ueterum consuetudine, nonnunquam ijs quæ diximus, magistratus, professionis, cognationis, aut etiam affinitatis cognomen annexere: idque contra recentium morem, qui honoris gratia præponunt dignitatū uocabula: Beatissimo papæ Alexandro sexto. Veteres contra: Trebatius M. Tullio Cic. imperatori. Hieronymus Damaso papæ. Budæus Copo medico regio. Erasmus Ioanni Coletto theologo. M. Cato Bruto consuli. M. Tullius Quinto fratri. M. Brutus Portiæ uxori. Optarim, si fieri possit, nihil adulationis admisceri titulis. Erras autem, si te laudari putas, quum episcopus scriberis, aut theologus. professionis ista sunt nomina, non gloriæ. Is demum te laudaret, qui bonū episcopum, aut eruditū theologum scriberet. Tolerabile fuerit si uxorem charissimam, aut liberos dulcissimos appellemus, aut patrem optimum. Porro quoties docti plussculum admiscent honorificentie titulis, non suo seruiunt ingenio, sed alienis obsequiunt. Istos nemo modestus

feret, opinor, qui prodigiosis assentationibus salutationem infarciunt: ac tum existimant salutationem esse miræ rhetoricam, ubi nōnunquam ipso etiam hominis nomine præternisso, hunc solem dixerint, alium lunam: hunc luciferum, alium cynosuram, aut lucernam ardentē, speculū sine macula, turibulum odoriferum, pyxidem unguentariam, candelabrum aureum, uirtutum sacrarium, disciplinarum thesaurum, omnis scibilis gazophylacium, phœnicem, aquilam, uitem, hortum, flumen, fontem, pelagus, apicem, culmen, florem, gemmam, iubar, fulmen, paradisum: deniq; rerum omnium laudabilium copię cornu. Et quid non? Ita nouus hic saluator iuxta Comicum, uenustum dat adueniens principium. Atque etiam ne parum sint Gnathones, quemadmodum alios inuodice efferunt, ita sese pari uenustate deiciunt, atq; extenuant, seruulos à pedibus, uilissimā mancipia eius cui scribunt appellantes. Huius salutationis exemplum hoc erit, si quis fortè requireret animi causa: Perspicacissimo domino, septem artium liberalium candelabro aurco. Radiāti Theologorum apici. Religiosis lucernæ semper fulgenti. Dominicalis ordinis lucifero. Vtriusq; testamenti gazophylacio. Heresiarcharum malleo, Omnium uirtutum heroicarum et non heroicarum, speculo limpidissimo. Dignissimo domino meo domino præceptorī, humilimus dominationis suæ discipulus, et uilissimus seruator, oscula pedum pro salute. Rides exemplum? Sanè meritò rides, sed huiusmodi non solum utuntur isti, uerum etiam libris editis præcipiunt adolescentulis. Hæc noua salutandi uenus priscis incognita, tum demum nata est, ubi profligatis linguis, exactis bonis autolibus,

ribus, quos illi poeticos uocant, in ludis literarijs pro grammatica tradebatur Michaël Modista, pro rhetorica similes nugæ. Quis unquam Gnatho, aut Colax, aut Gelasinus, usque adeo fuit impudens, aut in tantum esuriit, ut istiusmodi uerba regi suo ausus sit in os dicere? Qui plagas pati possunt, qui iure perfundi, qui offe peti, qui commingi sustinent: tamen non sustinent sic salutare, quemadmodum nos Christiani grauib. etiam uiris adularmur. Quādo Plautus ille parasitorū licetiosus et immodicus effector, ausus est talem inducere in fabula? Si Christianam simplicitatē tueri non libet, simus uel ethnicorum exēplo paulo minus impudētes. Paulus scripsit, inquit, Honore inuicem præuenientes. At apostolus illic non de salutatione, sed de subsidio loquitur: sic enim ille solet honorem appellare. Quod si uitari non potest, quin blandius agatur cum eo, cui scribitur, est uerecundius quoddam assentandi genus. Sunt figuratæ laudes: his epistolam, quanta erit, expleas licebit. Verum in ipsa statim salutatione, tam impudentem Gnathonismum, obsecro, quis ferat, nisi aut Mida stolidior, aut Thrasone gloriosior? Aequè uitio dandum est, quod quidā in principum literis faciunt, eius cui scribitur, aut qui scribit titulum, trecentorum cognominum longa serie in decimum usq; uersum producere: Iustinianus Imperator Caesar, Flauius, Alemanicus, Gothicus, Frācicus, Germanicus, Anticus, Slauius, Vuādalicus, Africanus, pius, felix, inclytus, uictor, ac triumphator, semper Augustus. An non fessus lector, epistolam parabit abijcere prius, quā ad epistolam peruenerit, nisi coronidem quam recensendis titulis finire

non poterant, per & cetera præcidissent? Ridendum & illud salutadi genus, inepte fucatum, quod Carolo Louanienſi quoq; cum primis arruisse uidetur: quo salutis loco nunc hoc, nunc illud apprecamur: ueluti, Midæ diuitias, loco salutis. Aut, humilimam recommendationem, uice salutis. Promptam cum debita ueneratione seruitutē, loco salutis. Hæc equidem deliramenta inuitus refro, sed aliter dedoceri non poterant. Et in primis hæc sunt dediscenda: tum quod salutationem uerbis superuacancis onerant, puritatemq; ac simplicitatem corrumpunt: tum quod stultissimum uidetur, aliquid salutis uice subijcere, quum ipsa salute nihil sit melius. Eiusdē ineptiæ sunt illa: Quot habet cælum stellas, quot habet mare guttas, tot tibi mitto salutes. Quod si quando pietate commendati uiri secus atque nos docemus, salutarunt: præpostere fecerimus, si à quibus uiuendi petenda fuerant exempla, non loquendi, in his quod optimum habuerunt, negligemus: quæ pessima, ea sola nobis proponemus. Neq; si quando D. Hieronymus, D. Augustinus, D. Gregorius suorum temporum consuetudini concesserunt, id nunc oportebit in ludum literarium uocare, præsertim hac tempestate, qua nihil est omnino literis cum uulgo cōmune. Postremò quid absurdius, quàm ex magni nominis autoribus nihil imitari, nisi quod erat contemplatione cæterarum uirtutū ferendum? Post expressas reliquas Hieronymi uirtutes salutationis nouitatem condonabimus. Quod si non potes, noli huius prætextu tueri, quod tempori suo dedit ille, non iudicio. Sed offendemus, inquit, si tuis præceptis parebimus. Quis enim non hanc salutem, Petrus Tartaretus Henrico

rico Bedæ theologo s. d. cōtumeliā interpretetur potius, quā salutem? Verum ego non in hoc hanc operam suscepī, quò docerem sermonem stultorum auribus atq; animis accommodare, sed ut recte scribendi rationem traderem. Neque tamen usque adeo desperandum existimo nostrum hoc seculum, ut errorem quem corrupti mores hominum, & inscitia potuit inuehere, cum bonorū, & eruditōrum uirorum autoritas & usus non possit reuellere. Videmus quantum profectum sit paucis annis. Vbi nunc in scholis auditur Michaël Medista, ubi glossa Iacobi, ubi citatur Catholicon, Brachylogus, aut Māmætrektus, quos olim ceu rarū thesaurū, aureis literis descriptos habebant monachorū bibliothecæ? Certe semper erit ad optima conandū. Si statim sanctum erit, & ἀγιον, quicquid hic aut ille deprauarit in studijs, neq; quod deprauatum fuerit, restituere licebit, quò tandem recident literæ? Deniq; si istis crassis licet ueterum eruditōrum exemplum contemnere, nobis uicissim non licebit istorum indocile inscitiam pro nihilo ducere? Quòd si quid à ueterum consuetudine licebit innouare, si uidebitur aliquid dandū eius animo cui scribitur, aut publicæ consuetudini, tolerabitur quidem: modo absit enorme uitium, hoc est, ne salutatio sit uel loquacitate molesta, uel assentatione parasitica, uel affectatione morosa, ne quod diximus, pessimū sit omē toti epistolæ, si statim à uitio fecerit auspicium.

Simplicis salutationis aliquot formulæ.

Salutationum quæ præter indicium nihil habent, formule sunt huiusmodi: Pius pontifex Romanus eius nominis primus, Lodouico Gallorum regi, eius nominis

undecimo s. D. Tiberius Cæsar senatui Romano s. D. Senatus P. Q. R. Machabæo duci, & socijs Iudeis s. D. Horatius Trib. milit. Bruto Imperatori s. D. Henricus Angliæ rex Maximiliano Cæsari s. D. Demetrius eques Romanus Tito Lucio iudici selecto s. D. In huiusmodi nominibus officiorum plerunq; hæretur à doctis, partim quòd incertum quæ ueterum nomina, quibus nunc respo- deant: partim quòd pleraq; iam recepta sunt, peregrinis ac barbaris uocabulis. Siquidem quem olim urbis præfe- ctum uocabant, nunc alicubi uocāt Marchionem, alicubi locum tenentem: quem tribunum plebis, nunc ciuium ma- gistrum uocari credunt. Quem olim questorem ærarium, nunc reddituarium uocant, siue receptorē. Quos olim ra- tionales, nūc, opinor, phinantiarios dici. Quos olim quæ- stores patricidij, nunc scultetos. Quos olim caduceato- res, nunc hiralDOS. Quos olim senatores, seu selectos iudi- ces, hodie uocant dominos parlamētares. Nam Ammiral- dus pro littorum curatore, siue maris præfecto, nesciò cui- ius linguae uerbum est. Quod genus sunt & illa, Mari- schalcus, Seneschalcus, Baro, quæ uidentur unā cum bar- barico imperio inuasisse. Aut igitur his utendum, aut ue- tus aliquod uocabulum subiiciendum, quod nouo respon- deat. Id commodius faciet, qui primum ex antiquis histo- riographis, è Varrone, è Cicerone de legibus, è iurecon- sultorum libris, ex libello Fenestellæ, quem ex professo scripsit, & inscripsit De magistratibus, animaduertent singulorum & uocabula, & functiones. Item huius tem- poris officia, quibus uerbis dicantur, & quibus in rebus uersentur. Eandem curam oportebit adhibere in conse- rendis

rendis Græcis ac Latinis officiorum uocabulis. Nam illi
 ἑταροῦ, hoc est, summum, uocant consulem, ἀντιπατοῦ pro
 consulem, ἀντιπατοῦ dictatorem, seu imperatorem, quem
 eundem interim ἑταρία uocant: sed hæc res plus ha-
 bet negotij, quàm ut hic sit obiter tradenda. Argumen-
 tum hoc proprium uolumen postulat, tantum indicabo,
 quibus rationibus cognitum magistratum possis circui-
 tione notare. Qui præest describendis epistolis, et uulgò
 secretarius dicitur, uocabitur ab epistolis: qui schedas cita-
 torias scribunt et notarij uocantur, dicetur à libellis: qui
 thesauro præfectus est, à thesauris: qui cubiculis, à cubicu-
 lis, quem cubicularium, siue camerarium uocant: pocilla-
 tor, à poculis: scriniorum præfectus, à scrinijs. Qui notant
 ac recitant acta in iudicijs, ab actis dicuntur, siue actua-
 rij. Atque item de cæteris.

Nouæ salutandi formulæ.

Pliniano demum seculo natum uidetur, ut quos fami-
 liarius amarent, eos in salute suos dicerent, blandio-
 re scilicet pronomine, coniunctissimam necessitudinem si-
 gnificantes. Plinius Calphurniæ suæ s. D. Ebutius Hispa-
 la suæ s. D. Quod si nobis permittimus à cōsuetudine ue-
 terum recedere, tot poterūt esse in epistolis salutandi for-
 mulæ, quot in congressu. Salue pater optime. Salue mater
 optima. Saluete liberi dulcissimi. Salue mea Terentia cha-
 rissima. Salue multum. Salue plurimum. Salue etiam atq;
 etiam. Salue quātum mereris. Salue pro tuis meritis. An-
 tonius Licentio suo multam optat salutem: plurimā salu-
 tem: perennem salutem. Nam plurimas salutes, aut innu-
 meras salutes, non ausim dicere, nisi sentiam à diuersis al-

latus. Politianus Marcilio suo multam ex animo precatur salutem. Erasmus Fausto suo multam optat faustitatem. Andreas Aegidio sodali iucundissimo multam optat filicitatem. Antonius Laurentius Marco fratri charissimo perpetuam optat incolumitatem. Terq; quaterq; saluem meū praesidium. Saluere te iubet tuus Ludouicus. Saluere te iubet, qui ipse non saluet. Salutem tibi dico, quam ipse desidero. Salutem tibi mittit, qui ipse perijt. Salutem tibi mittit, quam ipsa, nisi tu dederis, non est habitura. Saluus sis optime socer. Aue praceptor optime. Has itaq; atque huiusmodi formas, quanquam nonnihil diuersas à ueterum consuetudine, tamen non uideo quur oporteat in totū damnare, modò in loco adhibeantur. Illud genus non perinde probo, Salua sit tua praestantia, tua reuerentia, tua nobilitas, tua dominatio.

Quomodo per alium salutandum,
aut resalutandum.

CRebrum & hoc in epistolis, ut per alios salute-
mus alios. Id apud eruditos ferè fit his modis. At-
tico nostro multam ex me salutem dicito. Vxorem tuam
ac liberos mellitissimos omnes meis uerbis saluere iube-
bis. Generum mea causa salutabis officiose. Amicis omni-
bus communem ex me salutem dicito. Parentem opti-
mum meo nomine salutabis diligenter. Fac ut amicis com-
munibus mei uice salutem annunties. Totam familiam
tuam per te meis uerbis salutatam uolo. Non erat otium
omnibus scribendi, sed omnibus pro me multam dices sa-
lutem. Tu mihi apud amicos omnes uicarius esto salu-
tator. Omnibus ex me annuntiabis, me illis omnia leta
preca

precari. Gener tuus iussit, uti suis uerbis tibi multam salutem ascriberem. Socru tua optabis prosperam ualitudinem meo nomine. In salutandis amicis, quoniam in praesentia mihi non uacauit scribere, fac Erasmi tui uices gnauiter obeas. Quam blandissime salutabis Antonium, sed meo titulo. Salutasssem abbatem meis literis, sed tu mihi apud illum epistolae uice fueris. Grauabo te non magna sarcina, ut meo nomine salutem perferas ad socrum meam. Quaeso ut sodalitatem totam mihi salutes accurate.

Reddita salutatio per alios.

Attica, quam illi tuis uerbis dixi salutem, libenter accepit, teque uicissim per meas literas saluere iussit. Tuam salutem Attica libens accepit, ac suam remittit. Ambrosius salutem quam illi tuis uerbis renunciaui, totidem uerbis renumerat. Amici per me tuo nomine diligenter salutati, dederunt hoc negotij, ut te uicissim suo nomine iuberem saluere. Gencro tuis uerbis salutem scripsi, nam aberat: is suo nomine tibi multam salutem iussit rescribi. Socer tuis uerbis per me salutatus, te uicissim meis resalutat. Qui me per te salutant, hos omnes mutua salute meis uerbis imparties.

De epithetis & nominibus adoptiuis.

Nonnunquam urbanitatis & comitatis est, addere honoris, aut adoptiua cognomina: quorum posterius exemplum est, ut si senem bene de nobis merentem, appellemus patrem: iuuenem nobis charum, filium: nouercam, matrem: sororis maritum, fratrem: quibus adiunguntur & epitheta, quae Fabius uertit, apposita. Haec ueteres parcius aduſcebant titulis, etiam si recentium consuetu

suetudo diuersum obtinuit : sed horum maior erit usus in media epistola. In his illud in primis erit obseruandum, ut si tribuenda sunt, tribuantur apposita personis, & rei de qua agitur. Ecclesiasticis dignitatibus hæc ferè cōgruunt, Beatissime Papa. Pontifex maxime. Summe pontifex. Amplissime pater. Sanctissime præsul. Vigilantissime pastor. Sacratissime pater, uenerande, suspiciende, obseruande, integerrime, religiosissime pater.

Principum epitheta fere sunt huiusmodi.

CAesar Auguste. Rex inuictissime. Fortissime imperator. Dux illustrissime. Clementissime princeps. Vir generosissime, præpotens, ornatissime, clarissime, splendidissime, Opt. Maxime, quod à Ioue sumptum, quidam in Christum transferunt, in quem uerius competit, quam in Iouem. Nonnulli etiam ad summos monarchas traducunt. Diuos, ac deos appellare reges, ethnici cuiusdam Gnathonismi est. Dominos appellare, barbaricum, etiam si cœpit hoc nomen ferre Romana lingua, postquam ingenia iugum tyrannicum ferre poterant : mox ecclesiæ proceres, quò differrent à prophanis, pro dominis, domni uoluerunt appellari.

Magistratum ciuiliū epitheta fuerint hæc.

Consul uigilantissime. Senator splendidissime. Censor grauiissime. Aedilis magnificētissime. Iudex incorruptissime. Prætor integerrime. Ex his uero qui literas profitentur : Theologos graues, synceros, absolutos, sacros, ac diuinos appellabimus : Rhetores disertissimos, suauiloquentes, facundissimos : Poëtas sacros, diuinos, claros, nobiles, inclytos : Iurisperitos, iuris utriusq; consultissimos, prudent

prudentissimos legum, iuris utriusq; iuxta doctos : Dialecticos, acutos, argutos, inuictos: Medicos peritissimos, finidos, eximios: Mixte doctos, undecunq; doctissimos.

Cognatorum & affinium hæc fere
sunt epitheta.

Pater optime. Mater indulgentissima. Frater charissime. Patre obsequande. Soror charissima. Vxor suauiissima. Nepos mellitissime. Iucundissime gener, affinis, sodalis, commulito. Ex reliquorū genere, qui nulla certa nota sunt insignes, diuites & autoritate præstantes viros appellabimus: Optimates viros, summates, primarios, nobiles, graues, grauiissimos: Ornatos uirtute aut eruditione præcellentes: Obseruandos, honorandos, colendos, absolutos, eximios, egregios, prudentes, suspiciendos, spectatos, perspicaces, circumspectos. Matronas nobiles, primarias, optimas, integerrimas, probas, pudicas: Puellas, lepidas, bellas, amabiles, optime moratas, pudicas, iucundas, mellitas: Adolescentes ingeniosos, probos, modestos, optimæ spei, eximie indolis, generosæ indolis: Milites, fortissimos, exercitatissimos: Opifices, industrios, solertes, peritos, exquisitos, accuratos. Reliqua sibi quisq; ex his quæ recensuimus inueniet. Atq; hic quidē cautio sit oportet, non solum ne quæ alijs congruunt, in alios trāseramus: ueluti si quis puellā uenerandā, senem iucundissimū, regem pudicissimū, matronam inuictissimam nominet: Verum etiam ne quando manifesto, falsa tribuamus, ut theologum male doctum grauiissimum potius appelles, quàm eruditissimum: Præsulem stupidum ac supinū, quiduis potius, quàm uigilantem: Regem insigniter auarum, clementē magis dicas, quàm

quàm munificū. Etenim sibi quisq; conscius, hæc in contumeliam rapit, non aliter, quam si deformem senem, formosum puellum appelles, aut pumilionem egregiam heroa.

Vbi, & quomodo potissimum utendum epithetis.

Hæc, ut dixi, in salutationibus optarim parcius adhiberi. Cæterum in media epistola quum res agitur, erit his aliquando locus. Quamquam nec hic passim quæuis, & sine delectu erunt adhibenda. Nam ut boni ducis est unumqueng; militem, ita boni oratoris est, unamquamque uocem eo statuere loco, ubi quàm maxime possit usui esse. Veluti principem cui gratias ages pro accepto munere, aut à quo uelis aliquid impetrare largitatis, tempestiuus munificentissimus, aut benignissimus nominaris, quàm fortissimus, aut inuictissimus. Adhibebimus autem in loco, si dicemus: Ignoscas primo errori, dux mitissime. Patere te exorari clementissime Cæsar. Turcarum uim à Christianorum humeris depelle rex inuicte. Succurre periclitanti ecclesiæ, religiosissime princeps. Resistue per calumniam oppressos, æquissime prætor. Non est meum tibi consilium impartiri, uir oculatissime. Tuo consilio nobis subueni, uir prudentissime. Siquidem in his orationibus non sunt otiosa epitheta, sed argumenti uim obtinent. Ut enim probes non esse tuum illi dare consilium, assumis argumentum, quòd ipse quum sit oculatissimus, domi consilium habeat, nec egeat mutuo.

De transfigurandis epithetis.

TRansfigurantur hæc appositiva nomina nonnunquam haud ineleganter in substantiua, itaq; pro
nomi

nominum uicem gerunt: Obsecro te pater pijsime. Obsecro tuam pietatem pater. Gratulor tibi uir fortissime. Gratulor tuæ uirtuti. Condone mihi hunc errorem uir mansuetissime: Condonet mihi hunc errorem tua mansuetudo. Nostræ stultitiæ præsidio sis, quaeso, uir sapientissime: Nostræ stultitiæ tua sapientia sit præsidio. Compesce improborum audaciam uir integerrime: Improborum audaciam tua compescat integritas. Publica calamitas implorat te princeps clemētissime: Publica calamitas implorat tuam clemētiam optime princeps. Succurre religioni Christianæ pijsime Cæsar: Tua pietas Opt. Max. Cæsar, succurrat religioni Christianæ labantī. Non est hominis imperiti, uiro prudentissimo consilium dare: Non est meæ imperitiæ, tuæ prudentiæ consilium dare. Te, inquam, appello uir impudētissime: Tuam, inquam, appello impudentiam. Nonnunquam uehementiæ causa rem duplicamus, sed inmutata uoce. Succurrat mihi tua benignitas liberalissime Mecenās. Te omnes execrantur homo ignauissime: Tuam ignauiam execrantur omnes homo formidolosissime. Demūror te homo ueracissime: Veraciam tuam admiror, o demens. His igitur, si modice & in loco utemur, & grauiorem amplificando reddemus orationem, & argumento iuuabimus sententiam, & sermonem grata uarietate nouabimus. Nam uulgo scriptorum in huiusmodi neque modus est ullus, neque tempestiuitatis ratio. Sic enim passim: Dominationis tuæ literas accepimus. & Reuerendissima tua præstantia mihi literis significauit. & Nobilitas tua meo nomine salutabit uxore suam. Et, Charitati tuæ breuiter respon

respondeo. Et nostra paruitas, dignissimæ paternitati tuæ gratias agit. Stultum est ita uitare personam, quasi fas nō sit ea uti. Et tamen fateor alicubi gratiam habere uocabulum qualitatis personæ loco submissum. Stultitiæ meæ prudentia tua sit præsidio. Nostram tenuitatem tua foueat liberalitas. Nostram inopiam tua cōpia sustineat.

De adoptiuis nominibus.

VT autem redeamus ad id, quod superius attigimus, iisdem locis gratiā habēt adoptionis uocabula: quoties potentes, quorum autoritate subleuamur, quorum beneficentia adiuuamur, patronos, parentes, ac præceptores nominamus: Fœminas, patronas, ac matres: Aequales amicitia iunctos, fratres, ac sorores: Eiusdem studij sodales, aut eiusdem instituti professores, commilitones, adulescentes, filios, discipulos, alumnos.

De superstitione epithetorum.

Fugienda est infelicitas eorū, qui se certis uocibus alligāt, quas magica penē dixerim superstitione uel mutari, uel inuerso proferri ordine, piaculū existimant, perinde quasi Iouē conceptis uerbis euocēt, aut noxios demones asciscant. Quos nisi rite, certisq; uerbis compelles, capitis tui piculo feceris. Beatissime pater, audit Romanus pontifex. Si scripseris, pater beatissime, rescinditur diploma. Audit sanctissimus pater; Si quis scribat, pater sanctissime, mutatur scriptū. Audit sanctissimus dominus noster: nisi addas noster, aut si præpostere dixeris, noster sanctissimus dominus, ingēs flagitiū cōmissum putabitur. Simili superstitione receptū est, ut cardinalibus tantū, reuerendissimas dominationes tribuamus. Archiepiscopos re-

ueren

uerendissimos appellemus. Episcopos & Abbates reuerendos. Priores uenerabiles. Decanos spectabiles. Vnum Gallorum regem Christianissimum. Solum Hispaniarum regem catholicum. Angliæ regem serenissimum. Solum Casarem semper Augustum. Duces illustrissimos. Alios inferioris nobilitatis tantum illustres: alios clarissimos. Quis hanc titulorum superstitionem inuexit in mundum? Nimirum pharisaicum illud hominum genus, quod alijs quoque caeremonijs, & falsæ doctrinæ, falsæq; religionis præstigijs, diu mortalium generi nimium credula imposuit. Huiusmodi reuerendissimis dominationibus, & catholicis maiestatibus, amplissimis paternitatibus subinde repetitis, bonam epistolæ partem occupamus, & Latini sermonis gratiam perdimus. Ignosco ijs, qui utuntur inuiti: non ignosco, qui hæc cōmuniscuntur, aut qui exigunt ceu rem seriam. Quid enim si regem pro patriæ salute sese periculis obijcientem, pro catholico, aut Christianissimo dixero, patrem patriæ: ridebit, opinor, me crasso Calphurnius ore? Quid si Romanum pontificem, non ambitioni, non quæstui, non uoluptatibus, non tyrannidi inhiantē, sed CHRISTI gloriæ, Christianiq; gregis saluti seruientē dixero pastorem euangelicū: an non appositius loquar, quàm si dicam, beatissime pater, cum beati cognomen quadret etiam in diuitem? Si uere talis est pontifex, tribui dignum titulum: si non est, submonui qualis esse deberet. At isti putant aliud esse, dominus Petrus, & Petrus dominus. Et prophanos honoris gratia semel dominos appellandos, ecclesiasticos, dominos dominos. Cæterum abbates aut episcopos, dominos. Quod si domi-

f nici

nici uocabuli congeminatione facit ad significationem dignitatum, quoties eos uocabimus dominos, qui plus quam uiginti sacerdotibus onusti sunt? Et de his tricis, doctissimi scilicet homines sudantes disputant, cum utrumque iuxta sit barbarum. Conditionis nomen dominus est, non honoris: tyrannicum, non magnificum: barbaricum, non Romanum. Nam et lenonem cui mancipia sint, dominum recte dixeris. Item magistram nostrum si dicas, theologum intelligunt, praesertim Lutetiae, et Louanii, quum calciariorum famulus suum patronum, inter se confabulantes, nostri magistri uerbis significant. Veluti quum aiunt, ubi cessat noster magister? Temulentus est alicubi noster magister. Utinam nunquam domum redeat noster magister. Quod si capra loqui possent, pastori suo dicerent, noster magister. Tantulum interest inter caprarium abiectissimum et idiotam, et inter sacrosanctum diuinæ mentis interpretem. Dicent: Quid faciam, si quis honoris gratia me uocat magistrum nostrum? Ride, moue caput, et desinent te sic honorare, si senserint aures tuas non delectari titulis ineptis.

Quomodo dicendum, Vale.

Quemadmodum à salutatione auspiciamur epistolā, ita dicto uale, claudimus. Nisi quod apud Græcos *Χαίρειν* utroque loco ponitur, sed in calce rarius. Item apud Latinos salue. Vale non dicitur, nisi in digressu, quemadmodum nec apud Græcos *ἰσχυρῶς*. Hoc interest, quod saluatio nonnunquam sic effertur, quasi recitetur à tabulario. Cicero Trebatius salutē dicit. Vale, semper ad scribentis personam accommodatur. Vale mea Teretia. Nemo sic

fic scribit: Cicero Terentiam suam bene ualere iubet, quemadmodum: Cicero Terentiam saluere iubet.

Vale dicendi formulæ aliquot.

Vale. Vale recte. Bene uale. Cura ut quàm rectissimè ualeas. Etiam atque etiam cura ut ualeas. Da operam ut belle ualeas. Communem ualetudinem fac cures diligenter. Si tu recte uales, nos iandudum ualemus. Valetudini tuæ, si quidem nos ualere uis, omni sollicitudine fac scruias. Adnitere ut quàm optime ualeas. Sit tibi curæ tua ualetudo mi Tyro. Si quidem nos amas, ualebis mi Cicero, meq; mutuò diliges. Fac ualetudinem tuam summo tueare studio. Valeto. Scribā aliās copiosius, interim mihi ualebis. Adero ad calendas Maias, interea curabis ut ualeas. Da operā ut sis prospera ualetudine. Age curā ualetudinis tuæ. Si quid erit quod uelimus eius cui scribimus animo inherere, solet post uale subijci: Vale, nosq; quod soles, ama. Vale mi Petre, et hoc unum fac memento, te inter uenena uiuere. Iam uale. Valebis autem, si philosophiam amplecteris. Vale, et quicquid acciderit, cogita te mortalem esse. Vale nostri memor. Valeto, et nominis immortalitati totis neruis incumbito. Vale meum decus, et caue ne tibi excidat, quod admonuimus de fractis negocio. Nonnunquam et post dictum uale subijcimus, quod nos sugerit, aut quod ideo fingimus nos fugisse, quò tenacius infideat animo. Vale mi More. Sed heus tu, propemodum præterieram, quod in primis dictum oportuit. Vale. Iam parabam obsignare literas, sed quia præter spem ocij nonnihil obtigit, libet etiā diutius tecum garrire. Vale. Sed iam obsignaturo epistolam, illud per-

commode uenit in mentem. Valebis. Sed mane paulisper: nunc demum occurrit animo, quod primo loco dictum oportuit. Vale. Sed ô me obliuiosum, penè sero soceri tui negotium mihi uenit in mentem. Vale. Iam ceræ ad-moueram anulum. Papæ, quàm penè me fugerat, quod omnium maxime scire te uolebam. Valebis. Sed si illud prius admonuero, ut à fucatis amicis te subducas. Vale. Eia, de libro nunc demum sese offert memoriæ: ne cui credas, nisi uideris meum chirographum. Vale iterum atque iterum. Equidē non possum desinere, adeò mihi dulce est cū amico iucundissimo confabulari. Vale iam tertio. Sed prius quàm obsignem epistolam, unum illud addam. Vale. Iam epistolam complicaueram, cum adiret me gener tuus, qui te iussit saluere plurimū suis uerbis. Iam obsignaram epistolam, quum alteras tuas ad me literas reddidit ueredarius. Itaque resignaui, & eadem opera binis tuis respondēdo. Huiusmodi figuræ non hoc tantum in loco, uerū aliās etiam habent gratiam, si quid Fabio credimus. Nam & amouent suspicionem fuci, & artificij, & lectorem dormitabundum, uelut ad rem nouam expergefaciunt. Reperiuntur apud Christianos dicendi uale formulæ diuersæ ab his, non tamen in totum damnandæ, mea quidem sententia. Incolumem te nobis diu seruet Opt. Max. Iesus. Faxit Christus autor omnis salutis, ut nobis & quàm diutissime, & quàm rectissime ualeas. Diu te nobis ac Reip. sospitem uelit esse dominus Iesus. Huius generis formas si quis effingat accommodas, non arbitror reprehendendum. Ceterū alienas illas coronides, dureq; affectatas, non frā. Vale in eo qui uastum cingit fluctibus orbem. Vali-

dum

dum te seruet, qui mare & terras, uarijsq; mundum temperat horis. Quid enim terra mari cincta facit ad ualitudinem tuam? Aut quid annus in quatuor partes digestus? Mollius erat: Ille qui solus sanat omnem ægritudinem, donet tibi ut quàm optime ualeas.

Quid post uale.

Post uale continenter locum ac diem ascribunt ueteres. Locum uarie, his quidem modis. Datum Romæ, datum è Roma. Scriptum Mantuæ, siue è Mantua. Aut omisso participio, Carthagine, Lutetiæ, Athenis. Ex arce nostra. E' uilla paterna. Ex nostro Formiano. E' castris Cæsarianis. Ex regia Britannicæ. Ex nostro museo. E' nauis. Ex pandoecheo. Nam hoc quoque nonnunquam iuuat discere, ubi fuerit amicus qui scribit. Et locus ac tempus nonnunquam excusat epistolam neglectius scriptam. Tempus priuatum his ferme modis ascribitur. Ruri ad multam noctem. Puteolis prima luce. Ex hortis suburbanis. Inter conandum, aut mox à cœna. E' paternis ædibus crepusculo. Ex littore marino ad lunam. Ex aula Cæsaris, nocte concubia. Noctu, multa nocte, profunda nocte, alta nocte, plurima nocte, nocte intempesta. Sub gallicinium. Ex balneis pomeridianis. Tempus publicum his rationibus additur: Anno à Christo nato, millesimo quingentesimo. Anno à natali Iesu Christi quingentesimo supra millesimum. Anno à uirginis partu, millesimo trecentesimo nono. Anno ab orbe redempto, post millesimum quingentesimo. Anno à Christo passo, sexagesimo sexto. Anno ab hominum genere restituito. Anno salutis humanæ. Quidam auspiciantur annum à natali Christi, quidam à calendis Ianuarijs,

quidam à die paschæ, quidam à festo annunciationis. Atq; ex hac re sæpenumero captio nascitur parū attentis: quā uarietatem expediret tolli è rebus mortalium. Veteres ab orbe condito supputabant. Græci numerabant Olympiades, quemadmodum alij indictiones. Romani primum ab urbe condita numerabant: mox per consules designabant annum, quòd is magistratus esset annuus. Ascribitur et mensis, et dies mensis. Romæ calendæ Ianuarijs, siue Ianuarij. Ad calendæ Ianuarij, uel Ianuarias. Nonis Martijs, uel Martij. Idibus Iunijs, uel Iunij. Ad Idus Iunias. Pridie calendarum Ianuarij, uel pridie calendæ Ianuarij. quod posterius apud autores probos est usitatus. Postridie calendæ Octobres, uel calendarum Octobrium. Tertio calendæ Augustas, uel Augusti: uel, ad tertium calendæ Augustas. Recentius est autem, quòd quidā à principe mensis die supputant: Die mensis Iulij uigesimooctauo. Errant autem, qui præpositionem ad, additam, existimant semper tempus reddere incertum. Etenim quum M. Tullius frequenter sic ascribit diem: Ad x v. Cal. Febr. num ita potius erat, ut quo die scriberet, ipse nesciret? Imò hic sermo sumptus est à Græcis, qui τὸν ἐς τῆς αἰῶνος dicunt, pro τῆς αἰῶνος. Cæterum si quando de tempore ambigit qui scribit, hoc pacto scribere licebit: Anno circiter nonagesimo supra millesimū. Anno plus minus quingentesimo. Ad annos circiter nonaginta. Annos ferme nonaginta. Dies qui calendarum diem, aut nonarum, aut iduū proxime antecedit, non est aliter designandus, quàm per aduerbiū pridie. Pridie calendæ Ianuarias. Is enim est ultimus dies mensis Decembris. Qui proxime consequitur,

duplici

duplici modo notari potest: Postridie Nonas Iunias: siue, Octauo Idus Iunias. Nec absurdum est, quòd nonnulli nostris festis indicant dies. Natali Christi. Natalitio uirginis matris. Pridie natalis Ambrosiani. Ferijs paschalibus. Die à natali Ioannis Baptiste tertio. In scriptis, ubi cum periculo possit errari in tempore, profuerit eundem diem, aut annum uarijs notis indicare: ut, Anno à Christo nato M. D. Alexandri pontificis decimo. Nonis Aprilis, postridie pasche. Etenim si scriptoris uitio contigerit deprauari numerum, unum ex alio poterit restitui.

De ordine epistolari.

ORdinem in epistolis uel à natura, uel ab arte licebit petere, sed ab arte infrequentius. Nā si in actionibus forēsibus, omnis ferè dispositio à cōsilio sumitur, nō præceptis: quanto magis id faciendū in literis quæ legūtur, nō audiūtur: & legūtur à docto, non à uulgo? Postremò quæ nullū omnino nōnunquā habent ordinē: & si habent maxime, melius dissimulāt, quàm ostendunt. Quare superstitione faciūt, qui libertatē illā epistolārē, certis partibus alligāt, atq; eiusmodi seruituti includūt, cuiusmodi ne orationes quidē tenere Fabio placet. In simplicibus argumentis, cum sequamur ordinē, quē cōsiliū nobis dictauerit, nō præceptiunculæ. In confusaneis epistolis, in quibus innumerabiliū propè rerū acruus cōgeritur: aut ut quicquid in buccā uenerit, ita effundemus: aut ordinē aliquē à tempore, loco, personis, aut rebus imaginabimur, cum crebris transitiunculis breuiter significabimus. Quas quidē uel à similibus, uel à dissimilibus, paribus, imparibus, contrarijs, disparatis, relatis fingemus ad hunc modum. Habes

f 4 animum

animum monstrosum, nunc corpus accipe monstroso ani-
 mo dignū. Mea in illum officia tenes, iam quam ille gra-
 tiam retulerit, cognosce. Sed hæc adhuc puer, iam quæ
 adolescens designarit, referā. Verum hæc tibi cum multis
 cōmunia, illud tuæ propriæ laudis. Sed hoc leue, illud non
 tolerandū. Sed hæc in suis sordibus esse fatetur, ueniamus
 ad splendida. Sic episcopatū est asscquutus, nunc audi quo-
 modo gesserit. Sic emit magistratum, nunc dicam ut epi-
 scopatū administrauerit. Adhuc uetera diximus, illud no-
 uum & inauditum. Sed hæcenus iocati sumus, ueniamus
 ad seria. Sed tristitia mittamus, reuertamur ad lætiora. Hæ-
 bes Britannici itineris tragœdiam, nunc Gallicas accipe
 comœdias. Vulnus aperui, nunc remedium ostendam. Sed
 hoc nihil ad nos, illud uehementer mea refert. Ad primas
 tuas habes, nunc reliquis respondebo. Minusculæ tuæ epi-
 stolæ respondi, uenio ad maiorem. Priori tuæ epistolæ sa-
 tisfactum, ad alteram accingimur. Quæ hîc gerantur au-
 disti, nunc ad literas tuas ordine. Sed hæc me magnopere
 delectant, illud male habet. Quid doleam, habes: nunc
 quid metuum, accipe. Sed hæc spes tantum erat, illud iam
 tenebamus. Quantam rem susceperis, ostendit: nunc qua
 ratione perficias, disce. Tuis de negocijs habes, nostræ
 uero res sic habent. Prioribus tuis, opinor, respondimus,
 nunc ad posteriores accingar. Habes forensia, nunc do-
 mesticas res accipe. Rusticanas res habes, nunc urbanas
 accipe. De tuis habes ad omnia, de meis nunc uicissim ac-
 cipe. Sed iam satis diu de Rep. ad domestica ueniam. Sed
 hæc rumore tantū cognouimus, illa uidimus ipsi. Dixi du-
 cem, nunc tibi pacis moderatorē describā. Sed hæc corrigi
 possunt

possunt, illud ne leniri quidē ulla arte potest. Turpissima audisti, audi turpiora. Quid ingratius? sed audi etiam ingratiōra. Omnibus ferē de rebus habes, illud unum addā. Consilij mei rationem habes, nunc quid te facere uelim aperiā. Sed iam nimis multa de externis, de nostris pauca cōmemorabo. De partu, recte: de diuortio, discrucior. De affinitate noua uoluptatem nuncias maximam, sed de Casiano uita defuncto, acerbum profectō nuncium. Huiusmodi transitūunculus commode excogitatis, tanquam anisulis quibusdam inter se connecti poterunt, quæ natura non cohærebunt: pariterq; fiet, ne tanquam scopæ dissolutæ, turpiter diffluat epistola, et legetur libentius, et intelligetur facilius, et hærebit diutius. Quare connexionibus breuibus, et aptis, crebrius uti conuenit: non in hoc solum genere, uerum etiam in simplicioribus argumentis, quibus ea quoq; quæ natura sunt perpetua, interscremus, quò legentis animus subinde renouetur.

Mixtæ epistolæ exemplum.

Mixtæ epistolæ exēpla, quanquā apud Ciceronem plurima suppetunt, maximeq; ex ijs, quas ad Atticū, et Qu. fratrem scripsit, tamen nec ubi nostram operam studiosi adolescentes desiderent, unum subiiciemus.

Domitius Lucio suo S. D.

Seculum exisse scribis, quòd ne litera quidem à nobis adfertur. quanquā impudens ὑπερβολή: nam seculum istud uixdum etiam trimestre: tamen ut me sine culpa incusari doleo, ita tuo nostri desiderio maiorem in modum delector. Nos uix demum post Vlyssæos errores ad musas rediimus, nondum satis etiam placatas.

f 5 Expo

Expostulat adhuc, & queruntur sibi parū obtemperatū à nobis fuisse, qui quidē felicissimo literarū ocio relicto, tātis fluctibus memet iniecerim. Lucubrationes tuæ nitidissimis formulis excusæ, nuper in uulgus exierunt bonis, ni fallor, auib; nā passim & à distractoribus, & à studio=sa iuuentute rapiuntur. Neq; desunt tamen Momī quidā, qui Veneris sandaliū calumniētur, ne nihil in absolutissimo opere reprehendāt. Styli nouitatē subaccusant, id est, antiquitatem: quod ego tamen summam laudem interpretor. Quare tu hæc æquo animo feres, ne tibi Vergilius inuideat, cuius cœlestis eruditio huiusmodi Momos non potuit effugere. Nos quoq; dialogū nostrum incudi redditum perpoliuius, is iandudū in bibliopolarū est officinus, editionis alcā subiturus. Cæterum modo ab Aristotele, cuius signa à pueris sequuti sumus, descuiuius, eq; Lyceo, & ambulacris illis, in Platonicam familiam transmigrauius. Et adeo defectionis non pœnitet, mi Luci, ut te quoque ad meam Academiam sollicitare non prius sim desiturus, quā persuasero. Verum de scholis aliās: nunc ad politica. Hic omnia plausu, letitiāq; persstrepunt. Mediolanū receptū, dux à uictore in Galliā deportatus. Galli successu uictoriæ sublati, maiora moliuntur, & iam Italiæ munātur. Nunc ad domestica ueniam. Cætera ut uolumus: nepotulus tuus iam mensē febricula afflicto, sed medicus bene sperare iubet. A nobis neque pecuniæ parci= tur neq; ulli rei, quæ ad illius ualeitudinē curandam pertineat. Ambrosium, qui tibi debet, iam tuis uerbis sapius appellauī, sed homo planē faciē perfricuit: quare aut nomen condones censeo, aut obtorto collo hominem in ius trahas

trahas. Etiam si ucreor, ne oleum & operam omnem luse-
ris. Elabetur aliqua Proteus: sed de hoc tute statues. Do-
mesticae res sic habent. Nunc ad tuam epistolam. De Bri-
tannia adeunda, quid ita mihi in mentem inciderit, demi-
rari te scribis, ita credo, quia parum feliciter euenit. Quid
facerem? Orabat is, cui negare fas non erat, & per aesti-
uos menses in Gallia desidendum erat. Putabam esse alia
quid, eadem opera, & anticiſſimo homini gratificari, &
insulam multorum literis nobilem uisere. Postremo, fâte-
bor enim, nonnihil etiam nominis atque emolumenti spes
solicitabat. Consilium habes nostrum, nunc euentum ac-
cipe. Ad reditum usq; sequenda omnia.

Nunciatoris,

—Facilis descensus Auerni.

Sed reuocare gradum, superasq; euadere ad auras,
Hoc opus, hic labor est. —

Prius quàm nauim conscenderemus, in littore omnis mea
pecuniola naufragium fecit. Ceterū placidissima nauiga-
tione Gessoriacum appulimus. Hic denuo portitor omnes
crumena angulos rimatur, ac Douariensem portitorē de-
uouet, qui sibi pradam praeipuerit. O scelestum iniquis
littus. Imò amicum & salutare. nam nisi me nudū Britan-
nia remisisset, actum de nobis fuerat. Siquidem in Gallia
in latronū sicas incidi, à quibus sola me nuditas seruauit.
Nam aduersus hoc hostium genus, nullis armis melius de-
fendimur, quàm inopia. Lutetiam deniq; reuersum febris
aestuātissima excepit, quæ loculos pariter & corpus ex-
hausit. Habes non mali consilij pessimum exitum. Quòd
mihi de noui honoris accessione tam ex animo gratula-
ris, morem tu quidem antiquum tuum obtines, ut ami-
culi

not.

culi commodis propè uehementius, quàm tuis ipsius gau-

Lamentatio. *deas.* de Cassij morte nã tu mihi luctum acerbum annuncias. Quòd Vari nebulonis improbißimi impudentiã fregisti, ò quàm factũ bene. Sed quid ais? Petronium ne gladiatorio animo ad te uiam affectare, & tibi tam odiose negocium faceßere? An hoc quoq; portentum tuæ uirtuti

Gratiz. fata destinariunt? Quòd Antonius de nobis amantissime & loquitur & sentit, noui nihil nuncias. Quòd librum tam impendio carpit Zoilus, incredibile quàm mihi placeam, ut illi me intelligo magnopere displicere. Fratres è turpi similitate, te autore in gratiam redisse serio gaudeo.

Monitoria. Dabis operam ne quando quod sartum est, rescindatur. Nepotem tuum tam solícite mihi toties abs te commen-

Officiosa. dari subiracunde fero. Ignoscas, non tibi concedo, ut ille tibi magis curæ sit, quàm mihi, etiam si eum amas plurimum.

Gratulatio. Quòd hereditaria pecunia es auctus, neque me uis tibi gratulari, neque gratulandum puto. Quis enim non uel Croesi diuitijs illiusmodi hominis consuetudinem anteposuerit? Sororẽ tuam filiolo auctam, te nepotulo, uolupte est. Eam rem spero superi bene fortunabunt. Generum tibi uoluptati esse gaudeo. Ah in filium nimium se-

Deprecatoria. uis. Memineris facito, illum & hominem esse, & puerum, teq; idem quod ille est, fuisse. An illum uis repente nasci senem? Age mitte hanc noxam, me precatore, meoq; periculo. Ad me recipio illum posthac emendatiorem fore. Sed

ut. **Locosa.** ò Deum immortalem, quantos risus tu mihi nuncias? Ita ne Sabellius bibit, & fugit? Multũ aris reliquit, sed alieni.

Monitoria. Tandem fatearis oportet, me uatem esse optimum. Quanto antè fugam istam prospexi, & præcinui? Consilium tuum

tuū de nauigando neutiquā probo. Terrent me hyber-
 ni menses: sinus naufragijs infāmis: tua ualetudo nondum
 etiam confirmata. Sed de hoc ipse uideris, me certe autore Dissuasoria,
Domestica
 non facies. De puero amando, sanus ne es? Certe differ
 in reditum meum. Quod de filia nuptijs cogitas, ego tue
 sententiae uehementer subscribo. Habes ad omnem episto-
 lam tuam. Sed heus tu, illud unum me fūgerat: fundus tuus
 si est uti describis, suprā modum me delectat: tum ædifi-
 cium, eugē quā scitē abs te cogitatū. Iam isthuc gestio
 reuolare, ut in Academiola nostra, ab omni urbano stre-
 pitu semoti pariter philosophemur, certemusq; utrū ego
 te ad Academicorum partes abducam, an tu me persugam
 in Peripateticorum familiam reuoces. Hæc meditare, dum
 accurro. De edificio te, quamquā architectum tantum, Locosa,
 tamen hoc unum admonebo, ut cœnaculum speciosis fre-
 quentibusq; luminibus illustre fiat. In hortis platanus sit
 patulus diffusa ramis, et prope fonticulus aqua frigida
 subscatens, ut musas quoque, si quando uidebitur, possi-
 mus arcessere. Respōdimus tuis, nunc quid hic agatur ac- Transitio.
 cipe. Nos certe hic in grauissimo æstu, tamen frigemus.
Pontifex meus montes ille quidem aureos promittit, sed ant.
promittit tantum, mittit nihil. Caterū spe Crassi diuitias
uincimus. Ut ut res cadent, nos certe utemur foro. Tu mi Exhortatio.
N. toto pectore, id quod per te facis, in nominis immor-
talitatem incumbere. Iam orbis propē uniuersus ingenij tui
expectatione suspensus, nescio quid cœleste sibi de tua
uirtute promittit. Et eum in locū res adducta est, ut desi-
stere turpissimum fuerit. Nos hic gloriæ tuæ propagandæ
magno ardemus studio. Nepotulos meos ideo tibi non
Comendatitia.
commen

Transitio. cōmendo, quoniam cōmendatissimos esse scio. Scripseram hæc multa quidem nocte postridie daturus, & ecce tibi ante lucem de repente Lucilius adest: uixq; resalutatu ec= quid abs te literarū apporet, rogo. Negabat quicquam esse scriptorum, sed multum omnino rerum nouarum tuis uerbis nūciauit. Primum nauigandi te mutasse consilium,

Gratulatio. id quod ego utriusq; nomine uehemēter gaudeo. Camini fucatam beneuolentiam in apertam simulatē tandem cru= pisse, adeo moleste non fero, ut etiam gratuler tibi. Nam

not. personatus amicus damnum dare poterat: apertus hostis,

Gratiarū actio. quid tandē est quod possit nocere? Quod pro nostra exi= stimatione tantā cū inuidētissimis hominibus dimicationē suscepisti, non ego tibi tanquam pro nouo officio gratias

Monitoria. agam, quum id facere nunquā desinas. Quod de adiun= gēda Demetrii affinitate nos cōsulis, quanquā ipse con= silio abundas, tamen in reditum nostrum rem proferas cē= seo. Coram agere præstabit. Plura tecum garrire libebat, quid enim faciā libentius? Sed iandudum accinctus tabellio literas efflagitat. Quare ualebis ipse, nostrosq; omnes ua= lere meis uerbis iubebis. Datum Aureliæ Nonis Decemb.

Epistolarum genera.

Huiusmodi literarum genere ex uarijs rebus cōsarcia= nato familiares inuicē persæpe utuntur. Nunc sim= pliciū genera proponemus. In præsentia ne cōsiliij quidē est omnes epistolarum formas recensere, id quod non mi= nus infiniti negocij puto, quā Libycas arenas pernu= merare. Nam quod M. Tul. ad Curionem tria epistola= rum genera facit: non id agebat, ut singulas literarū spe= cies distingueret, sed ut propositæ complexionī seruiret.

Ea uerò diuifio quæ non ex argumenti uarietate, sed ex characteris conditione ducitur, parū mihi uidetur ad docendum appofita. Quòd fi quis ex argumentorum differentia formas cōmetiatur, quum illorum infinita fit uarietas, quis erit formarum modus? Quid enim eft in rerū genere quod literis nō committatur? In his gaudemus, dolemus, ſperamus, metuimus. In his ſtomachamur, expostulamus, blandimur, querimus, iurgamur, bellum denunciamus, in gratiam redimus, conſolamur, cōſulimus, deterreamus, munamur, excitamus, compeſcimus, narramus, deſcribimus, laudamus, uituperamus. In his odimus, amamus, miramur, deliberamus, paſcimus, conuiuiamur, nugamur, ſomniamus deniq; ecquid tandem non? His tanquam certiſſimis miniſtris, omnes animi affectus, his publica, his priuata, his domeſtica credimus. Quare in re per ſe infinita eam moderationē adhibebimus, ut neq; ſumma tantum genera ponamus, neq; minutiffimas quasq; partes fruſtulatim conciſas perſequamur: ne aut nimia paucitas ſtudioſis non multum adſerat adiumenti, aut immodica diligentia id demum, quod ait Fabius, aſſequamur, ut quum nimis multa, necdū tamen omnia uideamur dixiſſe.

Tres omnium generum fontes.

Rhetorum pleriq; tria cauſarum genera placuerunt, ſuaſorium, encomiaſticon, et iudiciale. Ad hæc tanquam ad fontes pleræq; literarum formæ referuntur, ut ſuaſorio hæc ſerè partes ſubijcias: Conciliationem, recon-
Suaſorij partes.
 ciliationem: exhortationem, dehortationem: ſuaſionem, diſſuaſionem: conſolationem, petitionem, commendationem, monitionem, amatoriam. In demonſtratiuo genere
Demonſtratiui uerſan

uerfantur descriptiones, personarum, regionum, prædiorum, arcium, fontium, hortorum, montium, monstrorum, tempestatum, itinerū, conuiuiorū, ædificiorum, pomparū.

Iudicialis. Ad iudiciale genus, hæc ferè referuntur: Accusatio, querela, defensio, expostulatio, expurgatio, exprobratio, comminatio, inuectiua, deprecatio. His tribus quartum genus

Familiaris. accersere licebit, quod, si placet, familiarè nominemus. Eius eiusmodi ferme species esse possunt: Narratoria, qua rem apud nos gestam, lōge positis exponimus. Nunciatoria, qua nouarū rerum quippiam annunciamus, siue de publicis, siue priuatis, siue etiam domesticis. Gratulatoria, qua amicorum felicitatē nobis iucundā esse testamur. Lamentatoria, qua uel nostra, uel necessariorū incōmoda deploramus. Mandatoria, qua negocij quippiam alij nostro nomine gerendū cōmittimus. Est quæ gratiarum habet actionem, qua nobis gratum fuisse benemerentis officium declaramus. Collaudatoria, qua puerū, aut qui in nostro sit imperio, officio functum laudamus. Officiosa, sic enim uisum est appellare, qua operā ac studiū ultro pollicemur amico. Iocosa, qua cuiuspiam animum festiua urbanitate delectamus. Verum de his prudens supersedebo, propterea quòd ut incantatores certas quasdam preculas, ita isti formulas quasdam præscriptas habēt, ut ne apicem quidem sine summo rerum humanarum diuinarumq; discrimine putent demutari posse. Nos eorum conatus, nostris præceptionibus adiutamur, qui ad optimum scribendi genus adnituntur: non qui uel arrogātissima superstitio-
ne, quod semel arripuerunt, id pro optimo defendunt: uel ad sordidissimum lucellum toto pectore inbiantes, pro
optimis

optimis pessima sequi malunt. Quid enim ijs præcipias, quibus ea demum epistola optima est, quæ quæstuosissima? His disputatoriam, sciscitatoriā, doctrinalemq; adijcias licebit. In quibus & theologica, & ethica contineri possunt. Neq; uerò me præterit, apud Græcos esse qui epistolarum genera diuidat hunc in modum, ut φιλική Epistolarem diuilio secundum Græcos, dicatur, quam amicus scribat amico. συστατική, qua quempiam alteri commendamus. μεμπτική, qua desideramus in aliquo officium. ἐνδοξαστική, qua cuipiam exprobramus in gratitudinem. παρηγορητική, qua consolamur afflictos in rebus aduersis. ἐπιεικτική, qua increpamus aliquem lapsum. νουθετική, qua liberè admonemus, quid sit agendum, quid non. ἀπειλητική, qua comminamur alicui, ac metum iniicimus. ψυχική, qua morum improbitatem alicui exprobramus. ἐπαινετική, qua collaudamus aliquem officio functum. συμβουλευτική, qua consulimus, quid nobis uideatur optimum factu. ἀξιωματική, qua deprecatores intercedimus pro aliquo, qui deliquit. ἐρωτηματική, qua sciscitamur, aut percontamur ab alio quod scire cupimus. ἀποφαντική, qua percontanti respondemus. ἀλληγορική, qua tectis uerbis significamus cuipiam, quod ab eo solo, cui scribimus, uolumus intelligi. αἰτιολογική, qua reddimus causas, cur aliquid aut factum non est, aut non est futurum. κατηγορική, qua quempiam incusamus. ἀπολογητική, qua nos purgamus. ἐὺχαιρική, qua gratulamur amico suam felicitatem. ἀφ' ὧν, quum diuersa scribimus, ac sentimus. ἀπὸ δὲ χαιρική, qua gratias agimus pro officio in nos collato. Has epistolarum formas tantum recensent, & exemplum qualecunque subiijciunt, nec indicant, qua ratione ge-

nus unumquodq; tractandum sit. Quod si maximè facerent, tamen ipsa generum distributio, non uidetur ab ulla ratione profecta. Nam quod appellant φιλικόν, non ab argumento sumptum est, sed à persona. Alioqui quos familiariter amamus, hos admonemus, obiurgamus, exhortamur: cum his iocamur, aut expostulamus. Extat & Philostrati præfatio, de charactere epistolæ, admonens nos, quòd epistolam non oporteat nec Atticam esse plus satis, nec omnino carere Atticismo: quòd hoc ipso figurata sit, quòd figurata non est: quòd tametsi civilis sit, tamen non abhorreat à mollitudine: quòd in brevioribus epistolis liceat circulum absolvere, in proluxioribus non item, nisi uel in calce, uel in epilogo, uel epiphonemate: quòd perspicuitas præcipue congruat epistolæ. Hæc ut sunt ab illo festiuiter Græcè scripta, ita non uideo, quid adiuuēt adulescentes ad rectè scribendum. Nos igitur iuuentutis industriæ consulere pro uirili cupientes, diuersam generum distributionem sequi maluimus. Sed ecce properantem aliò, me uelut è cursu reuocat, auremq; uellicat secretariorum chorus, qui principibus sunt ab epistolis. Ita ne nostri, inquit, τῶν μεγάλων ὁδὸς λόγος; Verum his difficile sit aliquid præscribere, quorum calamus liber non est. Sed quemadmodū præcipit Martialis, ut coquus habeat gulam domini, itidem isti coguntur affectui principū seruire: quos illud tantū obiter admonebo, ut ubique doctam sermonis facilitatem, ac perspicuitatem sectentur, ac decori cum primis meminerint. Id metiendum erit, non ab ipsorū animo, sed ab eorum fortuna, moribusq; , quorum nomine scribunt. Hactenus igitur epistolarum genera qua

ra quatuor proposuimus , & suas cuique generi formas subiecinus : nūc ordine de unaquaq; specie præcipientus.

Quid inter exhortationem
& suasionem.

AC primum finitimæ admodum inter se sunt , exhortatio , & suasio , quas nos tamen dicendi gratia separauimus : idq; fecimus neq; sine exemplo , neq; citra iudicium , propterea quòd & ueterū nonnulli in arte dicendi , exhortatorium genus à deliberatiuo disiunxissent , & ipsi nōnihil discriminis perspiceremus. Siquidem nec eodem tendit utrunq; , neq; uia simili. Nam suadendo id agitur , ut uelis : exhortando , ut audeas. Suasio probationibus docet : exhortatio stimulis excitat. Suasor sententiā mutat : exhortator animum addit. Suademus aut errantibus , aut certe hæsitantibus : exhortamur cessantes , aut etiam iam currētes. Quare si rem ad uiuum excutiamus , exhortatio suasoriæ epistolæ pars erit , nempe epilógus , qui affectibus constat , non argumentis. Neq; enim suadenti sat erit , quid sit optimū factū docuisse , nisi & stimulos subijciat , ne uel difficultate , uel periculo deterriti , uel ignauia retardati , quod optimum esse uiderimus , non sequamur. Sed ut in suasionem serè semper incidit exhortatio , ita in hac non raro continget uti suasionē. Est autem utrunq; officiosum literarum genus , cuiusq; usus maximis , minimisq; in rebus quàm latissime pateat. Atq; hoc maiore cura , diligentiaq; nobis erit pertractandum.

De exordio epistolarum.

Sed illud unum prius in genere studiosis adolescentibus præcipientus , ut epistolam scripturi , non statim

præcepta respiciant : aut ad libros, unde uoculas, sententias uel aliquot mutuentur, confugiant, sed prius res, de quibus scribere constituerint, solertissima cogitatione dispiciant : tum eius, ad quem scribitur, naturam, mores, affectus que omnes perspectos habeant : quantum etiam ipsi apud eum uel gratia, uel autoritate, uel meritis denique ualeant. Eque his omnibus diligenter pensculatis, epistolæ tanquam uiuum exemplar ducant. Quo constituto, tum demum nihil equidem morabor, quò minus locos aliquos ex autoribus petant, unde tum uerborum optimorum, tum sententiarum copiosam supellectilem possint mutuari. Eaque omnia oportebit, commode demutata, ad rem præsentem accommodare, ne ueluti male assuta, maleque conferruminata, hæc ipso furtiua deprehendantur, quòd pessimè coherent. Quin Maronis ingenium potius imitemur in alienis asciscendis, ut non aliunde corrogata, sed domi nostræ nata uideantur. De exordiæ epistola, illud etiã in uniuersum trademus, hoc in genere principij rationem esse minus difficilem, quàm in orationibus. Propterea quòd illic sæpe fit, ut orator iudicis animum, et mores penitus pernosce non potuerit : et quoties apud complures cognitores agitur, hoc etiã accedit difficultatis, ut quo alius conciliatur, eo propter diuersum ingenium alienetur alius. At qui uni cuiquam epistolam mittit, non difficulter potest exploratum habere, quibus ille rebus soleat commoueri : quod etiam si nulla intercessit familiaritas, id quod ferè fit, tamen diligenti percontatione licebit peruestigare. Quare præter ea quæ de colligenda beneuolentia, attentione, docilitate : quæque de animorum motibus, rhetorum literis

literis præcipiuntur, & proprii cuiusq; mores, uel con-
 uictu familiari, uel curiosa diligentia percepti, peculiarẽ
 quandã exordiendi materiã ministrabunt. Porro si ad pa-
 rum notum scribetur, hoc commodior erit oratoris, quàm
 scriptoris conditio: quòd illi obseruatis iudiciũ uultibus,
 mutare quædam ex tempore: & si quid aliorsum quàm
 expectarat, rapi uiderit, corrigere dicendo: aut si præsen-
 ferit, declinare liceat: quum epistola semel reddita, neque
 fronti legẽtis possit obsequundare: & is qui læditur scri-
 ptura, soleat relegẽdo dolorẽ suum exasterare, cui peri-
 culo cõueniet exactissima cura occurrere. At quum inter
 se norunt, non est difficilis principij constituendi uia, ma-
 ximeq; præterea uaria. Nam in actionibus multis modis
 delinquitur in exordiendo: si nimium longo, si uulgato, si
 cõmuni, si trãsato, si altius petito proœmio quis utatur.
 At ea literarũ est libertas, ut undelibet initium sumere li-
 ceat: modo id sit eiusmodi, quod illum ad id quod pares
 præparet. Veluti si quis pecuniã mutuam rogaturus, sta-
 tim in epistolæ initio de quopiam nunciet, quòd ille ob
 amorẽ nominis eius, singularẽ simultatẽ, aut odium ama-
 rum cupidissime sit accepturus: uel si quis amico, quem
 non ignoret accurate scriptis literis impẽse delectari, fã-
 bellam aliquam quàm lepidissimis uerbis fucatã recẽseat:
 deinde inter alia quædam ita de mutuãdo sermonẽ inter-
 iiciat, ut quouis potius, quàm huc superiora illa spectassẽ
 uideantur: non ne alienissimũ initium fecerit, in oratione
 non ferẽdum, in epistola scitissimum? Vbi illa etiã simu-
 latio plurimum obtinet gratiæ, quãdo nos aliò, quàm de-
 stinauerimus, delabi: aut longius amore rapi fingimus,

quàm initio constituissemus. Erit aliquoties à re media, aut omnino præpostere ingrediendum, modo ita simulemus, non etiam obliti nostri fluctuemus, eamq; ipsam erroris adumbrationem scito colore, ad rei commoditatem torquebimus. Idq; incredibili quadam amoris magnitudine dicemus accidere, qui neq; modum nouerit, neque ordinem. Calamum ab affectu duci: nos ibi denuo incipere, ubi desinendum erat: propterea quòd dum scribimus, coràm cum charissimis hominibus sermonem serere nobis uideamur. Quare obliquo illo proœmij genere, quod Græci ἰποπόνη, Latini insinuationem dixere, in actionibus non nisi tribus demum temporibus utendum putant, quum aut negotij turpitudine iudicem à nobis uehementer abalienauit: aut qui antè dixit, admodum persuasit: aut oratione nimis longa auditoris animum defatigauit. At in epistola, quoties uidebitur, oblique ingredi licebit, & quamlibet longe repetere, & quamlibet alienum assumere principium, dum quacunque uia tamen ad rem conferat. Neq; hoc, ut in dictionibus, ita & in literis uitiose uidebitur fieri, eò quòd illic auditor unū quiddam expectat, ad quod dum festinat, fastidiat necesse est, quicquid aliò ducere uideatur. At in epistola, quia contrà fit, id quod per dissimulationem assumitur, non ingressus uitiosus, sed separata quædam epistolæ pars uidebitur. Rectum uerò exordium, his omnino rationibus constituitur, quas in iudiciali genere tradiderunt ij, qui de arte conscripserunt. Sed oportebat eadem præcepta quæ illi rectè ad forenses causas accommodarunt, ad proprietatem epistolarum deflectere. Alioqui quid tandem erat
uel

uel fructus, uel negotij, quæ fuissent à ueterum permultis accuratissime, optimeq; perscripta, denuo uel eadem, uel deterius scribere: id quod ab omnibus, qui de hoc genere tractauerunt, factum uideo. Repetunt è Cicerone, quomodo exordium: quot narrationum genera: quomodo partitione constituenda controuersia: quemadmodum narratione aperienda causa: quibus argumentis uel communicanda nostra, uel aduersariorum coarguenda: quot epilogorum species: deinde quid in compositione fugiendum, aut sequendum: de sermonis elegantia, de luminibus. Sed Deum immortalem, quid hæc proprie ad epistolam? Aut si maxime ista discenda sunt, ita uti sunt, quanto rectius à Cicerone petentur, aut Fabio, eloquentiæ fontibus, quam è corruptis istorum lacunulis? Ut omittam interim quædam etiam illic præcipi, quæ ad epistolam pertinere ne possint quidem: puta de persona litigatoris, et oratoris: de circumstantium persona: de subiicienda re pro homine: de homine pro re subnuntiendo: de constituenda questione. Nisi forte quædam ex his in criminatorem epistolam incidere uidebuntur: sed etiam si incidunt eadem, tamen incidunt aliter. Ergo si quando res hortabitur, ut eius ad quem scribimus beneuolentiam, aut conciliemus, si dubius sit animus: aut redimamus, si læsus: aut augeamus, si res erit durior: aut excitemus, propter diutius intermissam uecessitudinis consuetudinem: à personis his ferè modis fauorem captabimus, si nostris parentibus cum illius maioribus, arctissimam charitatem, copulatissimam consuetudinem intercessisse dicemus, plurima utrinque extitisse officia: et si eam beneuolentiam nobis tan-

Quidō captanda beneuolētia à personis,

quam per manus, & hæreditaria successione traditã nun-
 quam neglectui fuisse dicemus. Verum amorẽ, quem ue-
 luti cum nutricis lacte imbibissemus, unã cum ipsis annis
 accreuisse, & primum quidẽ fatalem potius fuisse, quã
 iudicio constitutum: nunc consuetudine, officijs plurimis
 sic esse confirmatum, ut nullo prorsus casu cõuelli possit.
 Præterea quanta semper patris illius, aut patrui, aut ma-
 tris fuerit in nos charitas, aut nostrorũ in illum, & quã
 nos illos inuicem studiose, quã obseruanter coluerimus,
 aut ille nostros. Quòd si auitam, paternamq; amicitiam,
 quia nulla fuerit, commemorare non licebit, dicemus eos
 solere maiorum suorum necessitudines repetere, qui ipsi
 nullis amicitia uinculis essent coniuncti: quemadmodum
 auita facinora narrant, qui nihil ipsi memorabile gesse-
 rint. Hanc necessitudinem non tanquam hæreditaria sorte
 temere obuenuisse, sed à nobis ipsis & natam, & educatã:
 initio quidem, ingeniorum, studiorumq; similitudine pue-
 riles animos mira charitate conciliante: deinde conuictu
 coniunctissimo, mutuis officijs: postremò mutua uirtutum
 utriusq; admiratione sic coaluisse, adoleuisse, maturuisse,
 ut iam nihil accedere posse uideatur, uel ad beneficiorum
 cumulum, uel ad amorum magnitudinem. Tum nomina-
 tim, quo in loco, & quemadmodum, quibus communibus
 studijs pueritiam, aut etiam ephebiã transegerimus, quas
 uoluptates, quæ incommoda, quæ pericula cõmuniter tu-
 lerimus. Hæc omnia iucunda commemoratione reficabi-
 mus. Solemus enim grandes huiusmodi rerum mutua re-
 cordatione mirè delectari: & consuevit plerunq; ex his
 inter puero's inita beneuolentia, in senem usq; senectam,
 multa

A similitudine
 studiorum.

multa cum uoluptate perseuerare. Porro si qua propin-
 quitas, si qua affinitas intercedet, sic natura coniunctissi-
 mos fuisse dicemus, ut longe tamen mutua charitate con-
 iunctiores. Sin nulla erit, affirmabimus nulla esse cognat-
 ionis uincula, quæ nostros amicos arctius aut incundius,
 aut etiam tenacius alligent, quàm necessitudinis: sine his
 cognitionem aut affinitatem molestam quoq; haberi: ubi
 hæc adsunt, illa non magnopere requiri. Nullū esse præ-
 stantius, firmissq; necessitudinis genus, quàm quod à uir-
 tute, pulcherrimisq; studijs ceperit initium. Affinitatis co-
 pulam diuortio dirimi, cognatorum charitatem similitate
 rescindi: beneficijs constatam beneuolentiam, alterutrius
 ingratitudine in odium uerti solere: tum contractum
 amorem temere euanescere: eam demum copulam, quam
 uirtutis admiratio coniunxit, quemadmodum uirtutem
 ipsam, immortalem esse. Proderit & illius in nos meriti,
 cum gratitudinis significatione uehementer exaggerare:
 nostra uicissim in illum, multa cum uerecundia ac si-
 gurate significare. Qui nostri de illo sermones, quàm
 penitus infixæ memoria: quantopere illius literis delecte-
 mur: ut illius commodis, gloriaq; magis etiam ex animo
 gaudeamus, quàm nostrapte: quodq; incommoda illius
 non paulò acerbius, quàm propria feramus: quantam pro
 illius dignitate, fortunaq; curam, studiumq; præstiteri-
 mus: quàm acrem contra maleuolentium improbitatem,
 dimicationem sustineamus. Postremò uel eruditionem, uel
 uirtutem quampiam in eo laudemus: nostra si qua erunt
 laude digna, uerecunde commemoremus. A miseratione
 beneuolentiam captabimus, si nostram fortunam aut co-

Ab amore ex
 admiratione uir-
 tutis nato.

A miseratione.

Ab aduersario, rum quos commendamus, flebiliter exponemus. Ab aduersariorum persona, fauorem aucupabimur: si quas minas, si qua conuitia, si quam cōtumeliam illius causa nos pertulisse narrabimus, ab ijs qui & ipsum et eius nomine nos quoq; habent inuisos. Contrà quid nos in illos aut fortiter contumeliose ue dixerimus, aut inimice fecerimus. Sed hæc suis in locis. A re præparatiores reddemus, si negabimus ulla ex parte ad nos pertinere, quo de scripturi simus, ad illum magnopere: nobis illic neq; feri, neque meti, nisi quòd amici charissimi commodis haud secus atque nostris commouemur: si præterea negotij magnitudine, periculo, nouitate, antiquitate, utilitate, iucunditate, necessitate, aut huiusmodi quapiam cōmendatione excitabimus. Si iubebimus animo minime oscitanti legere, propterea quòd longe plus momenti sit in re, quàm præ se ferat. Si quantopere cū nobis, tum ijs quos illum plurimi facere cognouimus curæ sit, quanti q; referat, aperiemus. Quòd si res ipsa durior esse uidebitur, blandimētis præleniemus: prudentiam illius obtestabimur: ut quæ nos optimo amantissimo q; studio dicturi sumus, ea pro sua uetere mansuetudine, in optimam partem accipiat. Rem eiusmodi negabimus esse, cuiusmodi primo statim occurso uideatur: tum si maxime dura sit, tamen admonebimus quantulum amaritudinis, summa utilitate cōpenset. Sed hæc quoniam neq; proprie exordij sunt, neque in genere commode præcipi possunt, in suum quæq; locum transferemus. Neq; omnino eam exordiendi formam improbauerim, quam uideo neotericis scriptoribus nimio plus placuisse, ut à peruetusta quapiam sentētia factò ue memorabili in epistolam ingre

ingrediamur. Quod genus sit: Scio non temere scriptum esse Flacco: Quem cui commendes, etiam, atq; etiam aspi-
ce: ne mox Incutiant aliena tibi peccata pudorem. Nec
ignoro iudicium tuū exactum, cui nō temere quivis pro-
batur. Sed tamen tot modis exploratum habeo huius iu-
uenis ingenium, ut illum non dubitem tibi uel meo peri-
culo commendare. Item: Hercules olim aduersus hydra-
m Lernaem & cancrum congressurus, coactus est alienam
opem implorare, qui solet opitulari cæteris. Ego unus
cum tot monstris dimicans, ijsq; subinde nouis exorien-
tibus, quid faciam?

Abruptum epistolæ initium.

S Atyrica illa, & ueluti ex abrupto principij species,
in iocos & familiaribus mire decet, qualis est illa
Ciceronis: Ita ne præter litigatores istos nemo ad te ue-
nit? & Deum immortalem, quid ego audio? Sic est inquā,
uti scribis. Siccine igitur ueterē amiculū negligis? Ergo
mutabimus sententiā, quando tu quidē hoc tantopere cen-
ses. Quin ego igitur tibi gratulor? Quin tu igitur huc
reuolas? sic isthæc ut scribis res habet? Hui quis te tam esse
uirū credidisset? Eho, quid ais obsecro? Ringitur Zoilus?
Næ tu mihi album apportas nuntium. Huiusmodi figuris
id assequimur, ut non mutam epistolam epistolæ, sed uiuo
sermoni uiuum item sermonem referre uideamur. Et quo-
niam utrinq; missæ acceptæq; literæ, mutuum alloquium
imaginantur, pulcherrimū fuerit, quam rem representāt,
eam quā appositissime adumbrare. Porro solennes illas
cōmendationes, quas iam ex more præsumunt, aut pror-
sus omittendas, aut in epistolæ calcem censeo traducēdas.

Quan

Quaquam ubiuis etiam imperite uidetur fieri, ut nos ipsos cuiquam commendemus, sed offerimus magis, ac deducamus operam nostram. Alios commendamus, id est, laudamus, ut beneficio digni uideantur.

De exhortatoria epistola.

Quoniam exhortatorium genus, quod Græci *παρρησια* uocant, affectibus ferè cōstat, quos iuxta sapientum multorum sententiā, natura nobis, tanquam stimulos quosdam ad uirtutē perfectam ac pædagogos addidit, animaduersum nobis, penitusq; perspectum esse debet, quæ sit humani animi natura: quæ uarietas ingeniorum: quem quæq; res affectum pariat: quibus quisque rebus maxime ducatur, à quibus abhorreat. Qua quidem in parte proprie facultas oratoria dominatur. Sed hæc è rhetorum præceptionibus haurienda. Nos tantum breuiter attingemus, quantum ad huius generis epistolam faciendam satis esse putabimus. Ergo ex his potissimū locis extimulandi animi rationes petemus. A laude, spe, metu, odio, amore, miseratione, emulatione, expectatione, exemplis, obsecratione.

A' laude.

A laude bisariam exhortabimur, ut tum rem ipsam laudemus, tum hominem. Re laudanda excitabimus, si piam, si magnificam, si gloriosam, si raram, si nouam, si arduam, si hætenus intentatam dicemus. Quaquam hæc partem in suadendo diligētius tractamus. Personæ collaudatio in exhortando plurimū habet usus. Nam et honos unice uirtutem excitat, alitq;. Et ita mortalium animos natura finxit, ut uix quisquā adeò demisso sit pectore, quin laudi

laudibus erigatur. Quare studiosè cohortationis monita multa cum laude miscebimus. id quod Cicero & factitat, & factum à se refert, ut exhortandi artificium quoddam indicare uoluisse uideatur. Ergo ab hac parte comouebimus, si antè ab eo bene gesta artificiosa laude dilatabimus, idq; tum à modo, tum à loco, à tempore: tum à persona, à difficultate rei: per collationē, per fictionē, alijsq; amplificandi modis, de quibus suo loco nonnihil attingemus: propterea quòd quā plerisq; in generibus plurimum ualent, tum ad hoc propriè præcipueq; pertinent. Si quæ pulcherrime adhuc perfecit, ab omnibus in cælum tolli dicemus, ut quæ feliciter & strenue cæpta, pari aut maiori etiam animi magnitudine pergat, hortabimur: uihil illius immortalitati, præter extremam manum deesse: eam imponere non tam esse arduum, & negotiosum, quàm ad tuendam, quæ iam uirtute parta sit, gloriam necessarium, ut qui eatenus omnes reliquerit, in hoc tanquam extremo actu bonus artifex seipsum superet. Si generis claritatē, si fortunæ splendorem, si nobilitatem, si dignitatem, si imperij præstantiam, si ingenium, si uires, si sapientiam, si uirtutem, si ætatem, si rerum usum extollemus, ac ne quid his indignum admittat admonebimus. Itaq; rei dilatæ præstantiam cum eius uirtutis amplitudine cometiēmur, dicemusq; illius diuinam uirtutem, huic tam præclaro numeri unam parē inueniri. Ac rei quidē securior est amplificatio: personā uero quemadmodum laudes, nonnihil refert. Sunt enim alij paulò inaniore, qui laudem etiā apertiorē faciliè agnoscūt. Est alius morosiore natura, Cui male si palpare, recalcitrat undiq; tutus. Quare illi plenius,
hic

hic laudandus figuratius. Tantum ad mores attinet. Neq̃
 nihil in ætate discriminis. Siquidem iuuentus quoniam &
 ætatis uitio, & rerum imperitia tumet, apertiore laude,
 tanquã applausu clariore, cristas attollit: & senectus de-
 crepita ob deficientis ætatis infirmitatē, laudationē liben-
 ter accipit. At matura illa, & uirilis ætas, quò magis suis
 confidit uiribus, quoq̃ longius, uel à puerorum ineptia,
 uel à senum deliramentis abest, eò tectius minusq̃ scenicē
 laudari debet. Ergo apud uiros natura seucriores, lau-
 dandi inanitatē figuris obtexere cōueniet: ut aut occupa-
 tione laudem dissimulemus, aut contrario ductu orationis
 tanquã obiurgantes, maiore fide laudemus: aut in alteram
 quāpiam personam laudationē eam trāsferamus. Quouis
 demum artificio apertum Gnathonismum effugiamus.

A' spe, & metu.

PEracre res utraque calcar habet, tum ad excitandos
 animos mortalium, tum ad sustinendos, ne rerum ma-
 gnitudine defatigētur, spes præmiorum, & incommodo-
 rum metus: quorum alterius quidē in adhortando propriæ
 sunt partes, alterius in deterrēdo. Vtrunq̃ in genere de-
 liberatiuo latē tractatur: hoc in genere eatenus adhibe-
 tur, ut tanquam suasorio epilogo, cōmodorum incommo-
 dorumq̃ summā, breuiter & non sine amplificationibus,
 tanquā in conspectu ponamus, immortalitatē, beatitudi-
 nem, decus, gloriam, honores, opes, uoluptates, tranquilli-
 tatem, aut aliud cōmolumētum: diuersa ex parte, inferos,
 æternos cruciatus, turpitudinem, ignominiam, egestatem,
 dolores, tumultus. Quòd si utrisq̃ partibus uno in gene-
 re, id quod plerunq̃ fit, utemur, per Antithesim commo-
 da dila

da dilatata cum incommodis item exaggeratis conferre oportebit. Et quibus quæq; rebus maximè duci senserimus, eas res studiosius ampliatas, frequentius ingeremus, puta ambizioso honores, auaro emolumentum, seni uitæ tranquillitatem: itemq; de reliquis contrà, ut quicque maxime inuisum esse cognouerimus, ita quàm atrocissime, ac creberrimè proponendum. Deinde laborem, quo uel tanta commoda petuntur, uel incommoda uitantur, per depressionem oportebit extenuare, ac postea per contentionem componere.

Ab amore, odio, miseratione.

Vehementer commouerimus, si eorum quorum nomine pericula subeuntur, charitatem, commemoratio de renouabimus, & artificio alleuabimus: ut in patriam, parentes: in liberos à natura insitam pietatem, in benemeritos amorem: in amicos necessitudinem: in præstantes uirtute uiros obseruantiam. Rursus si odium & atrocitatem in eos, cōtra quos dimicatio suscipitur, quàm grauissime exaggerabimus. Neq; enim amanti solum, quod antiquitus dictū est, nihil est difficile, uerum idem & odium præstat. Quare utrunque calcar admouebimus, & hinc amicorum gratiam, hinc inimicorum atrocitatem cornibus aduersis conferemus: ut pro sanctissima Christi religione, contra teterrimam Turcarum superstitionem: pro coniugibus, pro libetis, contra nepharios parricidas: pro fidelissimis socijs, contra crudelissimos hostes, pro charissimo, honestissimoq; amico, contra maledicentissimum sycophantam. Idem & ijsdem rationibus efficiet cōmisericordia. Si amicorum solitudinē, inopiam, luctum, squalorem: è regione

è regione inimicorum potentiam, ferociam, audaciam, insolentiam proferemus. Sed hos affectus quemadmodum oporteat suscitare, & augere suscitatos, à Fabio plenissimè traditum est, in exordij, & conclusionis præceptis. Hoc tantum à nobis admonebitur, grauissimos animi motus excitaturum, qui consequentis tēporis imaginem graphice repræsentabit: quantum commodorum sequatur, si res bene geratur: sin contrà, quantum malorum. Et qui per prosopopœiam, rebus ipsis uocem dabit, uti patriæ, religioni, templis, mœnibus, sepulchris, manibus è monumento excitis: hisq; affectus, & sermonem conuenientem, ac decorum accommodauerit.

Ab æmulatione.

Hic locus ab inuidia sumitur, non illa ignaua & execrata, quæ quum ipsa nihil præclari machinetur, alienis tamen uirtutibus uritur: sed illa generosa, quæ animis nostris insecuit natura prudens, ut æmulatione contrà certantium, tanquam acerrimis quibusdam stimulis, incitari remur ad fortiter agendum: quæ nobis persuasit gloriosum esse, & quantisuis periculis redimendum, quàm plurimos præcedere: contrà turpissimū, & quauis mercede fugiendum, in simili certamine posteriores tulisse. Verum non simplex est ab æmulatione exhortandi ratio. Vtrinque enim accrescent animi, si æmulorum uirtutem, gloriam, studium, conatum, opes, improbitatem, cum amplificatione ante oculos ponemus. Sed cauēdū obiter, ne cōtrà certantiū laudē usq; adeò exaggeremus, ut eius animū, quem erigere conamur, in desperationē abijciamus. Vnde cominisci quippiā oportebit, ut æmulos uel fortunæ ui, uel huius

huius lentitudine nonnihil præterisse dicamus, haud uirtute: eoq; acrius annitendum, ut id dispendij, quod fortune culpa sit acceptum, studio nostro sarciamus: & pudorem, quem negligentia contraximus, uincamus industria, siue eorūdem ignauiam, inscitiam, infirmitatem, inopiam per eleuationem proferemus. Hac quidē moderatione, ne quē hortamur, ad securitatem, & oscitationem trahamus. In superiori modo erectior reddetur, ubi intelliget, tantō gloriosiore futuram uictoriam, quantō uirtute gloriaq; præcelluerint ij, quibus cum certatum est, quā ab egregijs uiris uel superari non indecorum haberi soleat. In altero sic facīle esse uictoriam ostendemus, ut tamen haud neglegendam arbitremur, incertos esse rerū humanarū exitus. Et multo magis pudendum esse, ab ignauis æmulis superari. Hortabimurq; ut iam non cū illis, quos longo intervallo post se reliquerit, sed ipsi secum certamen esse putet.

Ab expectatione duplici.

Expectatio quidem geminum habet calcar: nam haud mediocrem iniecerimus sollicitudinem, si quanta sit omnium amicorū, & beneuolentium publica priuatq; de illius uirtute expectatio: nominatim quantū sibi promiserint ij, quorū ille iudiciū, & autoritatē plurimi facere uidebitur, quorūq; causa facturus omnia putabitur, ostendemus: non illius unius interesse, sed omnīū necessariorū: sed posterorū, in quos ea sit gloria transfundenda. Expectationem quā maxime probabile efficiemus, à generis nobilitate, ab indole palam spectata, ab educatione, à loci celebritate, ab antè actis, & antè dictis, ab omnibus somnijs, & uaticinijs, atq; alijs item id genus circūstantijs.

Ab inimicorum expectatione.

EDiuerso maluolentium & inuidorum expectatio-
nem, & studia peruersa atrociter exaggerabimus, è
quibus nominatim referre quosdam fuerit efficacissimum,
quos illi præter cæteros inuisos atq; infestos nouimus: &
quid quisq; aut inuide dixerit, aut inimice fecerit, referre.
Horum omnium qui nunc præsentī gloria eius uruntur,
si quod ipsi uix ausint sibi promittere, res parum feliciter
eucnerit, quàm insolens sit futurum gaudium, quanta in
bene cupientes insultatio, quæ scommata, qui risus, quanta
ferocitas, descriptione ante oculos ponemus. Ita eius unius
uirtutem in editissimo frequentissimoq; theatro omnium
oculis expositam: unde necesse sit, aut cum summa bene-
uolentium gratulatione, & plausu recedere, aut inuiden-
tissimorum hominum sibilis cum summo nostro nostro-
rumq; pudore exigi atq; explodi.

Ab exemplis.

IAm nulla perinde re ad uirtutem inflāmesimus, ut co-
rum quos admiramur exemplis, maximeq; illustribus,
peructustis, ac domesticis. Illa enim autoritate, hæc affectu
commendantur, propterea quòd priscorum uirtutes, quon-
iam ab inuidia longe absunt, & audit quisque libenter,
& miratur impensius: & natura sit ut quisque finitimis
exemplis acrius tangatur, ueluti maiorum nostrorum, affi-
nium, præceptorum, & eorum quibuscum nobis uel pa-
tria, uel ordo, uel professio communis sit.

Exempla quomodo tractanda.

IN his ergo tractandis, ut summa est utilitas, ita studij
curæque plurimum erit adhibendum. Primo quos
propo

proponemus imitandos, eorum uocabula cum laude statim aliqua, & honorifica præfatione prostremus, hunc ad modum: Socrates uir bonus diuino testimonio sapiens iudicatus. Perspexit hoc Plato philosophiæ parens. Egregie Phocyon Græcorum longe incorruptissimus. Vidit hoc Alexander ille Macedo, uir gloriæ natus. Dauid de quo dubites, utrum rex gloriosior, an propheta sanctior. Præstanti uir animo Camillus. Imperio & triumphis genitus Scipio. Nunquam satis laudatus Aemilius. Oportebit autem huiusmodi præfatiunculas ad rem esse accommodas: etiam si quæcunq; laus exempli auctoritatem adiuuat, tamen alieniorem adhibere infantis est hominis: ut si quis cum unde fortiter dicendi duxerit exemplum, diuitem appellaret aut studiosum,

De contrarijs exemplis.

Diuersum in contrarijs exemplis fieri conuenit: ut, Quæ posteritas Dionysij sacrilegi tyranni nomen non execrabitur? Nobilitatus crudelitate Nero. Sardapalus uir muliere corruptior. Cleopatra regina meretrix. Catilina impijssimus patriæ proditor. Sibi felix, patriæ funestus L. Sylla. Nam huiusmodi exemplorum non in dehortando modo, uerum & in exhortando frequens est usus, propterea quòd quemadmodum uirtutis imagine allicimur, ita uitiorum simulachris ad honesti amorem accendimur. Neq; raro usu uenit, ut eadem opera pariter & adhortemur, & deterreamus: ueluti qui ad capeffendam Rempub. exhortetur, idem utiq; à priuato otio deterreat.

De inæqualitate exemplorum.

ET quoniam exemplorum multa uarietas est : nam alia
 Ex parte, alia in totum similia, aut dissimilia, alia con-
 traria, alia minora, maiora, paria: ostendit in Topicis Ci-
 cero, ad exhortandum efficaciora esse inæqualia. Quod
 ego quidem in hunc accipio sensum, ut semper à maiore
 ad minus descendat exhortatio. Nam etiam si aut persona,
 aut res minor esse uideatur, tamen complexus rerum &
 uerborum facit, ut maius sit, quod assumitur. Exempli
 causa, Si propter matrimonia uiolata urbes euerse sunt,
 quid fieri adultero par est? Hoc Fabius recte putat à ma-
 iore ad minus. Illud huic aduersum existimat, Tibicines
 quam ab urbe discessissent, publice reuocati sunt, quantò
 magis principes ciuitatis uiri, & de Repub. bene meriti,
 cum inuidiæ cesserint, ab exilio reducendi? At hic tamen si
 tibicinum persona sit principum conditione inferior, ta-
 men hoc ipsum tibicines fuisse publice reuocatos maius
 est, ob complexum, quàm si principes ab exilio reducan-
 tur. Quòd si hic intellectus non placet, qui mea quidem
 sententia uerissimus est, negationem obseruemus necesse
 est: id quod à neotericis dialecticis utcunque præcipitur.
 Sed hæc inæqualitas erit per collationem aperienda, quæ
 frè exemplis subijci consuevit. Infinitum uerò traditu,
 unde ea ducatur. Nam non modo ab una qualibet circun-
 stantiarum, sed etiam ab alijs quibuslibet differentijs su-
 mitur. Omnia tamen ad personam, & rem referuntur. A
 persona ad hunc quidem modum: Formica brutum, &
 minutum insectum, & uix animal, hyberno uictui æstate
 consulit, & homo senectæ non prospiciet in adolescētia?
 Hoc ausa est mulier, quid te uirum oportet? hoc uirgun-
 cula

cula intellexit, te anum quid par est sapere? Ille ethnicus, tu Christianus. Ille barbarus, tu Romanus. Ille propheta, tu sacris initiatus. Ille priuatus, tu magistratus. Ille tribunus militum tantum, tu consul. Ille tyrannus, tu philosophus. Ille obscurus, tu patritius. Alienus ille, tu patruus. Ille omnis expert doctrinae, tu à puero philosophie rationibus optimis institutus. Rudis ille, tu multo rerum usu exercitatus. A' re autem hoc pacto: Vitam ille contempsit, tu uoluptatem non contemnes? Ut corpus ualeat, ferrum patieris & ignes, & ut animo ualeas, salutarem obiurgationem non feres? Opes caducae & sordidae, per tanta pericula petuntur, & à sapientia quiduis incommodi deterret? Vnus ille, nos multi non idem faciemus? Ille inermis, imparatus, uos instructi. Regnum ille sperabat, tibi immortalitas certa proposita. Toties ille, tu semel. Ille in tanta rerum difficultate, tibi omnia expedita. A' persona & à re pariter: Puella uitam pro nihilo habuit, tu uir & uir eruditus, uoluptatulas nescio quas non quibus cōtemnere? Erit hoc artis, quae natura paria sunt, ea dicendo imparia facere, & artificiosa collatione, altera exaggerare, deprimere altera.

De uarietate & ordine exemplorum.

Quanquam autem appellatione propria id demum exemplum dicimus, quum res gesta aut perinde ut gesta exhortandi causa proponitur, tamen illustrium uirorum grauius dicta, philosophorum paradoxa, poetarum figmenta, autorum nobilium sententiae, paræmia uulgo receptae, allegoriae, parabola: breuiter quicquid similitudinibus est affine, id exempli uim habet, &

à Fabio huic generi subijcitur. Neq; primum illud genus quod retulimus, simplex est. Nam quædam ab inanimis ducuntur, uti: Sol Christo moriente luxit, quid hominem oportet facere? Saxa mors illius scindere potuit, humanam mentem non permolliet? Orbes cælestes perpetua uertigine parent imperatori Deo: nec ullum sydus è tot stellarum milibus ordinem deserit, aut in officio cessat, & mortales quid facere par est? A mutis rebus. Tigris pro catulis præceps seuit in prædonem, & pro liberis coniugeq; charissima, uirum fortem quid facere oportet? Leo in uictos, & abiectos non seuit, & non idem faciet imperator? Apis non solum mutum, uerum etiam exiguum animal in commune laborat, & homines Rempublicam negligunt? Elephantus numen agnoscit, & negligunt mortales? Quæcunq; autem ab inanimis ducuntur & mutis, imparia serè sunt. Siquidem ut similia, non ut paria proponuntur: sicut & illa, quæ à spiritualibus trahuntur, quod genus est: Cacodæmones credunt, & cōtremiscunt, quò magis oportet hominem immortale numen uereri? Cælestes illæ mentes, & immortales, nocturni diurniq; uitæ nostræ custodes, perpetuo nobiscum obambulant: quanto studio par est, nos ipsos pro nostra salute uigilare? Deus ipse, cui liberum est diffingere pro arbitratu, quod arbitrio suo finxit ad ulciscendos fontes lentissimus, ad ignoscendum promptissimus est, & regem mortalem cuiusmodi esse conuenit? Iam quæ ab hominibus ad homines transferuntur, ea tribus modis imparia fieri ostendimus, à persona, à negotio, ab utroq; . Ergo ut primi generis exempla copiose suppetant, omnium rerum

rerum, maximeq; insigniū naturæ, uires, miracula, & ex
 autorum monumentis, & nostræ obseruatione, com-
 parata esse debent: fontium, fluminum, marium, montium,
 gemmarum, arborum, herbarū, florum, atq; ex his quàm
 plurimæ similitudines iam præparate atq; repositæ: ut si
 quando usus fuerit, uelut è proximo depromantur. Secū-
 di uerò generis, diuitem supellectilem accumulauerimus:
 si quæ ueterum erudita curiositas, de uolatiliū, de quæ-
 drupedum, de ferarum, de serpētium, insectorum, piscium
 ingenijs memoriæ prodidit: quæq; quotidie mortaliū ex-
 periētia deprehendit, eorum omnium, quàm densissimam
 multitudinem in memoria, tanquam in procinctu paratam
 habeamus: maxime si qua sunt, quæ à certis autoribus
 prodigiose facta referūtur. Quod genus est illud, de Del-
 phino amatore, & puero adamato apud Aul. Gellū: &
 de dracone, qui nutritiū suū, iam à latronibus in sylua iu-
 gulandum seruauit: deq; leone, qui hospiti ob os exemptū
 gratiā uenatum aggerendo retulit. Et de Arione ac Del-
 phino, cuiusmodi permulta à Plinio referuntur: quorum
 & in inanimis nonnullus est usus. Verum hæc quoniā ad
 fabularum speciem proximè accedunt, autoritas erit gra-
 uitate, & multitudine, tum etiam sermonis commoditate
 fulcienda, deniq; præfatiūculis etiam muniēda. Porro eo-
 rum quæ ab humana persona ducuntur, minime frugalē,
 maximeq; uariam copiam cōflare oportebit: tum ex pri-
 scis historijs, atque annalibus: tum ex his, quæ nostra serē
 memoria gesta memorantur: eaq; cum sit expeditior, ma-
 gisq; ad manū copia, de quaq; uirtute, de quoq; uitio, de
 quaq; re illustri aliquot exempla sunt ediscenda, aut præ-

meditanda: neq; id ab unico historico, aut unica gēte, sed à Græcis, Latinis, Hebræisq; scriptoribus omnibus: ex his quæ apud Aegyptios memorabiliter sunt acta, quæ apud Lacedæmonios, quæ apud Thebanos, quæ apud Atticos, quæ apud Syros, quæ apud Persas, apud Romanos, apud Gallos, apud Britannos, apud Iudeos, apud Scythas. Nam habet sua quæq; gens miracula, suos ritus, sua quædam instituta. Narrant hodieq; nautæ, & negotiatores, qui per omnes terras, ac maria quærendæ studio rei circunvolitant, quædam non minus prodigiosa, quàm prisca uetustas finxisse creditur. Horum omnium duplex esse ordo poterit, ut ad efficaciora sensim increascat series: qui quidem non tam est uulgatus, quàm utilis, aut ut ab antiquissimis, maximeq; externis, per gradus ad nostratia, & proxima demum ueniamus, ut ab Aegyptijs, Phrygijsq; ad Persica, à Persicis ac Syriacis ad Græca, à Græcis ad Hebræa: ab his ad Romana, à Romanis ad barbara, ab ethnicis ad Christiana, à peregrinis ad nostratia: tum à ueteribus ad recētiora, ab ijs, ad ea quæ nostra sunt gesta memoria descendamus, à quibus ad gentilitia, postremo ad domestica perueniamus.

Defabulosis exemplis.

Proxima sunt huic generi ueterum poëtarū fabulæ, & prophetarum allegoriæ. Sed fabularum hic erit usus, ut aut fabulas esse negemus: fuisse antiquitus permulta, & his incredibilia, quæ tamē à certissimis autoribus sint literis prodita: aut poëtæ laudem præfati, quid sibi eruditissimi, prudentissimiq; homines eiusmodi figmentis uoluerint, probabiliter aperiemus, hoc pacto: Nimirum
hoc

hoc sentiebat diuina mens Homeri, non poëseos modo, sed omnis etiam philosophiæ parentis, quum & in Iliade Vlysssem, plerisq; belli negotijs admisceret, & in Odyssæa tot casibus alterum decenium fecerit iactari, arduum, perq; durissimos labores esse uirtutis iter. Neque temere projecto, neque aniliter erudita finxit antiquitas Herculem, tam multis exantlatis laboribus consumpto igni corpore, in deorum contubernium fuisse relatum. Id enim erat prisce illis sapientibus institutum, sanctissima philosophiæ mysteria, ne passim euulgarentur, huiusmodi doctis fabellis obtexere. Significauit autem immortalitatem non contingere nisi his, qui perpetuam ætatem honestis laboribus exegissent, & inexhausto uirtutis ardore, cum omnium uitiorum monstris indefatigati bellum gessissent. Sub hoc genere, & mysticos ueterum sacrorum ritus, superstitiosasq; nationum priscearum ceremonias complectimur, in primisq; Hebraicarum literarum mysteria: in quibus quidem interpretandis, utinam tam essemus circumspècti, quàm sumus frequentes, & audaculi. Mirabor enim, si quisquã illa scitè interpretabitur, omnis antiquitatis ignarus: ita ut ferè sunt isti, qui tantum uersantur in plusquam mutis literis, ac spinosis quæstiunculis. Eòdem referenda sunt, nam eundem habent usum, quæ à tragicis conucisq; personis mutuamur, & eorum qui in dialogis, & item historijs, non ad fidem rei gestæ, sed ad imitationem cõpositis inducuntur. Huc quoq; pertinere Fabius autumat apologos Aesopicos, & Aniani, quos ille λόγι μωθικοὶ, id est, sermones fabulosos appellat. His enim uehementer duci animos, præcipue simplices, & imperi-

tos, cum tantum ualuerit ille Menenij Agrippæ, de membris humanis aduersus uentrem coniuratis, sermo, ut grauius iritatum plebem, patribus reconciliarit. Quod si quæ deterreas, ne cum potentiore cõtendat, muros habebit stimulos apologus Horatianus, de rana sese inflante. Neq; leuiter interdum mouent excellentium uirorum dicta, itidem ut facta: qualia nõnulla Plutarchus collegit: & ueterum sapientum paradoxa: ut, Rex est qui metuit nihil. Et poetarum & illustrium scriptorum insignes sententiæ, ut Enniana illa: Fortes fortuna adiuuat. Et Vergiliana: Nate dea, quò fata trahunt, retrahuntq; sequamur.

Quicquid erit, superanda omnis fortuna ferendo est. Aut uulgò receptæ, quas adagia nominant. Sunt & à nobis animosæ quedam, & plenæ spiritus fingendæ: ut, Viri est, aut fortiter interire, aut uincere. Non moritur, quisquis pro patria mortem oppetit. Vt palma contra impositum onus, ita masculus animus, contra fortunæ difficultatem debet erigi, ultroq; insurgere. Virtus duris laboribus pascitur, non frangitur. Viri nihil habet, qui glorioso labori ullam uoluptatem anteposit. Inductiones autem Socraticæ, quas ἐσθητικὰ uocant, non tam ad excitandum ualent, quàm ad persuadendum, etiam si ad utrunq; sunt non inefficaces. Horum omnium miscellancâ quandam agemus, quo uaria magis sit oratio.

De obtestatione.

Exhortandi locos ceu fontes frè omnes aperuimus: quod si quis epilogum, etiam paræneticum quendam requireret: is non incommode per obtestationem sumitur, ut cum per inclytas maiorum imagines, quibus plus lucis

eis attulerit, quàm acceperit : per egregia gentis decora,
 quæ sua uirtute nō mediocriter illustrauerit : per gloriam
 bene gestis partam : per egregia facinora, quibus quotidie
 seipsum uincat : per immortale nomen, cuius iam æterna
 iacta sunt fundamēta : per felicissimā indolem : per ingeniū
 immortalitati, & pulcherrimis rebus natū : per incredibile
 sapientiā, prudētiam singularem, doctrinam raram, animi
 magnitudinē propè diuinā, uirtutē absolutam, à qua nihil
 sit tam arduum, quod aut præstari non queat, aut non ab
 omnibus expectetur : per maiorum manes, qui se à sua po=
 steritate benefactorū gloria superari gaudeāt : per libero=
 rum, & nepotum pietatē, ad quos decus hoc unā cum pa=
 trimonio sit hereditaria traditione transiturum : per ami=
 corū & beneuolentiū uota : per inuidorū studia : per odia
 execrata maleuolentiū, quos optime sic demū ulturus sit, si
 inuidētissimas aures illorū, & oculos, uirtutū splendore,
 et pulcherrimis rumoribus perstringat, atq; obruat, obte=
 stabimur, atq; obsecrabimus, ut se digna uclit & audeat.

De lenienda exhortatione.

Verum si quando periculum esse iudicabimus, ne
 quid offēdat uehemens, & importunior exhor=
 tatio : nam habet hæc nescio quid monentis, præcipien=
 tisq; , aut etiam diffidentis : & quorundam ingeniorum
 ea est insolentia, & securitas sui, ut ne moneri quidem
 patiantur. Id igitur ubi metuemus, multis rationibus ex=
 hortationis molestiam leniemus : ut aut negemus nos
 oratione nostra languentem uelle accendere, sed curren=
 tem incitare : ac ne incitare quidem, ut ea gerat, quæ ian=
 dudum sua sponte facit, sed nos pro nostro singulari
 in .

in illum studio ita gerēti gratulari: orabimurq; ut importunitati nostræ det ueniā, quæ non aliunde proficiscatur, quàm ab immodico quodam gloriæ illius studio. Nihil esse tam magnificū, quod illius uirtus non sit abunde præstatura: sed tamen qui in certaminibus spectant, tametsi nihil opus esse sciunt, tamen non possunt non applaudere, cui ualde fauent: quumq; is qui certat, suæ uirtutis probe cōscius, securus sit ab animo: tamen fautor ille securus esse non potest, donec certam uictoriam uiderit. Aut longe aliud à nobis institutum fuisse simulabimus, sed præter consilium huc calamum esse delapsum, transuersum scilicet agente nos incredibili quodam amore, ut eum exhortaremur, qui non tam calcaribus egeat, quàm freno. Deniq; uirtuti eius omnia secunda precabimur.

Quis huic generi character propriè conueniat.

EX multis styli generibus, graue illud, & acre atque ardens, & incitatum exhortationi præcipue conuenit. Nam florida, concinna, ac festiua, alibi gratiam habent, hic masculus, &, ut ita dicam, robustus debet esse character, amplius, & neruosus. Grauitas autem est, quam *ἰσχυρὸς* Fabius nominat, eamq; inter præcipuas orationis uirtutes ponit. Sed in his quæ ad concitandos affectus potissimum ualent, his serè rationibus constare uidetur, rebus, uerbis, amplificatione, figuris, & compositione.

Grauitas quibus rebus conueniat.

Rebus grauitatem consequemur, si quàm optimis sententijs, è sublimibus, grauib; ac magni nominis, et peruestis autoribus petitis: si exemplis exquisitissimis, si prius, si illustribus, si neutiquam uulgaribus utemur. Verbis

bis rerum gravitatem augebimus, si uoces sonantissimas, si amplas, si quàm maxime grauiter translatas, si significantes deligemus. Sonantes, ut: Bellicos tumultus diuina propè uirtute profligasti. Amplas: Immortalia uirtutum tuarum monimenta, nulla unquam seculorum series obliterabit. Significantia, ut: Frairem ne desere frater. Egregiam uerò laudem, & spolia ampla refertis, Vna dolo diuùm si fœmina uicta duorum est. Hanc uirtutem sermonis Fabius energiam appellat, quod nos actionē, aut efficaciam uertere possumus. Ea præstat, ne quod uerbum tota oratione sit ociosum, quemadmodum in hoc carmine Vergiliano:

—Tu'ne in truijs indocte solebas

Stridenti miserum stipula disperdere carmen?

Nam in posteriore uersiculo, singule quæq; uoces nouum pondus addunt. Hoc modo grauitatis laudem assequemur, si sermonem perpetuum, argumentis, amplificationibusq; infarciemus, eaq; singulis uocibus includemus. Augent orationem & epitheta, id est, apposita, maximeq; translata: ut, Cruentis manibus sacratissimum decorum, &c. Huius tamen modum requirit Fabius, & otiosa sunt uitanda, quibus ad uoluptatem, non ad usum utuntur poëtae.

De amplificatione.

IN affectibus autem permouendis præcipue, atq; adeò ^{Amplificatio unde sumitur & quanta eius uis.} propè sola dominatur amplificatio, cuius quidem uis omnis, in alleuando, deprimendoq; consistit. Ea sumitur à circumstantijs omnibus, à quibus & probationes ducuntur. His autem rationibus licebit amplificare. Primū quidem commutato rei nomine, ut si, qui casus sit, eum dicamus occisum: & qui sit improbus, eum latronem nomenus

nemus. Si quod nobis molestum est, id enecare, aut ad resstim adigere dicemus. Contraq; si, qui pulsarit hominem, attigisse: qui uulnerarit, laesisse dicetur. Si impudica quæ sit, meretrix: si audaculus, gladiator nominabitur. Alter est modus nihil à superiore diuersus: nisi quòd illic sola ponuntur, quæ amplificanti, hic per collationem effertur etiã illa, quæ recta erant, ut magis emineat atq; increseat amplificatio. Quod genus est Ciceronis in Verrem: Non enim furem, sed raptore: non adulterũ, sed expugnatorem pudicitie: non sacrilegũ, sed hostẽ sacrorũ, religionumq;: non sicarium, sed crudelißimũ carnificem ciuũ, sociorum, in uestrum iudiciũ adduximus. Tertius amplificandi modus, incrementũ uocatur: quum non statim quod est atrocissimum ponimus, sed per gradus plures, aut etiã unum peruenitur interdũ ad summum, interdum ad id quod supra summum est quodãmodo. Sic oratio increuit Cicero: ni: Facinus est uincire ciuẽ Romanum: scelus, uerberare: parricidium, necare: quid dicã, in crucẽ tollere? Hic ultra summum peruentum est. Ad summum sic: Matrem tuam cecidisti, quid dicam amplius? occidisti. Increscit & citra distinctionem oratio, dum cursu quodam grauius, grauiusq;, semper aliquid insequitur: ut, Pecuniam, honores, regnum, uitam deniq; patriæ charitate contempsit. & de uonũtu Antonij: In coetu uerò populi Romani, negotium publicũ gicens, magister equitum. Est & hoc incrementi genus, quum tanquam per fictionem, inferiora quæ sunt augemus, ut illa maiora uideãtur: ut, Hanc rem tam equã, si quilibet ignotus abs te peteret, tamen ignoto recusare nõ debebas: nunc orat pater, & pater sic meritis.

tis officijs nullam gratiam reposuisses, ingratisissimus eras:
 nunc pro summo beneficio, maleficium summum retulisti.
 Si liberorum & cōiugum salus defendenda tantum esset,
 tamen nullum erat periculum non subcundum: nunc pro
 totius Christiani orbis incolumitate, dignitate, capiuntur
 arma. Confine est huic, quum id quod tanquam exempli
 causa propositū est, augemus, eoq; aliud maius etiam esse
 ostēdimus: uti Cicero mulieris facinus, quod medicamentis
 partū abegisset exaggerat: ac meritò rei capitalis damna-
 tam dicit, quæ quidem spem parentis, memoriam nominis,
 subsidium generis, heredem familiæ designatum, Reipub. ci-
 uem sustulisset. Deinde Oppianici culpā, cuius par noxa
 uidebatur, hunc ad modum exaggerat per collationem:
 Quāto est Oppianicus in eadē iniuria maiore supplicio
 dignus? Siquidem illa cum suo corpori uim attulisset, se
 ipsam cruciavit. Hic autē idem effecit per alieni corporis
 uim, atq; cruciatū. Grauius auget illud comparisonis ge-
 nus, quum utrinq; plura pluribus reddūtur. Quod genus
 est illud M. Tul. in Catil. An uerò uir amplissimus P. Scia-
 pio pontifex maximus, T. Gracchum mediocriter labefa-
 ctantem statum Reip. priuatus interfecit, Catilinam orbē
 terræ, cæde atq; incendio uastare cupientem, nos cōsules
 perferemus? Hic & Catilina Graccho, adolescēs perditus
 uiro ornatissimo, & status Reip. orbi terrarū, & medio-
 cris labefactatio cædi, atq; incēdijs, uastationi, et priuatus
 cōsulibus cōparatur. Per ratiocinationem ampliamus, quū
 alibi fit, alibi ualet amplificatio: id quod non simpliciter
 accidit. Amplificatur enim & ex antecedētibus cōsequē-
 tia, & ex cōsequentibus antecedentia. Prioris exemplum
 hoc

hoc erit: Ille cauum conuersa cuspide montem Impulit in
 latus, ac uenti uelut agmine facto, Quà data porta ruunt.
 Ex his sic amplificatis apparet quanta sit tempeſtas cõ=
 ſequutura. Et Chriſtiani iudicij ſupremi horrorem exa=
 geramus, amplificatis his monſtris, quæ ſeruntur anteces=
 ſura. Poſterioris erit illud Cic. in Antonij uomitum, quem
 tantum aut uini in Hippie nuptijs hauſiſſe, ut poſtridie
 cogeretur in conſpectu populi Romani uomere, & fru=
 ſtus eſculentis ſubſellia complere. Mirè ſignificauit, quãta
 præceſſerit ingurgitatio, quum eo in loco uomeret, neque
 caſu, neq; uolens, ſed neceſſitate: neq; recens, ut ſerè ſolet,
 cibis reſunderetur, ſed qui in poſterum uſq; diem redun=
 daſſet. Et alia huius generis ſpecies, quum aut ea quæ
 per ſe grauiffima ſunt, conſultò deprimimus, quò magis,
 magisq; attollantur, quæ ſequutura ſunt: aut diuerſa at=
 tollimus, ut augeamus ea quæ præſeruntur. Prioris exem=
 plum erit illud in Verrè: Leuia ſunt hæc in hoc reo. Me=
 tum uirgarũ Nauarchus nobiliſſimæ ciuitatis, precio re=
 demit: humanum eſt. Alius ne ſecuri feriretur, pecuniam
 dedit: uſitatum eſt. Ex his quæ grauiffima non uideri non
 poſſunt, ſic eleuatis, neceſſe eſt atrociffimum quiddã col=
 ligi, atq; expectari. Sic amplificauit Terentianus Hegio,
 ubi Demeæ de uirgine uitiata queſtus, ſâcinus hoc ueluti
 uulgatum iam, & humanum contemnit, iubetq; grauius
 adhuc accipere, quum pater nihil hoc grauius, neq; fieri,
 neq; dici poſſe crederet. Poſterioris generis illud eſt, quũ
 Vergilius Aeneæ laudes ex amplificata Turni uirtute
 adauget: aut quũ Annibalis bellicis laudibus creſcit uir=
 tus Scipionis: aut quum Germanorũ, aut Gallorum forti=
 tudo

tudo, Cimbrorum immanitas augetur, ut maior sit uictoris gloria. Sed infinitæ propè sunt ex relatione ad aliquid amplificandi formæ, ueluti si clades à Troianis, Græcisq; acceptas amplifies, quò uideatur Helenæ species admirabilior, ob quam non piguerit sapientissimos uiros, tot mala perpeti: utq; in Platonis Symposio, & Alcibiadis forma, & toties oblata copia, Socratis continentia singularis colligitur. Reliquū est ultimum augēdi genus, quod *συναγωγὴ* uocatur, id est, congeriem appellant, qua rem eandem alijs atq; alijs modis efferimus. Nam nisi summa fiat uarietate, uitiosa erit iteratio: ueluti Cic. pro Ligario: Quid enim tuus ille Tubero districtus in acie Pharsalica gladius agebat? cuius latus ille mucro petebat? qui sensus erat armorum tuorum? quæ tua mens, oculi, manus, ardor animi? quid cupiebas? quid optabas? Sed plus habet grauitatis, quum paulatim series increfcit, ut: Aderat ianitor carceris, carnifex prætoris, mors, terrorq; sociorū, & ciuiū Romanorū licitor Sextius. Iam uerò extenuandi eadē sunt rationes, quæ amplificādi, neq; diuersus usus. Optime extenuationis exēplum erit illud comicū: Hæc uerba una, mehercle, falsa lacrymula, quā oculos terendo miserè uix ui expresserit, restinguet. Hic uiciosissimum fuerit ad leuiora à grauioribus orationem proficisci, ut Vitam, sanguinem, pecuniam pro te effundere non dubitem. Plurimum uero ponderis orationi accedat necesse est, quoties hinc amplificata, hinc eleuata inter se componuntur.

De figuris ad grauitatem facientibus.

IN hoc genere potissimum consuetabimur ea sermonis schemata, siue tropos, quæ reddunt acrem & ardentem

tem orationem. Huiusmodi sunt ex his quæ in uerbis sitæ sunt membra, articuli, comparia, repetitiones, contentiones, interrogationes, dubitationes, metaphora, prosopœia, apostrophæ, demonstrationes, quæ rem oculis subiiciunt cum exaggeratione. Eandem uim habent asseruationes, si quis tamen has inter schemata numerat: epiphonemata, quas acclamationes recte uerteris. De quorum singulis uero est huius instituti prolixius differere: qui rhetoricen hic non docemus, sed indicamus duntaxat, quod ad scribendas epistolas attinet. Caterum totius huius generis supellestem, ac uim copiosam colligere licebit, quum ex alijs scriptoribus, tum præcipue ex historiographis: apud quos reperire licebit crebras orationes, quibus dux exercitum, aut miles militem, aut magistratus populum ad fortiter agendum cohortatur. Profuerit et ea meminisse, quæ philosophi et facundi scriptores, de fortitudinis naturæ memorie prodiderunt. Nos tamen interim, quod quæ præcipimus inuentuti ceteri digito cõmonstrare, unicum subiiciemus exemplum.

Exemplum epist. cohortatoriæ.

Principium à laude.

Exhortatio cū laude mixta.

Dici non potest, iucundissime nepos, quanta tum me, tum tuos omnes uoluptate affecerit pulcherrimus rumor, nuper hic de rebus fortiter abs te gestis, exortus. Iacta sunt perpulchra immortalitatis tuæ fundamenta. Quid autem hortari incipiam, ut rem diuinitus exemptam perficias: qui eo animo sis natus, ut nihil unquam humile, aut sordidum cogitaris: utq; non tam calcareibus, quam frenis egere te putem? Sed tamen incredibili quodam erga te studio, compellor currentem (quod aiunt) incitare

incitare. I bone, quò uirtus tua te uocat: i pede fausto: per-
 ge absoluerè, quod summa cum laude coepisti: te natali-
 bus tuis, quibus hæc urbs nihil unquam uidit illustrius, pa-
 tre tuo clarissimo, ista tua indole, ista eruditione, isto ani-
 mo dignum præstare. Impone summam manum immorta-
 libus monimentis, à quorū absolutione non multum abes:
 quod maximum ac difficilimū est, præstitisti: quod desi-
 deratur, plus habet decoris, quàm difficultatis: Certasti cū
 maiorum tuorum imaginibus, quibus tuapte uirtute plus
 lucis attulisti, quàm acceperis. Viciisti etatē, qua cum pro-
 pè adhuc impubes habearis, nihil tamen non forti uiro di-
 gnum uel gessisti, uel cogitas. Anteuertisti maioribus tuis
 uirtutum magnitudine: uicisti hætenus, & tui studio so-
 rum expectationem, et aemulorum inuidentiam. Sed post-
 quàm omnia superasti, unum etiam certamen reliquum
 esse puta: nèpe ut te ipsum imiteris, tui similis esse studeas:
 tu te ipsum præire contendas. Nam uinci à teipso tam so-
 dum fuerit, quàm pulchrū fuerit reliquos superasse. Ita si
 semper tibi instes, nō deerit, qui cū laudibus certare pos-
 sis. Cogita te cum in locum, ipsius fortunæ manibus esse
 deductum, ut necesse sit, aut summa cum laude peragere
 fabulam, aut summo cum probro defatigari. Ardua qui-
 dem & difficilis est uirtutis uia, sed amplissima tibi præ-
 mia propone. Decus, immortalitas, imperiū, opes, digni-
 tas, felicitas, in manu sunt, si pertēderis. At si (quod omen
 dii auertant) defatigeris, nō solūm pristina gloriæ tene-
 bras offuderis, uerum etiam in posterum omnem dignita-
 tis spem tibi recideris. Labores neq; diuturni sunt, neque
 ita magni: præmia tum æterna, tum amplissima propo-
 nuntur.

Laus à bene
 coepris.
 A genere,
 A patre.
 Ab indole,
 Ab eruditione

A spe metus

A metu

nuntur. Multa iam pars exhausta, annus duntaxat est tibi perdurandus: in quo facito, ut tanquam in conclusione, & extrema muneris tui parte, perfectissimus atque ornatissimus

Ab exemplo. mus fuisse uidearis. Fac ut ueterum heroum pulcherrima facta tibi ob oculos assidue uersentur. Hercules ille, totius

Exemplū poeticum.

Græciæ facili princeps, quot laboribus sibi iter in coelum aperuit, quot monstra superauit, qui ad inferos etiā ipsos legitur penetrasse? Quæ tibi si facta de illo uidebuntur,

Tractatio fabulæ.

non pugno quidem, sed tamē diuinitus à sapiētissimis, doctissimisq; uiris excogitata sunt, quò nobis heroicæ uirtutis exemplum absolutum proponerent, & ad immortalitatem

Laus autoris.

nominis uiam ostenderent. Nam quonam alio consilio Homerus, cui magno doctissimorum hominum consensu, diuinitas quædam tribuitur, Vlyssē, quem nobis ut sapientis uiri simulachrum proposuit, tam diuturnis laboribus iactatum scripsit, nisi ut significaret hanc unam esse uiam, ad æternum nominis decus parandum apud posteros? Hac Epaminondas, hac Alcibiades clarissimi Græciæ imperatores, sibi immortalem apud posteros laudem

Exemplū Græcū ex historia.

pepererunt. Quid aliud Alexandrum magnum cogitasse credis, cum se tantis periculis obijceret? Quem tu laborē

Exemplū Macedonicum.

Decios illos recusaturos fuisse unquam credis: quorum alter, ut æternam sibi laudem compararet, dijs manibus se deuouit, alter in medios hostes se præcipitem dedit? Quæ

Exemplum Romanum.

non ætas Machabæorum nomen celebrauit? quorum unus elephanti uentre perfoſso pulcherrimam oppetens mortem, clarissimo facinore immortalem gloriam est consecutus. Quid hodie uel celebrius, uel plausibilius Iudith,

Exemplum Hebræum.

Debboræ, & Rachab memoria? quæ quoniam sexu suo maiores

Exemplum scæmineum.

maiores masculinum animi robur præstiterunt, non inter
 foeminas, sed inter heroes commemorantur. Sed quid nos
 externa atque antiqua repetimus? domi habes, qui te ad
 huiusmodi uirtutem debeant incitare, & quidem eo uehe-
 mentius, quò genere coniunctiores. Nam ceteros quidem
 egregios uiros imitari, laudi ducitur, at tuorum sine sum-
 mo dedecore dissimilis esse non potes. Viuit adhuc recens,
 & posteritate ipsa crescit, proauis tui uiri fortissimi me-
 moria. Quanto ille animo iam inde à teneris annis ad no-
 minis immortalitatem contendit? Honestos ille labores,
 pro ludo habuit: uoluptatem & ocium non secus, ac pe-
 stem teterrimam fugiebat. Sæpe ipse adolescens ex eo iam
 natu admodum grandi audiuisse memini, se haud lon-
 giorē uitam à superis optare, quàm ut patrie sua indu-
 stria posset usui esse, cui se potius, quàm sibi ipsi natum
 dicebat. Ad propiora ueniam, tibi magis, quàm mihi ipsi
 nota. Pater tuus uir fortissimus, atque optimus, quid un-
 quam durū, aut difficile iudicauit, quod uel ad gloriæ in-
 crementum, uel Recipi. cōmodū pertinere putasset? Quot
 ille, quāq; difficiles legationes adolescens, nō sine sum-
 ma laude obiit? Quot hyemes sub pellibus egit? E' quā-
 tis angustijs sua se uigilantia expediuit? Quem ille magi-
 stratum non petiit? Quid autem petiuit, quod non obti-
 nuit? Quid obtinuit, quo non summa cū laude sit persun-
 ctus? Debēt pectori tuo paterna illa monita infixā sede-
 re. Sæpe enim te adolescētulū, ut memini, Vergiliano illo
 carmine consueuit exosculans hortari: Disce puer uirtu-
 tem ex me, uerumq; laborem, Fortunam ex alijs. Nec raro
 me audiente, hunc usurpare sermonem solebat, sibi pro-

Transitus.
 Exemplum do-
 mesticum.

Exemplū aul.

Exemplum pa-
 tris.

Repetitiones.

Diſta familia-
 ria patris.

Ab expecta-
tione.

Ab expectatio-
ne maleuolorum.

Contentiones.
A certa perso-
na.

sus uideri nihil interesse inter eos, qui nunquam nati es-
sent, & eos qui nulla re memorabili gesta, obscuri ex hac
uita migrassent. Quare quum ab his sis maioribus ortus,
huiusmodi praeceptis foris, domiq; institutus, obscurū ti-
bi esse nō debet, quid tui, uel patria potius ipsa abs te ex-
pectet: praesertim cum isti generi, isti indoli, egregiam
quoque doctrinam adiunxeris: quum iam istiusmodi rudi-
menta edideris. Cogita tuorum omnium, non amicorū mo-
do, sed ciuium etiā quotquot sunt oculos in te unum con-
iectos, omnium in te suspensos animos: quorū iam expe-
ctationi uix satisfacturus uideris, si tantum à nataliū tuo-
rum uirtute nihil degeneraueris. Nescio, quid maius sibi
de te pollicentur: quorum si uotis tua uirtus responderit,
quid si etiam uicerit, quātus erit tuorum omnium trium-
phus, quāta patriae gratulatio? Quantum autem Trebo-
nij, uiri, ut scis, tui amantissimi, & iudicio de te, & amorī
in te accesserit? Sin rem indiligenter gesseris (quod omen
Deus auertat) maleuolentissimū homines, qui tuae hactenus
inuiderunt uirtuti, quosq; rerum tuarum splendor excru-
ciat, cōtinuō uerticē tollent, erimusq; & tu, & tui omnes
ludibrio, & risui nebulonibus inuidētissimis. Amici ob-
mutescant, inimici insultabunt, beneuoli frigidi, maleuoli
feroces. An haec feret ista tui pectoris celsitudo? Zoili in
te odiū nosti. Nullo cōmodiore modo pestem illam ulcisci
potes, quā ut gloriæ tuae inuidia contabescat. Varū au-
tem uirulentissimū hominem plane ad suspendium ade-
geris, si nobis uictor redieris. Codrus iam nunc suspendio
trabem delegit. Si nihil te neque tua gloria, neque nostra
expectatio mouerit, hoc certe tanti fuerit, ut haec monstra
conficias

conficias. Quare te charissime nepos, unica spes, & idem Epilogus per
obsecrationē
decus tue gentis, per luculentissimas maiorum tuorum
imagines, per egregiam indolem, per sapientiæ laudem,
cui semper studuisti: per nostram, patriæq; expectationē, idem A
per bene auspiciata laudum tuarum initia, obsecro, atque
obtestor, ne committas, ut quum hactenus ceteros uiceris,
à te ipso superatus uidearis. Dij tua cæpta secudent, &
felicibus utere fatis. Vale decus nostrū. Est & inter Hie-
ronymianas epistolas, exhortatoria ad Heliodorum, quæ
uniuersum eius generis artificium una complectitur.

De genere dehortatorio.

O Peræpretium non putavi, dehortationis exemplum
subijcere, quòd eadē sit utriusq; generis ratio, quum
uix unquam exhortemur, quin eadē opera dehortemur.
Exempla eorum quibus ea res infelicitè cesscrit, accu-
mulabimus. Deinde rei turpitudinem, probum, conuitia,
damnū, incommoda diligenter colligenus, quæ per exor-
nationem, quam rhetores descriptionem appellant, ante
oculos ponemus. Sed hæc aliæq; studiosorum industriæ
relinquenda putauimus. Nunc ad singulas cuiusq; gene-
ris partes, non quidem ex omnibus, sed optimis autoribus
syluam quandam uerborum; ac sententiarum submini-
strabimus: quibus ex nostris nonnihil adiiciemus, quò scri-
pturi, hæc semper tanquam penum ad manum habeant,
& imitandi studio, similia discant effingere.

Exemplum depromptum ex prima Ci-
ceronis ad Q. fratrem epistola.

Q uare, quoniā in istis urbibus cū summo imperio et Ab expectatio-
ne bonorum,
potestate uersaris, quibus uirtutes tuas cōsecras,

A metu,

Ab expectatio-
ne malorum.Mitigatio ex-
hortationis.

et in deorum numero collocatas uides, in omnibus rebus, quas statues, quas decernes, quas ages: quid tantis hominum opinionibus, tantis de te iudicijs, tantis honoribus debeas, cogitabis. Quod si in mediocri laude sermonis, ac prædicationis, res nostræ essent, nihil à te eximium, nihil præter aliorum consuetudinem postularem. Nunc uero propter earum rerum, in quibus uersati sumus, splendorem, et magnitudinem, nisi summam laudem ex ista prouincia assequimur, uix uidemur summam uituperationem posse uitare. Ea nostra ratio est, ut omnes boni tum faueant, tum etiam à nobis omnem diligentiam, uirtutemque postulent et expectent: omnes autem improbi, quod cum his bellum suscipimus sempiternum, uel minima re ad reprehendendum contenti esse uideantur. Quare cum eiusmodi theatrum est totius Asiae celebritate refertissimum, magnitudine amplissimum, iudicio crudelitissimum, natura autem ita resonans, ut Romam usque significationes uocesque referatur, contende quaeso, atque elabora, non modo ut his rebus dignus fuisset, sed etiam, ut omnia illa tuis artibus superasse uidearis. Simul et illud cogita, nos non de reliqua et sperata gloria iam laborare, sed de parta dimicare, quæ quidem non tam expetenda fuit, quam tuenda nobis est: quod reliquum est, id non tam difficile, quam præclarum. Exhortationem mitigat hoc modo: Atque hæc non eò dicuntur, ut te dormientem oratio mea excitasse, sed potius ut currentem incitasse uideatur: Facies enim perpetuo, quæ fecisti, &c. Tu quanquam consilio non eges, uel abundas potius, tamen hoc animo esse debes, ut nihil cures, quam ut antea, factum aliquod egregium audiamus, quam

quàm futurum putaremus. Te uerò adimoneo tum bene- A laude,
ficijs tuis, tum amore incitatus meo, ut omnem gloriam
ad quam à puero inflammatus fuisti, omni cura atque in-
dustria cōsequare, magnitudinemq; animi, quā ego sem-
per admiratus sum, semperq; amaui, constanter obtineas, Obsecratio,
nec unquam inflectas cuiusquam iniuria. Illud te ad ex-
tremum & oro & hortor, ut tanquam poëta boni, &
actores industrij solent, sic tu in extrema parte, & con-
clusionē muneris, ac negotij tui diligētissimus sis. Quam-
obrem si me amas, quantum profectò amas: si dormis, ex-
pergiscere: si stas, ingredi: si ingredi, curre: si curris,
aduola. Hoc sit negotium tuū, hoc otium, hic labor, hæc Plinius,
quies: in his uigilia, in his etiam somnus reponatur.
Effinge aliquid, & excude quod sit perpetuo tuum.
Nam reliqua rerum tuarum post te, alium atque alium
dominum sortientur, hoc nunquā tuum desinet esse, si
semel coeperit. Scio quem animum, quod horter inge-
nium. Tu modo enitere, tibi ipse sis tanti, quanti uidebe-
ris alijs, si tibi fueris. Quod te quoque ut facias, & hor-
tor, & moneo: memēto quibus imaginibus oneraris, quæ
nomina, & quanta sustineas. Proinde dum suppetit uita
enitatur, ut mors quā paucissima quæ abolere possit,
inueniat. Lusus uocantur, sed hi lusus non minorē inter-
dum gloriā quā seria consequuntur. Confugit in sinum
tuum respublica. Ac mihi intuenti sapientiā tuam, minus
mirū uidetur, quòd mortales istos caducosq; titulos, aut
deprecere aut tēperes. Scis enim ubi uera principis, ubi
sempiterna sit gloria: ubi sint honores, in quos nihil flam-
mis, nihil senectuti, nihil successoribus liceat. Arces enim
i s & sta

et status templaq; demolitur, et obscurat obliuio, negligit carpitq; posteritas. Contra contemptor ambitionis, et potestatis domitor, ac frenator animus, ipsa uetustate florescit, nec ab ullis magis laudatur, quam quibus minime necesse est. Quod ego titulis omnibus speciosius reor, quando non trabibus aut saxis nomē tuum, sed monumentis eternæ laudis inciditur. Ibit in secula fuisse principem, cui florenti et incolumi nunquā nisi modici honores, sepius nulli decernerentur.

Exhortatio.

Cicero. **S**ed presta te cum, qui mihi à teneris (ut Greci dicunt) unguiculis es cognitus. Magna est hominum opinio de te, magna commendatio liberalitatis, magna memoria consulatus tui. Hæc profectò uides quanto expressiora, quātoq; illustriora futura sint, cum aliquantum ex prouincia, atque ex imperio laudis accesserit. Quāquam te ita gerere uolo, quæ per exercitum atque imperium gerenda sunt, ut hæc multo antè meditare, huc te pares, hæc cogites, ad hæc te exerceas, sentiasque id, quod quia semper sperasti, non dubito, quin adeptus, intelligas te facillime posse obtinere summum atque altissimum gradum ciuitatis: quæ quidem mea cohortatio ne tibi inanis aut sine causa suscepta uideatur, &c. Teq; ad studium summe laudis cohortabor. Est enim tibi grauius aduersaria constituta, et parata incredibilis quædam expectatio, quam tu una re facillime uinces, si hoc statueris, quarum laudum gloriam adamaris, quibus artibus et laudes comparantur, in ijs esse laborandum. Lib. 9. epistola, Duabus tuis, locos habet hortatorios, et item gratula

gratulatorios, circa medium & finem. Quam indicare malui, partim ne uolumen oneretur, partim quòd gratiora sunt quæ nobis ipsi decerpimus. Epistola libro 10.

Quum ipsum Furnium, aliquot habet locos exhortatorios. Item παντῶν ἀγαθῶν μὴ μέλει, curaq; & effice, ut ab

Cicero ad Att.

omnibus & laudemur, & amemur. Per fortunas tuas Ci-

Dehortatio

cero, per liberos te oro & obsecro, ne quid grauius de salute, & incolumitate tua consulas. Nam deos hominesq;

amicitiãq; nostram testificor, me tibi prædixisse, neque temere monuisse. Quare si tibi tu, si filius unicus, si do-

mus, si spes tuæ reliquæ tibi charæ sunt, si aliquid apud te nos, si uir optimus gener tuus, ualeamus, eorū fortunā non

debes uelle cõturbare, ut eam causam, in cuius uictoria salus nostra est, odiſſe, aut relinquere cogamur, aut impiã

cupiditatem contra salutem tuam habeamus. Etiam atque etiam Cicero cogita, ne te, tuosq; omnes funditus euertas:

Adhortatio

nec te sciens, prudensq; eò demittas, unde exitum nullum

uides esse. Quare quid est quòd ego te hortor, ut dignita-

ti & gloriæ seruias? Proponam tibi claros uiros, quod facere solent qui hortantur? neminem habeo clariorem,

quàm te ipsum. Te inutere oportet: tecum ipse certes: ne licet quidem tibi iam tantis rebus gestis, non tui similem

esse. Quod cum ita sit, hortatio non est necessaria, gratulatione magis utèdum est. Contigit enim tibi, quod haud

scio, an nemini, ut summa seueritas animaduersionis, non modo non inuidiosa, sed etiam popularis esset: & cum

bonis omnibus, tum infimo cuique gratissima. Hoc si tibi fortuna quadam contigisset, gratularer felicitati tuæ:

sed contigit magnitudine tum animi, tum etiam inge-

nij,

nij, atq; consilij. Quo factò intelligere debes, in te positã esse Remp. tibiq; non modo tuendos, sed etiam ornandos illos uiros, à quibus initium libertatis profectum est. Tu quoniam Remp. nosq; conseruas, fac ut diligentissime teipsum, mi Dolabella, custodias. Nunc mi Attice, tota mente incumbere in hanc curã: magna enim res est. Quamobrem aduola obsecro, atq; eam Remp. quam uirtute, atq; animi magnitudine magis, quam euētis rerū liberaſti, exitu libera: omnium concursus ad te futurus est. Fortem et liberū animum, quo et consul, & nunc consularis Remp. uendicasti, sine constantia, & æquabilitate nullum esse putaris. Nihil enim per se amplū est, nisi in quo iudicij ratio extat: quia neminem magis decet, quàm te Remp. amare, libertatisq; defensorē esse, uel ingenio, uel rebus gestis, uel studio, atq; efflagitatione omnium. Tu te exuscita, ut eam ciuitatem, in qua maxima gessiſti, liberam atq; honestam fore putes, si modo sint populo duces, ad resistendū improborum consilij. Quare magnum fac animū habeas, & spem bonã. Cessator esse noli, & illud γένεσις σκωτῶν, noli putare ad arrogantiã minuendam solum esse dictum, uerū etiam ut bona nostra norimus. Præterea meminerimus, quanto maiori animo honestatis fructus in cōscientia, quam in fama reponatur. Sequi enim gloria, non appeti debet: nec si casu aliquo non sequatur, idcirco quod gloriã promeruit, minus pulchrum est. Ii uerò qui benefacta sua uerbis adornant, nō ideo prædicare, quia fecerint: sed ut prædicarent, fecisse creduntur. Sic quod magnificum referēte alio fuisset, ipso quī gesserat recensente, uanescit. Homines enim quum rem destruere non possunt, iactationem eius incessunt.

Plinius.

incessunt. Ita si silenda ficeris, factum ipsum: si laudanda, quod non sileas ipse culparis. Multo deformius amittere, quàm non assequi laudem. Item lib. ij. tota epistola, cuius initium: Hominem te patientem. Huiusmodi sententijs extimulamus animum laudis cupidum,

Εἰς δῖον ἄνδρα ἀμύνασθαι περὶ πατρὸς. Rursum,

Ἀλκιμὸς ἴσ᾽ ἵνα τίς σε καὶ ὀφειζόντων εἴδῃ. Item,

Ἀνίρ τις φίλοι, μύσαδι δὲ θεοῖς ἀλκή.

I bone quò uirtus tua te uocat, i pede fausto.

Nate dea, quò fata trahunt, retrahuntq; sequamur.

Tu ne cede malis, sed contra audentior ito,

Quàm tua te fortuna sinat. Fac aliquid dignum

promissis. Difficilia quæ pulchra. In magnis et uo-

luisse sat est. Macte hac grauitatis gloria Cæsar.

Plinius.

Dehortatio.

Cic. epist. faml.

Sed ego te ut ad certam laudem adhortor, sic à dimissionatione deterreo: redeoq; ad illud, quod initio scripsi, totius facti tui iudiciũ, non tam ex consilio tuo, quàm ex cuentu homines esse facturos.

Commentitia mea.

Non est affectanda gloria forti uiro, suapte uirtute contento: sed hæc benefacta non aliter quàm umbra corpus consequitur. Non appetit laudẽ, sibi bene conscia uirtus eximia, sed hoc contingit illustrior ac uerior. Splendidus titulus, pater patriæ: sed hũc promeruisse pulchrius est, quàm possedisse. Inter omnia tua gētisq; tuæ decora,
si mihi credis, erit hoc præcipue gloriosum. Tot egregijs
- facinoribus summa cum laude gestis, fac istum ceu colo-
phonẽ addas. Arduum facinus ad quod te hortor, sed tuo
genere

not.

genere, tuoq; animo dignum. Ab ista familia, ab ista indole, ab istis factis, nihil expectatur plebeiū, aut mediocre. Omnia summa præstes oportet, si uelis maiorum tuorum ornamentis, si tuæ pristinae gloriae, si omnium de te expectationi respondere. Cogita te uersari in theatro longe frequentissimo, omnium oculos in te cōiectos: quibus nunquam satis facies, nisi summa cum laude peregeris cœptam istius pulcherrimi facinoris fabulam. Ipsa uirtus abunde magnū sui præmiū est. Non uiuit, qui uiuit inglorius. Non perit, qui moriēs, honestam sui memoriam relinquit posteris. Ut omnia mors tollat, certe nominis honesti decus à rogo redditur illustrius. Erexeris, mihi crede, tibi monumentū ære perennius, quod non liuor edax, non Aquilo impotēs, possit diruere, aut innumerabilis annorum series, aut fuga tēporū. Oncrant te tuorū imagines, nō illustrāt, nisi quibus factis illi sibi nobilitatem pepererunt, ijs tu tuearis et alas. Huc te uocat generis tui claritas, huc patriæ pietas, huc ciuium tuorū nunc in tua uirtute sita salus: tantū exeras istum uere magnū animum tuum, aderunt fortibus ausis superi fauētes. Audaces adiuvat ipse deus. In re honesta, suus cuiq; animus deus est. Nunc delibera, utrū malis maiorum tuorū ornamentis, tuisq; laudatissimis factis hoc decus ac ueluti summam manū addere, an generi tuo te nebras offundere: et quicquid hactenus tot egregijs laboribus partū est gloriae, semel amittere. Nulla possessio difficilius aut tardius paratur, quàm honestæ famæ, nulla citius amittitur. Si te nulla mouet tantarum gloria rerum, certe liberis tuis nullam possessionē relinquere potes uel speciosiorē, uel preciosiorem, quàm huius facti nunquam intermo

intermorituram gloriam. Ut leones & aquilæ, non cum quibuslibet feris belligerantur, sed quasdam prædas, ut suis unguibus indignas cõtemnunt: ita tuum est, hoc facinus, quò maius est, ac difficilius, hoc maiore cum animo suscipere, uelut eximiam gloriæ materiam, eximie uirtuti seruatam. Scio difficilimum esse ad quod hortor: nec ignoro uerum esse quod dici solet, ὁ δὲ πρῶτος οὐδὲν: aliquando grauiora præstitisti, nec alius animus par tanto negotio. Si palma dedignatur cedere ponderi imposito, sed magis aduersus impositum nititur, sursum erigens sese: quãtò magis oportet fortissimi uiri animum, ex ipsa negotij difficultate crescere? Non hæc scribo, quò te cessantem *ms.* extimulem, sed quò sponte currenti calcar (quod aiunt) addā. Non tam hortor, ut ista facias, quàm gratulor ultro properanti, quò nostra uota tuam uirtutem uolebant inuitare. Primum cogita, quid deceat Germanum, deinde quid Saxonem, deinde quid Alberti nepotem, postremo quid Philippum. Duplicem sustines expectationem, nimirum ut laudatissimo patri Philippo Philippus, & eximio fratri, cui succedis, respondeas. Nobilitas uera, non aliunde quàm ex egregijs factis nascitur. Hanc ipse tibi præstare potes. Quid suspicis uetusta stemmata? Quin ipse tibi paras imagines? pulchrius erit decus cuius autor fueris, quàm cuius hæres. Quantò pulchrius est, te tuis maioribus tua uirtute prælucere, quàm in alienæ laudis hereditatem uenisse? Probrum ignauia quorundam nuper acceptum, tua uirtus, tuaq; uigilantia sarciat oportet. Proxime acceptam cladem omnes fortunæ imputabunt, si nunc declararis, quantum in bello ualeat

ualeat fortis & infractus ducis animus cum eximia prudentia coniunctus. Nihil magis nostrum est, quàm quod nobis nostra paratur industria. Hoc tibi præstat ista pe-
 -ctoris uirtus, ut audeas: hoc patriæ pietas, ut uelis: quod
 -reliquum est, dabunt superi, & pietatis fautores, & ho-
 -nestæ uirtutis prouectores. Maeste istius animi esto. Istius=
 -modi studijs ad nominis eternitatem grassare. Eia, maeste
 -uirtute. Sic sic itur in cœlū. Age fortissime iuuenis, ne de-
 -fatigare, ne conuiuiesce, donec pulcherrimis gestis hone-
 -stissimum finem imposueris. Maxima studij pars tibi iam
 -decursa est: hōc alacrius ad metam propera, quò propior
 -es. Nihil est tam arduū in rebus humanis, quod non effi-
 -ciat, si sibi imperarit animus, ut magnopere uelit. Que
 -res primū deos ac diuos fecit? non ne præclara in Remp.
 -merita? Quid enim dēo similis, quàm excelsus animus,
 -uel gratis de uniuerso mortalium genere bene mereri stu-
 -dens? Magnificentius est, amplissimos honores prome-
 -ruisse, quàm obtinuisse. In magnis & uoluisse magnū est.
 -In rebus præclaris etiā conatus in magna laude ponitur.
 -Quum hætenus in campo gloriæ præcucurreris omnes,
 -hīc tui similis sis oportet. Si quid in te generosæ mentis,
 -si quid paternæ indolis, si qua scintilla pietatis in patriā,
 -si quid consilij, si quid constantis animi, si quid mascu-
 -li roboris, si quid heroicæ uirtutis, id totum nunc expro-
 -mas oportet. Non poteris in hoc laudis cursu defatigari,
 -si spectes, quæ præmia tibi sint proposita. Perge infra-
 -cto animo, quā cœpisti, nomenq; tuum immortalitati
 -commenda. Verum decus non in opibus, sed in uirtute
 -positum est. Bene collocauit, qui patriæ uitam impendit.

Te unum spectant oculi ciuium tuorum. Tuis humeris innixa est patria. Illi despondebunt animū, nisi eum praeſtiteris, quem semper esse iudicarunt. Hæc ruitura est, si te subduxeris. Cogita laborē esse breuē, felicitatem ad quam properas, esse perennē. Ardua est, iuxta Hesiodum, uirtutis uia, sed in uertice manet inestimabile præmiū. An aliquid durum uideri debet, quo paratur æterna felicitas? Ne specta, quid hic aut ille interim de te loquatur, sed quid tota posteritas semper sit loquutura. Vere regium, magniq; animu est, male audire, quū benefeceris. Inuidiam maculorum, gloria benefactorum obrue. Pulcherrimum uindictæ genus est, ininucum benefactus ad suspendiū adigere. Inuidiorū latratus, uelut ignauorum canum negligere. Illud uide quò te bonorū consensus prouocat. Malis placuisse tam turpe est, quàm ob turpia. Enitere ut his placeas, qui bonis placent omnibus. Asina per medios ignes succurrit suo foetui, & uir fortis destituet patriā periclitantem, cuius pars sunt & liberi? Parua & exilia sydera, ualidorū exortu obscurantur, sed tu non potes magis illustrare progenitorū tuorum gloriā, quàm si ad istum modum famam illorum obscures. Eò perge, non quò te reuocat mundus, sed quò te uocat CHRISTVS. An te remoratur difficultas, ubi cœlum pronuttitur? An diffidis, ubi fautor & adiutor est CHRISTVS? An dubitas de præmio, ubi promissor est deus? Non agnoscet beneficiū tuum ætas tua. Atqui istud demum est animo excelso dignum. Nullum beneficij genus heroicis animis dignius, quàm quod erogatur in posteros. Sudoribus cinuntur literæ, sed pariunt immortalitatem, Vigilijs parantur, sed

semel partea nunquam amittuntur. Serius contingunt, sed
 ubi contigerint, tutissima simul & perennis est possessio.
 In alijs egregie gestis, magna laudis portio fortune deci-
 ditur, nonnullam & hi sibi uendicāt, quorū opera res per-
 acta est, huius facti gloria insolidum tua erit. Summa de
 te spem concitasti, non est tibi committendum, ut hanc se-
 feliſſe uidearis. Genus, indoles, prudentia, animi sublimi-
 tas, pristina decora, mura quandam de te concitarunt apud
 omnes expectationē, hanc fallere turpissimū fuerit, & qua-
 re necessarium, uincere pulcherrimum. Si uoles cogitare,
 quid te dignum sit, sic te geras in ista prouincia, ut qui in
 eadem ante te, non mediocri cum laude uersati sunt, tui
 cōparatione magnam laudis partem amittant, neq; quis-
 quam exoriatur, qui tibi ausit succedere. Fac ita te geras
 in isto magistratu, ut & autoritate tua successori tradas
 augustiorem, & integritate uigilantiq; difficiliore. Co-
 gitato tecum, quicquid est istud laboris, quod percipien-
 da iurisprudentiæ datur, tribus, aut ad summum quatuor
 annis absolui: ceterum honorem in omnem usq; uitam te
 comitaturum. Labor abit, honestas manet: labor breuis,
 gloria immortalis. Alij tot annos desudant, per terras ma-
 riaq; uolitant, ut rem familiarem augeant, te pigebit ad
 paucos annos honestissimis studijs incumbere, quò tibi
 simul & rem, & dignitatem pares? Honos alit artes, ut
 scripsit Cicero: & hoc tibi calcar non mediocre debet
 addere, quòd is princeps nobis contigit, sub quo nemo
 gratis uirtutem colit. Quidam ita propagant nominis sui
 memoriam, at nullum monumentum fidelius custodit ho-
 minis famam, quàm si benefactis nomen tuum inſculpas
 animis

animis hominum, hoc est, si ingenij monumentis, non solum de tua patria, uerum etiam de cunctis nationibus: nō solum de tue ætatis hominibus, uerum etiam de posteris bene merearis. Vide etiam atq; etiam necubi dormites in hoc opere: magni refert, unde famam auspicris. Expedit omni cura perpolitum esse, per quod primum innotescere uis populo. Postea quam semel bonarum literarum patrocinium suscepisti, non oportet de gradu cadere. Vides cum cuiusmodi monstris res est: prorsus Hercule quopiā est opus. Eum nemo melius præstabit uno te. Obtestor te per nostram amicitiam, per utriusque salutem: nam mea, nisi te incolumi non constiterit: ne te periculoso negotio admisceas. Vel hircus Aesopicus te doceat, ne te conijcias temere in negotium, unde quum uoles, non possis temetipsum extricare. Facilis descensus Auerni, sed reuocare gradum, perdifficile est: Si tibi uilis est tua uita, uxoris ac liberorum te moueat calamitas. Sine his tu perire non potes, quum ex te uno pendeant omnes. In te omnis domus inclinata recumbit. Hanc tua prudentia, tua uigilantia, tua fortitudine fulcias oportet, alioqui colapsuram. Tu inuicto animo, quod honestissimū iudicabis sequere: Optimæ causæ fauebunt et numina.

Dehortatio

Exhortatio mea.

Cogita quanta factū istud laus et gratulatio sit consequutura. Quid multis? sic te numeris omnibus uirtutum absolutū præsta, ut inimici uituperare te non possint, nisi simul laudent. Illud noctes, diesq; tecum cogita, quo te quoq; possis tollere humo, uictorq; uirū uolitare per ora. Quis non exosculetur istam eximiam indolem?

*ad querend
Archu.*
Quare te etiam atque etiam hortor, ut quod tibi maiores prætulerunt, tu posteris præferas. Tu uel unus efficere potes, ne prorsus uerum sit quod uulgò iactatur, nobiles nostros nihil habere in donibus suis pulchrum, nisi imagines. Hortantur te uno ore amici omnes, ut magno sis animo, utq; omnia summa speres. Hoc utilissimum iudicato, quod est cum honestate coniunctum.

Dehortatio mea.

Sic habeto rationem dignitatis, ut memineris salutis. Fama ægrè quidem restituitur, sed restituitur tamen. Vita semel amissa nunquam recuperatur. Stultum est cum eo contendere, cui par esse non possis. Qui certat cum eo, quem non potest uincere, queso quid aliud quàm irritat crabrones? Frustra nitēdo, nihil aliud quàm odium querere, an non extremæ dementiæ est? Si aduersus naturam tuam niteris, nihil aliud quàm cum dijs pugnaueris: & scis quomodo res ea successerit gigantibus. Quanto cum periculo tentantur ea, quæ uires nostras superant, Phaëtonis, Icar, & gigantū fabula te docere poterit. Quàm non tutum sit audacem esse erga potentes & armatos, Adonidis interitus docere nos debet.

Quibus respondendum exhortatori.

Cum ego idipsum destinassem, addidisti calcar sponæ curreti. Video quàm faueas gloriæ meæ. Itaq; dabo operam, ut non solum iudicio de me tuo, uerum etiam studio satisfaciam. Quanquam ipsa res iandudum inflammabat animū meum, tamen non mediocre calcar addidit tua tam amica exhortatio. Vtinam fortuna & meo animo, & tuo studio respondeat. Non alia ratione poteras me

me magis deterrere, quàm qua me conatus es incitare. Ais quicquid præscripsero, omnes habituros oraculi uice. Absit ut in negotio tam periculoso, meam auctoritatem quisquam sequatur. Strenuè tu quidem suffundis aquam, quod aiunt, sed mihi magis opitulatore opus est, quàm hortatore. Quin ipse capeßis ad quod me instigas? Si uideres uires meas esse pares negotio, nihil esset opus, qui adderet animum. Animi satis est, si tantundem esset uirium. Næ tu equum, quod aiunt, in campum prouocas. Te quidem autore nihil non audebo. Iste tuus animus tam feliciter omniāns, mihi fuerit auspicij uice. Nutantem animum, tua exhortatio totum impulit in curam huius negocij. Omnis iacta sit alea. Nos tuis auspicijs, rem fortiter aggrediemur. De exitu uiderint superi. Nos quod in nobis est, fortem & erectum animum præstabimus. Age, nos uela uentis pandemus. Tantum ut fortibus ausis aspirent superi. Utinam, quemadmodum addis animū, ita possis & successū rei dare. Tanti est apud me tua auctoritas, ut te autore nō dubitem uel in medio saltare foro. Quis tam est Thersites, quem ista tua tam ardens oratio non faciat uirum? Acres stimulos addidit tua exhortatio, sed iam currētī, ut aiunt. Quod mea sponte faciebā, id tuo hortatu multò faciam alacrius. Ut forti militi tubæ sonitus ad præliū addit animos, ita tua exhortatio me satis iam animatū, reddidit alacriorem. Ut qui monet quasi adiuuat, quemadmodum ait Plautus, ita qui hortatur, qui acclamat, qui applaudit.

De epistola suasoria.

IAm ad suasorium genus ueniamus, quod quidē ab illo superiori non admodum abhorret. Nam ut illic, ita hic

quoq; laudem, spem, expectationem, cohortationi nonnunquam admiscemus. Complectitur autem hoc genus uarias epistolarū species, quas separatim tractabimus. Nam & qui petit suadet, & qui commēdat, & qui cōsultat, & qui monet, & qui cōsolatur. Suasoriam igitur epistolam hoc pacto licebit instituire. Si res postulabit, captanda paucis est beneuolentia. Id quemadmodum fieri conueniat, à

Narratio. rhetoribus diligenter monstratum est. Deinde narrationē subiiciemus, in qua omnia ad suadendum accōmodabimus, & tanquam argumentorū semina iaciemus. Deinde si res ipsa in se partes continebit, eas cū diuisione proponemus.

Diuisio. Quod si simplex erit, ipsi nostro ingenio diuisionē faciemus, & rationū capita, à quibus potissimū sumus suasuri, sub distributione, ut diximus, enumerabimus. Deinde singulas rationes uarie, copioseq; tractabimus. Si quid uehementer nostræ rationi uidebitur officere, id statim in

Confutatio. principio destrucmus, aut ut quicque inciderit, ita confutandum erit. Sed de rationum inuentione prius, postea de earum tractatione præcipientus. Sumuntur autē rationes

Enumeratio partium à quibus constat. ab his potissimum partibus, honesto, utili, tuto, iucundo, facili, necessario. Honestum autem diuiditur in rectum & laudabile. Rectum in uirtutem & officium. Virtus in pru-

Partes à quibus suadetur. dentiam, iustitiam, fortitudinem, temperantiam. Prudentia in intelligentiā, memoriā, prouidentiā. Iustitia in naturā, consuetudinē, & legē. Natura in religionē, pietatem, gratiam, uindicationē, obseruātiā, ueritatē, pactū, par, iudicatum. Fortitudo in patientiā, magnificentiā, fidentiam, perseuerantiam. Tēperantia in continētiā, clementiam, modestiam. Honestū, est quod propter se est expetendum,

Rectum

Rectum quod cum uirtute sit & officio. Virtus est animi habitus rationi cōsentaneus. Officium, est uirtutis ad unāquāq; personam accōmodatio. Id sumitur ab ætate, scientia, dignitate, professione, alijsq; circumstantijs: ut aliud est officium militis, præceptoris, discipuli, consulis, prætoris, nobilis, plebeij, obscuri, senis, iuuenis, docti, indocti, uiri, fœminæ, cōiugati, cœlibis. Quæ quidem officia pro loco, tempore, & rerū conditione uariantur. Prudentia est rerū multarum memoria, & usus complurium negotiorum. Memoria, Intelligentia, Prouidentia, Iustitia, Natura, Religio, Pietas, Gratia, Vindicatio, Observantia, Veritas, Consuetudo, Pactum, Par, Iudicatum, Lex, Fortitudo.

- appetitio, & rerum humilium cōtemptio, & laborū cum
Magnificētia. utilitatis ratione perpeſſio. Magnificētia eſt rerum ma-
Fidentia. gnarū, cū ampla animi cogitatione adminiſtratio. Fiden-
Patiencia. tia eſt, per quā animus in magnis & honeſtis rebus mul-
 tum in ſe fiduciæ certa cum ſpe collocauit. Patiētia eſt re-
Perſeuerantia. rum arduarū, ac difficilium honeſtatis ac utilitatis cauſa,
 uolūtaria, & diuturna perpeſſio. Perſeuerantia eſt in ra-
Temperantia. tione bene conſiderata, ſtabilis & perpetua permansiō.
Continentia. Temperantia eſt rationis in libidinem, atq; alios non re-
 ctos impetus, animi firma, ac moderata dominatio. Conti-
Clementia. nentia eſt, per quam cupiditas, cōſilij gubernatione regi-
 tur. Clementia eſt, qua animi temere in odiū concitati, co-
Modestia. mutate retinētur. Modestia eſt, per quam pudor honeſtus,
 claram & ſtabilem cōparat autoritatē. Hæc ſunt quæ ho-
 neſta appellantur, propter ſe expetenda. Quæ his autem
 contraria ſunt, turpia nominantur, & propter ſe ſunt fu-
 gienda. Et quoniā uirtutibus uitia ſunt finitima, nō diffi-
 cile erit, quāuis rem uel ad laudem uel ad reprehensionem
 retrahere: idq; uel à nominis deprauatione, uel ab aliqua
Laudabile. circumſtantiarū. Sed hæc rhetorū ſunt, & ex eorum præ-
 ceptis mutuāda. Laudabile eſt, quod cōſicit honeſtam, &
 præſentem, & ſequentem cōmemorationem: id ex officio
 & uirtute naſcitur, neq; unquam ab honeſto ſeparatur.
 Vtilitas in conſeruatiōe præſentium & cōparatiōe ſe-
Vtile. quentiū commodorum, & in corū quæ his ſunt cōtraria,
 euitatiōe conſiſtit. Commodorum uerò, quæ & bona ap-
 pellantur, quædam ſunt corporis, ut forma, uires, facultas,
 & eiufmodi: quædam animi, ut docilitas, celeritas ingenij,
 memoria felix, bonitas naturæ & indolis. Ad hæc quæ
 noſtra

nostra paramus industria, eruditio, magnanimitas, temperantia, ac ceteræ uirtutes: quædam fortunæ, ut honores, magistratus, opes, amici, et eiusmodi. Horum ut quicque tractandū sit, ne sim prolixior, à rhetoribus peti iubebo. Tantum argumētandi formas annotabo, quæ rhetori conueniant: nam eæ quas in tres figuras digessit Aristoteles, magna ex parte frigent, etiam in philosophorum scholis. Quanquàm hanc partem non reperi in exemplari, quod apud me fuit manu descriptum. Atq; inter recognoscendum planè comperi, hoc ab alio quopiam assutum fuisse, qui nactus sit hæc in schedis meis, ex rhetorū præceptionibus, in alium quempiam usum decerptæ. Nō refecimus tamen, quòd in his magis desideraremus aptam tractationem, quàm utilitatem.

De complexione, & cæteris argumentationum oratoriarum generibus.

Complexio est, in qua utrumuis concesseris, reprehēditur. Væ, si tibi bonus præceptor fui, quid insectaris bene meritum? sin malus, cur reuocas? Poëtas desine calumniari: quos si ipse didicisti, cur in alijs reprehendis, quod ipse feceris? sin, quod magis credo, non didicisti, cur quod ignoras calumniaris? Pater si maritum improbū no ueras, cur me illi collocasti? si probum, cur distrabis? Gabiniū admonendum non censeo: nam si probus est, non est reprehendendus: sin improbus, admonitionem tuam contemnet. Miserum est habere uxorem: nam si formosa sit, metu angeris: sin deformis, hoc ipso miser eris, quod deformem habes. Si meministi, obtundam: sin obliti estis,

Exempla.

De falsa com-
plexione.

De enumera-
tione.

quum re nihil egerim, quid uerbis efficere possim? Stultum est, cuiquam absenti obrectare: nam si amicus est, cur presentem potius non admones? si inimicus, cur odium eius irritas, & illi nihil noces? De futuris euentis angimur non debemus: etenim si bona sint, frustra metuimus: si aduersa, infelicitatem duplicamus. Deprauata autem complexio dicitur, quum aut utraq; pars, aut altera conuer-
ti potest, & in aduersarium retorqueri: ut illud apud Aul. Gellium: Intendo tibi litē: si persuasero me nihil debere, non reddo mercedē, quia persuasi: si minus persuasero, nihil debeo: neq; enim didici artem. Sic utraq; pars conuertitur: Si persuaseris te nihil debere, dabis, quia didicisti artem: si minus persuaseris, rursus accipiam, quia non persuasisti. Accusandus omnino non est: nam si ueretur, quid eum accusas, qui probus est? si non ueretur, quid eum accusas, qui id parui aestimet? Inuerte partem priorē: Imo si ueretur, maxime est accusandus, ut corrigatur. Inuerte posteriorem sic: Imo si non ueretur, hoc ipso est accusandus, quia improbus. Complexio, quæ ex oppositis partibus constabit, refelli non poterit, ut hæc: Non sum accusandus, si aliter evenit, quam putavi. Nam si sciebas id non profuturum, tu potius es accusandus, qui quod Reip. utile uidebas, præsens conticuisti: si nesciebas, nec hic sum accusandus, cum & tu eiusdem futurorū incitiæ reus sis. Enumeratio est in qua pluribus rebus expositis, ac cæteris infirmatis, una reliqua necessario confirmatur, hoc modo: Si illū ab hoc dicis occisum, quum sine causa nunquam suscipiatur maleficium, necesse est, aut metu, aut odio, aut spe alicuius commodi, aut amici alicuius gratia ab hoc esse occisum

occisum: sed neq; odium, neq; metum, neq; spem intercessisse, neq; ad amicum aliquem mortem eius pertinere, probare poteris. Relinquitur ergo ab hoc non esse occisum.

A L T E R V M E X E M P L V M .

Quoniā hunc fundum cōstat meum fuisse, quē tu nunc possides, necesse est aut hereditate tibi obuēnisse, aut te uacuum occupasse, aut hunc emisse, aut usu tuum fecisse, aut certe me inde ui deieciisse. Me uiuo, mea res hereditate tibi obuēnire non potuit. Emptio nulla profertur. Vacuū, quod meū fuisse cōstat, possidere non potes. Vsu tuum non fecisti. Relinquitur igitur, ut ui me à mea possessione deieceris. Hæc argumentatio cōfutatur, si aut unū aliquod membrū, quod ab aduersario præteritū erat, profertur: aut si unū quippiam ex his quæ prolata sunt falsum ostēditur. Ut si dicat eum agrū sibi datum esse, quod ille in enumeratione præterierat: aut si emptionem proferat, quod alter in enumeratione negarat. Simplex conclusio, est argumentatio, in qua ex eo quod antecedit, aliquid cōsequi necesse est, hoc modo: Si hunc hominē in prouincia cōstat fuisse occisum, ab hoc qui tū Romæ fuit, occidi non potuit. Itē: Spirat, igitur nō est mortuus. Peperit, igitur cū uiro cōcubuit. Cū uiro cōcubuit, igitur uirgo non est. Homo est, igitur animal est. Poëta nouit, igitur didicit. Hæc argumentatio cōfutatur, si nō cohærere cōsequens ostēditur: ut, Si mater est, diligit filiū. At Medea (dicet aduersarius) filiū interfecit. Poëta est igitur lasciuus. At Prudentius continentissimæ uitæ fuit. Sunt enim quædā, quæ probabiliter quidem, ac iuxta sensum communē, sed neq; necessario, neq; perpetuò consequuntur. Ferè fit, ut iuuenes illaqueentur

amoribus

De simplici cō-
clusionē.

amoris, sed reperias castissimis moribus præditas. Aut si quod antecedit negabitur: ut si in primo exemplo dicat aduersarius, eum non Romæ, sed in prouincia fuisse.

Defubiatione,

Subiectio est argumentatio, in qua quærimus, quid pro aduersario, aut contra nos dici possit. Deinde per singulas interrogationes, propere subiicimus rationes, quibus id quod dictum est, non ita esse ostendimus, hoc modo: Quæro igitur, unde iste ex tenui, tam pecuniosus sit factus? patrimonium amplum relictum est? At patris bona uenierunt. Hereditas aliqua obuenit? At à suis exheredatus est. Ex mercatura quam agere constituit, quæstum maximum consequutus est? At ex ea re, quæ habere uidebatur, omnino amisit. Quare si his rationibus locupletatus non est, aut illi aurum domi nascitur, aut unde non oportuit, surripuit. Numeratur hæc argumentatio & inter exornationes. Nam quatenus aliquid colligimus, argumentatio est: quatenus ornatam conficit orationem, exornatio putatur. Neque tantum ad concludendum adhibetur, quum non minus habeat dignitatis, hoc modo: Quid faciam miser? taceam? instigem? purgem me? laterem lauem. Reprehenditur hæc argumentatio, aut enumeratio: à qua non multum differt, si aut aliquid prætermisum ostenditur, aut infirmatur aliquid ex enumeratis.

De opposi-
tione,

Oppositio est argumentatio, in qua ex opposito propositionis, ad ipsam propositionem reuertimur, hoc modo: Si eo tempore, quo hunc hominem in prouincia occisum dicitis, Romæ fui, relinquitur à me occisum non fuisse. Hæc propositio est, cuius oppositum sequitur. Nam si eo tempore, quo hunc hominem in prouincia occisum dicitis,

in

in prouincia fuisset, à me occisum suspicari poteratis: nunc autem, quum eo tempore in prouincia non fuerim, nihil est quod hominem à me occisum suspicemini.

ALIVD EXEMPLVM.

Oportet nouo exemplo contra Cimbros Caium Marium imperium continuare. Nam si pax esset, & nullus nos ad nouas cogitationes cogeret, liceret autem facere, quæ uolumus, nunquam nobis Quirites nouandū aliquid dicerem contra exempla atq; instituta maiorum. Contentus enim essem moribus his, legibus, eaq; cōsuetudine, quæ nobis à patribus tradita est. Nunc autē cum bellum accerimur sit, & hostes Italiam deuastēt, quotidieq; propius ueniant, ac iam urbi imminere uideantur, is qui omnibus imperatoribus antecellit Caius Marius, uel contra instituta ciuitatis (silent enim leges inter arma) ut nos liberet, nouo quodam exemplo, hoc etiam anno consulatū ac imperium contra Cimbros accipiet. Etenim quæ non faceremus, si pax esset, hæc nobis cum bellum sit, necessario suscipienda uidentur. ALIVD EXEMPLVM.

Redit ad primam
propositionē.

Non ab insignibus modò, uerum etiam à leuissimis uitijs nobis temperandum est. Nam si nulli nobis essent inimici, facile istis uitijs ignoscerem, quæ & humana sunt, & ipsa ætate penè excusantur. Nunc autem quum in dignitate uitæ constitutus, à pluribus inuidis & maluolis obserueris, dandam tibi operam censeo, ne uel in minima culpa deprehendi queas.

Hæc propositio
est oppositum.

ALIVD EXEMPLVM.

Grauisime omnino istam iniuriam feram necesse est, quæ si mihi ab alieno quopiam, de quo nihil essem bene-meritus

meritus, obiecta esset, æquiore animo ferrem: liceret enim inimicum ulcisci, & simplex uulnus esset. Nunc autem quum ab eo hanc contumeliam acceperim, qui cum summa mihi familiaritas fuit, & in quem tantum officiorum contuli quātum in alium neminem, non molestissime ferre non possum. Duplicatur enim uulnus, quum iniuriæ in-
gratitudo summa additur, & cum quo amico sum usus, sine summa turpitudine non licet ulcisci.

ALIVD EXEMPLVM.

Haud æquum est, ut tibi meam operā sine fructu commodem. Nam si referendi facultas tibi deesset, uoluntas promptæ adesset, uoluntate contentus essem. Nunc autem quum sis opulentissimus, & id tibi supersit, quod mihi deest, baud par est, te gratis meum officium postulare.

Violatio. Violatio, quam Græci βίασις appellant, est argumētatio, in qua ex aduersariorum ratione, non id quod ipsi uolunt, sed quod nobis utile est, sequi demonstramus. Hæc in confutatione solum adhibetur. EXEMPLVM.

Non est ducenda uxor. ratio, eò quòd ex connubio, in orbitatem & luctum incidamus. Imò eò maxime est uxor ducenda, quæ filiis alijs procreatis, luctum orbitatis à nobis expellit. ALIVD EXEMPLVM.

Non sunt legendi poëtæ, demulcent enim legis animi, & alliciunt. Imò ob id ipsum sunt legendi, quia demulcent animum. ALIVD EXEMPLVM.

Nihil est magni tentandum cuiquam, eò quòd brevis sit hominis uita. Imò tanto magis aliquid egregij tentandum erit, ut quum diu uiuere non possimus, aliquid relinquamus, quo nos uixisse testemur. Et iterum: Damnandus

duſ eſt, occidit hominem: imò præmio donandus, quia tyrannum hominem occidit.

*Inductio eſt argumentatio, quæ rebus non dubijs con= De inductione
ceſſis, propter ſimilitudinem, rem quæ dubia erat, com=*
probat. Dic mihi prætor, uarijs ſententijs pugnandum,
nec ne: ſi illo die inter nos diſſenſiſſemus, utrius ſententiæ
ſtaretur? Non eſt dubium, inquis, quin Conſulis. Quòd ſi
diuerſa fuiſſent auſpicia, & mea quidem pugnandum eo
die ſignificaffent: tua, quieſcendum: meis ne auſpicijs pu=
gnandum fuiſſet, an tuis quieſcendum? Meis ſcilicet, quia
conſul fui, parendum dices. Age uerò, ſi meis auſpicijs,
mea ſententia, pugnatum proſpere eſt, æquum ne tibi ui=
detur cum honorem ex ea re aſſequi, cuius nec ſententia,
nec auſpicijs quicquam actum eſt?

ALTERVM EXEMPLVM.

Dic mihi ſenex ingratiffime, ſi nihil in te beneficij
collocaſſem, num tu me iniurium uocaſſes? Non, inquis.
Neque enim iniuria uideri poteſt, ſi nihil de eo bene me=
rearis, cui nihil debes. Nunc igitur quum ultro pluri=
um in te officiij contulerim, non æquum eſt te mihi ſuc=
cẽſere, quòd bene facere deſierim, qui ſuccenſere non po=
teras, etiam ſi nunquam bene facere cœpiſſem.

*Collectio eſt argumentatio, quæ rationibus & expo= De collectione.
ſitione abſoluitur. Hæc in quinque partes diſtributa eſt:*
propoſitionẽ, rationem, rationis confirmationem, expoli=
tionẽ, & conſuſionem. Propoſitio eſt, per quam ſumma=
tim oſtẽdimus, quid ſit quod probare uolumus. Ratio eſt,
quæ demonſtrat uerum id eſſe, quod propoſuimus uno aut
pluribus argumentis. Rationis cõfirmatio, quæ rationem
expo

expositam corroborat. Expositio est, quæ rei locupletanda & honestanda causa sumitur. Conclusio est, quæ postremo diffusius dictas breuiter colligit partes argumentationis.

EXEMPLVM.

Propositio. Quoniã breuiter docui Iudices, quæ de causa semper Ulysses Aiace[m] extinctũ uoluerit, nunc ne quid uobis impedimento sit, quin eum ab hoc interfectum uel hac luce

Ratio. clarius uideatis: potuisse quoq; quod uoluerit facile perficere, quàm breuissime ostendam. Nam is quum sine so-

Confirmatio. cijs acerrimum uirum uideret, tum demum cogitauit posse eum incautum opprimi. Etenim quum arborum frequentiam prospectũ omnem eripere uideret, tum eum securũ,

Expositio. alijs cogitationibus occupatum, non antè quicquam aduersi suspicaturum arbitrabatur, quàm ei gladiũ occultus infingeret. Itaq; solitudo loci, obscuritas, insidiæ præparatæ ac dolus, acerrimi, & capitalis inimici nihil metuentis, solitudo & securitas, potestatem interimendi fortissimum uirum, deterrimo omnium atq; perfidissimo præbuerunt. Non credat hoc quisquam, nisi constet nihil esse Ulyssis animo sceleratius, atq; improbius. Cuius rei indigna mors Palamedis præclarũ testimoniũ est, quum singularis prudentiæ uirum dolo atq; insidijs confusus, uel publico iudicio superare posse sperauerit. Quòd si non in syluis, neq; in solitudine, sed celeberrimo loco, cunctis spectantibus, publico iudicio, sapientissimum hominem superare posse credidit, quantò magis solum, atq; incautum, idq; in latebris interimere posse sperauit? præsertim quum Palamedis iniusta nex animum ad maius facinus audendum accen-

Conclusio. derit. Quare si syluam, si solitudinem, si illum inermem, incau

incautum, hunc præmeditatum hæc omnia, paratumq;
fuisse intellexistis, nolite amplius dubitare, Iudices, Aia-
cem ab Ulyffe occidi potuisse.

Aliud exemplum.

Nihil dementius est, quàm de improbo homine bene Propositio.
mereri. Quisquis enim id facit, suo officio suoq; sumptu est
hostem sibi facit eum, quem neq; amicum, neq; inimicum
habere licuit. Nam si eum suis officijs nullis deuinxisset, Ratio.
nihil cum improbo commercij fuisset. Nunc quum is ei se
deuinctum sentiat, cui gratias referre nolit, cui debitorem
uideri pudeat, neesse est, ut eiusmodi hominē extinctum
uelit, ne sit, cui debere superbissimus simul, & ingratis-
mus homo uideatur. Id si cui obscurum uidetur, Trebonij Confirmatio.
hominis innocentissimi casu, liquidò poterit intelligere,
qui quum Varum senem, omnium quos terra sustinet, in-
gratissimum, amicū etiam habere potuisset, si nihil de eo
meritus esset, eum suis summis beneficijs, acerrimum effe-
cit inimicum. Itaq; quantò se deuinctiorem illi intelligit,
cui homo superbissimus minime uelit, tantò diligentius in
eius perniciem incumbit. Quis eum hominē sanæ mentis
iudicaret, qui latroni gladiū, quo ipsum iugularet, ultro Expositio.
ministraret? Nihilò plus sapit is, qui improbum & ingra-
tum demerens, causam illi præbet, cur se perditum uelit.
Quare cū nostro beneficio summū malum nobis parari Conclusio.
intelligamus: & quemadmodū amico nostro cesserit, ui-
deamus, ipso Oreste uidebimur insanores, si posthac im-
probum hominem nostris beneficijs demereri uelinus.

Aliud exemplum.

Sapientis est, famæ suæ longe diligentius, quàm opibus Propositio.
suis,

Ratio. suis, non minus uerò diligenter quàm uita consulere. Minus siquidem damni, & incommodi accipit, qui pecuniã,

Confirmatio. aut etiã uitam amittit, quàm qui famã. Pecunia enim amissa sarciri potest, fama semel amissa in integrum restituitur nunquam. Et uita quidem corporis, quum certos à natura terminos acceperit, in longum tempus extendi nequit. Fama uerò hominis, quæ est altera, & potior uita nostra, etiam post cineres, & rogi superest. Vitam igitur quisquis eripit, rem adimit, qua nullo etiam auferẽte, diu frui non poteramus. At famam qui eripit, re immortalis, & pulcherrima nos spoliatur. Quod ueteres recte intellexisse mihi

Expositio. uidentur, qui non pecuniam modo, uerum etiam uitam ipsam effundere non dubitabant, quò nomen suum quàm maxime prorogarent. Multos fuisse eo animo legimus, ut postquàm se famam spoliatos uiderent, ne causam quidem esse putarent, cur diutius in uita manerent. Adeò grauius

Conclusio. famæ, quàm uitæ dispendium iudicabant. Quòd si homines ijs rebus maxime timere uidemus, quæ cum sint pre-

not. ciosissima, facillime tamen perduntur, ac difficilime restituntur: sapiens existimãdus non est, qui famæ, quæ neque restitui potest semel amissa, & qua nihil habet homo preciosius, non multò diligentius consulendum putat, quàm pecuniæ, aut etiam uitæ. Potest etiam tribus duntaxat, aut quatuor partibus confici collectio: si uel confirmatio, uel expositio, uel utraq; omittitur. Ratiocinatio est argumẽtatio perfectissima, quæ accommodatione assumptionis, ad id quod propositum est elicit conclusionem. Hæc quoque sicut collectio paucioribus partibus cõstare potest, tamen ea quæ perfectissima putatur, quinque partibus consuetur.

De ratiocinatione.

mitur: Propositione, ratione, propositionis assumptione,
 assumptionis ratione, & complexione. *Propositio est,* *Propositio.*
 per quam breuiter is locus proponitur, ex quo omnis
 emanat uis argumētationis. *Ratio est, quæ demonstrat, uerum* *Ratio.*
 esse quod proposuimus uno, pluribus uē argumentis.
Assumptio est oratio, per quam id, quod ex propositione *Assumptio.*
 ad ostendendum pertinet, assumitur. *Assumptionis ra-*
 tio est, per quam id quod assumptū est cōfirmatur. *Com-*
 plexio est, per quam id quod ex tota argumētatione con- *Complexio.*
 fitur, exponimus, hoc modo: Omnes qui causam habent
 ad suscipiendum facinus, si uita eorum à maleficio non
 abhorret, libēter maleficiū suscipere solent. At Vlysses
 interficiendi Aiakis summam causam habuit: nec est ho-
 micidium ab eius uita alienum. Vlysses igitur interficien-
 di Aiakis maleficiū suscepit. Hæc est ratiocinatio tripar-
 tita, omīssis rationibus. Hanc quinque partibus hoc pacto
 tractabimus: Omnes homines, iudices, quorum uita per *Propositio.*
 consuetudinem à scelere non abhorret, odio sic mouen-
 tur, ut uehementer exoptent suas inimicitias quouis ex-
 plere facinore. Nam eiusmodi homines, qui manus sem-
 per iniusto sanguine cruētas habere consueti sunt, quum *Ratio.*
 non possint, à uitio animi recedere: non solum, quum aut
 ita accidit, ut commodum consequantur, aut incommo-
 dum maleficio uitent, mouentur ad facinus: uerumetiam
 ipsi causas quærunt, quibus socio iniurias manus ad-
 ferant. Etenim si boni uiri cauendum putant, ut ne cau-
 sam quidem habeant, qua prætermittere officium com-
 pellantur, hos crudeles uiros, hos iniquos, qui semper
 sanguine gaudent, non mirum est interficiendi hominis
 l 2 causam

causam querere. Præterea, si boni nonnunquam metu,
aut inimicitijs à recta uia qua semper uixerunt, depulsi
sunt, quis non credat homines prauos commodo suo mo=
ueri, ut conseruare cōsuetudinem suam uelint? Illi uirtu=
tem sibi solitā utilitate decepti omittūt: hi officium quod
nunquā obseruauerunt, quum utilitatem scelere adipi=
sci se posse intelligunt, obseruabunt? Videlicet ignoratis
iudices, quanta uis sit iræ? quid inimiciæ possint, quid
odium pariat? Non dico hic belluas ira & odio moueri,
ut alteri noceant. Non dico multos sapientissimos uiros
odio atq; ira permotos, temperare sibi non potuisse. Præ=
terire melius est, quot urbes, quot regna, quot gentes in=
fectæ odio iacent. Quare Iudices, si etiam bonos inimici=
tj corrumpi uidetis, huiusmodi homines qui per cōsue=
tudinē à maleficio abesse non possunt, odio motos, ob=
Assumptio. truncare inimicum uoluisse dubitatis? At Vlysses acerrim=
us inimicus, capitaliq; odio ab Aiace diſsidebat. Scitis
enim omnes, scitis: nec opus est, ut altius rem uobis ape=
riam, quē in illum animum gessit, post iniquissimam illam
contentionem armorum. Scitis timidum hunc hominem,
qui nihil unquam uirtute animi, omnia fraude egerat, for=
tissimum hominem, acerrimum hostem, inimicorū perse=
cutorem, iniuria laceſsitum uehementer extimuisse. Intel=
ligebat enim, nisi uitam illi eriperet, se incolumē esse non
posse. Consueuerat, si manifeste non poterat, quouis mo=
do aduersarios aggredi: cui rei Palamedis indigna mors
testimonio est, quem quum prudētia omnes superare ui=
debat, non ignoratis qua proditione, quibus insidijs, qua
inuidia motus, occiderit. Atque ex illo nullum periculum
metuebat

metuebat. Aiakis metu conficiebatur. Hac in re inuidia, Complexio,
 odium, ira, & metus simul concurrunt. In Palamedem
 inuidia solum mouebatur. Quare Iudices, huiusmodi ho=
 mines, uel parua de causa maleficia suscipere solent. Hic
 autem odio acerbo Aiakis, ac metu perculsus erat. Non De propositionis inuentione,
 est audiendus, si neget se Aiacem interficere uoluisse. Pro=
 positiones autē, à principalibus causarū locis inueniun=
 tur, ut in coniecturali statu, à petitione testium, hoc mo=
 do: Sine testibus non est audiendus aduersarius. In nego=
 tiali cōstitutione, à lege, hoc pacto: Non oportet aliquid
 innouari contra leges. His contraria: ut, Non sunt omnis
 rei petendi testes, plurima enim flagitia occulte commit=
 tuntur. Et hoc tempore contra leges aliquid innouare
 oportet. Si uerò id quod ab aduersarijs propositum est,
 aut proponi poterat, refellere uoluerimus, tum utendum De exornanda propositione,
 erit propositione, sublatione, apposita propositione, so=
 lutione. Propositio est, sublationis pollicitatio. Exemplū,
 Nec me clā est, quid callidissimus senex calumniatur. Sub
 latio est aduersarij. Exemplum, Non debuisse me contra
 pactionem discedere. Opposita propositio, est solutionis
 pollicitatio: ut, Verum id quā friuolum sit, non est
 difficile ostendere. Solutionem secundarijs locis confir=
 mabimus hoc modo: Ridicule enim mihi pactionem alle=
 gat, quam ipse prior soluit. Conuenerat, ut biennium à
 me doceretur, fāteor: uerum ea lege, ut ille mores in me=
 lius mutaret. Nunc quum ex malo factus sit pessimus, ab
 utro nostrum est pactio uiolata? nempe ab isto.

Aliud exemplum.

Nec audiendos theologos puto, qui poētas legendos
 1 3 ne gent,



negent, quòd uerborū nitore legentis animum uehementē alliciant. Quid enim magis pro poëtis dici potest? Nam si, ut fatentur, poëtæ mira quadam dicendi politiæ, uenustatēq; delectant: quum ea uoluptas nō modo à turpitudine absit, uerum etiam summam adferat utilitatem, causa est ostensa cur maxime poëtæ legere debeamus.

**Derationū in-
uentione.**

Rationes porrò quibus propositiones confirmantur, inueniuntur à circumstantiis, quæ sex numerari solent, Per-

Persona.

sona, res, causa, locus, tempus, modus, quibus additur à nonnullis septima, materia. Persona est, quæ ad aliquam rem confirmandam, uel iufirmādam capitur, hominis conditio. Persona est duplex. Vna extra causam, ut maiorum aliorum iudicum, auditorum. Alia in causa, ut accusato-

**Quæ conside-
randa in una-
quaq; persona.**

Nomen. ris, rei, iudicis, testium. Persona in decem partes distribuitur, Nomen, naturam, uictum, fortunam, habitum, adfectionem, studia, facta, casus, orationes. Additur et consilium. Nomen proprium, ut Cato sapiens, Aristides iustus, Metellus Numidicus pius, Pomponius Atticus, Melaius Polynices, Petrus Candidus. Nomen commune ciuitatis, aut gētis, aut prouinciæ, ut Pœnus perfidus, Græcus leuis, Athenienses studiosi, Romani bellaces. Ab his sæpe rationem ducimus, maxime in genere demonstratiuō, nomen fortuitò impositum in calumniam trahentes: ut, Hic uero nomine Niger, nomen ex re habet. Credo hoc nomen non fortuitò, sed præfagio quodam et omine contigisse. Aut inuertimus nomē: ut, Falso nomine Innocentius, quū nihil sit eo nocentius. Cādidus, quum præter nomen nihil habeat cādidī. Aut per Antiphrasim: ut, Vigilantius dictus, quū Dormitantius meritò debeat appellari

lari. Fingimus & ipsi nomina, de quo suo loco dicemus: Nihil enim ad rationum inuentiones eares attinet. *Natura* Natura aut diuina, aut humana, & mortalis est. Diuina sumatur ex augurijs, extis, omnibus, prodigijs, oraculis diuinitus dictis. Mortalis natura diuiditur in sexum, ut uir, mulier. Nationē, ut Græcus, Barbarus. Patriā, ut Romanus, Atheniensis. Cognationē, ut nobilis, ignobilis. Aetatem, ut puer, iuuenis, senex. Dignitatem, quæ in commoda animi & corporis distribuitur, siue etiā incommoda. Animi autem commoda, & incommoda sunt, ut acutus, hebes, memor, obliuiosus, prudens, stultus, timidus, audax: dum hæc insunt à natura, non industria comparata. Corporis autem sunt, ualētudo, imbecillitas, longitudo, breuitas, formositas, uelocitas, tarditas, candor, fuscedo: item & nasus, hirsutus, glaucus, & huiusmodi. *Victus* Victus distribuitur in educationem, apud quos, quo modo, & cætera: In usum, ut quo in negotio, quo quæstu sit occupatus, & cætera: In mores, ut libidinosus, an frugi, auarus, an liberalis, & *Fortuna* eiusmodi. In fortuna considerandum est seruus ne sit, an liber: pecuniosus, an tenuis: exul, abdicatus, an secus: priuatus, an cum potestate: fortunatus, an infortunatus. *Adfectio* Adfectio est animi, & corporis ex tempore aliqua mutatio, ut uultus letus, tristis, cupiditas, metus, titubatio, pallor, rubor, tremor, oculorum suffusio, gestus insolitus, incessus modo citus, modo tardus, quæ inter signa coniecturalia numerantur. *Habitus* Habitus uirtutes, & uitia corporis, & animi complectitur, quæ non insunt à natura, sed industria sunt comparata, ut uelocitas, robur, ingenium, memoria, pro- *Studium* bitas, eruditio, facundia, & huiusmodi. Studium est ue-

hemens animi ad rem quampiam applicatio, ut medicus, orator, poëta, theologus, miles, uel equorum studiosus, & eiusmodi. *Facta, casus, & rationes.* Facta, casus, & rationes, ex tribus temporibus considerantur. Ex præterito, quid fecerit, quid illi acciderit, quid dixerit. Ex præfenti, quid faciat, eueniat, quid dicat. Ex futuro, quid facturus sit, quid illi euenturum sit, quæ dicturus sit, aut ipse, aut eius socij, ciues, maiores, amici, inimici. *Consilium.* Consilium est faciendi excogitata ratio. *Res, Causa.* Res est totius negotij certis signis conflata complexio, quæ potissimum in epilogis adhiberi solet. Causa diuiditur in impulsione, ratiocinationem. Impulsio est temerarius impetus animi ad aliquid faciendū, aut non faciendum, ut ira, cupiditas, uiolentia, timor, furor, & omnis animi perturbatio. Ratiocinatio est, quæ commodorum comparatione, aut incommodorum uitatione, ad rem hortatur. Ea consistit in commodorum adeptione, retentione, augmento, aut incommodorum euitatione, reiectione, diminutione. Est autem duplex causa, principalis, & accessoria. Principalis, ut occidit hominem ex quo pecuniæ maximam summam sperabat. Accessoria, præterea non ignorans se Clodio, huius inimico acerrimo rem gratam facturum. *Locus.* Locus opportunus an importunus, angustus, amplus, nemorosus, montuosus, longinquus an propinquus, celebris an desertus, sacer an prophanus, publicus an priuatus. *Modus.* Modus, clàm an ui: palàm an occulte: per suasione an sponte: audacter an captiose: insciens an prudens: amore an odio. *Materia.* Materia, fuste an gladio, arcu, ueneno, incantationibus. Nunc quomodo rationes à circumstantijs inueniātur, exempla subiiciamus. Proditor es patriæ

triae Catilina: nisi huius rei testes Cicero produxerit, non est audiendus. Ea enim nobilitate, his maioribus natus sum, ut sine testibus, id de me suspicari non debeat. Atque ideo magis expellendus est Cicero, quum hæc sine testibus dicat, quod mihi semper inimicus fuerit, et nobilitati (utpote nouus homo) infestus. Nam uestræ prudentiæ, iudices est, eam potestatem, talibus uiris non concedere, ne fictis argumentis nobiles homines circumueniant. Non enim tanti sceleris suspicionem sine testibus approbare debetis. Præsertim in hac Repub. in qua leges sanctissime semper sunt conseruatae. Atque ideo magis expellendus, ne si fictis argumentis locus dabitur, multos nostrum hi noui homines inuadere conentur. His præsertim temporibus, quibus ignobilium animi in nobilitatem sunt accensi: et ea licentia uiuitur, ut nemo falsa crimina non excogitet. De circumstantiis hætenus, unde rationes propositionum inueniuntur. Nunc de confirmationum inuentione. Profluit autem omnis confirmatio ab ijs locis. Ab exemplo, minori, maiori, æquali, et contrario.

Ratio a persona rei.
A persona aduersarij.
A persona iudicum.

Are.

A loco.
A causa.
A tempore.

De inuentione confirmationum.

Exemplum.

Oportet tempore belli ob ciuitatis emolumentum aliquid innouare. Et maxime nobis Romanis id licet, qui semper ad utilitatē reip. aliquid noui solemus excogitare. Maiores enim nostri ex commodo Reip. reges expulerunt, et decemuiros continuare imperium passi sunt: et tribunos plebis sacrosanctos constituerunt. Scipionē ante tempus consulem creauerunt. Si paterfamiliās multa ē re sua innouare non ueretur, senatus ob Reip. commodum quippiam innouare non audebit? Si tempore pacis inno-

Propositio.
Ratio a persona.

Ab exemplo.

A minori.

Confirmatio uare quicquam solemus, tempore belli, quum res postulat,
à contrario. est innouandum. Profluit expolitio à circumstantijs, unde
De inuentione et rationes. Est autè expolitio, quiddam ex ratione, con-
expolitionis. firmationeq; conflatum, hoc modo: Continuare Scipioni
Confirmatio. imperium, uel contra leges oportet. Nam et maiores no-
Expolitio ex tempore,
A causa. sari ex utilitate Reip. decemuiros facilè continuare impe-
Are, rium passi sunt. Atq; illi tunc in pace, nos coacti bello quid
A persona. faciemus? Et illi ad ornadam Remp. nos ad defendendam
 libertatem faciemus. Et illi decemuiros continuare impe-
 rium simul passi sunt, nos unum solummodo non patie-
 mur? Et illi Appium Claudium hominem, ut res docuit, li-
 bidine perditum, atq; tyrannicum, nos Scipionem, qui ea
 continentiae exempla dedit Numantiae, ut omnium pro-
 batissimus uideretur. In exornationibus uerò longe aliter
 de expolitione praecipitur. Hoc monendus est studiosus, si-
 cut ad unam propositionem confirmandam, plures rationes
 • adferri posse, ita unamquamq; rationem pluribus confirma-
 tionibus posse muniri: et item ad confirmandas singulas,
 plures expolitiones posse adhiberi. Verum quemadmodum
 rationes propositionibus breuitatis causa nonnunquam
De Enthyme- admiscuntur, ita confirmatio rationi, confirmationi expo-
mate, & Epen- litio intexitur. Est igitur hoc loco expolitio, siue Enthyma,
enthymemate. oratio quae à circumstantijs ad confirmationem non
Propositio. sine collatione fertur. Epenthymema, est quaedam addita
Ratio à re. Enthymemati acuta excogitatio. Exempli causa, Coriola-
Confirmatio ni factum plusquam hostile nobis uideri debet: tyrannicum
à contrario. enim est patriam expugnare. Hostes enim oppugnandi non
 sunt: quibus hic maiori odio est prosequendus, quod illi alie-
 nam, hic suam patriam oppugnat. Et cui plurimum debet,
 hanc

hanc euertere conatur. Fluit quidem comprehensio à circumstantijs, sed approbatur à quadam, aut totius in minoribus, uel paucioribus, incisione, aut similitum enumeratione, aut fictoria ratione, quæ oppositum rei confingat.

Exemplum.

Simulat, nō amat puella: quæ si uirū quempiā amaret, nō ego te ueneficij accusarē. Si teipsū arderet, artes tuæ mihi suspectæ nō essent. Si aliū quendam furorē fureret: si alia ægritudine laboraret, non te accusarē. Pater tres semel interfecit filios: si duos interfecisset, si unum solum, si nō filiū, tamē moleste ferretis. Misit cētum talenta Philippius Atheniensibus, quibus Demosihenes sibi traderetur. Non si mille daret, nō si decē milia, nō si ciuitates, gētes, prouincias, regna, simul omnia cōferret, Demosihenē, qui Græciæ libertatem, tum prudentia sua, tum eloquētia tutatus est, tradituros putarem. His ego talentis, non dico Hyperidē, aut Aeschinem, sed ne plebeium quidē quempiam, aut opificem, aut omnino ciuem infimum traderem.

Alterum exemplum.

Ego, si tuos filios (si modo tui dicendi sunt, quos crudelissime trucidasti) aut uerberibus affecisses, aut exilio, & abdicatione notasses, moleste tamē etiā ferrem, tot pulcherrimos iuuenes uel charissimo patriæ solo priuari, uel indigne uerberibus cædi. Nunc uerò quum non abdicatione, non exilio, nō uerberibus, sed morte tres simul abstuleris, non exoptulem: nō accusem: nō grauiter feram? Et qui si unum interfecisses, exclamarem, nunc tribus necatis, silebo? Inueniuntur item argumēta, & rationes à locis topicis, nempe à genere, specie, differentia, proprio,

De comprehensione.

A fictoria ratione.

A similitum enumeratione.

Ab incisione in minora.

A similitum enumeratione.

Ab incisione topicis i paucioribus.

defini

definitione, toto, partibus, causis, effectis, usibus, iunctis, iudicato, simili, maiori, minore, pari, proportionem, oppo-

A genere. sitis, trāssumptione, casu, cōiugatis, diuisione. Genus est, quod continet speciem. Ad generis negationē, cōsequitur

A specie.

et speciei remotio, non contrā: ut, Virtus non est, igitur nec iustitia. Animal nō est, igitur nec homo. Remota specie, non cōsequitur remotio generis: sed affirmata specie, sequitur affirmatio generis. Iustitia non est, igitur uirtus non est, non consequitur: iustitia est, igitur uirtus est, consequitur. Ad remotionem tamen totius generis, consequitur remotio cuiuslibet speciei. Rursus ad affirmationem totius generis, consequitur affirmatio uniuscuiusq; speciei: ut, Omne argētum legauit, igitur et calatū legauit. Omnibus scientijs operam dare iubemur, igitur et poētica. Nulla uirtus est principi negligenda, igitur nec clementia. Remouetur tamen necessario genus, si quis formas eius omnes per enumerationē negauerit, hoc modo: Nam

A differentia.

quod nec ratione utitur, nec brutū est, id ne animal quidē est. Differentia est, qua genus diducitur in speciem. A differentia æqualiter infertur, et remouetur species, quā constituit. Genus autem comprobatur, nō improbat, ut suprà dictum est de specie: ut, Si sentit, est animal: si ratione caret, homo nō est. Ratione non caret, igitur et animal est.

A proprio.

Nam si ratione caret, non statim animal non erit. Proprium est, quod soli speciei accidit, ut homini risus. Id, quemadmodum differentia, id cuius est proprium positum, infert, remotum aufert: ut, Quod risibile est, id hominem esse necesse est. Quod risibile non est, id ne homo quidē dici potest. Si tyrannicidæ proprium est tyrannum

occide

occidere, hic tyrannum occidit, igitur præmio donandus. Hoc quoniam proprium non est, sic confutabimus: Si tyrannum occidere, tyrannicidæ proprium est, carnifices, quibus tyrannos occidendos tradimus, tyrannum occidunt: carnifices igitur præmium accipiāt. Definitio est A definitione. cuiusq; rei breuiter, & absolutè potestatem complectens oratio. Hæc cum re definita conuertatur necesse est: ut, Si animal rationale est, igitur & homo: Quod nec animal est, nec rationale, id homo non erit. Si homo est, ergo & animal rationale. Si homo non est, igitur ne animal quidē rationale. Definitio confutatur, si aut uerum proprium, aut differētia uera, aut genus uerum positum non est: si quid in altero continetur, aut excluditur, quod non idem in altero contineatur, aut excludatur, hoc modo: Monetā omnē uxori legauit, cælatum autē argentum moneta est: argentum igitur cælatum omne legauit. Neque enim omne cælatum argentum moneta dicitur. Nam patera, & huiusmodi cælatum argentum est, nec tamen ista monetam uocant. Constituuntur & definitiones ex accidentibus: quæ si huiusmodi sint, ut cum re definita cōuertantur, ualet consequutio: ut, Homo est animal bipes, erectum, sine pennis. psittacus auis est uiridis, rostro adunco, collo rubro, torque insigni in senectā, quæ altero pede cibum tenēs uescitur. Constituuntur & definitiones ex enumeratis absolute partibus, speciebus, siue formis: ut, Res publica est, quæ unius, aut paucorum, aut populi potestate regitur. Hoc genus facile cōfutatur, si qua species in enumeratione præterita additur. Exemplū: Iniuriæ sunt, quæ aut pulsatione corpus, aut cōuitio aures afficiūt. Confutatur

A descriptione.

Alterum genus descriptionis.

tur

tur. Quid si quis filiā tuam rapiat, iniuria non erit? Etymologia est uominis interpretatio : siue notatio : ut, Hic Chrysogonus est appellatus, quòd aurum undecunq; pariat. Nam *Χρὸς* Græcè aurum, *γόνος* factum significat. Fingit, igitur poëta. De deo disputat, igitur theologus.

A toto. Medetur, ergo medicus. A' toto inferuntur partes, non remouentur, hoc modo: Si tota Respub. consilio gubernanda est, ergo & domus, & unusquisq; ciuium. Non tamen quoniam tota Respu. fortunæ cōmittenda non est, idcirco nec tu te casui committes. Neque enim quia tota domus redintegranda non est, igitur nec paries unus. Verū partes si uniuersæ colligantur, totum inferunt: si uniuersæ remoueantur, totum auferunt. Considerātur autem partes, à tempore, à quantitate, à loco: ut, Si neque in cælo, neque in terra inuenitur, nusquam igitur inueniri pote-

A causa. rit. Causa & effectus conuertuntur, si modo eiusmodi sit causa, ut ab ea una fluat effectus, & ea sola sit idonea ad producendū effectum. Ea quadrisariam diuiditur, in efficientem, materialem, formalem, & finalem. Ab efficiente

Ab efficiente. causa: ut, Non potest non esse dies, exorto sole. Nec uirgo est, si cum uiro concubuit. Si sapientia uirum bonum facit, & ipsa bona est. Corpus in lumine est, ergo facit umbrā. Voluptas infāmiā gignit, igitur fugienda. Virtus honorem adfert, igitur appetenda. Coloratus est, igitur fuit in sole. Puluerulentus est, igitur in itinere fuit: nō est consequens: harum enim rerū plures possunt esse causas. Sublata materia, & effectus necessario auferitur: ut, Lignum nullum habuit, nec naues igitur potuit fabricare.

A forma. Ferrum cum desit, quī possunt gladios cudere? A' forma: ut,

ut, Aperte mentiūtur poëta uolasse Dædalum: nam quod
 natura negat, nemo potest facere. A fine ducuntur argu- A fine
 menta: ut, Felicitas est expetenda, igitur & uirtus. Non
 malum est uiuere, igitur nec comedere. Bona est medici-
 na, nam & salus bona est. Bona est pax, igitur & bellum
 utile. Hæc argumentatio in coniecturali statu potissimum Ab uisibus
 adhibetur. Ab uisibus: ut, Equitare oportet, igitur & equi
 habendi. Nauigare conuenit, igitur & naues parare con-
 uenit. Tueri uitam licet, igitur & gladium ferre licet. Ve-
 terem theologiam scire pulchrum, ergo & poëtas didi-
 cisse pulchrum erit. A generatione ad corruptionem: ut, A generatione
 Malum est extinguere Remp. igitur bona est Resp. Con-
 cordia ciuium optima, cur non igitur & ciuitas? Ab ad- Ab adiunctis
 iunctis: ut, Cæsarem sapientissimum fuisse constat, quem
 nullius unquā rei poenituerit. Stultus Antonius, qui nihil
 unquā gessit, cuius non postea poenituerit. Pallet, cogita-
 bundus sedet, subinde animum mutat, igitur amat. Expal-
 luit, titubauit, trepidauit, igitur cōsciis sibi fuit. Si tibi fa-
 mam meam cōtaminare licuit, mihi expurgare non lice-
 bit. Quem quis amat, non lædit: quem heredē facit, cha-
 rum habuit. Orbæ inseruit, igitur hereditatem captat. Si
 poëta est, igitur lasciuus. Si dialecticus, igitur cōtētiōsus.
 Si theologus, morosus. Si medicus, auarus. Quæ tamen fa-
 cile confutari possunt, præsertim si eiusmodi sint, ut sæpe A iudicatis
 numero non consequantur. Ab iudicio, uel autoritate: ut,
 Optima statim discēda sunt. Sic enim Quintilianus insti-
 tutor optimus faciendū existimauit. A simili sic: Ut in tē- A simili
 pestate, quum maximum periculum, mare, uentiq; minan-
 tur, tum peritus nauclerus minime à clauo decessit, oculos
 & man

Et manus ad omnia intentas habet: Ita uir sapiens, quum
 maxime scuit fortuna, Et quum res sint maxime dubie,
 tum maxime consilio uti, Et uigilare ad omnia debet. Lo-
 cus autem à simili confutatur, si aut dissimile esse docebi-
 mus, quod alter simile dixit, aut aliā commodiorem simi-
 litudinem adducemus, hoc modo: Vt picem nemo tractat,
 nisi contaminetur, ita poëtas nemo potest legere, quin ad
 libidinem incitetur. Negabimus simile quidpiam poësim
 diuinam scientiam cum pice habere, aut commodiorē si-
 militudinē dabimus, hoc modo: Imò quod apes facere ui-
 demus, ut ex unoquoq; flosculo, quicquid est optimum, id
 excerpant, si quid ueneni, id araneæ exugēdū relinquāt:
 ita nos in poëtis, quod est eruditionis, Et bonæ doctrinæ,
 id nobis rapiemus, si quid obscœnitatis occurrerit, id re-
 linquemus. Vt neq; equus indomitus, quamuis natura bo-
 nus ad eas utilitates, quæ ab eo desiderantur, idoneus est:
 ita nec homo indoctus, quamuis ingeniosus, is est à quo
 uirtutis fructum possis elicere. Non enim ut qui currenti
 ad cursum succedit, uelocior est: sic qui Imperatori, ad re-
 gendum exercitum melior. Nec ut nauis, ita amicitia no-
 ua fidelior. A maiori hoc modo: Parenti nō obtemperat,
 A maiori. Et audiet alienū? Huius mortē tam fert familiariter, quid
 mihi hic faciet patri? Si adulterum occidere licet, ergo
 A minori. Et loris cedere. A minori uerò sic: Si furem cedere licet,
 A pari. Et latronem. Si puer ista potuisti, uir non poteris? A pa-
 ri: Si lex parricidam damnat, Et matricidam. Si patri in
 filium ius est, igitur Et in filiam. Si fratrem domi alis, cur
 me eiicias? Porro exemplum, aut simile est, aut contra-
 Ab exemplo. rium, aut maius, aut minus. Simile exemplum: ut, Iure occi-
 sisus

Simile per ne-
 gationem.

eifus Saturninus, quoniã & Gracchus. Cõtrariũ: ut, Bru-
 tus filios proditiõẽ molientes occidit. Manlius uirtutem
 filij morte multauit. Marcellus ornãmẽta Syracusanis ho-
 stibus restituit. Verres eadẽ socijs abstulit. Maius: ut, Si
 propter matrimoniũ uiolatum Troia funditus excisa est,
 quid fieri adultero par est? Minus: ut, Tibicines, quũ ex
 urbe recessissent, publice sunt reuocati, ciuitatis princi-
 pes, qui bene de Repu. meriti sunt, quũ inuidiã cessissent,
 ad exilio nõ sunt reuocandi? Simile ostenditur, à genere, De cõfutatione
argumentorum
ab exemplo,
A genere,
 natura, ui, magnitudine, multitudine, tẽpore, loco, causa,
 persona, opinione, modo. A' genere sic: Extinguitur in-
 tellectus, quoniã & uisus. Cõfutatur, sed uisus materialis,
 non item intellectus. A' ui: Infit inuentuti seueritas quæ- A ui.
 dam, quoniam & senibus. Confutatur, sed iucunditas iu-
 uentutis propria. A' magnitudine: Si sorte, non electione A magnitudi-
ne,
 fit gubernator naui, nec imperator classis. Cõfutatur, at
 maiori maius ratione gerendum est. A' multitudine: No- A multitudi-
ne,
 strã ne an hostium hæ ciuitates sint, dijudicemus: sic enim
 & maiores de duabus fecerũt. Confutatur, sed in pluribus
 maius periculum. A' tempore: Continuet Pompeius impe- A tempore,
 rium, quoniã & Marius. Confutatur, sed ille atrocissima
 Reipu. tempestate, quum nunc urgeat nemo. A' loco & A loco & cau-
sa,
 causa: Quum in Italia bellum sit, non traiiciãtur in Afri-
 cam copiæ, ne simile quid cum Atheniensibus patiantur.
 Confutatur, sed longius illi, & ignota in loca, propius
 nos, & cognita, & ea ex re alios quoque hostes illi at-
 traxerunt, nos hostem Annibalem ab Italia expellemus.
 A' persona: Cõtinuet Marius imperium, quoniam & Sci- A persona;
 pio. Confutatur, at sanctus ille uir, hic non æque. Ab opi- Ab opinione;
 nione:

nione: Qui Cereris sacra stuprauit obeuntem, ea poena plectatur, qua qui Vestæ obeuntem corrumpit. Confutatur: sed quæ maiori conatu suscipiuntur peccata, atrocius punienda sunt. Possunt autem multa horum ad eiusdem euerfio-

Locus à proportionem.

nem concurrere. Locus à proportionem, hoc differt à simili, quod ibi à simili simile ducitur, hic similitudinis, ac proportionis fit collatio. Per simile sic effertur argumentum: Nā ut naui gubernator nō sorte, sed iudicio eligitur, ita in Rep. magistratus sunt eligendi. Per proportionem sic: Ita se habet ad nauim gubernator, ut ad Rēp. magistratus. At iudicio, non sorte gubernator eligitur. Oportet ergo magistratus, iudicio, non sorte eligere. Locus à proportionem eodem modo reprehenditur, quo locus à simili.

Ab oppositis. A priuatiue oppositis.

Locus ab oppositis quinque partibus diuiditur. A priuatiue oppositis sic: Cæcus est, igitur nunquam uidebit. Item: Non est solus cæcus, qui caret oculis: nā multos tametsi oculos habent, tamē cecos appellare non dubita-

A negatione. A relatiue oppositis.

mus. A negatione: Pacē contempserunt Carthaginenses, in Hispania enim nostros socios sollicitāt. A relatiue oppositis, Carthaginenses Romanis subiectos esse conceditis? constat igitur Romanos Carthagini imperasse. Si tu me præceptorē appellas, cur ego te non appellem discipulū? Si fateris à me tibi creditam pecuniā, tu mihi debes. Si me pro filio non habes, nec tu mihi pro patre habebereis. Si nos pro tuo exercitu non habes, nec te pro imperatore ducemus. A contrarie oppositis: Si sanus non es, ægrotare constat. Si amādus, qui bene meretur: odio prosequendus, qui male. Si præmio dignus, qui tyrānum occidit: supplicio afficiendus, qui tyrānum iuuat. In contrarijs, quæ me-

diata

diata uocantur, non consequitur necessariò : ut , Si niger non est, igitur albus est, nam uiridis, aut ruber esse potest.

A' disparatis : Disparata genere sunt, quæ sub eodem ge-

A disparatis.

nere posita, diuersis differentiis, uel proprijs separantur. Quamquam etiam quæ genere distant, disparata possint uocari: ut, Si homo est, igitur nec asinus, nec deus, &c. Tu

quû decẽ pondo argenti deposueris, qua fronte auri tantundẽ repetis? Marmoreã domũ diruisti, & reponis late-

ritiam? A' trãsumptione: Philosophus nõ inuidet, quoniã nec sapiẽs. Distinguitur hic locus ab interpretatione, quoniã hic nihil exponitur, sed à uerbo notiori, minus notum

A transumptio-
ne.

infertur, illic nominis ratio affertur, hoc modo: Sapiens nõ inuidet, philosophus amator est sapientiæ, igitur non in-

A coniugatis;

uidet. A' coniugatis: Si rhetorice uirtus est, rhetorem studi-

A casibus.

diosum esse necesse est. A' casibus: Si ingratitude turpis est, turpiter igitur facis, qui bene merito gratiã non reser-

A diuisione;

ras. A' diuisione: Diuisio fit, aut per negationẽ, aut partitionẽ. Per negationẽ hoc modo: Aut utile est bellum indi-

cere, aut nõ: sed nõ est utile bellũ inferre, igitur quiescere utile est. Partitio autẽ aut est generis in species: ut, Anima

lũ quẽdã ratione participãt, quẽdã sunt rationis exper-

tia: aut totius in partes, aut uocis in significata, aut subie-

Tutum,

cti in accidentia, aut accidẽtis in subiecta, aut accidẽtis in accidentia. Sed de his hæcenus satis, iam ad partes suaso-

Iucundum;

rio generi proprias redeamus. Tutũ, quod ad incolumita-

Facile.

tem pertinet. Iucundũ, quod uoluptatẽ aut animũ, aut cor-

Necessarium;

poris, aut utriusque adfert. Facile, quod sine periculo, aut negotio fieri possit. Necessariũ, quod aliter fieri nequit.

Cætera à rhetorum præceptis petãtur. Nemo putet omni-

m 2 bus

bus his partibus semper in suadendo utendum esse, quod perlongū foret, præsertim in epistola. Sed quot incident, & quanta ex parte, eatenus attingere sat fuerit. Cōciliato igitur eius animo, cui scribimus: deinde si inciderit, subiecta narratione: tertio loco id quod suadere, aut dissuadere uolumus, cum amplificatione quadam est proponendū. Deinde post diuisionem, aut etiam omissa diuisione: ratio, aut multe rationes sunt subdendæ: rationibus confirmationes subiungendo. Confirmationi ipsi nonnunquam altera confirmatio firmamenti causa apponitur. Deinde rē locupletabimus exemplo, autoritate, prouerbio, sententia, simili, dissimili, contrario. Quæ ita inter se miscebimus, ut nunc à ratione ad simile, à simili ad exemplū, ab exemplo rursus ad rationem, uel eandē alijs uerbis uestitam, uel aliā ueniamus. Nam ab exemplis rationes nonnunquam nascuntur. Item autoritati, sententiæq; rationem cōuenit subijcere. De exemplorū uarietate iam diximus. Similia ex omni rerū genere petuntur, quare plurimorū animantiū, herbarum, aliarūq; rerū species et naturas cognitæ, & perspectas habere conducat: autoritates quoq; alias philosophorū, alias oratorum, theologorū, historicorū. Quæ si scite intermiscemus, nunquā deerit quod dicamus, & satietatem uarietate faciliē uitabimus. In hac uarietate, expolitione, & collectione rhetorica diligenter utemur. Huius præceptiuncula hoc erit exemplum.

Exemplum epistolæ suasoriæ.

Beneuolentiam
capiat.

Quanquam pro tua singulari sapientia, ipse abunde per te sapis affinis iucundissime, nec alienis eges consilijs, tamē hoc uel ueteri nostræ amicitie, quæ ab ipsis propè

propè cunabulis unà cum ætate nobis accreuit, uel tuis
 summis in me officijs, uel arctissimæ deniq; affinitati de-
 bere me putauī, si is esse uellē, quē tu me semper existimasti
 uirū & amicū, & gratum, ut id quod ad tuam tuorumq;
 salutē ac dignitatē plurimū interesse iudicassē, te liben-
 ter ac libere admonerē. Aliena nonnunquā rectius quā
 nostra perspicimus. Tuum consiliū meis in rebus persepe
 sum secutus, neque minus felix mihi comperi, quā erat
 amicū. Nunc si uicissim in tuis meū sequi uoles, futurū ar-
 bitror, ut neq; me suasisse, neque te pœniteat paruissē. Cœ
 nauit apud me sexto Idus Apriles, cum in uilla Montana
 essem, Antonius Baldus, homo, ut scis, tuarū rerum studio-
 sissimus, generiq; tuo iam inde ab initio coniunctissimus.
 Triste plenumq; lacrymarū conuiuium. Nuntiabat mihi
 magno utriusq; dolore, matrē tuam, scēminam integerrī-
 mam, ē uini concessisse: sororē tuā luctu ac desiderio ui-
 ctam, sterili dicatarū uirginum choro ascriptam esse: ad te
 unū spēm stirpis tuæ redisse: amicos summo consensu tibi
 puellā summo genere natam, forma præstanti, optime mo-
 ratam, postremò tui amantissimā, summa cum dote obtu-
 lisse. Te uerò nescio qua seu doloris impotentia, seu reli-
 gione, ita coelibatū decreuisse, ut nec generis studio, nec
 sobolis amore, nec amicorum ullis aut monitis, aut preci-
 bus, aut lacrymis abduci possis à sententia. Tu tamen uel
 me autore, mentē istam mutabis, & cœlibatu relicto, sterili
 ac parū humano uitæ instituto, sanctissimo cōiugio indul-
 gebis. Qua in re neq; tuorū charitatem, quæ tamen alio-
 qui animum tuum uincere debebat: neq; meam autoritatē
 quicquam mihi prodesse cupio, nisi clarissimis rationibus

Natiuo.

Semina argu-
mentorū.

Propositio.

Dialiso, hoc
est, limen argu-
mentationis.

ostendero, id fore tibi longe tum honestius, tum utilius, tum iucundius. Quid quod etiam hoc tempore necessarium?

Ab honesto pri-
mū ratiocinat.

Nam primum hac in re, si te honesti ratio mouet, quæ apud probos uiros plurimū ualere debet, quid matrimonio honestius, quod ipse Christus honestauit, qui nuptijs unā cum matre, nō solum interesse dignatus est, uerum etiā nuptiale conuiuium miraculorum suorum primitijs cōse-

A laudabili.

adiunxit, sanctificauit, quod ipsa sanxit natura? Quid eo laudabilius, quod qui reprehendit, hæreseos damnetur? Tam est honorificum matrimoniū, quā est infāme uoca-

Ab æquo.

bulum hæretici. Quid æquius, quā id reddere posteris, quod ipsi à maioribus accepimus? Quid inconsideratius, quā id sanctimonie studio, perinde ut prophanū fugere, quod deus ipse totius sanctimonie fons ac parens sanctissimum haberi uoluit? Quid inhumanius, quā hominem ab humanæ conditionis legibus abhorrere? Quid ingratius, quā id negare minoribus, quod ipse nisi à maioribus accepisses, ne esses quidē qui negare posses? Quod

Cōfirmationes
cum laude ma-
trimonij.

si matrimoniij quærimus autorem, non à Lycurgo, non à Mose, non à Solone, sed ab ipso summo rerū omnū opifice conditum et institutū est: ab eodem et laudatū, ab eodem honestatum consecratumq;. Siquidem initio cum hominem è limo finxisset, miseram prorsus et inamœnā eius uitam fore intellexit, nisi sociam e uam adiungeret. Quare uxorem non è luto illo quo uirū, sed ex Adæ cratibus eduxit, quod prorsus intelligeremus nihil nobis uxore charius esse debere, nihil coniunctius, nihil tenacius adglutiatum. Idem ille post diluuium mortalium generi reconciliatus

Homo pri-
mum conditus,
mox uxori iun-
ctus.

Post diluuium
renouata matri-
monij lex.

aliatus hanc primam legem prouulgasse legitur, non uti
 coelibatum amplecterentur, sed ut crescerent, ut multipli-
 carentur, ut terram implerent. At quo pacto, nisi coniu-
 gio darent operā? Et ne hic uel Mosaisca legis libertatē,
 uel tempestatis illius necessitatē causemur, quid aliud sibi
 uult illud in Euāgelicis quoq; literis repetitum cōproba-
 tumq; Christi suffragium? Propter hoc, inquit, relinquet
 homo patrē & matrē, & adhærebit uxori suæ. Quid pa-
 rentum pietate sanctius? At huic tamen coniugalis præ-
 fertur fides. Quo autore? nempe deo. Quo tempore? non
 Iudaismi tantum, sed Christianismi quoq;. Deseritur pa-
 ter, deseritur mater, & adhæretur uxori. Filius emācipa-
 tus incipit sui iuris esse. Filius abdicatus desinit esse fi-
 lius. At sola mors dirimit coniugiū, si tamen illa dirimit.
 Iam si cætera sacramenta, quibus ecclesia Christi potissi-
 mū nititur, religiosa quadam ueneratione coluntur, quis
 non uidet huic plurimū religionis deberi, quod & à deo
 & primum omnium est institutum? Et cætera quidem in
 terris, hoc in paradiso: cætera ad remedium, hoc ad cōsor-
 tium felicitatis: cætera naturæ collapsæ sunt adhibita, unū
 illud cōditæ datū est. Si leges à mortalibus institutas san-
 ctas habemus, non erit coniugij lex sanctissima, quam ab
 eodē accepimus, à quo & uitā, quæ una propè cum ipso
 hominum genere nata est. Denique ut legem exemplo
 confirmaret, adolescens, ut dictum est, ad nuptiale conui-
 uium uocatus, unā cū matre libens adfuit: nec adfuit mo-
 do, uerum etiā prodigioso munere honestauit, haud alibi
 miraculorum suorum initium auspicatus. Cur igitur, in-

Quod naturæ
 lege fuerit pro-
 ditum, euange-
 lica comproba-
 uit autoritas.

Consuetudo.

Ratiocinatio-
des.

nō plurima sint in Christo, quæ mirari potius quàm imi-
tari debeamus, sine patre natus, sine parentis dolore pro-
cessit, clauso monumento prodijt. Quid in eo non supra
naturā? Sint hæc illi propria. Nos intra naturæ legē ui-
uētes, suspiciamus illa, quæ supra naturam sunt: quæ pro
modulo nostro sunt, æmulemur. Sed è uirgine nasci uo-
luit. È uirgine quidem, sed coniugata. Virgo mater deum
decebat: cōiugata, nobis quid esset agendum significauit.
Virginitas eam decebat, quæ cœlestis afflatu numinis il-
libata parēret illibatū. Sed Ioseph sponsus, nobis casti cō-
iugij leges commendat. Quā magis coniugalē societatem
potuit cōmendare, quàm quòd arcanam illam, & angeli-
cis quoq; mentibus stupendam, diuinæ naturæ cum huma-
no corpore animaq; coniunctionē: quòd ineffabilem illum
& æternum in ecclesiam suā amorem declarare uolēs, se
sponsū illius, illam sponsam suam appellat? Magnum,
inquit Paulus, matrimonij sacramentum est, in Christo, &
in ecclesia. Si qua fuisset in rerū natura sanctior copula:
si quod sædus religiosius, quàm coniugiū, profectō ab eo
sumpta fuisset imago. Quid simile usquam de cœlibatu
legis in arcanis literis? Honorandum cōnubium, & thorus
immaculatus prædicatur apud apostolum Paulum, cœ-
libatus hic ne nominatur quidem. Nec excusatur quidem,
nisi compensatione maioris boni. Alioqui si quis naturæ
legem secutus, det operam liberis, præferendus est illi, qui
perseuerat in cœlibatu, non ob aliud, nisi ut sibi liberius
uiuat. Verè cōtinentes, ac uirgines laudatas legimus, cœ-
libatus ex se nullam habet laudē. Iam uerò Mosaica lex
sterile coniugium execratur, atq; ob id à cōmunibus aris
quosdam

quosdam submotos legimus. Quano brem tandem? nempe ideo, quòd tanquam inutiles, & sibi duntaxat uiuentes, populum nulla sobole augerent. In Deuteronomio præcipuum benedictionis argumentũ proponitur Israëlitis, quòd nullus esset inter illos futurus sterilis, nec mas, nec fœmina. Et Lya dicitur despecta à domino, quòd non pareret. Quin & in Psalmis inter præcipuas beatitudinis partes refertur uxoris fœcunditas. Vxor, inquit, tua sicut uitis abundans, filij tui sicut nouellæ oliuarum in circuitu mensæ tuæ. Quòd si lex dānat, ac notat sterile matrimoniũ, cœlibes multo amplius dānauit. Si natura pœnā non effugit, ne uoluntas quidem effugiet. Si damnantur quorũ uoluntati natura defuit, quid cōmercentur ij, qui ne operā quidem dederunt, ne steriles essent? Hebræorum leges ^{Laus coniugij.} hoc honoris habebant marimonio, ut qui sponsam du- ^{à præmijs.} xisset, eodẽ anno nō cogeretur in bellũ exire. Periclitatur ciuitas nisi sint qui eam armis tueantur. At certũ exitium est, nisi sint qui cōiugij beneficio iuuentutẽ, semper mortalitate deficientẽ sufficiant. Quin & Romanæ leges eos qui cœlibes essent, dāno etiā multabant, à reipub. muneribus secludebant. At qui liberis rempublicā auxissent, eis tanquam bene meritis præmium è publico statuebant. Priscæ leges pœnas constituerant aduersus cœlibes, quæ tametsi per Constantinum Cæsarem temperatæ sunt in fauorem Christianæ religionis, tamen arguunt quàm non sit è Repub. uel minui ciuitatem amore cœlibatus, uel spurij impleri. Quin Cæs. Augustus Censor, inquisiuit in militem, quòd in ducenda uxore non paruisset legibus, & periclitabatur ni docuisset se trium liberorum pa-
m 3 rentem

rentem. Declarant & in hoc Cæsarum leges fauorem er-
ga coniugium, quòd indictas uiduitates à Micella indu-
ctas sustulerunt, ac sublatis pœnis huiusmodi pacta, tan-
quam præter æquum & bonum inita pro irritis haberi
uoluerunt. Adde quòd Vlpianus declarat dotis causam
semper & ubiq; præcipuam, quod haud quaquam fuisset,
nisi præcipua quedam utilitas ex matrimonio profici-
scretur. Habitus est honos coniugio, sed maior fecundita-
ti. Simul atq; contigisset nomen patris, hereditatis &
omnis legati atq; etiam caduci capax reddebatur, id li-
quet etiam ex poëta Satyrico: Per me scriberis hæres, Le-
gatum omne capis, nec non & dulce caducum. Plus etiam
cōmodorum adferebat ius trium liberorum, in his est im-
munitas à publicis legationibus. Quinque porrò liberi
uacationem impetrant à personalibus quoque muneri-
bus, quod genus est tutela. Ei cui tredecim liberi conti-
gissent Iulianus imperator non modo uacationem in-
dulsit à decurionatu, sed simpliciter ab omnibus mune-
ribus. Nec silent huius tanti fauoris causam sapientissi-
mi legum conditores. Quid immortalitate felicius? Hanc
natura negatam matrimonium arte quatenus licet largi-
tur Reipub. Cui non optabilis est apud posteros memo-
ria? Hæc nullis fornicibus, nullis pyramidibus, titulis uè
certius propagatur, quàm liberorum procuratione.
Apud Adrianum imperatorem causam uicit Albinus, non
alia commendatione, quàm quòd Reipub. dedisset nu-
merosam sobolē. Proinde dispendio fisci, passus est libe-
ros in paterna bona in solidum succedere, quòd intelli-
geret imperium magis fulciri propagatione iuuentutis,
quàm

quàm pecuniarum accessione. Postremo ceteræ leges nec omnibus regionibus, nec quibuslibet temporibus congruunt, sola coniugij lex ad omnes orbis nationes, ad omne tempus pertinet. Lyncurgus leges tulit, ut qui uxores non ducerent, hi & æstate arcerentur à ludis ac spectaculis, hyeme uerò nudi forum circuirent, ac semetipsos execrati iusta pati dicrent, quòd legibus non paruissent. In summa, uis scire quantum matrimonio tribuerit anti-
 quitas? uiolati matrimonij pœnā perpende: Græci quon- A pœnâ
 dam uiolatum matrimonij ius decenni bello uindicandum censuerunt. Ad hæc non Romanis modo, uerumetiam & Hebræis, & Barbaricis legibus, adulteris pœna capitalis statuebatur. Furem quadrupli pœna absoluebat, adulterij scelus securis expiabat. Apud Hebræos autem populi manibus lapidabatur, qui id uiolasset, sine quo populus non esset. Nec hoc contenta legum seueritas, illud etiam permisit, deprehensum adulterum sine iudicio, sine legibus confodere: nimirum id donans dolori maritali, quod grauati concedit uim à capite propellenti: quasi lædat atrocius, qui coniugem adimat, quàm qui uitam. Profecto sanctissimam quandam rem coniugium uideri necesse est, quod uiolatum humano sanguine sit expiandum: cuius ultio, nec leges, nec iudicē expectare cogitur: quod ius nec in parricidio est. Sed quid de scriptis legibus agimus? Naturæ hæc lex est, non in tabulis æreis exarata, A definitione
 sed animis nostris penitus insita: cui qui non paret, ne homo quidē sit existimandus, nedum bonus ciuis. Nam si, ut Stoici homines acutissimi disputant, recte uiuere, est naturæ ductum sequi, quid tam naturæ consentaneum, quàm matrimo

A natura. matrimonium? Nihil enim tam à natura, non hominibus modò, uerumetiam reliquo animantiũ generi insitum est, quàm ut suã quodq; speciem ab interitu uindictet, & propagatione posteritatis tanquã immortalem efficiat. Quod

A minore. sine coniugali coniunctione fieri non posse quis ignoret?

In arbore coniugium.

Turpissimum autem uidetur, muta pecora naturæ parère legibus, homines gigantum more naturæ bellum indicere. Cuius opus, si oculis haud cæcutientibus inspiciamus, intelligemus in omni rerum genere coniugij speciẽ quamdam inesse uoluisse. Omitto enim iam de arboribus, in quibus, Plinio autore certissimo, adeò manifesto sexus discrimine coniugium inuenitur, ut nisi marita arbor in foeminas circumstantes ramis incumbat, tanquam cõcubitum appetens, hæ planè steriles mansuræ sint. Taceo de geminis, in quibus sexum inueniri scripsit idem autor, at non

Coitus Cœli & Terræ.

Non'ne deus ita res cunctas uinculis quibusdã connexit, ut aliæ alijs egere uideantur? Quid cœlum perpetuo motu uersatile, non'ne dum tellurem omnium parentem subiectam, uario rerum genere fecundat, uelut infuso semine, mariti fungitur officio? Sed singula percurrere nimis longũ arbitror. Quorsum autẽ hæc spectant? eò uidelicet, ut intelligamus coniugali societate & constare,

Fabula, & eius expositio.

& contineri omnia: sine ea dissolui, interire, collabi cuncta. Fingunt ueteres illi ac sapientissimi poëtæ, quibus studium fuit philosophiæ præcepta fabularum inuolucris tegere, gigantes anguipedes terræ filios, extructis in cœlum montibus bellum superis intulisse. Quid hæc sibi uult fabula? Nimirum immanes quosdam ac feros homines et obscuros, à coniugali concordia uehementer abhorruisse, eoq;

eoq; fulmine præcipitatos, hoc est, funditus interisse, cum id uitarent, quo solo constat humani generis incolumitas.

At ijdem Orpheum poëtam ac citharæ dum saxa durissima cantu mouisse commemorant. Quid significantes? Nempe uirum & sapientem, & fecundum, homines saæcos & ferarum ritu uiuentes, à uago concubitu prohibuisse, atque ad matrimonij sanctissimas leges adduxisse. Apparet igitur qui connubij amore non tangitur, cum non hominem, sed saxum uideri, hostem naturæ, numini huius rebellem, suapte stultitia sibi perniciem accersere.

Age uerò, quandoquidem in fabulas minime fabulosas incidimus, idē Orpheus, cū apud inferos Plutonium ipsum, manesq; permouit, ut Eurydicen suam liceret abducere: quid aliud poëtas cogitasse putamus, quàm ut nobis cōiugalem amorem cōmendarent, qui apud inferos quoq; sanctus, ac religiosus haberetur? Eòdem pertinet, quòd antiq̃uitas cōiugio Iouem Gameliū præfecerit, Iunonē pronubam, Lucinā, quæ parturiētibus adesset: superstitiose quidem errans in deorum nominibus, at non errans in hoc, quòd matrimonium rem sacram ac dignā, quæ dijs curæ sit, iudicarit. Diuersi quidē apud diuersos populos ac nationes, ritus legesq; fuisse. Nulla unquā gens tam fuit barbarā, tam ab humanitate omni aliena, apud quam coniugij nomen non sanctum, non uenerandū sit habitum. Hoc Thrax, hoc Sarmata, hoc Indus, hoc Græcus, hoc Latinus, hoc uel extremus orbis Britannus, aut si qui sint his quoq; scmotiores, religiosum habuit. Quid ita? quia necesse est omnibus esse cōmune, quod cōmunis hominū parens inseuit: & adeò penitus inseuit, ut huius rei sensus nō so-

Ab autoritate
& exemplis.

lūm

lum ad turtures & columbos, uerum etiam ad immanissimas feras pertingat. Siquidem leones in uxore mites sunt. Pro catulis dimicant tigrides. Asinos per obstantes ignes agit prolis tuende pietas. Atque hoc sanè ius naturæ uocant, ut efficacissimum, ita latissime patens. Vt igitur diligens cultor non est, qui presentibus rebus contentus, arbores adultas satis quidem accurate tractat: cæterum neque propagandi, neque inserendi curam agit, propterea quod necesse est paucis annis eos hortos quantumuis diligenter excultos interire: ita parum diligens in Rep. ciuis censendus, qui presenti turba contentus, de propaganda ciuium multitudine non cogitat. Nemo igitur unquam egregius ciuis habitus est, qui non liberis gignendis recteque instituendis operam dederit. Apud Hebræos & Persas laudi in primis erat, quam plurimas habere uxores, tanquam ei patria plurimum deberet, qui eam numerosissima sobole locupletasset. Num tu Abraham ipso sanctior uideri studes? Is pater multarum gentium non esset appellatus, idque deo auspice, si uxoris contubernium refugisset. Num tu Iacob religiosior haberi quæris? Is Rachelis amplexus tam diuturna seruitute, redimere non dubitauit. Num Solomone sapientior? At quantum ille uxorum gregem domi aluit? Num Socrate castior, qui Xanthippen scæuinam etiam morosam domi pertulisse legitur: non tam, ut ille suo more iocabatur, quò domi disceret tolerantiam, sed ne in naturæ officio claudicasse uideretur? Intellexit enim uir, unus Apollinis oraculo sapiens iudicatus, hac lege se genitum, ad hanc natum, hoc se debere naturæ. Nam si recte à ueteribus philosophis dictum est: si non temere à nostris theologis comprobatum

probatum: si merito uelut adagionis uice ubiq; decantatum, neq; deum, neq; naturam quicquā frustra facere: cur hæc membra tribuit, cur hos stimulos, hanc gignendi uim addidit, si cœlibatus per se laudi ducitur? Si quis te magnifico munere donaret, arcu, ueste, aut gladio, indignus accepto uideberis, si uti eo aut noles, aut nescies. Cum cætera omnia tanta ratione sint constituta, haud uerisimile uideri debet, hac una in re naturā dormitasse. Nec audio qui mihi dicat scdam illam & obscenā pruriginem & Veneris stimulos non à natura, sed à peccato profectam. *Confutatio.*
 Quid tam dissimile ueri? Quasi uerò matrimonium, cuius munus sine his stimulis peragi nequit, non culpā præcesserit. Iam in cæteris animantibus unde illi stimuli? à natura, an à peccato? Mirum ni à natura. Postremò nos imaginatione scdam reddimus, quod suapte natura pulchrum ac sanctum est. Alioqui si res non opinione uulgi, sed ipsa natura uelimus expendere, quā minus scdam brutorum animantium more edere, mandere, concoquere, excernere, dormire, quā licita permissaq; Venere uti?

At uirtuti potius quā naturæ parēdū. Perinde quasi *Confutatio.*
 uirtus sit ulla dicenda, quæ cum natura pugnet: unde nisi proficiscatur, ne esse quidem poterit, quæ cultu & disciplina perficiatur. Sed apostolorum te institutum delectat, *Confutatio.*
 qui & ipsi cœlibatum sunt secuti, & alios ad id uitæ genus sunt cohortati. Imitentur sanè apostolos uiri apostolici, quorū cum sit muneris & docere, & instituere plebem, non queunt simul & gregi, & uxori satisfacere. Quanquā & apostolis aliquot uxores fuisse constat. Episcopis cœlibatum concedamus. Quid tu apostolicum
 institutum

institutum sequeris, ab apostolico munere longe alienissi-
 mus, homo nimirū & prophanus, & priuatus? Illis hoc
 uenīe datum est, ut uacent à coniugij munere, quò magis
 uacaret copiosiore prolem Christo gignere. Sit istud sa-
 cerdotum ac monachorum priuilegium, quos apparet in
 Essenorum institutum successisse. Tui status alia ratio est.
 At ipse Christus, inquit, beatos pronuntiavit, qui sese ca-
 strarunt ob regnū dei. Non reijcio autoritatē, sed senten-
 tiam interpreter. Primum arbitror hoc Christi dogma, ad
 ea tempora potissimum pertinere, quibus oportebat ab
 omnibus mundi negotijs quàm maxime expeditum esse.
 Cursitandū erat per omnes terras, imminēbat undiq; per-
 sequutor. Nunc is est rerū ac tēporum status, ut nusquam
 reperias minus inquinatam morum integritatem, quàm
 apud coniugatos. Exaggerent quantumlibet suum insti-
 tutum monachorum ac uirginum examina: iactent quan-
 tum uolent ceremonias, cultusq; suos, quibus potissimum
 inter ceteros eminent: sanctissimum uitæ genus est pure,
 casteq; seruātū coniugium. Præterea non is modò sese ca-
 strat, qui uiuit cœlebs, sed qui caste, sancteq; colit coniu-
 gij munus. Atq; utinā uere castrati sint, quicunq; suis ui-
 tijs magnificum castrationis prætexūt titulū, sub umbra
 castitatis turpius libidinātes. Neq; enim mei pudoris esse
 puto commemorare, in quæ dedecora sæpe prolabantur,
 qui nature repugnāt. Postremò ne præcipit quidē Chri-
 stus ulli cœlibatū, at idem diuortiū palàm interdicit. Mihi
 sanè uidetur, nō pessime consulturus rebus ac moribus ho-
 minū, qui sacerdotibus quoq; ac monachis, si res ita ferat,
 ius indulgeat cōiugij: præsertim quū ubiq; tam ingens sit
 sacerdotum

sacerdotum turba, quorū quotusquisq; castam agit uitam?
 Quāto satius cōcubinas in uxores uertere, ut quas nunc
 habent cum infamia, cum irrequieta conscientia, habeant
 palam cum honesta fama: ac liberos gignāt, quos ut uere
 legitimos ament, sancteq; instituāt, quibus & ipsi pudēdi
 non sint, & uiciisim ab illis cohonestētur. Atq; id, opinor,
 iam pridem procurassent episcoporū officiales, nisi pro=
 uentus amplior esset ex cōcubinis, quā ex uxoribus. Sed *Confutatio,*
 diuina quaedam res est, angelica res est uirginitas: at hu=
 mana quēdā res est coniugiū. Ego nunc homo loquor ho=
 mini. Laudanda quidē res est uirginitas, at ita, si non hęc
 laus ad quā plurimos trāsferatur. Quam si uulgò usur=
 pare homines incipiant, quid uirginitate dici, cogitari ue=
 possit exitialius? Tum si in ceteris maxime laudē merea=
 tur uirginitas, in te certe reprehēsiōne carere non potest,
 per quem stabit, quò minus optimum illud genus & im=
 mortalitate cum primis dignum oblitteretur. Postremò mi=
 nimum abest à uirginitatis laude, qui ius illibatum coniu=
 gij seruat, qui uxorem gignendę proli, nō libidini habet. *Ex lege Mo=
 saica,*
 Si frater fratris sine liberis defuncti semen excitare iube=
 tur, tu uniuerſi tui generis spem interire sines, præsertim
 cum ad te unū reciderit? Neq; uerò me clam est, magnis
 uoluminibus priscorū patrum decantatas uirginitatis lau=
 des: quorū Hieronymus adeò miratur eam, ut non multū *Hieronymus,*
 absit à contumelia matrimonij, & ab episcopis orthodo=
 xis ad palinodiā sit inuitatus. Verū donetur hic ardor il=
 lis tēporibus: nunc optarim, ut isti qui passim sine delectu,
 ad cœlibatum ac uirginitatem adhortantur ætatem, quę
 sibi nondum est nota, hoc operę collocarent in describen=
 n da ima

da imagine casti puriq; matrimonij. Atqui his ipsis quibus tantopere placet uirginitas, non displicet bellū aduersus Turcarum gentē, qui numero tot partibus nos superant: quorum si rectum est iudiciū, consequetur, ut in primis rectū & honestū habeatur, pro uirili liberis gignendis operam dare, & iuuentutē in belli usum sufficere. Nisi fortē bombardas, tela, naues, ad hoc bellum apparandas putant, uiris opus esse non putant. Idem probāt ut ethnicorum parentes ferro trucidemus, quò liceat filios etiam insciētes baptizare. Id si uerum est, quantò mitius est idē efficere coniugiorū officio? Nulla natio tam immanis est, quin execretur infanticidiū. Principum leges pari prope modū seueritate puniūt prouocatū abortū, & accersitam pharmacis sterilitatem. *Quur ita? Quia unumquodque interest inter eum, qui quod nasci cœperit, intercipit: & eum, qui procurat, ne quid nasci possit.* Hoc quod in tuo corpore uel arescit, uel magno etiam salutis periculo corrūpitur, quod in somnis elabitur, homo erat, si modo tu esses homo. Execrantur Hebræorū literæ, uirū qui iussus congregari cū uxore fratris defuncti, ne quid nasceretur, proiecit semen in terrā: & uita iudicatus est indignus, qui uitā inuidit nascituro fœtui. At quantulū ab hoc differunt, qui sibi perpetuam sterilitatem indicunt? An non uidentur tot homines occidere, quot erant nascituri, si liberis gignendis dedissent operā? *Quæso, si cui sit fundus soli natura feracis, quē incultū sinat perpetuo sterilē esse, non ne legibus pœnas daret, quòd Reip. intersit, ut suam quisq; rem bene tractet? Si punitur is, qui negligit agrum, qui ut maxime colatur, nihil aliud fert, quàm triticū, aut fābas, aut pisas:*

qua

qua pœna dignus est, qui recusat cum fundum colere, qui cultus fert homines? Atque illic diutino molestoq; labore est opus, hic breuē culturam etiam uoluptas ueluti paratū præmiū inuitat. Quare si quid naturæ sensus, si honestum, si pietas, si religio, si officiū, si uirtus te mouet, cur ab eo abhorres, quod deus instituit, natura sanxit, ratio suadet, diuinæ pariter et humanæ literæ laudant, leges iubent, omnium gentium cōsensus approbat, ad quod optimi cuiusq; exemplū adhortatur? Quod si pleræq; res etiam acerbæ, uiro bono sunt expetendæ, non alio nomine, quàm quòd honestæ sunt, matrimoniū profecto multo maxime expetendū, de quo quis dubitare possit, plus ne habeat honestatis, an uoluptatis? Quid enim dulcius, quàm cū ea uiuere, cum qua sis non beneuolentiæ modo, uerum etiā corporum mutua quadā cōmunionē artiſſime copulatus? Si magnā quandā animi delectationē ex reliquorum necessariorum beneuolentiā capimus, quàm dulce in primis sit habere, qui cum animi tui secretos affectus cōmunices: qui cū perinde ut tecum loquaris: cuius fidei te tuto committas: qui tuas fortunas suas esse ducat? Quid tu credis habere felicitatis mariti uxorisq; coniunctionē, qua nulla possit in rerū natura inueniri, neq; maior, neq; firmior? Cum cæteris enim amicis animorū dūtaxat beneuolentiā cōiungimur, cū uxore et summa charitate, et corporū p̄mixtione, et sacramēti sœdere, et fortunarū omnium societate copulamur. Præterea in cæteris amicitijs quāta simulatio? quanta perfidia? Sed ij quos nostri amantiſſimos existimamus, sicut hirūdines, exacta æstate deuolāt, ita fortuna reflante deficiunt. Nonnunquā recentior amicus ueterē eiecit. Paucos

Epilogus superiorū argumentationum.

A iucundo.

Rationes.

Confirmatio.

audiuius, quorū fides usq; ad uitæ finē cōstiterit. Vxor
 uerò charitas nō perfidia corrūpitur, nulla simulatio
 ne obscuratur, nulla rerum mutatione conuellitur: deniq;
 sola morte, imò ne morte quidē distrahitur. Illa parētum,
 illa sororum, illa fratrum pietatē, tui amore contemnit: te
 unum respicit: ex te pendet: tecum emori cupiat. Res est?
 habes quæ tueatur, habes quæ augeat. Nō est? habes quæ
 quærat. Si res secūda sint, duplicatur felicitas: sin aduer=
 se, erit quæ te cōsoletur, quæ asideat, quæ inferuiat, quæ
 tuum malū suum esse cupiat. An tu uoluptatē ullam cum
 hac tanta cōiūctione cōferendā censes? Si domi agis, adest
 quæ solitudinis tediū depellat: si foris, est quæ discedentē
 osculo prosequatur, absentem desideret, redeuntē leta ex=
 cipiat, Dulcis iuuetæ tuæ sodalis, gratum senectutis sola=
 tium. Natura quidē homini dulcis est uel quæuis societas,
 quippe quæ ad beneuolentiā atq; amicitiam genuit. Hæc
 igitur quomodo non erit dulcissima, in qua nihil non cō=
 mune est? Contrā autē, si feras quoq; solitudinē horrere,
 Societate delectari uidemus, mea sententia, ne homo quidē
 sit existimandus, qui ab hac societate omnīū & honestis=
 sima & iucundissima abhorreat. Quid enim eo homine
 odiosius, qui tāquā sibi uni natus, sibi uiuat, sibi quærat,
 sibi parcat, sibi sumptum faciat, neminem amet, ametur à
 nemine? An non istiusmodi portentum dignū censebitur,
 quod cum Timone illo ex uniuerso hominum cōtubernio
 in mediū mare proijciatur? Neq; hic ausim illas tibi uo=
 luptates proponere, quibus cū natura nihil uoluerit esse
 homini dulcius, nescio tamen quo pacto à magnis inge=
 nijs dissimulantur potius, quàm contēnuntur. Quāquā
 quis

quis adeò se uero, ne dicam stupido, sit natus ingenio, qui eiusmodi uoluptatum genere non capiatur: præsertim si citra numinis, aut hominis offensam, citra famæ detrimentum possit contingere? Equidem cum non hominem, sed planè saxum dixerim. Etiam si minima bonorum, quæ habet coniugium, pars est, ea corporum uoluptas. Sed fac te istam ut uiro indignam contemnere: quanquàm ne uiri quidem uocabulum sine his meremur: ponatur, si uis, inter extrema coniugij commoda: iam quid casto amore esse potest amabilius, imò quid sanctius atque honestius? Accrescit interim dulcis affinium turba. Duplicatur parentum, fratrum, sororum, nepotum numerus. Natura enim unam duntaxat matrem, unum patrem tribuere potest. Coniugio pater alter, altera mater accedit, qui te, ut cui sua uiscera commiserint, singulari pietate non prosequi non possunt. Iam uerò quanti illud æstimabis, ubi pulcherrima coniux pulchra faciet te prole parentem? Vbi quis tibi paruulus aula luserit Aeneas, qui tuos, tuæq; coniugis uultus referat, qui te blanda balbutie patrem appellitet? Iam accesserit coniugali charitati uinculum adamantinum, quod ne mors quidem ipsa queat abrumpere.

Felices, inquit Flaccus, ter et amplius, Quos irrupta tenet copula, nec malis Diuulsos querimonijs, Suprema citius soluet amor die. Habes qui senectutem tuam oblectent, qui oculos claudant, qui iusta persoluant, in quibus renatus uidearis, quibus superstitionibus tu ne occidisse quidè puteris. Non abeunt ad alienos heredes, quæ tibi parasti. Ita tanquam omnibus perfuncto uitæ munij, ne mors quidem ipsa acerba uideri poterit. Omnibus, ue-

linus nolinus, senectus imminet. Hac ratione natura prospexit, ut in liberis ac nepotibus repubescamus. Quis enim grauiter ferat senectutem, ubi suos uultus, quos adolefcēs gēsit, in filio conspexerit? Mors omnibus parata est. At hac una uia, uelut immortalitātē quandam meditatur naturae prouidentia, dū sic aliud ex alio propagat, ut ueluti cūm planta arbore excisa repullulat, nec interisse uideatur, qui prole relicta moritur. At minime me fugit, qd inter hēc obmurmures. Beata res est coniugiū, si omnia secūda cūeniāt: sed quid si morosa cōtingat uxor? quid si impudica? qd si liberi impij proueniāt? Occurrent animo tuo exempla eorum, quibus cōiugium exitiū attulerit. Exaggera quantū potes, sed tamē hominū ista uitia fuerint, non cōiugij. Crede mihi, non solet nisi malis maritis mala uxor contingere. Adde quōd tibi in manu est, ut bonam eligas. Quid si corrūpatur? A malo quidē marito, uxor bona corrūpi potest: à bona mala corrigi consueuit. Falso uxores accusamus. Nemo, si qd mihi credis, unquā nisi suo uitio improbā uxore habuit. Iam ex bonis parentibus, ferme similes nascuntur liberi. Quanquā et hi utcūq; nati, ferē tales euadunt, quales illos finxeris institutione. Iam uerò non est quōd zelotypiam metuas. Iste stultē amantū morbus est, castus ac legitimus amor zelotypiam nescit. Quid tibi tragœdiæ in mentem ueniunt? Hēc maritum adultera securi percussit, hēc ueneno sustulit: illa morum odio ad mortem adegit. Cur non potius Tiberij Gracchi Cornelia succurrit? Cur non Alcestis non optimi mariti cōiux optima? Cur non occurrit uel Iulia Pompeij, uel Bruti Portia? Cur non æterno nomine digna Artemisia? Cur non Hypsi

cratea

cratea Mithridatis Pontici regis uxor? Cur non Tertiae Aemiliae comitas in mentem uenit? Cur non Turiae fides? Cur non Lucretia, Lētulāq; succurrit? Cur non Arria illa à Plinio celebrata? Cur non innumerae aliae, quarū et pudicitia, et fides in maritos, ne morte quidem potuit immutari? Rara, inquis, auis in terris, mulier proba. Et tu rara uxore dignū te finge. Mulier, inquit sapiēs ille, bona, pars bona. Aude tuis moribus dignā sperare. Plurimum in hoc situm est, quam deligas, quomodoingas, qualē ipse te illi praebeas. Sed dulcior est, inquires, libertas. Quisquis uxore accipit, compedes accipit, quas sola mors possit excutere. Quid autem dulce esse homini soli possit? Si dulcis est libertas, sociā asciscēdā cēseo, qua cum bonū istud tibi cōmune esse uelis. Quāquā quid ista seruitute liberius, ubi ita uterq; alteri obnoxius est, ut neuter manumitti uelit? Astrictus es ei quem in amicitiam recipis. At hic nemo libertatē ademptā clamat. At uereri, ne liberis morte absumptis, orbus in luctum incidas. Si orbitatē times, ob id ipsum ducenda uxor est, quae sola hoc praeſtare potest, ne simus orbi. Sed quid tu tā diligēter, imò anxie, omnia matrimonij incōmoda disquisis, quasi cœlibatus nihil habeat incōmodi? Quasi uerò ulla sit uita mortaliū, quae nō sit omnibus fortunae subiecta casibus. E' uita migret oportet, qui nihil incōmodi ferre uelit. Quòd si ad cœlestem illam uitam respicias, mors haec hominum uita est, haud uita dicenda. Sin intra humanā conditionē animum contineas, nihil est coniugali uita, neq; tutius, neq; tranquillius, neq; iucundius, neq; amabilius, neq; felicius. Ab exitu rem spectata: quotumquenq; uides, qui semel expertus coniugium,

A simili.
Orbitas.

Violatio.

nō auide repetat? Mauricius meus, cuius eximia prudentia tibi non est incognita, non ne ab obitu cōiugis, quam unice deamabat, altero mense duxit in thalamū nouam spon-
sam? Non adeo libidinis impatiētia, sed negabat sibi uitam uideri uitam absq; coniuge rerum omnium consorte. Io-
uius noster, non ne iam quartam ambit uxore? Sic adama-
bat uiuas, ut nullam consolationem admissurus uideretur.
Sic una defuncta, ad sarcindā thalami solitudinē prope-
rabat, quasi leuiter illas amasset. Sed quid nos de honesto
ac iucundo disputamus, cū non utilitas modo suadeat, uerū
etiam necessitas ad coniugiū impellat? Tolle matrimoniū,
per paucis annis uniuersum hominū genus funditus inter-
eat necesse est. Xerxen illū Persarū regē, cum ex edito lo-
co ingentem illam hominum multitudinem intueretur, la-
crymas non tenuisse dicūt, quòd ex tantis hominū milibus
post annos sexaginta, nullus omnino supersuturus esset.
Cur quod ille de suis copijs inteliexit, non etiā de uniuers-
so hominū genere perspicimus? Sublato coniugio, quotus
quisq; ex tot regionibus, prouincijs, regnis, urbibus, cœ-
tibus post centū annos supererit? Eamus nūc: & cœlibatū
miremur, qui eternā sit generi nostro cladem allaturus.
Quæ pestis, aut lues à supis, aut inferis imitti possit nocē-
tior? Quid ab ullo diluuiο timeri possit acerbius? Quid
tristius expectetur, etiamsi Phaētontēū redeat incendiū?
At ex huiusmodi quidē tempestatibus multa relinqui so-
lent incolumia, ex cœlibatu nihil reliqui fieri potest. Vi-
demus quantū morborū agmen, quot casuum discrimina
noctes, diesq; hominū paucitati insidientur. Quot pestis
absūmit, quot absorbet mare, quot Mauors abripit? Ta-
cco enim

Ab utiti, ac ne-
cessario.

ego enim de quotidianis mortibus. Circumuolat undique
 mors: ruit, rapit, properat quātū potest genus nostrū ex-
 tinguere, & nos cœlibatū miramur, cōiugium fugimus?
 Nisi fortē placet Essenorū institutū, aut Dulopolitarum,
 quorū gentem facinorosorū nunquā deficiēs numerositas
 propagat. Num expectamus, ut Iupiter aliquis nos eo-
 dem munere donet, quod apibus tribuisse dicitur, ut sine
 concubitu foetificemus, & posteritatis semina è flosculis
 ore legamus? An uerò postulamus, ut sicut è Iouis cerebro
 Mineruā prognatā poëtæ sãbulantur, ita nobis è capite
 liberi exilient? An deniq; ut iuxta ueterū fabulas, è terra,
 è saxis proiectis, è duris arborū trūcis homines producā-
 tur? E' terræ gremio permulta sine nostro cultu enascun-
 tur. Plātula sub umbra matris sæpe pullulascūt: at homini
 hāc unā propagādi uia natura esse uoluit, ut mutua ma-
 riti, uxorisq; opera mortalium genus ab interitu uindica-
 retur. Quod si fugiant tuo exēplo mortales, ne ista quidē,
 quæ tu miraris, esse poterunt. Cœlibatum miraris, suspicis
 uirginitatē? At nec cœlibes erunt, nec uirgines, si coniugij
 usum sustuleris. Cur igitur prælata est uirginitas? cur ho-
 norata, si exitiū adfert mortalibus? Laudata est, sed pro tē-
 pore, sed in paucis. Voluit enim deus hominibus cœlestis
 illius uitæ tanquā imaginē quādam & simulachrū ostēdi,
 ubi neq; nubēt ullæ, neq; nuptū dabūt ulli. Sed ad exēplū
 paucitas idonea est, multitudo inutilis. Quē admodū non
 omnes agri, quāquā feraces, ad usum uitæ seruntur: sed
 pars negligitur, pars oculis pascendis colitur. At patitur
 hoc ipsa rerū copia, in tanta aruorū amplitudine, exiguam
 partē sterilem relinqui. Verum si nulli serantur, quis non

uideat nobis ad glandes fore redeundum? Ita cœlibatus in tanta hominũ multitudinem, in paucis quidẽ laudem habet, in omnibus summã reprehensionẽ habiturus. Iam si maxime in alijs sit uirtutis nomẽ habitura uirginitas, in te certe uitiosa fuerit. Ceteri enim puritati studuisse uidebũtur: tu generis parricida iudicaberis, quod cum honesto cõiugio ppagare potueris, turpi cœlibatu passus sis interire. Liccat è numerosa sobole uirginẽ deo consecrare. Rustici frugũ primitias superis immolant, non uniuersum prouectũ: at te unũ stirpis tuæ reliquias esse memineris oportet. Nihil autẽ refert, utrũ occidas, an seruare recuses, q̃ à te uno seruari & poterat, & facile poterat. At sororis exemplum te ad cœlibatũ adhortatur. At ista uel una re potissimũ debebas à cœlibatu deterreri. Generis enim spem, quæ prius utrisq; erat cõmunis, nunc totã ad te unum reuolutam intelligis. Detur hæc uenia sexui, detur ætati: puella dolore uicta peccauit, stultarũ muliercularum, aut stultorum monachorum impulsu sese præcipitẽ dedit. Tu maior natu, uirũ te esse memineris necesse est. Illa maioribus suis commori uoluit, tu ne moriantur, operã dabis. Soror subduxit sese officio, tu duorũ tibi partes obeũdas esse cogita. Non dubitarunt filiæ Loth cum patre temulento rem habere, satius esse iudicantes nefario etiam incestu generi consulere, quàm pati interire. Tu matrimonio honesto, sancto, pudico, sine offensa, summa cum uoluptate, non cõsules tuo generi alioqui intermorituro? Quare sinamus eos Hippolyti institutum imitari, sectẽtur cœlibatum, uel qui mariti fieri possunt, patres non possunt: uel quorum tenuitas liberis educandis non suppeditat, uel quorum ge-

nus

Violatio.

Exemplum cõ
collatione.

Epilogus.

nus aliorum opera possit propagari: aut certe eiusmodi est, ut magis Reip. conducat intermori, quam propagari: uel quos peculiaris quidam æterni numinis fauor, cōmuni hominum sorte selectos cœlesti cuipiā functioni destinauit, quorum mira est raritas. Tu uerò cum teste medico uiro neq; imperito, & minime mendaci, magnam posteritatem promittere uidearis: patrimonium habeas amplissimum, genus autem tum optimum, tum clarissimum; ita ut obliterari sine nepbario scelere, magnoq; Reip. detrimento non possit: tum adsit ætas integra, nec desit forma: offeratur uerò coniux puella, qua neq; integriorē, neq; illustriorē ullam uiderunt ciues tui, pudica, modesta, pia, facie diuina, cum dote amplissima: cum rogent amici, lacrymentur propinqui, instent affines, patria flagitet: ipsi maiorum tuorum cineres à tumulis idipsum te obtestentur: tu tamen adhuc cōtaris, adhuc cœlibatum cogitas? Si qua res parum honesta abs te peteretur, si qua difficilis, tamen uel tuorum uota, uel generis charitas animum tuum expugnare debuerat. Quanto equius est id amicorum lacrymas, patriæ pietatē, maiorū charitatē abs te obtinere, ad quod te diuinæ pariter & humanæ leges hortantur, natura instigat, ratio ducit, honestas allicit, tot cōmoda inuitāt, necessitas etiam ipsa cogit? Sed iam argumentorū plus satis. Confido te iandudū me monitore sentētiam mutasse, animūq; ad salubriora consilia appulisse. Plurimum cōducet in hoc suasorio genere longe omnium utilissimo, diligēter exerceri. Dominatur enim ferè omnibus generibus. Primum igitur cuiusmodi sit, quod persuadere cupis, atque tante est considerandum. Deinde quæ sunt in eo commoda omnia

De exercitatio-
ne huius gene-
ris præcepta.

omnia diligenter colligemus, & amplificabimus: contrà uerò si qua insunt incommoda, quæq; illius animum posse detertere uidentur, ea aut extenuabimus, aut remouebimus, excogitatis quàm plurimis rationibus, & rationũ confirmationibus, ac locupletationibus. Qui loci incident communes, ad rem accommodandi sunt: uelut hic incidebat, omnibus rebus insitam esse uim propagandi sui. Item mille morbis, mille casibus atteri genus humanum. Item quàm nihil in hac uita iucundum sine consorte. Item senectutem ac mortem tolerabiliorem fieri, paratis liberis. Postremo uerò uidendum quibus argumentationum formis, aut quibus exornationibus ea quæ excogitata sunt, quàm commodissime possint explicari.

De genere dissuasorio.

IN dissuasionem omnia incommoda colligemus. Hæc quæ admodum inueniri possint, mox paucis demonstrabimus, quæ quidem meditata, & tanquam ad manum habere oportebit. Proponat autẽ didascalus aliquod argumentũ scite excogitatum, capita rationũ, exempla, similitudines: & si uolet, dispositionem paucis ostendat, reliqua puero- rum ingenijs relinquat. Deinde illorum inuenta castiget, mox palinodiã scribere iubeat. Nonnunquã etiam acuedi ingenij gratia, infames materias proponat. Veluti si quis suadeat paupertatem, exilium, ingratitudinem, agrotationem, contemptum studiorum, neglectum linguarum, tyrannidem, ut uetulus uetulam ducat, ut domũ ducat uxorem improbam. Nihil enim est ita natura bonum, quin ab ingenioso oratore deprauari possit. Hac exercitatione cum copia, tum promptitudo quædam quauis de re dicendi para-

di parabitur. A' me modo suafum est matrimonium, ubi pleraq; eius uitæ commoda collegi, contrā autem cœlibatus incommoda exaggeravi. Incommoda uero matrimonij, quæ illic partim extenuavi, partim refelli, ea in palinodia erunt exaggeranda: contrā, commoda aut uehemēter deprimenda, aut commoda esse neganda.

Quonam igitur modo erit hæc palinodia instituenda? Aut hoc ipsum argumentum ijsdem positis circumstantijs, in diuersam partē tractabimus: aut fingemus amicum secum hæsitantē, utrā uitam uelit amplecti, aut iam nuptias animo destinasse. Et ut à circumstantijs discamus inuenire argumenta, thema certis personis confictum proponemus, hoc pacto. Petrus adolescēs, minimus fratrum suorum, summo ingenio, & iam literis initiatus, matris opera à schola reuocatus, ab eadem ad ducendam uxorem sollicitatur, puellam, & diuitem, & egregia forma. Pater neque uxori, neque filio refragatur, sed liberum illi permittit, ut eligat. Scribit nunc illi sodalis, æqualis, & socius studiorum, conaturq; illū à matrimonio deterre. Hic, ut coniugium quàm miserrimum ostēdat, omnes eius uitæ ærumnas contrahet: primum ab ipsius coniugij natura: Adducet enim seruitutem, & eam quidem, quam semel admissam effugere nullo modo possis. Nulla enim seruitus, non misera esse potest, quum hominem natura libertatis auidum finxerit. Atque hic incidit locus communis, late tractabilis. Ad hæc, quum omnis seruitus misera est, tum illa minime uiro conuenit, qua cogimur mulierculis inscruire. Præter ea quòd mutua est seruitus. Accedit etiam alterum incōmodū, quòd eam ipsam sustinere rogeris & alere, cui inscrui.

seruis. Nā reliquis in seruitutibus, serui ex dominis pendunt, at illa ex te. Prius ibas, quò uolebas: cœnabas, ubi uolebas: uiuebas qui cum uolebas, uagabaris, nugabaris, conuiuabaris, lusitabas, confabulabaris. Nunc domi desidendum, cœnandum domi, cubandū domi, uiuendum more illius. Quæ si facis, ubi dulcis illa libertas? Sin minus, lites domi paratæ, audienda iurgiosa uxoris conuicia. Res augeri poterit per contentionē. Seruus uernaculus, siue emptitius uel precio dato, uel ex heri benignitate, sperat libertatē: hic sola mors habet ius manumittendi. At formosa est, non potest non esse uoluptati. Imò si formosa est, certam miseriam effugere non potes. Nam si deformis esset, minus quidem animum uoluptate oblectaret: at rursum metu minus angere, minus procax esset.

Nunc quum formam suam non ignoret, multo erit insolentior. Tum si parum pudica sit, quī tibi iucunda poterit esse uita? Sin pudica, quod haud scio an fieri possit, perpetuo metu cruciaberis, ne te non satis amet, ne corrumpatur, ne mutet animum. Nam si non ames, miserum est uiuere cum ea, quā non ames. Sin ames, hæc omnia secum incōmoda adfert amor, suspiciones, iniurias, iurgia, rixas, & cætera. Præterea stulti est compedes suas quamuis aureas amare. Quid refert, lineo, an serico fune stranguleris? Deinde extenuabis eam corporis uoluptatē, qua negabis tantos dolores esse emendos. Est enim pecuina prorsus, plena fastidij, plus aloës quā mellis habens, indigna magnis ingenijs. An hæc una tanti est, ut multo dulciores uoluptates relinquant, & tot misérias adeas? Atq; hic rursum incidit locus cōmunis, aduersus eā uoluptatē, quæ ex co-

itu

itu percipitur, quam quidam non inscite morbi comitialis speciei dixere, Plato escam malorum. Nulla res magis hebetat animi uigorē, nulla magis enervat vires corporis, nulla magis accelerat senium. Post hæc ostēdat rem esse plenam periculose alceæ. Hic locus incidet odiosus, de uitijis fœmnei sexus, que pauca bonæ aut pudicæ reperiuntur, quàm paucos non pœnituerit initi coniugij. Hæc omnia quæ nimium frequenter accidunt, ponet ob oculos. Vxorē rixosam, procacē, impudicā: breuiter his moribus, ut, quòd frequenter accidit, maritum ad mortem adigat: perennes querelas, dotis exprobrationē, affiniū graue supercilium, garrulam socrus linguam, suffosorem alieni matrimonij, liberos impios ac perditos, aliāq; quæ plurima collegere Iuuenalis, Tertullianus, Hieronymus, & alij qui in uituperando matrimonio vires eloquentiæ deprompserunt. Atq; hinc ueluti gradu factō, descēdet ad ea incommoda, quæ felix etiam matrimonium ferè consequuntur: maiore rei domesticæ curam, studium augendarum facultatum, adipiscendorū honorum (huc enim extimulat uxoris fœcunditas) morbum filiorum aut uxoris, mortem, luctum, orbitatem. Contrā quæ uoluptas sit in literis. Non posse quenquam simul & uxori & musis uacare. Quæ dignitas, quæq; felicitas uirginitatis. Hic per contentiones enumerabit, quæ relinquat, quæ subeat. Sed sine matrimonio genus humanum sustineri non potest: quasi uerò desint, qui isto munere fungantur. Istiuc alijs relinque, qui humanis rebus sunt nati, tu ad diuinā, ad cœlestia factus es. Sunt tibi fratres, quorum opera genus tuum possit præpagari, tuum est illud nō liberis, sed literis illustrare. Plures

res filios tibi parabis beneficijs tuis, quàm uxor possit gignere. Et sæpe numero fidelius amant, quos pararis, quàm quos genueris. Puta te tot habere filios, quot pueros, quot adolescentes ad honestas literas, ac piam uitam institueris. Hi parentem non grauant sumptu, non discruciant alendi sollicitudine, imò potius alunt parentem. Et hic est locus communis, longe uerius esse patrem, qui fingit, ac fornat animum, quàm qui generat corpus. Ad horum omnium singula poterunt accommodari exempla, ceteraq; quibus ostendimus orationem locupletari. Hec indicasse suffecerit, ne plus satis oneremus lectorem.

De consolatoria epistola.

QUum uita mortalium undiq; plena sit calamitatum, neq; multos reperire liceat, quos suæ fortunæ non poeniteat, nullū officiū incidit frequentius, quàm ut amicorū animos consolando subleuemus. Neq; uerò mediocre beneficiū est, tēpestiua & amica consolatio, qua quoties in rebus afflictis eorum, quibus bene uolumus, egritudini re mederi non licet, uerbis saltem lenimus dolorem. Verum scite idipsum faciamus oportet, ne uelut imperiti medici uulnus crudū adhuc & recens exulceremus potius, quàm mitigemus. Proinde triplex erit ratio tractandæ cōsolationis: una simplex & aperta, per quam argumētis declaramus non esse causam dolendi: quū uiro sapienti nihil accidere possit triste præter turpitudinem, neq; à quoquam lædi possit, nisi à scipso. Huiusmodi ualidis pharmacis utemur, quoties nobis cū philosopho, aut alioqui uiro cordato res est. Altera per insinuationem sumenda, quoties aut animus est infirmior, aut dolor recentior, acerbior ue, quàm

Triplex ratio
tractandæ con-
solationis.

quàm ut apertè patiat^{ur} sibi admoueri manus. Siue quū
erectior est animus eius, quem consolamur, quàm ut uide-
ri uelit opus habere consolatore. Nam quemadmodū sunt
quidā animo tam excelfo præditi, ut quum ægrotēt gra-
uiter, tamen pudeat medicū accersere, quòd ignauum, ac
forti uiro pudēdum existimēt ægrotare: ita sunt qui pudo-
re quodam generosæ mentis, quamlibet magnū dolorem
animi premunt, ac dissimulant. His hac arte erit obrep-
dum, ut negemus nos cōsolandi gratia scribere, quū mul-
tis modis perspectam habeamus illius eximiam sapien-
tiam, tum in fractam animi magnitudinē omnibus fortunæ
procellis maiorem: tametsi fatebimur casum esse eiusmodi,
ut alium quēlibet facile possit deijcere, tamē non dubitare
nos, quid homo a puero ueræ philosophiæ præceptis in-
stitutus, longo rerū usu doctus, ad hæc inuictō quodā ani-
mi robore præditus, fortiter ferat, quod ex cōmuni morta-
lium lege uitari nō potest: nos illius fortitudini gratulari
uelle potius, quàm dolori mederi. Priori incommodo sic
medebimur, ut eius, quē consolari uolumus, affectū in nos
transferamus, sic attēperantes orationē, ut nostro dolori
magis obsequi, quàm illius ægritudinē mitigare uelle ui-
deamur. Hac arte M. Tullius Milonis causam agēs, fictē
metum in se transfert, quò iudicum animis metū eximat.
Siquidē quos dolor adhuc totos possidet, non aliter tra-
ctandi sunt, quàm isti, qui ob morbo uitiatum animi iudi-
cium, sibi uidentur esse cornuti, aut naso in longū promi-
nenti, aut mortui, aut testacei. Oderūt dissentientes, amāt
eos, qui per dissimulationē, ipsorū imaginationi assentan-
tur. Proinde qui his mederi student, nonnunquā simulant
o sese

se se codē teneri malo. Porro contracta beneuolētia, facile persuadent remedium, ac paulatim obrepentes, tandē eximunt falsam imaginationem. Itidē agendū erit cum his, quorum animus nondum admittit manum medicantis. Dicemus nos ipsos ad cōsolandum parum esse idoneos, qui non minus angamur animo, quā is ipse, quem confirmare deberemus. Deinde doloris causas etiā exaggerabimus, eamq; exaggerationem non solum à re ipsa, sed ab eius etiam qui patitur indignitate sumemus, non sine laude quadam eius iniuriam quā plurimis bonis uiris dolere dicemus. Quod ubi erit factum, tum medicamentum adhibebimus: hic omnia quæ dolorem lenire possint, diligenter colligemus. Id fiet, si ipsum malum in quod incidit, uerisimiliter extenuabimus: & bonum unde excidit, quantum licet eleuemus. Malum extenuabimus, si minime diuturnum fore ostendemus. Solent enim patientius ferri incommoda, quæ breui finem habitura putentur, præsertim si eam incommoditatem magna aliqua spes sequutura monstretur. Hic omnes rerum cōiecturas diligentissime dispicimus, quibus eam spem quā maxime probabilem efficiamus. Vnde autem coniecturæ sumantur, rhetorum de statu cōiecturali præceptiones haud obscure demonstrāt: & Ciceronis cum multa, tum illa in primis ad Cæcinnā epistola, exemplo esse potest, ubi idē facete suo more, tantumquam augurandi disciplinam quandam tradere uidetur. His omnibus assentationem quandā admiscebimus. Quod si eiusmodi sit incommodum, ut diuturnū uideri necesse sit, alijs extenuandi rationibus utemur. Aut enim non esse incommodum, aut non esse tam graue, quā apparet, nitentur

Alter modus
extenuandi ma-
lum,

temur ostendere. Id faciemus, si quicquid erit in eo commodi, id accurate cum amplificatione quadam indicemus. Nullum enim tam graue malum homini potest accidere, ex quo nō aliquid commodi decerpi queat. Si negabimus ullum esse malum existimādum, quod citra culpā homini obtigerit, quemadmodū docet Aristoteles, iucundam esse malorum recordationem, quæ cum honesta fama coniuncta sunt: ita leuius ferimus, quæ nostra culpa contracta nō sunt. Hic philosophorū rationes et præter ceteros Stoicorum plurimum adiuuabunt: si eiusmodi calamitatem uel famæ eius profuturam, uel gradum quendam ad maximā commodā iactum esse ostendemus. Solet enim summa uirtus, summāq; felicitas à durissimis iniurijs plerumq; proficisci: idq; exemplis approbabitur, si theologico more eiusmodi tempestatem à superis propitijs immissam dicemus, corpori quidem molestant, sed animæ salutarē. Nihil autem æque dolorem leuat, teste Cicerone, ut communis tanquam legis humanæ conditionis recordatio. quare id mali, illi cum uniuerso mortaliū genere, uel certe cum clarissimis, optimisq; uiris quā plurimis commune esse declarabimus. Hic illustrium uirorum exempla, qui in eodem luctus inciderunt, aut certe similes: quiq; eos fortissimo animo, maxima cum laude tulerunt, accumulabimus. Postremò ad exhortationē ueniamus: ad pristinā animi tolerantiā, magnitudinē, sapiētiā, eruditionē uocabimus. In cōclusionē omnē operā, studū, diligētiam, et ipsi, et eius filijs, ac necessarijs deferemus. In cōsolādo iocus erit uehemēter fugiendus, nisi leue sit incōmodū, ut ioco possit exhiberi. Tum si modò cui scribimus, is erit, qui huiusmodi

rebus capiatur, quàm blandissime iocādum erit, ita tamen, ut ueras consolatioes cum iocis permisceamus. Præterea cauēdum ne nō tam amice consolari, quàm præcipere uideamur, nisi uehementer erit familiaris, cui scribimus: ne tanquā sani ægrotantibus imperemus: ne quid de nostra, aliorum'ue felicitate cōmemoremus: ne Tityrū illum Vergilianum rustice inūtemur: O Melibœe, Deus nobis hæc oia fecit. Ut enim societas miseriam leuat, ita alienæ immunitatis recordatio, ægritudinē exasperat. *Quæ* quū satis diligenter præcepta putē, exemplū adiiciemus. Canidius uir in rep. sua præclarus, per inuidiā factionū aduersarū eiectus, in longinquis regionibus exulat, relicta domū uxore, paruisq; liberis, cum amicus consolatur. Officiū meum tibi, ut à quo persepe meo in luctu fuerim amātissime cōfirmatus, uiciſſim in tuo tristiſſimo casu deberi quidem agnosco: sed te nihil egere gaudeo. Ita enim fortiter, sapienterq; exilium ferre audio, ut nos, qui tui desiderio angimur, tua potius, quàm tu nostra consolatione simus subleuādi. Næ tu sanè uir fortissime, nihil à tuis studijs alienū facis. Ita enim à puero, & optimis maiorū institutis, & philosophiæ rationibus animū præparasti, ut nullus te fortunæ flatus, nec secundus erigere, nec aduersus possit deicere. Non quo te tam acerbi uulneris sensu omnino carere putē: id enim stupentis magis, quàm excellētis animū uidetur. Quis enim tam saxeo pectore sit, qui, quod tibi euenit, quū pro summis in Remp. meritis, summam contumeliā acceperit, tanta ingratitude non permoneatur? Quis tantum obliuionis ex illo Lethæo flumine bibit unquam, ut nullo natalis terræ, amicorū, uxoris, liberorū desidri

Argumentum
sive thema epi-
stolæ.
Epistola conso-
latoria exilij.

siderio teneretur? Non tibi doleat uulnus qui acceperis, quum multis nō tuus modo, uerū alienis, bonis tamen, doleat? Quare si te dolere uetem, inhumanissimus planē uidear: tametsi affirmare ausim, permultas esse causas, cur tu malū moderatius ferre debebas: quod si etiā diurnum fore uideretur, tamen erat quo te sustentares. Nempe in primis tua uirtute, literis, conscientia recte factorum: quā quidem nulla est in rebus aduersis uel uerior, uel præsensior cōsolatio. Nunc certissimo augurio breui futurū spero, ut tibi de honestissimo reditu gratulemur: omnes que existiment amulos tuos, qui tuā salutem extinguere credebantur, dignitatem tuam uehementer illustrasse. Id quidem ego, auguriū ne uanum putes, certissimis signis, partim quidem a tua uirtute, et maximis in Remp. officijs, partim a tēporum natura colligo. Eam enim in te sapientiam, integritatē, industriam, nostra Respub. domi, belliq; experta est: ut etsi tu pro animi tui magnitudine, patria carere facillē possēs, illa certe tali ciue diutius carere omnino non sustineat. Cur igitur sic meritū eiecit, inquires? Rerumpub. tempestates nosti: nec uulgi animos ignoras, quibus nihil instabilius: qui procellarum in morē sursum ac deorsum fluctuant, nec quenquā constanter aut odisse solēt, aut amare. Ita est humanum ingenium, uirtutis nec præsens fulgorem, nec absens desiderium ferre possumus. Præsensem, ut Flaccus ait, odimus, sublatam ex oculis quærimus inuidi. Camillum uirum clarissimum, cuius in pace splendorem Romana Respubl. ferre non potuit, afflictis in rebus, coacta est reuocare: nec prius quā expulisset, qualem ciuem habuisset, ciuitas alioqui sapiens

A persona,

Confutatio,

Exempla,

intelligere potuit. Itaq; quum absenti patriā reddidissent, & dictaturam non ambienti decreuissent, imperium quod à ciuibus deferebatur, ab exule defensum est. Socratem, uirum omnium quos terra produxit optimum, Anyti & Meliti calumnia undecim uiri ueneno damnarunt: quem ubi desiderare cœpit ciuitas Atheniēsis, repente omnium conuersis animis, in ipsos accusatores publicus est impetus factus: Socrati statuae erectæ. Serius quidem illi, quàm Socrati cōmodum erat, respicuerūt: tu nondū ita cecidisti, quin facile restitui possis. Iam multos quos tuus in Rep. splendor urebat, tui desiderium cruciat: factionis aduersæ qui sunt, partim amicorū precibus uicti, partim absentia tua, partim ipsa die mutati, posuerunt odium, nonnulli ad amicorum tuorum partes transfugerunt. Nemo certe est, qui non mitius oderit. Peroportune uerò bellum oritur, & magnū, & periculosum, & quidem cum ijs ipsis, quos aliquādo tua uirtute coercitos meminerunt. In quo quum uehementer Resp. tuam operā sit desideratura, in certam spem adducor fore, ut qui ab ingratis ciuibus fueris eiectus, à supplicibus reuocaris, ut non tam acerbum fuerit eiectum fuisse, quàm gloriosum sic fuisse reuocatum. Habes auguriū meum: quod ita meum est, ut idem amicorum tuorum nemo non speret, inimicorum nemo non metuat. Quo si quid addubitarem, non uterer ullis remedijs potius quàm illis, quibus te uirum fortem facile sustētari uideo, quibusq; ipse uxor quotidie, & te uti facile suspicor. Optima consolatrix philosophia, quæ non unum aliquod malum, inanibus fomentis lenire, sed ad omnes fortunæ incurfus animum armare solet. Huius, ut ita dicam, lacte quum

Facit uerisimile,

Consolatio ē
philosophorū
decretis.

juum ab ipsis sis incunabulis enutritus, quid ego sus Mi
neruam, aut ululas Athenas? sed tamen pro tua modestia
 memorē, ut aiunt, te moneri patieris, uidelicet ut hominis
 felicitatem non in fortunæ temeritate, sed in animo esse si-
 tam memineris. Patriam, opes, honores, cæteraq; munera
 sua, fortuna potest eripere: animum sapientem neq; dare; Paradoxa.
 neq; eripere potest. In te ipso omne præsidium tuum con
stitutum esse cogites: sapienti uiro, præter turpitudinem,
nihil acerbi posse accidere. Virtutem seipsa cõmentum
 non è casu mutabilitate pendere. Non cruciari, sed cru-
 ciatu dignū admittere, in malis est numerandum. Tua te
 uirtute inuoluas oportet. Exiliū dolet? Non tu nūser, qui
 immeritus pateris, sed ij longe miserrimū, qui immeretē
 eiecerunt. Infelicius enim longe est facere iniuriā, quā
 accipere. Patriā ingratiſſimī ciues eripuerunt: animi ma-
 gnitudinē, uirtutē, integritatē, eruditiōē, honestam
 famā eripere non potuerunt, nec poterunt. At hoc ipsum
 dolet, quod optimē meritis ab ea Repub. quam sapienti-
 uero tua uirtute seruaris, exulas. At isihuc maximam æ- Confutatio.
 gritudinis partē leuare deberet. Socrates, uir integra-
 tate laudatissimus, uenenum bibiturus, uxorem eiulantem,
 deplorantēq; quod innocens esset moriturus, obiurgās:
 Stulta, inquit, nocentem me mori malles? At quod ue- Confutatio.
 nit ex merito, leuiter, lente que ferendum: Quæ uenit in-
digno pœna, dolenda uenit. Vulgi ista sententia est, et
 stultitiæ plena. Sapienti uero, quæ maior esse possit con-
 solatio, quā ex recte factorum conscientia? quæ quum
 aderit, etiam si fractus illabatur orbis, impavidum ferient
 ruinæ. Omne solum forti patria est. Egestas, exilium, bel-
 lum,

Bentētia mixta lum, non mala, sed materia uirtutis sunt. Crescit enim, & simili. *ms.* alitur aduersis rebus animi uigor, perinde ut illex: quæ quò diligentius duris bipennibus tondetur, eò latius ramos diffundit. Darius se rebus aduersis prudentiorē fieri dicebat. Egò uerò ita existimo multos egregios uiros, fortunæ sæuitia non prudentiores modo, uerum etiā clariores euasisse. Num Hercules gloria per orbem sic emanare potuisset, nisi illi luno tot monstra, tanquam uirtutis materiam obiecisset? Vlyssē equidē nō tam bellicis rebus, quā tolerantia malorum, quibus decennium est iactatus, *★* immortale nomen adsequutum puto. Cedunt ipsa interdū feliciter mala, & à superis propitijs inmittuntur. Multos tibi recensere possem, quibus ita cecit exiliū, ut optandum fuisse uideretur: qui quum in patria uel obscuri, uel inuidiosi uixisset, apud exteros & rem amplissimam, & summos honores sunt assequuti. Claudii uirum nobilissimum à ciuibus in exilium actū, Gallia excepit. Iam exul ad eò locuples, clarusq; est, ut non modo patriam non desideret, uerum etiam quòd non antè reliquerit, pœniteat. Petrum Aliacensem Cameracēsis ciuitas episcopū eiecit, Roma ex ~~exile~~ fecit Cardinalem. Multa apud nostros, ad gloriam uirtutis uia grassantibus obstant, emulatio, inuidia, postremo uirtutis, & splendoris satietas quædā. Quare cum ex his rebus, quas tu semper es admiratus, & in quibus felicitatē constituendā iudicauisti, nihil tibi decessit, nihil est, quod te his casibus uehementer afflictes, quibus natura uniuersum hominū genus subiectū esse uoluit. Hac enim lege nascimur omnes, ut omnibus fortunæ casibus subiaccamus. Sic libitum est fortunæ in rebus humanis ludenti

Exempla fabulosa.

Exemplum cōsidum.

ludenti, indignos attollere, optimum quenq; deicere, *lata* Mitigatio mali
a cōmunitate.
miscere *tristibus*. Quid autem acerbum uideri potest, cuius
 cōditio tibi cū omnibus est cōmunis? Repete cogitatione
 & ueteres & recentes annales. Quem tu regē, quem du-
 cem, quē clarum uirum ab hoc sæuo fortunæ ludo immu-
 nem fuisse cōperies? Quoties illa è domino seruum, è rege
 captiuum, è cōsule rhetorē, è triumphatore exulem, ex pa-
 triæ cōseruatore hostem patriæ fecit? Quid unquam ha-
 buit Græcia Alcibiade uel generosius, uel fortius? At hic Exemplū Græ-
cum.
 ubi splendore suo inuidiā suscitasset, ex ea Republ. quam
multis uictorijs illustrasset, in exiliū eiectus est. Aristides
 ob inuidiā, quod ob morū incorruptam integritatē uulgo
 Iustus cognominaretur, ostracismo damnatus solum uer-
 tere iussus est. Quid Phocione iustius? at hunc etiā uene-
 num bibere cōegit. Quid Socrate castius? at huic sua uir-
 tus exitiū attulit. Exemplum Ro-
manorum.
 Quid de Scipione dicā? quid de Bruto,
 quid de Catone, quid de Cicerone, qui ea Republ. carcere
 compulsi sunt, quam magno suo periculo ipsi seruassent?
 At quanto animo sapiētissimū uiri, ciuū iniurias tulerunt?
 Nimūrum intelligebant uirtutē suam, & gloriā bene ge-
 stus partam, nō in ingrata patria residere, sed unā in exi-
 lium comitari. At frustra suam operam in ingratiſsimos
 ciues contulerant. Minimē. Quid ita? quia non ut in pa- Subiectio.
 tria senescerent, ea pericula susceperant, sed ut æternam
 sibi famam compararent. Exules tamen erant. Minime.
 Quam ob rem? Eam enim pro patria habere desierant, in
 qua talibus uiris locus non esset. Vbicunq; bene sumus, in
 patria sumus. Quare non magno eius desiderio teneban-
 tur, ubi minus tutē, quam in exilio uiuēdum intellexerāt.

Numidico Metello, qui ob summam animi cōstantiam ei-
 ctus erat, quum in spectaculo sedenti, literæ reuocatiōnis
 redderētur, ne aperiēdas quidem putauit, ante quā ludi
 finirentur. Et Metellus quidem Roma negligenter plane,
 carebat, sed Metello Roma carere non potuit. Quam ob
 rem nō poterat? quia cuius præsēntis animi magnitudine
 ciues inuidi cruciabantur, eius absēntis industriam requi-
 rebant. Ille uerō exulem se esse non meminit, ne afflictum
 quidem aut miserū putabat. Cur ita? Nimirum persuasum
 habebat eos, qui rem exilio dignam admitterent, miseros
 esse: eos uero, qui ob uirtutis inuidiā exularent, non sup-
 plicium, sed gloriæ materiam accepisse. Secundis enim in
 rebus animū magnum obtinere nō magni negotij est. At
 se uiente fortuna, animo nō frangi, sed æquabilem mentis
 statum tenere, id uero longe pulcherrimum putatur. Tu
 uerō quum sis istis uiris, neq; rerum usu, neq; animi ma-
 gnitudine inferior, literarū etiā peritia superior, strenuos
 gubernatores debes imitari, qui quum maxime aduersa
 tempestas incumbit, tum minime a clauo discedunt. Neq;
 enim magni artificij est tranquillo mari, uentisq; serenit-
 bus, rectum tenere cursum, sed egregium nauclerum tem-
 pestas arguit diuersa. Et quoniam mare ingressis uenti
 in manu non sunt, ijs, qui contigerunt, æquo animo uten-
 dum erit. Adde fieri nōnunquam, ut uenti nimium secun-
 di plus periculi adferant, quam aduersi: cogunturq; plus
 æquo turgentia uela cōtrahere. Rebus enim plus satis ex
 sententia procedentibus, facile præcipites in exitium fe-
 rimur: aduersis uero, ut cautiōres, diligentioresq;, ita tu-
 tiores nonnunquam sumus.

Quaprop

Quapropter cordatis uiris fortune fauorem semper Conclasio.
suspectum esse uideo, quæ tum maxime insidiatur, quum
blanditur maxime. Huc ego te rationibus facile cõfirmas-
sem, (quanquàm quale est Hercule uelle consolari?) nisi
iam certa de reditu tuo spes omnium tuorum animos ob-
tineret. Tu fac, ut animi uirtutem domi, belliq; spectatam
in ista interim palæstra parcem obtineas. Mibi liberorum
tuorum negotia tantæ sunt curæ, ut ne tibi quidem ipsi *negl*
maiori esse possint. Vale.

Quanquàm autē orbitati, & exilijs potissimum adhi-
beri solet consolatio, tamen licebit & alia themata cõmi-
nisci uarijs de rebus, quæ molestiam adferunt: ueluti de
morbo corporis, de uoletudine parū prospera aut firma,
de senectute, de parū bonis auib; contracto matrimonio,
cuius frustra poenitet: de monachali instituto: de sacerdo-
tio, aut alio uitæ genere, cuius tædet eū, qui sese addixit:
de generis infelicitate, de conditionis humilitate, de pau-
pertate molesta, de inuidia, de rebus aliquo casu creptis:
de beneficijs penes ingratum hominē depositis: de liberis
improba uita de honestatibus parentē: de pestilētia, de bel-
lo, cæterisq; innumeris. Nā hos ueluti fontes uisum est in-
dicare præceptoribus, unde sumant subinde nouū thema.

Subijcimus & alterum exemplum. Antonius Sucque-
tus amisit filium optimæ spei adolescentem. Hunc conso-
latur amicus.

Aliud exemplum consolationis.

Q Vam acerbū uulnus ex adolescentis optimi decessu
pater acceperis Antoni clarissime, equidē ex meo
ipsius dolore facile coniecturam facio. Quare uehemēter
sim

Transitus ad
argumentatio-
nem.

Argumentatio.

Ratio.

Exemplum
impar.

Mitigatio mali
accommunitate.

Agmili.

sim inhumanus, si parentem in tam tristi casu lugere ue-
tem, cum alienus ipse nō queam nō lugere. Impudens au-
tem meritō uidear, si tuo dolori parem mederi, cum ipsi
mihi medico sit opus: siq; patri coner lacrymas absterge-
re, cum ipse lacrymarum nullum adhuc modum facere
possim. Quancquā enim hoc fortunæ telum, paternū pe-
ctus altius ferire debuit, tamen illud tibi præstare solet sin-
gularis quædam sapientia, ut omneis casus humanos, non
solum forti & infracto, uerum etiam alacri perferas ani-
mo. Proinde tibi constes oportet, ut animi dolorē, omni-
no iustissimum (quis enim neget?) si nondum potes abij-
cere, certe premas, ac modereris. Cur autem non etiā abij-
cias? uidelicet, ut quod ab idiotis impetrat paucorū die-
rum spatium, id a sapientissimo uiro impetret ratio. Nam
quæ matercula tam impotēter filij mortem luget, cui dies
non ægritudinem leniat primum: deinde penitus etiā adi-
mat? Nusquam animo deiici, sapiētis est. At in his casibus,
quibus omnes ex æquo maximū pariter ac minimū sumus
obnoxij, dolere immoderatiū, extremæ uerordiæ mihi ui-
detur esse. Quis enim ignorat, nisi prorsus incogitās, hac
se lege natum esse, ut quādo cunq; uocarit Deus, sit pro-
tinus hinc emigrandum? Itaq; qui mortem hominis deplo-
rat, quæso, quid aliud, quā se mortalem esse deflet? Aut
cur potius mortē deplores, quā natiuitatem, cum utraq;
iuxta secundum naturam sit? Perinde ac si quis gratias
agat, quod ad conuiuiū sit admissus, queratur autē sese di-
nutti. Quod si quis uelut è sublimi specula, uniuerſi mor-
talium generis cōditionem, uitamq; cōtempletur, non me-
ritō delicatus sibi uideatur, si inter tot orbitatis exempla,
inter

inter tam densa senum ac iuuenum funera, gravius discru-
 cietur animo, perinde quasi soli nouum aliquod, ac ma-
 gnum malum acciderit, quasiq; unus tanquam albæ, quod
 aiunt, gallinæ filius, extra publicam aleam statui postulet?
 Quas ob res sapientissimi legum conditores, ut luctum Ab autoritate.
 aliquem parentū affectibus indulgent, ne uidelicet, à qui-
 buslibet ἀνάσσειν illam exigere uideantur, à nonnullis
 etiam Stoicis damnatam, ita eum modicis sanè finibus cir-
 cumscripserunt. Siue quòd intelligerent, in id genus casi-
 bus, qui cum omnium sunt cōmunes, tum uerò non fortu-
 næ iniuria, sed ipso naturæ cursu atque ordine inducun-
 tur, breuem moerorem sufficere: uel, infirmioribus, utpote
 natura, uulnus quod inflixit, leniente, sensimq; cicatricem
 obducente: siue quia perpenderint, dolorem nō solum in-
 utilem esse ijs, quibus impenditur, uerum etiam pernicio-
 sum ijs, à quibus sumitur, grauem ac molestum amicis ac
 familiaribus, uitæq; socijs.

Iam uero, si quis rem recta reputet uia, an non demen-
 tiæ species esse uidetur, ultrò malum malo addere: & cum
 fati iacturam nulla ratione sarcire possis, tamen ultro tibi Simile.
 perniciem accersere? Perinde ut si quis ab hoste, nonnulla
 facultatum parte spoliatus, quicquid reliquū est, id omne
 iratus in mare deijciat, adq; eum modum fortunam suam
 deplorare sese prædicet. Quod si nos parum mouet Mi- Exempla.
 mus ille nobilis, & quouis etiam philosopho dignus, Fe-
 ras, non culpes quod mutari non potest, certe Dauidis sa-
 pientissimi regis exemplum pulcherrimum in mētem ue-
 niat: cui simul atq; pueri, quem tenerrime diligebat, mors
 est nunciata, cōfestim solo crexit sese, puluerem absterfit,
 cilicium

cilicium abiecit, deinde lotus & unctus, uultu mutato, alacris ad epulas accessit. Id factum admirantibus amicis, Quid est, inquit, cur me iam conficiam dolore? Nam antehac, utcumque spes erat fieri posse, ut meo luctu flexus Deus, infantem seruaret: nunc nullis ille lacrymis ad nos reuocari potest, nos ad illum breui properabimus. Quis tam demens ut cuiquam supplex esse uelit, quem certo sciat precibus non commoueri? At morte nihil inexorabilius, nihil

Agmill. *surdus, nihil rigidus. Arte mansuescunt ferae uel immanissimae. Est quo frangatur marmor: est quo mollescat adamus, nihil est quo mortem delinias. Ea nec formae parcat, nec opibus, nec aetati, nec imperiis. Atque ob id ipsum aegre ferenda animo, uel quod ineuitabilis, uel quod tam exaequo communis omnibus. Iam uero quid ego tibi recensere pergam tot ethnicorum exempla, qui suorum interitum excelsa in fractoque tulerint animo? A quibus animi fortitudine superari Christianos, non ne turpissimum uideatur? Nunc tibi succurrat nobilis illa, meritoque literis omnium celebrata Telamonis & Anaxagorae uox: Sciebam me genuisse mortalem. Succurrat Pericles Atheniensium dux, non tam eloquentia, quam animi fortitudine celebris: qui cum intra quadriduum duobus mirificis adolescentulis oratus esset, solito uultu, atque adeo coronatus, etiam in concione disseruit. Succurrat Xenophon ille Socrate praetore dignus: cui cum inter sacrificandum, mors filii esset nunciata, coronam modo deposuit, atque eandem mox reposuit, simul atque fortiter in acie cecidisse cognouit. Succurrat Dion Syracusanus, qui cum in amicorum consessu non nihil agigaret, ac subito tumultu in edibus coorto sciscitatus,*

Exempla im-
paria.

tatus, quid esset rei, didicisset filium de tegulis lapsum interisse, nihil commotus, iussit extincti corpus mulieribus rite sepeliendum tradi, sese quod instituerat, non omissum. Hunc imitatus Demosthenes, amissa filia charissima, atq; unica, septimo ab eius obitu die coronatus, & candido uestitu ad populum prodijt. Cuius facti & fidem confirmavit, & illustravit gloriâ Aeschinis inimici criminatione. Succurrat rex Antigonus, cui cum nuntiatum esset, filium in extraordinario cōflictu cōcidisse, paulisper cunctatus, & intuens eos qui renunciant, magno quidem animo, Scro, inquit, interisti Alcyoneu (nam id erat filio nomen) qui tam temere in hostes te conieceris, neque tuæ salutis, neq; meorū memor monitorum. Quod si Romana te magis capiunt exempla, respice Puluillū Horatium, cui Capitolium dedicanti, cum nuntiatum esset, filiū uitæ defunctum esse, nec manum à poste remouit, neq; uultum à religione ad priuatum dolorem flexit. Respice Paulum Aemilium, qui intra septem dies duobus amissis filiis, progressus in concionem, ultro populo Romano gratulatus est, quod publicam fortunæ inuidiam, domestico luctu redemisset. Cogita Qu. Fabium Maximum, qui cum filium consulare, & egregijs clarum gestis amisset, consul in concionem prodijt, & encomium filij recitauit. Intuere Catonem Censorium, cui cum filius natu maior obisset, singulari ingenio, summa uirtute iuuenis, ad hæc prætor iam designatus, nihil tamen hoc casu cōmotus est, ut Reipublicæ negocia segnius administraret. Occurrat Martius cognomento Rex. Is cum filium summæ pietatis, magnæ spei, postremo unicum amisset, orbitatē suam adeo
infra

infracto tulit animo, ut statim à rogo iuuenis curiam peteret, ac senatum legis ferendæ causa euocaret. Occurrat L. Sylla, cui filia mors, nihil omnino acerrimā illius in hostes uirtutem contudit, nec effecit, ut falsò sibi Felicis cognomen- tum usurpasse uideretur. L. Bibulus postero statim die, quàm utrunq; filium interfectum cognouit, ad solita officia processit in publicū. Huius collega C. Cæsar, cum Britanniam peragraret, et filia mortē didicisset, tamen intra tertium diem imperatoria obiit munia. M. Crassus in Parthico bello, cum filij caput pilo præfixū conspiceret (nam id hostes ludibrij causa propius accedentes ostentabant, conuitijs etiā exasperantes calamitatem) usq; adeò nō est animo consternatus, ut repentē per omnes ordines equo circumuectus clamaret, suū hoc malum priuatim, cæterum publicam Reip. salutē in militum incolumitate sitam esse. Atq; ut omittam exemplorū agmen, Gallos, Pisones, Scæuolas, Metellos, Scauros, Marcellos, Aufidios, Claudius Cæsar cum eum amisisset, quem et genuerat, et adoptauerat, ipse tamē pro Rostris laudauit filium, in conspectu posito corpore, interiecto tantummodo uelamento, quod pontificis oculos à funere arceret, et flente populo Romano solus nō fleuit pater. Atq; ut hos quidē imitari pulchrū, ita turpissimum sit, non præstare uiros eum animum quē foemina præstiterūt. Cornelia duos filios, Tib. Gracchum, et C. Gracchum, et occisos uidit, et insepultos. At consolantibus amicis, ac miseram dicentibus: Nunquàm, inquit, non felicem me dicam, quæ Gracchos peperit. Sed quid nos hæc ex priscorum annalibus repetimus?

Transitus. Quasi uero non quotidiana uita, satis exemplorum sup-
peditet?

peditet? Circūspice uicinos, circūspice cognatos & affi-
 nes, quot reperies etiam mulierculas, quæ mortem libero-
 rum moderate frant? Intantum non opus est, ad hanc
 rem, magnis philosophiæ præsidij. Nam si quis modo
 secum animo reputarit, quàm calamitosa sit hæc nostra
 omnis uita, quot periculis, quot morbis, quot casibus,
 quot curis, quot incommodis, quot uitij, quot iniurijs sit
 obnoxia: quàm exigua pars eius nobis abeat non dicam
 cum uoluptate, sed non aliqua ægritudine cōtaminata: de-
 inde quàm fugax etiam ac præceps, propemodum etiam
 gratulabitur ijs, qui maturius eam reliquerint. Breuitatem
 grauiter expressit Euripides, qui uitam mortalium, dicu-
 lam unam appellat. Sed melius Phalereus Demetrius, Eu-
 ripidem castigans, qui eam non potius temporis pun-
 ctum dixerit. Optime uero Pindarus, qui uitam hominum,
 umbræ somnium appellat. Res duas maxime nihili con-
 iunxit, umbrā & somnium, ut planè quàm sit inanis hæc
 uita, demonstraret. Porro quàm eadē sit calamitosa, pro-
 be perspexisse uidentur antiqui poëtæ, qui mortalium ge-
 nus, non alio epitheto rectius insigniri posse iudicarunt,
 quàm si eos, μοχθηροὺς καὶ θνητοὺς, id est, calamitosos &
 miseros, cognominarent. Nam prima pars æui, quæ qui-
 dem optima putatur, sese nescit. Mediam protinus nego-
 ciorū tumultus, curæq; excipiunt. Extremā morbi ac se-
 nectus occupat, ut de felicissimis interim agamus. Quis
 igitur non optimo iure probet illam Sileni sententiam:
 Optimum esse non nasci, proximū quàm ocysime abole-
 ri? Quis non approbet Thracum institutū, qui nascentes,
 luctu lamentisq; excipiunt, rursus exeuntes è uita, gau-

Ab extenuatio-
 ne commodi ar-
 missi.

dio, gratulationibusq; prosequi solent? Quòd si quis ipse
 sibi narret, quæ suis auditoribus solitus est Hegeſias, is
 et suam mortem optabit potius quàm horrescet, et suo=
Consutatio. rum obitum æquissimo feret animo. At obſtrepit interim
 paternus dolor. Ante diem perijt, perijt adhuc ephebus,
 perijt optimus, ac ſingulari pietate filius, uitæq; longiſſi=
 ma dignus. Queritur naturæ uices inuerti, quòd filio pa=
 ter, iuueni ſenex ſuperſtes ſis. Sed obſecro te per deũ im=
 mortalem, quid tandè appellas, ante diem? Quasi uerò nò
 unusquisq; uitæ dies et ſupremus eſſe poſſit. Alius inter
A ſinitione. materni latebras uteri, uixdum homo præſocatur, et in=
 ter ſingentis adhuc naturæ manus intercudit. Alius dum
 naſcitur, alius dum uagit in cunis abripitur. Alius in ipſo
 ſtatim cui flore, uixdū percepto uitæ ſenſu, perit. Ex tot
 hominū nulis, quàm paucis datum eſt ad ſenectæ limen,
 quæadmodum uocat Homerus, pertingere? Hac nimirum
 lege deus animam in huius corpusculi præſidio cõſtituit,
 ut quocunq; die, quocunq; momento iuſſerit decedere, pro=
 tinus inde ſit exeundum. Neq; uero quiſquam ante diem
 euocari ſibi uideri poſſit, cū nulli ſit certus dies præſcri=
 ptus, ſed is demum legitimus eſt dies, quæcunq; imperator
 ille noſter ſupremũ eſſe uoluerit. Nos ſi ſapimus, unum
 quemlibet perinde ut ſupremũ opperiemur. Quanquam
 in tanta uitæ breuitate, fugacitateq; quantulum quæſo re=
Collatio. fert, paulò ſerius, an maturius eximaris? Neq; enim magis
 intereſſe uidetur, quàm cum plures ad capitis ſupplicium
 ducuntur, primus, tertius, an octauus feriaris, nihilominus
 mox feriendus. Quid enim aliud ipſa uita, quàm perpe=
 tuus quidã ad mortem curſus? Niſi quòd commodius cum
 his

his agitur, qui à tam laboriosa uitæ functione maturius
 dimittuntur. Verum ut amentis est, iniussu imperatoris è *Collatio.*
 castris excedere: ita stulti atque ingrati, missionem à duce
 celerius datam, non libenter amplecti. Maxime si iam non
 sine laude discedat, qui dimittitur, siq; ad præmium, non
 ad ignominiam auocetur. Neque enim conuenit cui spæ- *Sententia.*
 tium solstitijs metiri. Recte factis æstimanda est ætas: ut
 is diu uixisse putetur, non qui plurimos annos ἰτάσμεν
 ἀχρότης, ut inquit Homerus, terram præsit, & nu-
 mero addidit, sed qui gnauiter peracta uitæ fabula, hone-
 stam sui memoriã posteris reliquit. An quereris, quòd sta-
 tim tibi talem filium dederit deus, qualẽ optasses post an-
 nos multos euadere? Quid quòd neq; usq; adeò præma-
 ture defunctus est noster adolescens? Iam uigesimum atti-
 gerat annum, qua quidem ætate, mea sententia, optimum
 est mori, quia uiuere dulcissimum. Iam patriæ ciuem bo-
 num, iam patri filium pium, iam æqualibus conuictorem
 iucundum, denique superis bonam & integram mentem
 præstiterat. Deceffit uitiorum ignarus, calamitatum im-
 peritus. Porro quid allatura fuerit uita longior, incertum.
 Certe plerunq; fieri uidemus, ut posterior ætas, & gra-
 uioribus uitijs adolescentiæ puritatem inficiat, & pluri-
 bus calamitatibus iuuentutis felicitatem contaminet. His
 omnibus seu malis, seu periculis illum mors cita subduxit.
 Nunc deniq; tutò gloriari potes, te filium optimum ha-
 buisse: uel habere magis. Sed habueris tantum, non ha-
 beas etiam. Vtrum potius æquum est discrucari te, quòd
 amiseris, an gaudere, qui talem habueris? Vide ne pa-
 rum grati sit animi, meminisse repetiti muneris, non me-

minisse dati. Magnum profectò munus, filius pius, sed ita datum, ut ad tempus fruereris, non ut perpetuò tuum

A simili. esset. Sic enim tecū cōsidera uir sapientissime, imò sic pariter consideremus. Si quis princeps, summi precij, summaq; artis tabulam nobis dedisset utendam, utrum eam, quandoocunq; collubitum fuerit reposcenti, sereno uultu reddemus, gratias insuper agentes, an tristes ad hunc modum cum eo expostulabimus? O' te crudelem, quàm precioso munere nos spoliasti, quantam uoluptatem nobis ademisti, quàm cito rem tam egregiam nec opinantibus eripuisti: non'ne is optimo iure, tam ingratis qucrimonijs ad hunc responderit modum? Hoccine premij pro meo officio reporto? Ita'ne nihil meministis, nisi hoc tantum, quòd bellissimam tabulam amisistis? Excidit animo, gratis ex ultro commodasse me? uos tot iam dies, mea benignitate pauisse oculos, animum oblectasse? quòd dedi, benignitatis erat: quòd reposco, meo iure facio. Vobis aliquid ex me lucri fuit, iactura nihil fuit, nisi quòd uestro uitio id esse proprium fingebatis, quod erat commodatium: proinde perire uobis uidetur, quod repetitur. Imò

Protopopoeia.

Epiphonema.

quò pretiosior, quò iucundior ea res fuit, quam utendam permisi, hòc magis atq; magis mihi debetis. Nec ante tēpus repetitum uideri oportet, quod citra iniuriam poterat non committi. Hæc ratio si nullo pacto refelli poterat, cogita quantò iustius natura dolorem ac querelas nostras huiusmodi sermone possit reprehendere. Atq; his nimirum rationibus, dolorem nostrum leniri conueniebat, etiam si mors totum hominem tolleret, neque quicquam nostri post funus superesset. Nunc si saltē hoc credimus, de quo nihil

Transitus.

nihil addubitaui Socrates ille Platonice, uidelicet hominem ipsum animū esse, corpus hoc nihil aliud esse, q̄ animi uel organū, uel domiciliū, aut ut uerius dicā, sepulchrū & carcerē, unde cum emergerit, tum demum sui iuris esse, multoq; q̄ antea felicius uiuere, quid est quod mortem incusemus: quandoquidem usq; adeo nō perit ille qui moritur, ut tum demum nasci uideatur potius? Et nobis animo frui licet, quod oculis non cernimus: nihilo secius q̄ amicis absentibus cogitatione frui solemus. Et haud scio an aliquātō suauius, quā si eos corā oculis cōspiceremus: propterea quod corporū cōiectus, nō raro nobis offensarum materiā cōsueuit ministrare, & cōsuetudinis assiduitas, amicitiae iucūditatē nōnihil imminuere. Eius rei si desideras exemplū, an non sat argumento sunt apostoli, qui tum demū uere frui Christo, uereq; amare coeperūt, posteaquā illis corporea præsētia fuisset adēpta? Sic est profecto: bonorum auicētia, animorū, non corporum coniunctione cōstat. Qui uere amat, animos amat, non corpora. At animorū copulā, nulla uis, nulla tēporum, nulla locorū intercapedo potest dirimere. Porro nimis quā puerile est, amicū iam periisse putare, simulatq; sub oculis esse desierit. Tu quoties libebit, filium tibi cogitatione, sermonibusq; præsētē reddes. Ille uicissim tui meminit, sentitq; penitus animi tui affectus, nōnunquā & in somnis occurrabit patri: & arcanis quibusdam modis animus utriusq; sese cōplectentur, & cōfabulabūtur. Quid autē prohibet, quò minus iam nunc imaginē cum illo te uiuere, qui cū paulò post es uicturus? Quātulū enim est hoc omne quod uiuimus? Sed haecenus ijs remedijs sum usus, quibus cum

Exaggeratio
in fictione,

ethnico quolibet agere poteram. Nunc quid pietas, quid Christiana fides à nobis impetrare debeat, paucis confideremus. Iam primum si maxime misera mors esset, tamen oportebat boni consulere, quod nulla uia corrigi poterat. Rursum si totū extingueret hominē, æquius tamē ferēda, quòd tot huius uitæ calamitatibus finem imponat. Porro si animum originis æthereæ, graui corporis erga stulo liberat, propemodum etiā gratulandum ijs, qui è uita decesserint, & in felice illā libertatē postliminio redierint. Nunc uerò cum haud dubie pias animas ex huius uitæ procellis, ad immortalitatis portū trāsmittat, ac ne pilum quidem hominis perimat, quippe corporibus quoq; ad eādem immortalitatē aliquando reuocādis: utrum quæso lugere, an magis gratulari cōueniat ei quem ex hoc turbulentissimo uitæ pelago, in tranquillā illam immortalitatis stationem, mors matura transuexerit? Agē paulisper huius uitæ (si modo uita est appellāda) sordes, arūnas, pericula in unum cōgere. Rursus è diuerso eius uitæ cōmoda, quæ pios hinc ereptos manent, cōpone: & facīle uidebis, hoc homine nihil esse iniustius, qui summū bonum, ad quod unum nati, cōditiq; sumus, perinde quasi maximum malum deploret. Orbū te clamitas, cum filiū cœlo genucris, cuius ceu numinis cuiusdā memoriam, ut sacrosanctā uenerari possis: qui cœlitus tui curam agens, res tuas ceu dexter aliquis Deus, bene fortunare ualeat. Neq; enim ille, aut non sentit res mortaliū, aut solitā in patrē pietatē unā cum corpore deposuit. Viuit profectò, mihi crede, uiuit ille, adestq; præsens nobis: & hoc ipsum nostrū colloquiū audit, sentitq; ac fortassis hunc ipsum luctum nostrum ridet, ac damnat.

Quòd

Quòd ni corporum horum moles obsisteret, fortassis et
audiremus cum lacrymas nostras huiusmodi dictis in-
crepantem: Quid isthuc est quod agitis? Quid senectus-
tem uestram inutili, ne dicam, amenti ludu conficitis? Protopoposia,
Quid iniquissimis querimonijs, fatam, fortunam, mortem
in ius trahitis? An mihi ex istius uita malis exemplo, et
in hanc felicitatem euectio inuidetur? Sed bona uerba. Non
inuidet nec paterna pietas, nec amicitia candor. Verum Contraria.
quid aliud sibi uult ista comploratio? An lacrymis di-
gnum censetis, quòd è seruitute in libertatem, de arum-
nis ad felicitatem, de caligine in lucem, de periculis in-
tutum, de morte ad uitam, de morbis ad immortalitatem,
de tot malis ad summum bonum, de caducis ad aeterna,
de terrenis ad coelestia: denique quòd ab hominum collu-
uie, ad angelorum contubernium sum traductus? Iam
appello uestros istos animos. Quæso per uestram in me Fictio.
pietatem, si uobis esset in manu me ad istam reuocare ui-
tam, num essetis reuocaturi? At quo tandem flagitio tan-
tum odium cõmerui? Si reuocare nolitis, quorsum attinent
istæ querelæ, non solum inutiles, ut dixi, uerum etiam im-
pia? Porro nisi me immortalitas iandudum omnis doloris
expertem reddidisset, ego uicissim uestras istas lacrymas,
alijs lacrymis deflerem, et tam crassam animi uestri cali-
ginem commiserarer. At nostram ipsorum uicem ploramus Constatatio.
inquitis. Verum isthuc sanè haud amantium est, sed ad sese
respicientium, et uel alieno incõmodo suis rebus consulere
uolentium. Sed age, quid tandem isthuc iacturæ est, quod
mea mors uobis attulit, an quòd conspectu meo frui non
licet? Atqui nihilo secius interim memoria nostri frui
p 4 licet,

licet, tantò quidem felicius, quantò tutius. Nam existimate me malis omnibus præreptum, quæcunque in uita homini possunt accidere, & quorum magnam partem uestra uiuacitas experta est. Non est qui uobis obsequium exhibeat, sed est qui apud Deum Opt. Max. pro uestra salute patronum agat, ut sedulum, ita & efficacē. Deniq; quantum hoc momenti est, quod nostram dirimet consuetudinem? Vos modo pro uestra uirili date operam, ut pie peracta uitæ fabula, mors dignos reperiatur, qui huc traducamini. Hæc, inquam, si nobis loqueretur filius, non ne meritò nostri luctus nos pudefceret? His fermè rationibus, animi mei uulnus lenire soleo, quæ tibi cōmunia facere uolui, non quòd his remedijs magnopere egeres, sed arbitratus sum congruere, ut qui cum mihi luctus esset communis, cum eodem & consolationem communicarem. Caterum ut quæ fusiùs disserta sunt, in epilogum contraham, hoc pacto effruescentem animi tui dolorem coërcebis. Mortuus est filius, genueras mortalem. Tanto, inquis, bono priuatus sum: reddidisti ei, qui gratis dederat. Grauis orbitas: leuius ferendum, quod aliquà sarciri potest. Patrem destituit. Quid prodest flere, quod mutari non potest? Aut cur anxie deplores, quod tibi cum tot hominum milibus commune est? Sed interitum filij non possum non flere. Quiduis potius quàm perit, qui bene moritur. At occubuit immatura morte: nulla mors non matura recte morienti. Ante diem uiuere desijt: nullus cuiquam certus mortis dies. In ipso æui flore extinctus est: tum optimum est mori, cum uiuere est suauissimum. Obijt adolescens: hoc pluribus uitæ malis sub-

ductus

Epilogus.

ductus est. Optimum amisi filium : gaude quòd talem habueris. Innocens è uita decessit : nulla mors magis optanda, minusq; deploranda est. Sed interim filio frui non licet: at animo licet, & mox ipso totus toto fruëris. Si quid nouisti rectius istis, candidus imperti: si non, his utere mecum. Ac bene uale, quod quidem uult etiam ipse filius.

Sylua.

Quapropter hoc te primum rogo, ne contrahas, aut Cicero.
demittas animum, ne ue obrui, tanquam fluctu, sic
magnitudine negotij sinas, contraq; erigas, ac resistas, si
ue etiam ultro occurras negotijs. Nullus dolor est, quem
non tēporis longinquitas minuatur, atq; molliat, & cui non
callum obducatur. Homines nos esse meminerimus, ea lege
natos, ut sub telis fortunæ proposita sit uita nostra. Neq;
esse recusandum, quò minus ea, qua nati sumus cōditione,
uiuamus: ne ue tam grauitur eos casus feramus, quos nullo
consilio uitare possumus. Euentisq; aliorum memoria re-
petitis, nihil accidisse nobis noui cogitemus. Homines sa-
pientes, turpitudine, non casu & delicto suo, non aliorum
iniuria commoueri debent. Consciētiam rectæ uoluntatis,
maximam consolationem esse rerum incommodarum, nec
esse ullum magnum malum præter culpam, memineris.

Est omnino difficile, non grauitur id ferre, sed tamen
animos nostros maximis in rebus gerendis, & sustinen-
dis exercitatos, frangi & debilitari molestia non oportet.
Quoniam molestissime homines ferre debent, quæ ip-
sorum culpa contracta sunt.

Tu fac animo magno, fortiq; sis, speresq; fore, ut fra-
cto impetu leuissimi hominis, tuam pristinam dignitatem Cicero.

Cic. epist. iam, & gloriam consequaris.

Me in summo dolore, quē in tuis rebus capio, maxime scilicet cōsolatur spes, quōd ualde suspicor fore, ut infringat̃ hominū improbitas, & cōsilijs tuorum amicorū, & ipsa die, qua debilitantur cogitationes, & inimicorum, & proditorū. Facile secundo loco me consolatur recordatio meorum temporum, quorū imaginem uideo in rebus tuis.

Lib. iij. epistola, Vehementer te esse sollicitū. Eodem, epist. Posteaquam mihi. Eodem, Neq; monere te audeo.

Reliquum est, ut consoler, & afferam rationes, quibus te à molestijs coner abducere. At ea quidem facultas, uel tui, uel alterius consolandi, in te summa est, si unquam in ullo fuit. Itaq; eam partē, quæ ab exquisita quadā ratione & doctrina proficiscitur, nō attingā, tibi totam relinqū. Quid sit forti & sapiente homine dignum, quid grauitas, quid altitudo animi, quid acta tua uita, quid studia, quid artes quibus à pueritia floruiſti, à te flagitent, tu uidebis.

Extremum illud est, ut te horter & obsecrē, animo ut maximo sis: nec ea solum memineris, quæ ab alijs magnis uiris accepisti, sed illa etiam, quæ ipse ingenio, studioq; peperisti: quæ si colliges, & sperabis omnia optime, & quæ accident, qualiacunq; erunt, sapienter feres. Sed hæc tu melius, uel optime omnium.

Quare non debes, aut propriam fortunam, aut precipuam postulare, aut communem recusare.

Lib. v. epistola: Et si unus ex omnibus, tota. Eodem, Et si egomet, & c.

Sed ut illa secūda moderate tulimus, sic hanc nō solum aduersam, sed etiā funditus euersam fortunā fortiter ferre debemus

debemus : ut hoc saltem in maximis malis boni consequamur, ut mortem, quam etiam beati continere debebamus, propterea quod nullum sensum esset habitura, nunc sic affecti, non modo continere debeamus, sed etiam optare. Tu si me diligis, fruiere isto otio, tibiq; persuade, præter culpam ac peccatum quo semper caruisti, & carebis, homini accidere nihil posse, quod sit horribile aut pertimescendum.

Lib. vj. epistola. Et si ea perturbatio, &c.

Sin omnino interierint omnia, fueritq; is exitus, quem uir prudentissimus M. Antonius iam tum timebat, cum tantum instare malorum suspicabatur : misera est illa quidem consolatio, tali præsertim ciui, & uiro, sed tamen necessaria: nihil esse præcipue cuiquam dolendum in eo, quod accidat uniuerfis. Quæ uis insit in his paucis uerbis (plura enim committenda epistolæ non erant) si attendes, quod facis, profectò etiam sine meis literis intelliges, &c.

Ita enim uiuere, ut non sit uiuendum, miserrimum est: mori autem, nemo sapiens miserrimum duxit, ne beato quidem.

Sed in ea es urbe, in qua hæc uel plura, & ornatiora parietes ipsi loqui posse uideantur, &c.

Ego tibi hoc confirmo, etsi leuis est consolatio ex miseris aliorum, nihilo te nunc maiore in discrimine esse, quam quemuis aut eorum qui discesserint, aut eorum qui remanserint. Alteri dimicant, alteri uictori timent. Sed hæc consolatio leuis, illa grauior, qua te uti spero, ego certe utor. Nec enim dum ero, angar ulla re, cum omni uacua culpa : & si non ero, sensu omnino carebo. Sed rursus, *Μακρὸς ὢς Ἀθάνατος*, qui ad te hæc.

Libro vj. ex epistola: Noui quid ad te. Ab eo loco: Hoc loco

loco si uideor augere, &c.

Quod reliquū est, quando tibi uirtus, & dignitas tua re-
ditum ad tuos aperuit, est tuæ sapientiæ, magnitudi-
nisq; animi, quid amiseris, obliuisci: quid recuperaueris,
cogitare. Viues cum tuis: uiues nobiscum. Plus acquisiui-
sti dignitatis, quā amisti rei familiaris: quæ tamen ipsa
esset iucundior, si ulla esset Respublica.

Lib. vj. ex epistola: Gratulor tibi mi Balbe. Ab eo loco:
Mihi tamen placuit mi Balbe. Tua me calamitas uehe-
menter excruciat, meis incommodis modice tangor.

Tu fac habeas fortem animum: quem semper habuisti:
primū ob eas causas, quas scripsi: deinde quod ea de Rep.
semper uoluisti, atque sensisti: ut non modo secunda spe-
rare debeas, sed etiam si omnia aduersa essent, tamen con-
scientia, & factorum, & consiliorum tuorum, quæcunq;
acciderent, fortissimo & maximo animo ferre deberes.

Quamobrem fac animo magno, fortiq; sis: & si turbi-
dissima sapienter ferres, tranquilliora læte feras.

De reliquo, ut te sæpe p literas hortatus sum, ita uelim
tibi persuadeas, te in hac causa nihil habere, quod timēdū
sit, præter cōmunē casum ciuitatis: qui etsi est grauissimus,
tamen ita uiximus, & id ætatis iam sumus, ut omnia quæ
non nostra culpa nobis accident, fortiter ferre debeamus.

Vacare culpa magnum est solatium, præsertim cum
habeam duas res, quibus me sustentem, optimarum artium
scientiam, & maximarum rerum gloriam: quarum altera
mihi uiuo nunquam eripietur, altera ne mortuo quidem.

Libro ix. epistola: Delectauerunt me literæ tuæ. locos
habet consolatorios.

Ac ne sis perturbatus. Noui enim te : & non ignoro, *Ad Atticum.*
quàm sit amor omnis sollicitus, atque anxius. Sed res est,
ut spero, non tam exitu molesta, quàm auditu.

Sed ad hæc omnia una consolatio est, quòd ea condi-
tionemati sumus, ut nihil, quod homini accidere possit,
recusare debeamus.

Ex lib. ad Brutum, tota, & elegans : Fungerer officio.

Ex epistolis Plinij Secundi.

Q Vibus ex causis necesse est, tanquam immaturam
mortem eius in sinu tuo defleam: si tamen fas est aut
fieri, aut omnino mortem uocari, qua tanti uiri mortalitas
magis finita, quàm uita est. Viuit enim, uiuetq; semper: at-
que etiam latius in memoria hominum & sermone uersa-
bitur, postquàm ab oculis recessit. Volo tibi multa alia scri-
bere, sed totus animus in hac una contemplatione defi-
xus est. Virginium cogito, Virginium uideo, Virginium
iam uanis imaginibus, recentibus tamen audio, alloquor,
teneo, cui fortasse ciues aliquos uirtutibus pares & habe-
mus, & habebimus, gloria neminem.

Vt enim crudum adhuc uulnus, medentium manus re-
formidat, deinde patitur, atque ultro requirit: sic recens
animi dolor consolationes reiicit, ac refugit, mox deside-
rat, & clementer ad motis acquiescit.

Torqueor quòd discipulū, ut scribis, optime spei ami-
fisti, cuius & ualetudine, & morte impedita studia tua
quid nesciam, cum sis omnium officiorum obseruantissi-
mus, cumq; omnes quos probas effusissime diligas?

Iisdē nūc ego te quibus ipsum me hortor, moneo, cōfir-
mo. Et gaudiū mihi, & solatiū in literis: nihilq; tam latū,
quod

quod his lætius : nihil tam triste , quod non per has minus triste. Tamen in magna consolatione, ingēs est sollicitudo.

Consolatoria sylua mea.

Valeat illa uulgi sentētia, Vbi non sis qui fueris , non est quur uiuere uelis. Quæ si minus potest tota displicere, cogita non tantū qui nuper fueris , sed qui olim: neque tantum obuersetur animo tuo , unde cecideris , sed etiam unde surrexeris.

Ab sit à uiro muliebris illa uox, Dū mea me uictū doceat fortuna dolere. Imò te ratio reddat aduersus omnes uite casus inuictū, ut propellas animo dolorē, non ut assuescas.

Tibi recti conscientia , & bonorum iudicium pluris esse debet quàm inuidorum hominum sermo.

Magis te confirmare debet paucorum insignium , & probatissimorum hominum graue testimonium , quàm inepti uulgi fabulæ.

Leuius ista feres , si percipias animo , quid posteritas de te loquutura sit potius , quàm tuum seculum , cui liuor adimat iudicium.

Neque tantum de fortuna tua ademisse , quantum ad nominis tui gloriam addidisse æmulorum tuorum iniuria mihi uidetur.

Non hic tui cōsolandi officium mihi sumpsi, quod minus magnifice de animi tui magnitudine sentire, sed quæ admodū gubernatores optimi uim tempestatis, ita uiri fortissimi fortune impetum superare interdum non possunt. Non me fugit , quàm graue uulnus acceperis ex uxoris obitu. Amisisti fœminam singularis exempli, etiamsi priscis seculis uixisset. Quam illa marito uerecundiā præstitit,

tit, quum ipsa summam mereretur? quàm multas, quàm eximias uirtutes, ex diuersis ætatibus, ex uarijs matronis collectas, ac mexas una expressit? Tamen hoc tibi debet esse magno solatio, quòd tantum bonum tandiu possederis. Vixit enim tecum annos quadraginta quatuor, sine iurgio, sine offensa. Sed hoc ægrius fero, inquires, quò tenui diutius. Nam gustatas tantum uoluptates facilius obliuiscimur. At uide ne ingrati sit hominis, tantum cogitare quid amiseris, non meminisse quàm diu fruitus sis. Certe prudētiæ tuæ fuerit, non committere, ne hoc ualeat apud animum tuum ratio, quod alioqui necessitas ipsa, & dies longa, & satietas doloris inducit.

Communis dolor. Tu nepotibus, ego pronepotibus orbatus sum. Sed spero futurum ut alij nati, dolorem hunc gaudio mutent, quando salua est unde hoc sperare liceat.

Multum ab istis dissentio, qui in graui dolore putant hominem sibi relinquendū, donec uulnus tempore mitius, medicam admittat manum. At ego quemadmodū primum arbitror, animum philosophiæ præceptis, aduersus omnes malorum incursus, ueluti antidoto præmunitum habere: ita proximum arbitror, statim repugnare dolori, ne ueluti morbus iam familiaris factus, nullis remedijs possit exigi.

Scribis dolorem, quem ex uxoris obitu cōceperas, non solum non leniri die, sed in dies etiam in crudefcere.

Quò magis censeo uelut in uetere morbo ad qualibet mutationis auxilia cōfugiendum. Sunt balnea, rusticatio, negotiorū cura, studia literarum, peregrinatio, spectacula, contetio cum aduersarijs, publici magistratus functio. Horum atq; his simulum, nunc hoc, nunc illud tentandum est.

est. Fortassis incidēs tandem in aliquid, quod egritudinem istam animi uel sanet, uel ceu clauus clauum protrudat.

Consolatio familiaris cum ob-
iurgatione mea.

TE'ne sic angī, sic animo iacere? Quorsum tandem attinet, ut te afflictes, ut te lacrymis cōficiās? An ista malum lenient, an non potius exacerbabunt? Quorsum attinet tam misere deplorare, quod mutari nō potest? Vbi nunc est illa animi tui constantia? ubi litera, quibus aliorū dolorem leuare consueueras? Alijs mederi potuisti, tibi nihil prodes. Ipse tibi nunc medicus sis oportet. Cur frustra & te ipsum lacrymis, & amicos querelis exanimas? Que est ista animi impotentia, quæ mollities? Num te uirū esse oblitus es? Ita'ne ista tam grauiter fers? quasi uerō ista tibi uni contigerint, aut tanta sint, ut alijs non multo etiam acerbiora euenerint. Quid uel tuo animo, uel doctrina indignius, quā sic angī, sic frangi, sic teipsum abijcere, quo modo ne mulier quidem ulla posset? Neque enim uideo quem fructum adferre possint inanes lacrymæ, & querimonie. Nam si eiusmodi malum iudicas, ut ad salutem reflecti nequeat, cur luctu duplicas incommodum? Si spes est, cur non ea potius te sustentas: atque id agis, quæ ratione quā primum ex istis malis queas emergere? Si desperas, memineris illud, in istiusmodi rerum conditione bonum animum, dimidium adimere mali. Sin speras: cur perinde, tanquam in re desperatissima te maceras?

Audio te tam grauiter angī, ut ex luctu, mentis etiam errore afficiaris. Deum immortalem quid tibi uis? Quin tu potius obduras, ac seruas te rebus secundis? Cur tu & amicis

amicis luctum auges, & inimicis uoluptatem præbes, & teipsum indigne conficis?

Tu contra audētior ito, Quò tua te fortuna sinet.

Ducunt uolentem fāta, nolentem trahunt. Tu, dum ista te cōscientia, iste animus, ista uirtus, ista litera, ista rerum gestarum memoria te comitabitur, caue te putes exulem ubicunq; locorum, quocunque sub cælo erit uiuendum, etiamsi ultra Getas relegatus esses. Sed quid ego sus Minervam? Facit sanè non loquacitas mea, sed beneuolentia longiores epistolas. Vale.

Consolatio iocosa & familiaris.

Quòd te lacrymis conficis, non muror, qui puellam amiseris, nondum totos sexaginta septē annos natam, idq; relicta dote satis opima. In h' c tibi scribere uisum est, ne doloris magnitudine uictus tibi manus adstreres. Priusquàm extilles lacrymis, fac iuxta prouerbum, Viuorū memineris. Tua puella redibit nunquàm. Alioqui matrē deflere uideberis. Mitto tibi strophium, quo lacrymas extergeas, & succum medicum, quo lippitudini fletu cōtractæ medearis. Clama te miserum, sed nunquàm efficies, quin istam miseriam tibi complures inuideant. Nisi desinis macerare te, uereor ne populus in te iaciat conuitium illud: *πὸς ἀνθρώπων τὰ φρονιμώτατα.*

Ad consolationem responsio.

Iam quibus modis respōdendum sit cōsolatori, res ipsa dabit cōsiliū. Nam ferme gratias agimus primū pro officio, deinde laudamus ingenium, quòd nihil adduci potuerit ad leniendum dolorem, quod ille non summa dicendi facultate disseruerit. Postremò quòd illius & prudens,

et erudita, et grauis, denique cum primis amica oratio, aut bonā doloris partem nobis ademerit, aut totum excusserit. Aut si nobis nō profuit illius consolatio, laudabimus animum, studium, et ingenium illius: quod tanquam bonus ac peritus medicus nullum nō remedij genus admo uerit, sed arte maius esse malū. Aut ita respondebimus im perioso consolatori: Facile, quum ualemus, recta consilia egrotis damus. Tu si hic sies, aliter sentias. Exemplo su per sedebimus, syluæ nonnihil suppeditabimus.

Cic. ex famul. libro iij. Ego uero Serui. lib. v. Quan quam ipsa consolatio.

Ad Atticum.

Vtinā illum diem uideā, cum tibi agam gratias, quod me uiuere cōgisti. Adhuc equidem ualde me pœnitet.

Sed te oro, ut ad me Vibonem statim uenias, quod ego multis de causis conuersti iter meum. Sed eò si ueneris, de toto itinere, ac fuga mea consilium capere potero. Si id non feceris, mirabor, sed cōfido te esse omnino facturum.

Quod me hortaris, ut firmo sim animo, uellem posses aliquid afferre, quam ob rem id facere possim.

Quod me ab hoc mœrore recreari uis, facis, ut omnia, et c. Sed me mihi non defuisse, tu testis es. Nihil enim de mœrore minuendo scriptum ab ullo est, quod ego nō domi legerim. Sed omnē consolationem uincit dolor. Quin etiam feci, quod profectò ante me nemo, ut ipse me per li teras consolaret, quem librum ad te mittam.

Consolari iam desine, obiurgare uerò noli. Quod quū facis, et ego tuum amorem et dolorem desidero, quem ita affectum mea ærumna esse arbitror, ut te ipsum conso lari nemo possit.

Ad conso

Ad consolationem, mea.

Tua quidem oratio sperare me iubet, quod improbum sit etiam optare.

Vide ne me lactes inani spe, ne doloris uorsuram fecero, mox cum scenore recursuri.

De petitoria epistola.

Seruius enarrans locum, in libro Aeneidos primo, ubi Iuno supplex petit ab Aeolo, ut classem Aeneae disijciat, indicat praecipere rhetores in omni petitione quatuor seruanda esse: primum ut quod petimus ostendamus esse in potestate eius à quo petimus: praeterea ut doceamus esse iustum quod petimus: deinde ut modum ac uiam indicemus, qua confici possit, quod petimus: denique ut sequatur remuneratio. Hunc ordinem in petitionibus Vergilio fuisse perpetuum, uelut hoc in loco: Et mulcere dedit uentos, et tollere fluctus: ostendit facultatem. Mox: Gens inimica mihi Tyrrhenum nauigat aequor: declarat esse iustum. Iustum enim quicquid molimur in hostem. Rursum: Incute uim uentis, et disijce corpora ponto: modum aperit et uiam. Addit remunerationem. Sunt mihi bis septem. Ac recte quidem Seruius et expedite. Nos tamen paulo crassiore Minerua rem aperiemus. Primum, quoniam uaria est natura rerum, quas petimus: et magna est uarietas personarum, quae rogant, aut rogantur, oportet et petendi rationem esse uariam. Sunt enim quaedam quae fauorabiliter petimus à quouis, ueluti consilium: sunt quae pudore suffundunt rogantem, ueluti quum petimus mutuum, aut rem parum honestam. Igitur in genere duplex erit petendi modus, rectus, et obliquus. Vbi causa erit fauorabilis, aperte suadebimus

debimus esse præstandū, quod petimus: ubi secus, per insinuationem irrepemus in petitionē. Primum exaggerantes, quāta nos circumsiet necessitas, & quā magnum tantum sit necessitas, & quā inutilis pudor uiro egēti: neque fugere nos, quā sit improbum, rem tantam ab eo petere, de quo nihil unquam simus promeriti. Post hæc paulatim per cuniculos ostendemus, nobis non mediocrē spem porrigi ab insigni illius benignitate, qua solitus sit etiā ignotis & indignis opitulari: ob eximiā ingenij bonitatem, ad subleuandas omniū miseras propensi. Hic pudor nō uulgariter cōmendat rogantem, quemadmodum improbitas alienat animū. Nullus enim libenter in eum cōfert beneficium, qui ceu debitū flagitat, magisq; poscit, quā petit. Prostat Hortensio, quod quū cuperet ex uxore Catonis Uticensis suscollere prolem, nō ipsam petijt, sed illius filiā Portiā Bibulo nuptam, plurimas interim causas adducēs, quare cuperet ex ea gente hærcdem. Ille cum respondisset se faciliē assensurū, si modo probaretur genero: tandē uerecunde subindicauit, se Martiam ipsius uxorem petere, cuius copiam facere, ipsi esset in manu, qui maritus esset. Iam imprudens cōcesserat, quod petebatur. Itaq; persuaso Martiæ patre, duxit eam uxorem. Autor Plutarchus. Vbi nihil erit opus hac insinuatione, tamē eius à quo rem difficilē petimus, beneuolentiā modis omnibus conciliabimus. A persona ipsius, cuius benignitatē quum erga cæteros, tum erga nos grate cōmemorabimus: dicemusq; nos ei cui iam sumus tot nominibus deuinctissimi, uelle fieri deuinctiores: à persona nostra testificātes, quāto studio semper illum coluerimus, quodq; præcipuā fiduciā in illo semper habuer

habuerimus: simul ostendentes hoc quod petimus, ut nulli nos libētius debituros, quā illi cui debemus omnia, ita nulli facilius esse pręstare. Quod etiam magis exponemus in explicando modo. Si qua erunt nostra in illum merita, ea summa cū modestia significabimus magis, quā cōmemorabimus. A persona maiorū utriusque, si docebimus inter utriusq; parētes ueterem atq; arētissimā necessitudinē intercessisse, compluribus nutuis officijs huc usq; cultā, & cōfirmatam. A persona aduersariorū, si declarabimus nobis esse certamen cum ijs, quos is etiā odit, à quo pręsidia poscimus. A re, si docebimus eam piā esse, iustā, honestā, nobis necessariā, illi facilē, & honorificā. Deinde si citra arrogantia ostendemus, quid ex ea re cōmoditatis sit ad ipsum etiā aliquando rediturū. Si quid inerit incōmodi, quod animū illius, uel alienet à nobis, uel deterreat, id uel diluemus, uel extenuabimus. Si erit opus, admiscebimus obtestationes earū rerū aut personarū, quibus scimus illū posse cōmoueri. Postremò pollicebimur memorē animū, nec habituros modò gratiā, uerū etiā relaturos, si dabitur cū scēnore: nos ipsos totos, resq; nostras omnes illi uicissim dedicabimus, ac deferemus. Facultatē nostrā extenuabimus: de animo, studioq; magnifice pollicebimur. Illud adijciā, non hic solum, uerum etiā alijs in rebus aliquando plus ualere iocum tēpestiuum, & aptū, quā seriā petitionē. Tantum de pręceptionibus satis esto, reliqua iuuenibus, aut pręceptori animaduertenda relinquo.

Exemplum petitionis obliquę.

Ingenij mei pudorem ipse non ignoras uir eximie. Sed quò non adigit mortales, uere durissimū telum neces-

sita? Eo in loco sunt res meae, ut ni protinus ad manum
sint ducenti angelati, tam perierit tuus Ludouicus, quàm
extrema faba, quod aiunt. Scio beneficiũ esse magnum &
eximũ: neq; me fugit quàm nulla sunt mea in te officia,
quorũ fiducia rem tantũ ausim abs te petere, presertim
quum tot, tantisq; nominibus iam pridem obstrictus, tibi
nondum ulla ex parte retulerim gratiã. Et tamẽ nisi deus
aliquis, uelut *ἐν τῷ μυχῷ* alicunde sese proferat, funditus
interij. Quare quemadmodũ in summa rerũ desperatione,
nautæ solent sacrã iacere ancorã, ita ego dispectis omni-
bus, ad te uelut ad propitium quoddam numen confugio.
 Non ausim rogare, quanquã huc adigit necessitas, tamẽ
 illud uolui te scire, statum rerum mearum: ut si me iudicas
 dignum exitio, te iudice peream equiore animo: sin tua
 pietas, multis iam argumentis antehac in me declarata, di-
 gnabitur me ex hoc discrimine eximere, conabor omni-
 bus neruis, ne te unquam huius capitis seruati poeniteat.

Petitio rei parum honestæ.

Non ignorabam, quàm impudens esset in causa pes-
 sima, à uiro omnium optimo patrocinium rogare.
 Non enim conabor excusare factum meũ, ne grauius pec-
 cem impudentia, quàm hætenus peccatũ est stultitia, &
 incogitantia, ne dicam demẽtia. Horrescit animus, abhor-
 rens & ab ipsa malorũ meorum commemoratione, sed ta-
 men aperiendum uulnus, si sperem medelam. Sortem satis
 amplam, quã pater dederat in negotiationem, nuper alea
 perdididi. Ingens flagitiũ fateor, sed utcunq; succurri pote-
 rat, si solum esset. Inscio patre, cũ matris pedissequa rem
 habui. Illa me callidior, negauit se facturam sui copiam,
 nisi

nisi pollicerer me maritū ipsi futurū. Ibi mihi nō Iupiter, ut inquit Hesiodus, dimidiū mentis, sed Venus totam mētem ademūt. Polliceor demens. Nunc aiunt nulla ratione rescindi posse, quod sic actū est: ut illis sit pessime, qui leges tam iniquas cōdunt. Pater meritō iritatus, abdicatiōnē parat. Quod si fit, nullū uideo melius cōsiliū, quā ut laqueo uitā finia. Quur enim libeat uiuere in tātis malis? Scio te nihil non posse apud patrē. Solus es qui me possis redigere in gratiā. Quōd si quid te miseret mei, nō ausim rogare, sed tamē uides calamitatē meā. Efficiam ut te mei seruati nunquam uel pudeat, uel pœniteat. Sic admissum hoc omni officiorū genere sarcia. Aetatem uides. Sæpenu-
mero à grauioribus cōmissis, iuuenes sese ad bonā frugem conuertēre. Vtinā quod factū est, fieri posset infectū. Sed quod mutari non potest, pensari potest. Maximum quidē hoc peccatū est, fateor, sed primum. Deniq; quid sibi uult pater? Si abdicat, nec mihi adinut uxorem, & sibi parat orbitatē: sin ignoscit, habebit hoc semper additiōrē filiū. Fac breui sciam, utrū meis malis sim omnino perdēdus, an tua bonitate seruādus. Nihil enim miseriū, quā pēdēre.

Petitionis honestæ exemplum.

Improbum fortasse alijs uidebitur, præsul amplissime, cum à quo tantum beneficiorū acceperim, quātum ne sperare quidem unquā sum ausus, rursus nouis precibus sollicitare. At ego ingenui, minimeq; ingrati animi existimo, cui multum debeas, ei plurimū uelle debere. Cui enim extremas fortunarum mearū partes potius acceptas ferre cupiam, quā ei ipsi cui primas, cui medias debeo? Quid enim Lucius esset, nisi te tanquam numen quoddam pro-

pitium nactus esset? Tu me puerū, ob nescio quam in me uirtutis indolem, præterea fortasse, quod putabas meas literas tibi aliquando uel usui, uel ornamēto futuras (quam utinam de me uel existimationē, uel expectationem non omni ex parte uidear sefellisse) adoptasti. Nec semel complexus, unquam fouere, iuuare, ornare destitisti. Itaque si quid hodie in me uel uirtutis, uel bonarū literarū, uel dignitatis esse putatur, id omne tuæ debeo munificētiæ. Sed duo mihi restare uidentur, ut & tu opus tuū pulcherrime cœptū perficias: & ego efficiā, ne nullum tantorum in me beneficiorū fructū ex me cepisse uidearis. Quod utrunq; ut fiat, & ego maximopere cupio, & tibi in manu est. Eadem opera & tu me alumnum beaueris, & eo in loco collocaris, quo multis in rebus tibi usui esse possim. Post diuturnos, ut scis, in literis theologicis exhaustos labores, ad Calēdas Maias theologica laurea sum insigniendus, quam quidē professionē paulò splendidius uitæ genus decere, nō ignoras. Præterea, quoniā hætenus amplitudini tuæ sumptui tantū fui, æquum est, ut aliquando sim & usui, & dignitati. Iam uerò hoc ipso tēpore uacat præpositura Corinthiensis, nō maxima quidē illa, sed meo cōsilio cōmodissima: tum quod & in tua sit patria, & à mea nō ita multū absit. Habebis, qui tuorū, tuaq; illic negotia perinde curæ sit habiturus, ac si propria forent. Præterea quicquid unquam dignitatis mihi accessurū est, id in tuam unius gloriam accesserit, cui semel me debeo, quātus sum. Nec me latet, quā potentes sim competitores habiturus, quā hoc honore indignos, quā utriq; nostrū maleuolentes. Nihil me terret, modò tu uelis, qui unus plus
ceteris

Narratio.

cæteris omnibus potes patrocinari. Quid enim tu audeas à principe petere, quòd ille cunctetur præstare? Quare si me non temere adoptasti: si qua unquam ex parte tuo de me iudicio respondi: si me uirum gratum existimas, fac ut hæc præpositura mihi tribuatur. Id ego abs te & diligentius, & pluribus uerbis contenderè, nisi uererer, ne de tua humanitate, quam ego semper in me propensissimam sum expertus, diffidere uiderer. Ego uicissim modis omnibus enitar, ita me eo honore dignū præstare, ut neq; te noui huius in me muneris poeniteat, & ueterum tuorū erga me beneficiorum fructum aliquem percipias. Vale.

Petitoria sylua.

PLuribus uerbis ad te scriberem, si aut tua humanitas longiorem orationem expectaret, aut id fieri nostra amicitia pateretur, aut res uerba desideraret, ac non pro se ipsa loqueretur. Cic. epist. fam.

Hoc uelim tibi persuadeas, si rationibus meis à te prouisum esse intellexero, magnam te ex eo, & perpetuam uoluptatem esse capturum.

Quòd si mihi tua clementia opem tulerit, omnibus in rebus me fore in tua potestate tibi confirmo.

Lib. v. epistola: Coram me tecum, tota.

Cum uerò ea tua sit uoluntas, humanitas, beneuolentia erga me, libenter amplector talem animum. Sed ita (non enim dimittam pudorem in rogando meum) si feceris id quod ostendis, magnam habebō gratiam: si non feceris, ignoscam: & alterum timori, alterum mihi te negare non potuisse arbitror. Est enim res profectò maxima. Quid rectum sit, apparet: quid expediat, obscurum est: ita tamē,

q 3 ut si

ut si nos sumus, qui esse debemus, id est, studio digni, & literis nostris, dubitare non possimus, quin ea maxime cōducant, quæ sunt rectissima.

Lib. vi. epistola: Si mihi non tecum. tota.

Lib. ix. petitio iocosa: Et si munus flagitare.

Cic. ad Ant.

Tu si me amas tantum, quantum profecto amas, expeditus facito ut sis: si in clamaro, ut accurras. Sed do operam, & dabo, ne sit necesse.

Nunc mihi & consilijs opus est tuis, & amore, & fide, quare aduola. Expedita erunt mihi omnia, si te habebō. Multa per Varronem nostrum agi possunt, quæ te etiam urgente erunt firmiora. Multa ab ipso Publio elici, multa cognosci, quæ tibi occulta esse nō poterūt: multa etiam, sed absurdum est singula explicare, cum ego te requiram ad omnia. Vnum illud tibi persuadeas uelim, omnia mihi fore explicata, si te uidero.

Quam ob rem, si me amas tantum, quantum profecto amas: si dormis, expergiscere: si stas, ingredi: si ingrederis, curre: si curris, aduola. Credibile non est, quantum ego in consilijs, & prudentia tua, quodq; maximum est, quantum in amore & fide ponam. Magnitudo rei longam orationem fortasse desiderat: cōiunctio uerò nostrorum animorum, breuitate contenta est.

Quare ut Numestio mandauī, tecum ut ageret, item atq; eo, si potest, acrius te rogo, ut planè ad nos aduoles: respiraro, si te uidero.

Pluribus uerbis tecum agerem, nisi pro me apud te res ipsa loqueretur.

Tantum te oro, ut quoniam me ipsum semper amasti,
eodem

eodem amore sis . Ego enim idem sum . Inimici mei mea mihi, non me ipsum ademerunt . Cura ut ualeas .

Tu me, ut facis, opera, consilio, gratia iuua.

Quintum fratrem optimum, humanissimumq; sustenta.

Omnem autē spem habeo existimationis, priuatarumq; rerum in tua erga me mihi perspectissima beneuolentia: quam si his temporibus miseris, & extremis præstiteris: hæc pericula, quæ mihi communia sunt cum cæteris, fortius feram: idq; ut facias, te obtestor, atq; obsecro.

Te etiam atq; etiam oro, ut me totum tuendum suscipias, ut si ij salui erunt, quibus cum sum, unâ cum ijs possem incolumis esse, salutemq; meam tuæ beneuolentiæ acceptam ferre.

Itaque te uehementer etiam atque etiam rogo, magis quàm à me uis, aut pateris te rogari, ut hanc cogitationem toto pectore amplectare.

Quanquàm hæc epistola non suasoris est, sed rogatoris. Igitur mi Plance, rogo te, & etiam oro, sic mediussimè, ut maiore studio, magisq; ex animo agere non possem, ut totum hoc negotium ita agas, ita tractes, ita conficias, ut quod sine ulla dubitatione apud c o s s. obtinui nus propter summam bonitatem, & æquitatem causæ, id tu nos obtinuisse non modo facile patiare, sed etiam gaudeas. Qua quidem uoluntate te esse erga Atticum, sæpe præsens & illi ostendisti, & uerò etiam mihi. Quod si feceris, me, quem uoluntate, & paterna necessitudine coniunctum semper habuisti, maximo beneficio deuinctū habebis. Idq; ut facias, te uehemēter etiam atq; etiam rogo.

Nunc mi Capito (scio enim quantum semper apud
eos,

eos, quibus cum sis, posse solcas) eo plus apud hominem
facilimum, atque humanissimum Plancum enitere, elabo-
ra, uel potius eblandire, effice ut Plancus, quē spero opti-
mum esse, sit etiam melior opera tua.

Quod certe facies, si tu neruulos tuos mihi saepe co-
gnitos, suauitatemq; , qua nemo tibi par est, adhibueris.
Quod ut facias, te uehementer rogo.

Ignosce mihi, quod cum antea accuratissime de Bu-
throtijs ad te scripserim, eadem de re sepius scribā. Non
mehercule mi Plance facio, quod parum confidam, aut li-
beralitati tuæ, aut nostræ amicitie, sed cum tanta res aga-
tur Attici nostri, nunc uerò etiam existimatio, &c.

Oro, atq; obsecro te Cicero, necessitudinem nostram,
tuamq; in me beneuolentiam obtestans, sororis meæ libe-
ros, obliuiscaris esse Lepidi filios, meq; his in patris lo-
cum successisse existimes. Hoc si à te impetro, nihil pro-
fectò dubitabis pro his suscipere.

Scribere multa ad te neq; possum præ solitudine, ac
stomacho, neq; debeo. Nam si in tanta re, tamq; necessaria
uerbis mihi opus est ad te excitandū, et confirmandū, nulla
spes est, facturū te quod uolo, & quod oportet. Quare no-
li expectare lōgas preces, intueri me ipsum, qui hoc à te,
uel à Cicerone cōiunctissimo homine priuatim, uel à cōsula-
ri tali uiro remota necessitudine priuata impetrare debeo.

Hoc te ita rogo, ut maiore studio te rogare nō possim.

Cic. petit.

Innumerabilia sunt tua in me officia, domestica, foren-
sia, urbana, prouincialia, in re priuata, in re publica, in
studijs, in literis nostris: omnia uiceris, si feceris, &c.

Cui enim ego potius dignitatem meam acceptum ferre
cupiam,

cupiam, quàm cui salutem & omnia debeo?

Credibile non est quantũ ego in consilijs, & prudẽtia Petit, consil.
tua, quod maximum est, quantum in amore & fide ponã.

T e habere consiliorum autorem, & solitudinum so-
cium, omni in cogitatione coniunctum cupio.

Quod si feceris, magnus ad tua pristina erga me stu-
dia cumulus accedet. T e autore, mihi uel augendi, uel
quiescendi ratio constabit.

Nunc mihi consilijs opus est tuis, & amorẽ, & fide.
omnia mihi expedita erunt, ubi tuam sententiã accepero.

Hac in re consilium de tua sententia capiemus.

Tuum ad nos reditum, tum omnes tui uehementer de-
siderant, tum tempus & res tuæ postulant.

Autoritate tua nobis opus est, & consilio, & etiam
gratia. Noli pati litigare fratres, & iudicijs turpi-
bus conflictari.

Sed quid tibi mando nominatim? me totum tuo amori,
fideiq; commendo.

Sed si me amas, quod qdẽ iam facis, aut pbelle simulas.

Nũquã putavi fore, ut supplex ad te uenirẽ: sed hercle
facile patior, datum tẽpus, in quo amorẽ experiar tuum.

Quod superest, rogo ut pari simplicitate, si qua exi- Plinius.
stimabitis addenda, commutanda, omittenda, indicetis.

A simplicitate tua peto, quod de libello meo dicturus Petit, iudicij.
es alijs, mihi dicas. Neq; est difficile, quod postulo.

Lib. iij. epistola: Assumo te in consilium, &c.

Petit, consilij.

Mihi & tentandi aliquid, & quiescendi te autore ra-
tio constabit. Obsequar tamen consilio tuo, cuius mihi
autoritas pro ratione sufficit.

Audisti

Audisti consilij mei motus, superest alterutra ex parte iudicium tuum, in quo mihi æquè iucūda erit simplicitas dissentientis, quàm comprobantis autoritas.

Politianus lib. vij. epistola: Multo æquius fuerat.

Habes quid mihi uideatur, & intelligis animi mei uotum, sed tamen tuum consilium sine exceptione sequar: ad tuam uoluntatem me cōfirmabo, à quo honeste dissentire non possum. Nihil assentor: tantum enim animi inducō, & mehercle amor in te meus, apud me ualeat, ut quæ tibi utilia sunt, & quæ tu uis, ea omnia mihi protinus & recta, & uera uideantur.

Hac in re facturus sum, quicquid tu decreueris: nā huius totius consilij, te ducem, me comitem esse decet.

Quod ut facias, non solum te rogo, uerum etiam suadeo. Neq; enim mihi iucundius erit, si nos inuiseris, quàm utile tibi.

Sylua mea.

Habes rerum mearum statum. Diuinas animi mei uotum. Vides quid res ipsa flagitet: nam ipse nihil auisim rogare, ne uidear non minus improbus, quàm miser.

Improbus planè uideri possem, qui te quotidianis meis postulationibus, occupatissimum interpellem: nisi eo te animo esse cognoscerem, ut quos semel tueri coeperis, non quiescas, donec planè confirmes.

Ex tua unius humanitate quantus sum pendeo. In te uno omnes spes, fortunæq; meæ sunt sitæ.

Nihil est tam arduum, quod te patrono consequi posse diffidam. Nihil tam amplum est, quod uel ego abs te petere non audeam, uel tu præstare nequeas.

Quàm

Quàm tu facile potes, tam ego uehementer cupio.

Parum recte de tua liberalitate sentit, qui rem iustam uerbosius abs te petit.

Adijce & hunc calculum, ad altissimos cumulos tuorum in me beneficiorum: quibus etsi nihil accrescere posset uideatur: tamen hoc unum desiderant, ut undique absoluti, atque exaggerati esse uideantur.

Quum plurima sint tua in me officia, nihil tamen fuerit hoc uno uel maius, uel iucundius.

Non dubito quin mirere, atque etiam stomachere, quod tecum eadem de re agam sepius.

Scio, perfricui faciem insigniter, qui hoc ausim abs te petere: sed hanc impudentiam me docuit non mea natura, sed dura necessitas.

Res est tam pia, tam iusta, ut uir æquus eam nec hosti negare debeat. Nostra tam arcta est necessitudo, ut nihil tam iniquum sit, quod alter ab altero non debeat impetrare.

Si uideor improbus, qui rem tantam abs te flagitem uerius, quam petam, dabis ueniam. Hanc audaciam me docuit non mea natura, sed tua humanitas, qui mihi nihil negare soleas.

Res est eiusmodi, ut si tecum consideres, quod abs te peto, sim abs te potius rogandus.

Inuitus onero te precibus, sed urget necessitas.

Scio tantos patronos non uocandos ad mediocrem, aut uulgarem operam: sed hoc negotium eius generis est, ut ab uno te præstari possit.

Responsio ad petitionem.

Quod mecum per literas agis, unam ob causam mala Cic. ad Attic.
lem coram egisses. Non enim solum ex oratione,
sed

sed etiam ex uultu & oculis, & fronte (ut aiunt) meum erga te amorē perspicere potuisses. Nam cum te semper amaui, primum tuo studio, post etiam beneficio prouocatus, tum his temporibus Resp. te mihi ita commendauit, ut chariorem habeam neminem. Litteræ uerò tuæ tum amantissime, tum honorificentissime scriptæ, sic me affecerunt, ut non dare tibi beneficium uiderer, sed accipere à te, ita petente, ut inimicum meum, necessarium tuum, me inuito seruare nolles, cum id nullo negotio facere posses.

Plinius.

Lib. iij. tota epistola: Facis pro cetera reuerentia. Faciam ergo quod desideras, tam diligenter, quam libenter.

Quòd admones, gratias ago: quòd rogas, queror. Admoneri enim debeo, ut sciam: rogari non debeo, ut faciā, quod mihi non facere turpissimum est.

Mea.

Excusarem me profectò uel fratri, hoc sanè tempore, sed arctior est amicitia nostra, quam ut ullā patiatur exceptionem, quoties alterutrius seria res agitur.

De commendatitia epistola.

Hic finitimum est commendatitium genus. Quum enim commendamus aliquem, alieno nomine quippiam petimus: quare ijsdem rationibus erit tractandum. Hic tres erunt considerandæ personæ. Nostra, eius cui scribimus, eius quem commendamus. Postremo loco res ipsa cuiusmodi sit, erit inspicieda. A nostra persona persuadebimus, si causas, à quibus ad hunc commendandum fuerimus commoti, iustas, magnas, plurimas uel ostendemus: uel quòd de nostris, aut nobis ipsis sit bene meritus: uel quòd nobis cum ipso, aut nostris cum illius maioribus, uetus, & coniunctissima familiaritas intercesserit,

rit, aut hospitium, uel quòd sanguine propinquus, patria, studijs uel coniunctus, affinis, aut alioqui charus, & commendatus: uel ita deniq; hominem describemus, ut ob modestiam, probitatem, eruditionem, integritatem, humanitatem, nobilitatem, dignus sit qui quum omnibus bonis, tum illi in primis debeat esse quam commendatissimus. Si qua uerò uel nostra, uel illius quem commendamus, maiorum uel eius in alterum merita præcesserunt, ea summa cum modestia significabimus, extenuantes quidem ipsa benefacta, benefaciendi autem animum amplificantes. Vehementer commendationem iuuabit, si eum quem commendamus, de eo cui commendamus, quàm optime, & sentire, & prædicare dicemus. Non possumus enim non beneuolentia quadam commoueri erga eos, quibus nos citra assentationem intelligimus esse admirationi. Quare scitè Iſocrates præcipuum amicitiae cõciliandæ initium commonstrauit, ut absentem laudemus, apud eos, quos renuntiaturus suspicemur: si utriusq; nostrum summam de eo fiduciam uerisimiliter aperiemus, sollicitudinẽ uidelicet quandam iniiciamus oportet, ubi eiusmodi hominem omnem spem suã in ipsius unius humanitate reposuisse intelliget, nullius præter suam unius opem implorare uoluisse. Et à personis quidem hoc modo cõmendationem tractabimus.

A re commendabimus, si eam facilem illi duntaxat, cui commendamus, monstremus: si piã, si honestam, si utilem probabimus. Tum si eiusmodi erit, ut ex ea ad patronum aliquid laudis, gratiæ, autoritatis, aut emolumenti uenturum uideatur, id accurate admonebimus, si eodem beneficio quàm plurimos deuincturum dicemus. Deinde obse-

A persona com
mẽdati, & eius
cui commenda
mus,

A re.

erationibus uti licebit. Postremo loco & nostro, & commendati nomine pollicebimur illum gratum, & memorem futurum. Nos eodem beneficio perinde ac si in nos esset collatum, perpetuo deuinctos fore. In calce mutuam operam, & studium deferemus. Constat enim epistolam commendatitiam ex duobus misceri generibus, suasorio, & demonstratiuo. Quum enim eum quem commendamus, cum laude describimus, in demonstratiuo genere uersamur: quum rem ipsam aut honestam, aut utilem, aut facilem ostendimus, in deliberatiuo. Sed breuis debet esse commendatio, neq; nimis accurata, praesertim si ad eum scribimus, cui sumus ipsi uehementer commendati. Testimonij enim pondus habere debet, potius quam disputationis speciem. Et huius generis esse potest triplex tractatio: Recta, obliqua, & iocosa. Recta, quum aperte docebimus cum esse dignum fauore, quem commendamus. Obliqua, quum negabimus nos hunc commendare uelle, tantum admonere ut hominem uelit cognoscere: futurum enim, ut quum alij gratis agere soleant ijs, qui commendationem recepissent, ille ultro gratias sit acturus, quod nostra opera contigerit nosse talem uirum. Iocosa, quum intelligemus nos plus effecturos sermonis iucunditate, quam serijs argumentis. Non arbitror operae precium, de singulis exempla proponere, ne nimium increascit uoluminis magnitudo. Tantum in sylua formulas aliquot annotabimus. Commendatorij generis exempla, quum apud Ciceronem sint plurima, tum illa epistola, cuius initium est, Nondum erat auditum, uniuersum commendandi artificium una complectitur.

Breuis huius
generis com-
prehensio.

Herman

Hermannus theologus Andronio
Bolano antistiti S. D.

Quanquàm mihi Dionisij mei fortunæ maiori propemodū, quàm meæ ipsius curæ essent, præsul humanissime, idq; non modo propter uetustissimam ætatis manq; , quæ nubi cum eius familia fuit, necessitudinē, uerū etiā propter admirabilē hominis et modestiam, & probitatē, tamen eum tibi pluribus uerbis cōmendādum non putauī, ne uel de nostra amicitia, uel de hominis uirtute parū fesus uiderer. Id enim nostra necessitudo, qua nihil arbitror inueniri coniunctius, postulare uidetur, ut quēcunq; beneuolentia complectendū statuissem, idem tibi quoq; & charissimus, & quā commēdatissimus debeat haberi. Tanta rursum est hominis tum probitas, tum modestia, tum eruditio, ut uel citra meas literas quū optimo cuiq; , tum tibi eiusmodi uiroꝝ amātissimo nō possit non esse quā commēdatissimus, nisi utrunq; parū noui, præsertim quòd tibi ipsi cum patre huius, uiro, ut scis, omnium qui unquā fuerunt gratissimo, uetus hospitium fuerit. Non eguit quidem ille nostra commendatione, quanquàm commendari planē uoluit, & uni adeò tibi uoluit. Mirum enim dictū fuerit, quantū fiduciæ, in tua unius humanitate reposuerit, quā amanter de te & loquatur, & sentiat. Neq; enim quæ essent à mente diuersa, loqui consueuit. Nec errat mea quidem sententia. Cui enim obscurum est, quantū pro tua auctoritate, et apud illustrissimū principem, & populum ualeas? Tum quantū studiosis uiris semper fauerit tua benignitas, sæpe maiorū suorū antehac, nunc et mea prædicatione didicit. Res est autē eiusmodi, ut tibi non multū ne-

gotij, huic plurimum cōmoditatis sit allatura. Debet huic
 Narratio. Abbas Syrus ex agris nescio quibus, iam multorū anno=
 rum fructus, homo ut scis, & pecuniosus, & calumniosus,
 cuius quidē prædecesores, sine ulla cōtrouersia cōstan=
 ter soluerūt. Hic simul atq; insatiabilem habēdi sitim, unā
 cum mitra est assequutus, debitū inficiatur, in ius, imò po=
 tius, in iniuriā uocat. Pudet dicere quas Proteus ille opti=
 mo adolescenti tergiuersationes nectat, quā astutas elā=
 bendi uias quærat, hominē nosti. Quod quidē cum semper
 molestū esse debeat, quia iniquum, tum hoc tempore Dio=
 nysio meo incommodissime sanē obijcitur, hoc in tempore
 negari pecuniam, quum ea sic est opus, ut quum maxime.
 Proximo uere, erat doctoris insignia consequuturus, quò
 maiore cum autoritate possit Reip. commodis inseruire.
 Est enim iuris utriusque mûre peritus. Vide autem quā
 iniquum sit, huius Midæ causificationibus studiosissimum
 iuuenem, è medio studiorum suorum cursu, ad iniustas li=
 tes uocari, & iam multis sudoribus promeritum honorē,
 penē è manibus extorqueri. Rem iam partim ex me co=
 gnosti, reliqua ex ipso corā agente disces. In te uno
 utriusque nostrum spes sita est. Quare te per nostram be=
 neuolentiam, & paterni hospitij memoriam, maiorem in
 modum oro, ut ei in causa æquissima præsidio uelis esse:
 Abbatem istum uel odio, uel autoritate, uel metu ad sola=
 uendum compellas, à litibus quibus maxime pascitur, de=
 terras. Et magna & multa sunt tua in me officia, hoc ta=
 men ita mihi erit gratum, ut pro omnium summo sim ha=
 biturus. Apud iuuenem ita beneficium collocaris, ut nun=
 quā antehac apud quenquam rectius. Bene uale.

Est

Est uulgare ac frigidum commendationis genus, quum hoc officium extorquetur à nobis. Si tibi molestus sum, huic imputa: Nam mihi fuit molestior.

Tu pro tua prudentia, ubi ex ipso iam cognito quid sibi uelit cognoris, dispicies, quid sit factu optimum.

Commodabis illi mea causa, si modo id potes absq; tuo incommodo: sin minus, quo'uis ablega hominem potius, quàm ut ad me redeat.

Est et iocosa cōmendatio, quæ nonnunquā plus efficit quàm seria. Exemplum est in epistolis Ioannis Campani, qui monachum quēdam importunum cōmendat suo Cardinali. Et nos aliquando sic pusillum quendā, et recaluastrum ac macilentum commendauimus Mœcenati nostro, qui per eum miserat pecuniā, et in literis caluum appellarat, solitus et me ioco caluum dicere, quod essem raro capillitio. Commendauimus autem in hanc ferme sententiam. Caluus ille caluo pecuniam bona fide reddidit. Verū si pernosses, quo in statu sit iste caluus, haudquaquam admirareris hominem sic esse macilentum, ut uix ossibus hæreat: sic esse raro capillitio, ut uix tres pili supersint in capite. Est illi lōga lis apud tuum tribunal. Ea res sic ex-pilat, sic exugit hominem, ut ni tua succurrat bonitas, ne pilum quidem nummorum sit usquam habiturus, et periculum sit, ne prorsus fame pereat. Causa pia est, pro matre litigat, neque quicquam superest, nisi ut suprema sententia pronuncietur. Bene uolo homini. Quir enim non faueat similis simili? Eodem beneficio tibi duos caluos, duos magnos uiros obligabis. Hæc friuolum uideretur admonere, nisi conduceret ad hoc, ut præceptor ex his
r 3 facile

facile reperiat uarias thematum formas.

Commendaticiae sylua.

Etc. epist. fam.

E Pistola lib. i. epist. fa. j. cuius initium: Aulo Trebonio: tota huius generis est.

Lentulum nostrum eximia spe, summæ uirtutis adolescentem, cum cæteris artibus quibus studuisti semper ipse, tum in primis imitatione tui, fac erudias. Nulla enim erit hac præstantior disciplina. Quem nos, et quia tuus, et quia te dignus est filius, et quia nos diligit, semperq; dilexit, in primis amamus, charumq; habemus.

Lib. ij. Fabio uiro optimo. Tota.

locosa.

L. Valerium iuriconsultum ualde tibi commendo, sed ita etiã si non est iuriconsultus. Melius enim ei cauere uolo, quam ipse alijs solet. Valde hominẽ diligo, est ex meis domesticis atq; intimis familiaribus. Omnino tibi agit gratias: sed idem scribit, meas literas maximum apud te pondus habituras. Id eum ne fallat, te etiam atq; etiam rogo.

Atq; ipsum tibi Pomponium ita commẽdo, ut quanquam ipsius causa cõfido te facturum esse omnia, tamen abs te hoc petã, ut si qd residet in te amoris erga me, id omne in Põponij negotio ostẽdas. Hoc mihi gratius facere nihil potes.

Lib. vj. Cum A. Cæcinnæ tanta. Tota, et elegans.

Hunc mihi Cæsar sic uelim omni tua comitate cõplectare, ut omnia, quæ per me possis adduci, ut in meos cõferre uelis, in unum hunc conferas: de quo tibi hominẽ hoc spondeo, nõ illo uetere uerbo meo, quod cum ad te de Milone scripsissem, iure lusisti, sed more Romano, quomodo homines nõ inepti loquuntur, probiorem hominem, meliorem uirum, prudentiorem esse neminem. Accedit etiam, quod familiar

militariatē inducit, in iure ciuili singularis memoria, summa scientia. Huic ego neq; tribunatum, neq; præfecturā, neq; ullius beneficij certū nomen peto, beneuolētiam tuā, & liberalitatem peto. Neq; impedio, quō minus, si tibi ita placuerit, etiā hisce cum ornes gloriolæ insignibus. Totum deniq; hominē tibi trado de manu (ut aiunt) in manum tuā istā & uictoria, & fide præstantē. Summus enim putidiusculi, quanquam per te uix licet. Verū, ut uideo, licebit. Rufum istum amicū tuum, de quo iterū ad me scribis, adiuuare quantum possem, etiam si ab eo læsus essem, cum te tantopere uiderem eius causa laborare. Cum uerō & ex tuis literis, & illius ad me missis intelligā, & iudicē magnæ curæ ei salutē meā fuisse, nō possum ei nō amicus esse: neq; solum tua commendatione quæ apud me, ut debet, ualet plurimū, sed etiam uoluntate, ac iudicio meo.

Responsio ad
commendatio-
nem.

Lib. xj. Permagis interest. Tota, & elegans.

Item proxima: Lamia uno omnium. Item eodem libro: Cum Appio Claudio.

Lib. xij. Etsi non satis. Eodem: Gaio Auiano. Item proxima: Aulum Fusium.

Item multæ sequentes epistolæ sunt eiusdem generis. Eodē: Non dubito. Quin totus hic liber nihil habet præter epistolas commendatitias. Lib. xy. Marcum Fabium.

Quare cæteris in rebus, tantum ei tribues, quantū humanitas tua amicitiaq; nostra postulat. De Tullia mea tibi antiquissimum esse uideo, idq; ita ut sit, te uehementer rogo. Ego autem mi Plance, etsi non dubitabam, quin & s. c. & lex & Coss. decretum, ac literæ apud te plurimum autoritatis haberent, teq; ipsius Attici causa uelle

Cic. ad Attici

intellexeram, tamen hoc pro coniunctione, & beneuolentia nostra mihi sumpsi, ut id à te peterem, quod tua singularis humanitas, suauissimiq; mores, à te essent impetraturi, id autem est, ut hoc, quod te tua sponte facturum esse certò scio, honoris nostri causa libenter non prolixè, sed celeriter facias. Mihi nemo est amicior, nec iucundior, nec charior Attico, cuius antea res solū familiaris agebatur, eaq; magna, nunc acceßit etiam existimatio: ut quod cōsequutus est magna & industria, & gratia uiuo Cesare, mortuo id, te adiuuante, obtineat. Quòd si à te erit impetratū, sic uelim existimes, me de tua liberalitate ita interpretaturum, ut tuo summo beneficio me affectum iudicē.

Ego etiā mi Cicero proprie, familiariterq; te rogo, ut Veterem ames, uelisq; esse quā amplissimū, qui etsi nulare deterreri à proposito potest, tamen excitari tuis laudibus indulgentiaq; poterit, quo magis amplexetur, ac tueatur iudicium suum: id mihi gratissimum erit.

Filiam meā, & tuam, Ciceronemq; nostrum quid ego mi frater tibi commendem? Quin illud maximo, quod tibi non minorem dolorem illorum orbitas affert, quā mihi. Sed te incolumi orbi non erunt.

Itaq; cum tibi commendo maiorem in modum, hominē domi splendidum, gratiosum etiam extra domum, quem fac ut tua liberalitate tibi obliges. Est tribunus militum in exercitu nostro. Gratum hominē obseruantemq; cognosces. Trebatium ut ualde ames, uehementer te rogo.

Quare ut instituisi, complectere adolescentem.

Ex lib. ad Brutū. Tota: Bibulus. Item epi. Multos tibi.

Omnibus rebus ita cum tractes, ut intelligat nostram
cōmen

commendationem non uulgarem fuisse.

Commendatoriæ ad nuptias
exemplum.

Tota epist. lib. j. Petis ut fra. t.

Plinius.

Elegās exēplum cōmendationis, erit tota illa epist. lib. ij. cuius initium: Et tu occasiones obligādi me auidissime amplecteris. Lib. iij. epist. Quod ipse amicis tuis.

Lib. iij. Caluissium nepotem.

Eodem libro: Si quid omnino. Rursum lib. vj. Attilium Crescentem.

Obliga me, oblige antè, quàm dicat: nam cum dixerit, gratias ages. Spondeo sollicitudini tuæ, spei meæ, magnitudini causæ sustenturum.

Est indolis optimæ, breui producturus alios, si hic interim prouectus fuerit à nobis.

Accepisse te beneficium credes, cum propius inspexeris hominem, omnibus honoribus, omnibus titulis (nihil uolo elatius de modestissimo uiro dicere) parem.

Videor ergo demonstrare tibi posse Iuliū Genitorem: amatur à me, iudicio tamē meo nō obstat charitas hominis, quæ ex iudicio nata est. Vir est emēdatus & grauis, paulò etiā horridior, & durior, ut in hac licētia tēporū: quātum eloquētia ualeat, pluribus credere potes. Nā dicendi facultas aperta, & exposita statim cernitur. Vita hominū altos recessus, magnasq; latebras habet, cuius pro Genitore me spōsorē accipe. Nihil ex hoc uiro filius tuus audiet, nisi profuturū. Nihil discet, quod nescisse rectius fuerit, nec minus sæpe ab illo, q̃ à te, meq; admonebitur, qbus imaginibus oneratur, quæ noīa, et quāta sustineat. Proinde

Commendatio
præceptoris.

fauentibus dijs, trade eū præceptori, à quo mores primū,
mox eloquentiam discat, quæ male sine moribus discitur.

Lib. v. epist. Video quam molliter tuos habeas.

Commendatio
liberti,

Claudius amari à te cupit, dignus hoc ipso quod cupit, deinde quòd ipse te diligit. Neque enim serè quisquam exigit istud, nisi qui facit, uir alioqui rectus, integer, quietus, ac penè ultra modum, si quis tamen ultra modum uerecundus.

Hunc hominem appetentissimum tui, mihi crede, complectere, adprehende, imò et inuita, ac sic ama, tanquam gratiam referas. Neq; enim obligandus, sed remunerandus est in amoris officio, qui prior cœpit.

Commendatio mea.

Multis in illum beneficijs confrendis reddidisti te quodammodo obnoxium. Ita enim nunc moribus comparatum est, ut posteaquàm multa præstiteris, hoc tantum menūerint, quod negatum est.

Posteaquàm hominem cœpisti benefaciendo tuum facere, beneficia beneficijs cumulanda sunt.

Non decet stare semel incitatum liberalitatem, cuius pulchritudinem usus ipse commendat.

Cur hunc hominem tibi tanto studio commendandum putarim, mirari defines, ubi cum propius nosse cœperis.

in Huic persuasum est, et te apud principē, et me apud te plurimum ualere: et de te quidem haud fallitur, de me ne fallatur, non tam promeritus sum, quam cupio.

Pluribus hanc rem abs te contenderem, ni uererer, ne cui de tua humanitate uiderer diffidere.

Scio nō sine causā dictum Horatio: Quem cui cōmendes,

des, etiā atq; etiā aspice. Sed huius hominis integritas sic mihi multis argumentis est explorata, ut non dubitē illam tibi uel capitis mei periculo cōmendare. Quem si complecteris, gratias agam quōd mihi credideris. Sed tu mihi magis ages gratias, quōd tibi tradiderim hominem in manū, qui tibi fuerat etiā è longinquo arcessendus.

Respon. ad commendationem.

Numerium Numestium libenter accepi in amicitiam: Cicero ad Atticum. et hominem grauem et prudentem, et dignum tua commendatione cognoui.

Plinius lib. vj. epist. Commendas mihi. Rursum epist. Rogas ut agam.

Quid ego audio? uis tibi ignosci, quōd me tuis commendatitijs literis oneras. Imo sic interpretor, ingens beneficium abs te datum, quī tali uiro me conciliaris.

Quid possim, tu uideris. Quis sit exitus rei futurus, fortunæ in manu est. Illud efficiā, ut Antonius intelligat nostram amicitiam haudquaquam uulgarem esse.

Et tu diligenter commendas hominem, et ille mihi uisus est dignus, cui tantopere faueas. Sed temporum iniquitas in causa fuit, quō minus licuerit illi tantum præstare quantum uolebamus.

Demonitoria epistola.

Monitoriæ epistolæ duplex est officium. Et uitium, si quod mutari uolemus, doctē indicare: et quæ sint agenda, ea nescienti tanquam scienti ostendere. Et quoniam uix quisquā æquo animo sua discit uitia, ideo reprehensionis acerbitatē laude mitigabimus. Cum multa in eo sint egregia, negabimus passuros nos, ut tot uirtutes

unius

unius uitij nœuo obscurentur, neq; commissuros ut tantus amicus cum exceptione laudetur. Deinde ipsum uitium uel ab ætate, uel ab imprudentia extenuabimus, uel maximis quoque uiris idem fuisse ostendemus: aut certe ipsum quidē esse mutandū, sed tamē ab animi liberalitate, alia uē uirtute proficisci, haud magno negotio mutari posse. Nos hæc præcipuo in illum amore scribere dicemus, alijs non idem facturos. Orabimus ut pari libertate in nos utatur, nisi fortē minus amet. Id enim propriū amicitie munus, ut libera sit admonitio ac mutua, & similia, quæ ad hanc sententiā pertinebūt. Quod si tyrāno, regi, aut aliqui potenti scribimus, cuius aures nullā omnino sint reprehensionem admissuræ, eum falsò laudantes reprehēdemus. Quum enim multas in eo uirtutes prædicamus, à quibus est alienissimus: quū item in alijs quædā abomināda execramur uitia, à quibus illum immunē esse dicimus, tacite admonemus agnoscentem, quid mutare, quid sequi debeat. Hoc equidē consilio laudationes illas principū repectas fuisse auguror, ut sub laudis specie suorū uitiorum sine offēsa, sine pudore admonerentur. Alioqui quid ea affectatione fœdus? Vbi uerò sine reprehensione quid agendum sit, ostendemus, autoritatē quādam nobis cōstituamus oportet, sine eius, quem monemus, iniuria. Idq; uel ab ætate, qua illū longē præcedimus: uel à multarum rerū usu, qui in eo tantus per ætatem nondum esse potuit: uel à diuturno studio in quo nos simus plurimis annis uersati, illo nunc ingrediente, pollicebimur nos amantissime, simulq; fidelissime consulturos. Demum grauitate quadam sermonis, quid quomodo fieri conueniet, ostendemus.

Probatissi

Probatissimorū autorū dictis & exemplis crebris utemur, præsertim eorum quorum autoritas grauis est apud eum, quæ admonemus, & quid quenq; laudis, aut infamiae consequutum sit, ostendemus. Ad prius illud admonendi genus, quo amicū uel blandius uocamus ad meliora consilia, uel liberius obiurgamus, pro personarū aut rerū uarietate, multū cōducet liber Plutarchi, quæ scripsit de discernendo adulate ab amico. Ad posterius hoc quod tantum docet, non obiurgat, conferent epistolæ, imò libri omnes Senecæ, Cypriani, Hieronymi & aliorū qui uiuēdi formā diuersis præscripserunt. Sed præcipue Plutarchi libelli, qui morales appellantur. In priore reperientur huiusmodi fermè themata. Admonendus amicus submorsus, ut magis sese accōmodet ad mores omnium. Sit magis comis in uxorem, mitior in liberos, clementior erga famulos, obsequētior erga amicos. Item qui linguae sit liberioris, admonēdus, ut circumspectius loquatur, quod non eodem candore ab omnibus excipiatur, quæ dicuntur. Item amicus plus satis addictus studijs admonebitur, ut parcat ualeitudini, ut se partiat studijs ac necessarijs negotijs, ut se magis accommodet ad sensum cōmunem. Ita qui simplicioris crit ingenij, admonebitur, ne quid fidat fictis amicis. Qui deditus erit aleæ, reuocabitur ad alios lusus. Qui profusior, ad frugalitatē: qui fērocior, ad modestiā: qui incogitantior, ad uigilantiam. Atque item de cæteris, nam sunt innumera. Hoc genus minimum differt à suasorio. In posteriore licet huiusmodi themata fingere. In studio literarum quomodo uersandum. Stylus quibus modis potissimum parandus. Quibus rebus concilianda fama.

Quibus

Quibus artibus uitari possit inuidia. Quo pacto colenda amicitia. Quid uitandum aut sequendum in matrimonio: qua de re scripsit Plutarchus. Quibus modis instituendi liberi. Quid faciendum ludimagistro. Quid ei, qui decreuerit in aula principum uiuere. Quod officium boni medici, principis, aut episcopi, ducis, aut militis, boni concionatoris. Ex his similia licebit similesq; materias comminisci. Sæpe miscetur utrunq; genus, cuius accuratissimum exemplum si quis querit, legat Ciceronis ad Qu. fratrem epistolam, cuius initium: Etsi non dubitabam quin hanc epistolam. Præstabit in huiusmodi thematibus exerceri, unde præter phrasim paratur & prudentia potius, quam in friuolis, & anilibus materiis. In re tam uaria, non magis referebat exemplum subijcere, sed tamen hoc faciemus, ne prorsus exemplo careat præceptio.

Exemplum epistolæ monitoriæ.

Quoniam ex Italia reuersus, inter tuos uiuere decreuisti, critq; tibi & pro tua eruditione, & natalium splendore, & uitæ dignitate in omnium oculis summa cum expectatione uiuendum, oras ut senex iuueni optimam quandam uiuendi formam commonstrem, quò possis & malcuolorum reprehensionem effugere, & optimi cuiusque iudicio probari, deniq; & animi tranquillitati & corporis ualitudini consulere. Incredibile dictu est, quantum iam nunc ista animi tui maturitate delecter, qui iuuenis adhuc, ea quæ senes plerique negligimus, mediteris. Optima, inquit Cicero, est uitæ eligenda ratio, quâ iucundam reddet consuetudo. Quare quâquã singularis tua & eruditio, et præmatura quædam animi magnitudo, moni-
tore

tore non egeat, tamē quantū etate, qua sola te uincimus: quantum longo rerum usu, qui prudentes efficere solet: quātum multorum annorum studio consequi potuimus, institutū quā optimum præscribemus. Quod & ueterum plerōq; tenuisse uideo, me quoq; quātum potui, sequutum esse gaudeo: ne te quidē sequutum fuisse poenitebit olim. Principio, quod semper fecisti, eum animū obtine, qui nihil acerbum, nihil durum existimet, quod sit honestum. Qui nullo uel metu deterritus, uel spe captus ab officio deflectatur. Quā optimos tibi adiungito. Malos ne laceſſito. Tua ne iactes: aliena ne carpas. Fac quum omnibus sis antefrendus, ipse te præsferas nemini. Amicū ita ames, tanquam aliquando osurus: inimicum ita oderis, tanquam olim amaturus. Cum bonis officijs certa: nemini aduerseris: omnibus te affabile praebeas: domi hilaris, foris cōpositus. Nemini tua arcana cōmittas, memor quā fallax sit multorum amicitia. Beneficium confer libenter, inuitus accipe. Morositatē in primis fuge. Officiorū diutissime meminisse oportet, iniuriarū faciliē obliuisci. Gloriam si contemnes, ultro te sequetur: sin sequeris, fugiet sequentem. Ne capta laudari, sed fac laudanda. Cum prae potētibus, aut nulla sit cōsuetudo, aut comis. Nullus sumptus tibi sit preciosior tempore: diem in operas partire. Ieiunus stude, aut scribe: pransus, hilariora quaedam agito, cessa nunquā. His rationibus si diligenter uteris, & animi tranquillitati consules, & charus quā plurimis, nemini odiosus esse poteris. Corpus uerō moderatis agitationibus exerce, ne ignauia torpescat, ne ue immodicis laboribus frangatur. Cibus sit temperatus, ac tempesti-

uus:

Docet agenda.

271

uus:prande liberalius:coena parcius:potus non quantum libidini,sed quantum naturæ satis est,sume. Vale.

Aliud exemplum.

CVM te incredibili quodam ardore literarū flagrare minime dubitarem, Christiane non uulgaris amice, hortatore. nihil opus esse putaui, sed eius quam ingressus esses, uitæ duce modò, ac tanquam indice. Id quod mei officij esse iudicaui, uidelicet ut tibi homini non modo multis modis copulatissimo, uerum etiam iucundissimo, uestigia, quibus ipse à puero essem ingressus, cōmonstrarem. Quæ si tu pari cura accipies, atq; ego dicturus sum, futurū cōfido, ut neque me monuisse, neque te paruissē pœnituerit. Prima igitur cura sit, ut præceptorem tibi deligas quam eruditissimū. Neq; enim fieri potest, ut is recte quenquam erudiat, qui sit ipse ineruditus. Quem simul atq; nactus eris, fac modis omnibus efficias, ut ille patris in te, tu filij uicissim in illum induas affectū. Ad quod quidem cum ipsa honesti ratio nos debet adhortari, quòd non minus debeamus ijs à quibus recte uiuēdi rationē, quàm à quibus uiuendi initia sumpsimus: tum mutua ista beneuolentia tantum ad discendum habet momēti, ut frustra sis literarum præceptorē habiturus, nisi habueris & amicum. Deinde ut te illi & attentum, & assiduū præbeas. Contentione enim immodica nonnunquam obruuntur ingenia discētiū. Assiduitas uerò & mediocritate sua perdurat, & quotidianis incrementis maiorem opinione accruum accumulat. Satiētia cum omnibus in rebus, tum in literis nihil perniciosius. Laxanda est igitur aliquoties illa literarum contentio: intermiscendi lusus, sed liberales, sed literis

teris digni, & ab his non nimis abhorrentes. Imò medijs
 ipsis studijs perpetua quædam uoluptas est intermiscenda,
 ut. ludum potius discendi, quàm laborem existimemus.
 Nihil enim perquàm diu fieri potest, quod non agentem
 aliqua uoluptate remoretur. Optima quæque statim, ac
 primum discere. Extremæ est dementiæ, discere dediscenda.
 Quod in curando stomacho solèt præcipere medici, idem
 tibi in ingenijs seruandum puta. Caue ne aut noxio, aut
 immodico cibo ingeniũ obruas: utroq; enim iuxta offenditur.
 Ebrardum, Catholicon, Brachylogũ, cæterosq; id
 genus, quos percensere neq; possum, neq; operæ precium
 est, ijs relinquito, quos barbaricæ immenso labore discere
 iuuat. In initio non quàm multa, sed quàm bona percipias,
 refert. Sed iam rationem accipe, qua possis non solum re-
 ctius, sed etiam facilius discere. Hoc enim in homine arti-
 fice præstare solet artis ratio, ut tantundè operis, quũ re-
 ctius, expeditiusq; tum leuius etiam efficiat. Diem tibi in
 operas partire, id quod & à Plinio Secũdo, & à Pio pon-
 tifice Max. uiris præstantissimis, factitatum legimus. Prin-
 cipio, quod caput est, præceptorem interpretantem, non
 attentus modò, sed & auidus auscultato. Non contentus
 impigre sequi differentem, aliquoties præuolare contem-
 de. Omnia illius dicta memoriæ, præcipua etiã literis man-
 dabis, fidelissimis uocũ custodibus. Quibus rursus ita con-
 fidas caue, ut diues ille ridiculus apud Senecã: qui sic ani-
 mum induxerat, ut se tenere crederet, quicquid seruorum
 quisquam meminisset. Noli committere, ut codices habeas
 eruditos, ipse ineruditus. Audita ne effluant, aut apud te,
 aut cum alijs retracta. Nec his contentus, aliquam tem-
 s poris

poris partem tacitæ cogitationi tribuere memento: quam unam D. Aurelius tum ingenio, tum memoriæ in primis conducere scripsit. Conflictatio quoq; & tanquam palæstra ingeniorū, neruos animi præcipue tum ostendit, tum excitat, tum adauget. Nec sciscitari, si quid dubitabis: nec castigari, si quid errabis, sit pudor. Nocturnas lucubrationes, atq; intempestiua studia fugito: nam & ingenium extinguunt, & ualitudinem uehementer offundunt. Aurora musis amica est, apta studijs. Pransus aut lude, aut deambula, aut hilarius confabulare. Quid quòd inter ista quoq; studijs locus esse potest? Cibi non quantum libidini, sed quantum ualitudini satis sit, sumito. Sub cœnā paulisper inambula: cœnatus, idem facito. Sub somnū exquisiti quippiā, ac dignū memoria legito. De eo cogitantē sompor opprimat: id expectectus, à te ipso reposcas. Plinianū illud semper animo insideat tuo: Omne perire tēpus, quod studio non impertias. Cogita, iuuenta nihil esse fugacius: quæ ubi auolarit semel, redit nunq̃. Sed iam hortator esse incipio, indicem pollicitus. Tu suauissime Christiane, hanc formam, aut si quā poteris meliorē, sequere, ac bene uale.

Quis sit modus repetendæ lectionis.

Quibusdam prima ac unica ferè cura est, statim ad uerbum ediscere: quod equidē non probo: est enim tum magni laboris, tum fructus propè nullius. Quorsum enim attinet, psittaci more, uerba non intellecta reddere? Commodiorē igitur uiam accipe, Lectionē quidem auditam continuo relegere: ita, ut uniuersam sententiā paulò altius animo infigas. Deinde à calce rursus ad caput redibis,

bis, & singula uerba excutere incipies : ea duntaxat in-
 quirens, quæ ad grammaticâ curam attinent. Videlicet, si
 quod uerbum obscurum, aut ancipitis deriuationis, si
 heteroclitæ coniugationis : quod supinum, quod præteri-
 tum faciat : quos habeat maiores, quos nepotes, quâ con-
 structionem, quid significet, & huiusmodi nonnulla. Hoc
 ubi egeris, rursus de integro percurrito : ea iam potissi-
 mum inquirens quæ ad artificium rhetoricum spectant.
 Si quid uenustius, si quid elegantius, si quid concinnius
 dictum uidebitur, annotabis indice, aut asterisco apposi-
 to. Verborum compositionem inspicies, orationis decora
 scrutabere. Autoris cōsiliū indagabis, quæ quicquæ ratio-
 ne dixerit. Vbi quid te delectauerit uehementius, caue
 præter casam, quod aut, fugias. Fige pedē, ac abs te ipso
 rationem exige, quare tantopere sis ea ratione delecta-
 tus : cur non ex cæteris quoq; parem ceperis uoluptatem.
 Inuenies te acumine, aut exornatione aliqua oratoria;
 aut cōpositionis harmonia: aut, ne omnia persequar, simi-
 li quapiam causa commotum fuisse. Quod si aliquod ada-
 gium, si quæ sententia, si quod prouerbium uetus, si quæ his-
 toria, si quæ fabula, si quæ similitudo non inepta, si quid
 breuiter, acutè, aut alioqui ingeniose dictū esse uidebitur,
 id tanquā thesaurum quendam animo diligenter reponen-
 dum ducito ad usum, et ad imitationem. His diligenter cu-
 ratis, ne pigeat quarto iterare. Nam hoc habent crudito-
 rum uirorum, summo ingenio, summis uigilijs elucubrata
 scripta, ut millies relecta, magis, magisque placeant, semperq;
 admiratori suo nouū miraculū ostendant. Id quod tibi in
 tabula tua sæpenumero, nec sine causa laudata, euenire

solet, quod antea non animaduertisses. Idem tibi multo amplius in bonis autoribus eueniet. Releges igitur quanto, ac quæ ad philosophiam, maxime uerò ethicen referri posse uideantur, circûspicies, si quod exēplū, quod moribus accommodari possit. Quid autem est, ex quo non uel exemplum uiuendi, uel imago quædam, uel occasio sumi queat? Nam in aliorum pulchrè ac turpiter factis, quid deceat, quid non, iuxtà uidemus. Hæc si facies, iam uel edidiceris, quanquam aliud egisti. Tum demum, si libet, ad ediscendi laborem accedito: qui tum aut nullus erit, aut certe perquàm exiguus. Quid deinde? Restat, ut cum studiosis congregiaris, tuas annotationes in mediū proferas, uicissimq; illorum audias, alia laudabis, alia reprehendes: tua partim defendes, partim castigari permittes. Postremo quod in alijs laudasti, tuis in scriptis imitari conaberis.

Secreta studia à doctis laudantur: at ita, ut postea è latebris in arenam prodeamus, uiriumq; nostrarum periculum faciamus. Id quod sapientissime à Socrate est dictum. Experiamur utrum partus ingeniorū uitales sint, nimirū obstetricum industriam imitati. Quare alternatim utrisq; utetur, qui non uulgariter uolet euadere doctus. Vale.

Aliud exemplum de uita aulica.

Scribis te nolentem ac reluctantem, uoluntate parentum rapi, protrudiq; in aulam principis. Quando igitur necessitas uinci non potest, superest ut commode utendo perficias, ut aliquando te isthinc explices quàm minimo malo. Nec enim omnibus infelicitè cessit, hanc adisse Laidem. Et ne tibi uidear non satis grauis admonitor, scito me ab ipsa pueritia ad annum usque quinquagesimū in

in aulis principum militasse. Primum illud tecum statuito, ne quid cui credas, quantumvis in speciem amico, quantumvis arridenti, complexanti, pollicenti, deicranti. Nec quenquam existimes tibi ex animo amicum, nec tu sis cuiquam amicus ex animo: tamē perinde quasi neminem non ames, ita blandus & comis esto singulis. Esto largissimus eorum officiorum, quæ tibi nihil adferunt impendij. Saluta blande, cōplectere, cede uiam, aperi caput, subinde repute honoris & charitatis titulos, lauda affatim, pollicere benigniter. Prius igitur domi uultum composito, ut is tibi paratus sit ad omnem fabulæ partem, ne quid ueri affectus in facie subluceat. Meditāda domi est actio, ut oratio uultui, ut uultus, ac totius corporis gestus, orationi succutæ subseruiat. Hæc sunt aulicæ philosophiæ rudimenta: ad quæ nullus erit idoneus, nisi prius omnē pudorem abstulerit, ac uultu natiuo domi relicto, quasi personā sumpserit. Proximum erit, ut factiones totius aulæ subodororis, sed ita, ne cui te faciliē admisceas. Si quos, aut si quas uideris nihil non posse apud principem, uide ut te semper inflectas ad latus nauis felicius. Nec pudeat, aut pigeat ascentari morionibus etiā, quos animaduuerteris esse gratos Ioui. Sed hunc ipsum omnibus technis captabis. Quoties in illius conspectu consistes, arte præ te feres simplicem quandā alacritatem, quasi gaudio gestias, quoties illi datur adesse. Et postea quā cōperisti, quibus rebus offenda tur, quibus oblectetur, non multū erit negocij apud illum quamuis magnam inire gratiam. Commode subseruiēs, ad orationem arridebis: si loqui non dabitur, applaudes uelut admirabundus. Sed apud alios plenis, ut aiunt, tibijs

illius laudes decantabis . Aliqui certe perferent, si passim prædicaueris. Nunc hic, nunc ille tibi captandus erit munusculo, sed eleganti et apto magis, quam precioso, ne uidearis aureo piscari hamo . pretium addes oratione. Excusabis tenuitatem fortunæ. Vbi illa contigerit opulentior, polliceberis montes aureos. Si qua præda affulserit, caue quisquam Deorū aut hominū tibi tam charus sit, ut illi cedas. Semper tibi proximus esto. Quoties de re agitur, uel patri uerba danda sunt . Non semper in aula spirant uenti sequundi : ubi spirant, arripienda est occasio. Nullius iurisiurādi tam sancta sit tibi religio, ut huius gratia patiaris opimam prædā elabi de manibus. Si quibus principem senseris uehementer insensum, ac diuersam factionē gestire uictoria, semper accommoda te felicioribus, sed ita, ut alteram partē non lædas capitaliter, nisi id fiat tuo magno, certoq; bono. Solent enim principū fauores, uentorum in morem subinde reflare in diuersum. In summa, ubiq; uenare commodū tuum. Ne quē apertē lædas. Caue mensam habeas domi, ea res exhauriet te sumptibus. Longè præstat conuiuiam esse, quam conuiuatore. Noli supputare, quanti cōstet una cœna domi data, sed subducito rationē, ad quantam summam post annum ea res tibi sit reditura. Proceres aliquat cole. Horum mēsis te adiungito, sed ita, ne crebrius ad eundē. Hic comis et commodus esto conuiuiua, sic festiuus ac lepidus, ut ne quem offendas. Si quid in te dictum erit petulātius, in lulum, iocumq; uertito, etiam si seria res sit. Ab omnibus tanquā ab hostibus caueto. Ne cui concedas, unde te possit lædere. Si quos senseris tibi parum amicos, fac artificio summo dissimules, et communibus

nibus officijs hoc magis apud illos amicum agas. Lauda apud eos, quos suspicaris renūtiaturos. hac arte aut fient amici, aut mitius erunt inimici. Tantū caue, ne qua detur ansa ledendi. In cæteris nugis aulicorū esto lepidus congerro. Tantum ab alea temperato: siquidē ad hunc scopulum multi fecere naufragium, sic, ut uix licuerit enatare nudos. Da operam, ut quā minimum inquineris. Ad rem augendam & constabiliendam ubiq; uigila. Vbi satis pingueris, excogitanda ratio, ut, quod paucis contigit, feliciter ab aula te subducas, tibiq; uiuas. Neq; perpetuus adsis principi, neq; nimium diu absis: quorum alterum parit tedium, ac satietatem, alterum obliuionem. Vt autem etiam cōmodo tuo absis, ambi legationes, sed fauorabiles, minimiq; negocij, ita subinde redibis nouus ad principem tuū. Semper esto querulus ac petax, & quēadmodū callidæ meretrices, uarijs nominibus ac modis, semper aliquid auferunt ab amatoribus, ita tibi stulto sit, semper aliquid auferre à principe. Sed ea potissimū petēda, quæ ille sine suo sumptu largiri potest. Quod genus sunt sacerdotia, præposituræ, abbatia. Si quid erit tale, cuius tu capax nō sis, suborna qui petant suo nomine, sed tuo cōmodo. Hæc arbitror esse satis pro primis elementis: posthac ubi te profecisse uidero, abstrusiora quædam impartiam. Vale.

Exemplum epistolæ, quæ habet admixtam obiurgationem.

Contigit tibi genus cum primis honestum: contigit res satis ampla: contigit ingenium: contigit eruditio non uulgaris, nec deest iudicium. Quid multis? felix eras, nisi unam quiddam tibi decesset, ut hæc tua pace dixerim.

Nam hæc qui scribit, tibi ex animo bene uult, ut si quis alius. Quid isthuc? inquires, ut animo imperes tuo, mi Saxon. Quid confrunt literæ, si nescias uti? Non hercle plus, quàm cithara ei qui nesciat canere. Ad hoc discitur philosophia, ut ne quid agatur ex affectuum arbitrio, sed ex rationis iudicio. Et unum hoc quod deest ad felicitatem, ipse tibi præstare potes: præstiteris enim ilico, si magnopere uelis. Quid tibi cum istis litibus? Sit interim leuis momenti, quod & rem deteris, & temporis iacturam facis, animi tranquillitate cares, & minus iucundus es uxori, liberis, amicis, minus adeò tibi ipsi: uides toties periclitari ualitudinem tuam. Vt belli, sic litis incertus euentus. Sed finge certam uictoriam: quæso te, totum hoc quod euinces, tot incommodis emendum putas, etiam uitæ discrimine? Scio, non facis ista tuo te ingenio, quo nihil est ad pacem, & amicitiam propensius. Instigat te lippus ille uentilator, homo factus ad lites. Sed obsecro te per nostram amicitiam, quæ magis libet isti uni auscultare, quàm optimo parenti, quàm his amicis, qui tibi non minus bene uolunt, quàm sibi? Tu quidē pro tuo candore alios æstimas ē tuo ingenio: at uereor ne cōsultor iste sibi consulat, non tibi. Mihi uultus ipse hominis impostorem clamitat. Atque utinam hic mihi sit læua mens: sed uereor ne serò sapias, meque uatem uerum fuisse dicas. Reijce nebulonis uenentam blandiloquentiam. Patrem uirum & singulari prudentia præditum, & tui plus quàm paternè amantē: imò tuum ipsius ingenium, tuam eruditionem in consilium adhibe. Rem per arbitros cum affue transige, uel parum æquis conditionibus: fortasse capies aliquod rei dispendium.

dium. Crede mihi, si rerum omnium rationem subduxeris, istud dispendium summum erit compendium, etiam si in solidum pereat, quo de lis est. Vale.

Monitoriæ sylua.

NAm neq; pugnandū arbitrarer contra tantas opes, Cíc. epist. Fam. neque delendum, etiam si id fieri posset, summorum ciuium principatum, neq; permanendum in una sententia, conuersis rebus, ac bonorum uoluntatibus mutatis, sed temporibus assentiendum. Nunquā enim præstantibus in Repub. gubernanda uiris laudata est in una sententiā perpetua permansio, sed ut in nauigando tempestati obsequi artis est, etiam si portum tenere non queas: cum uerò id possis mutata uelificatione assequi, stultum est cum tenere cum periculo cursum, quē ceperis, potius, quā eo cōmutato, quò uelis tandem peruenire: Sic cum omnibus nobis in administranda Repu. propositum esse debeat id, quod à me sæpiissime dictum est, cum dignitate ocium: non idem semper dicere, sed idem semper spectare debemus.

Etsi eo te adhuc cōsilio usum intelligo, ut id reprehendere nō audeam, nō quin ab eo ipse dissentia, sed quòd ea te sapiētia esse iudicē, ut meū consiliū non anteponā tuo, tamē & amicitie nostræ uetustas, & tua summa erga me beneuolentia, quæ mihi iam à pueritia tua cognita est, me hortata est, ut ea scriberē ad te, quæ & saluti tuæ conducere arbitrarer, & non aliena esse ducerem à dignitate.

Sed quoniam quod mihi placeret ostendi, reliqua tu pro tua prudentia considerabis.

Scribam aperte, sicut & mea natura, & nostra amicitia postulabit.

Oro, obtestorq; te, pro nostra uetere coniunctione, ac necessitudine, proq; summa mea in te beneuolètia, & tua in me pariter, te ut nobis, parenti, coniugi, tuisq; omnibus, quibus es fuisseq; semper charissimus, saluum conserues: incolumitati tuæ, tuorumq;, qui ex te pendent, consulas. Quæ didicisti, quæq; ab adolescentia pulcherrime à sapientissimis uiris tradita memoria, & scientia comprehendisti, ijs hoc tempore utare: quos coniunctos summa beneuolètia, plurimisq; officijs amasti, eorum desiderium si non æquo animo, at forti feras.

Nunc tantum significandum putauì, ut potius amorè tibi ostenderem meum, quàm ostentarem prudentiam.

Adbuc enim patitur tua summa humanitas, & sapientia, me quod sentiam, liberè dicere.

Lib. x. epistola: Quæ locutus est Furnius noster.

Cic. ad Antic.

Vt enim gubernatori cursus secundus, medico salus, imperatori uictoria, sic huic moderatori Reip. beata ciuium uita proposita est, ut opibus firma, copijs locuples, gloria ampla, uirtute honesta sit. Huius enim operis maximi inter homines, atq; optimi illum esse effectorem uolo.

Vehementer à te Brute dissentio, neque clemètiæ tuæ concedo, sed salutaris seueritatis uincit inanem speciem clementiæ. Quòd si clementes esse uoluerimus, nunquàm decerunt bella ciuilia.

Hæc ex oraculo Apollinis Pythij edita tibi puta, nihil potest esse uerius.

Nunc Cicero, nunc agendum est, ne frustra oppressum esse Antonium gauisi simus, neu semper primi cuiusq; mali excidendi causa sit, ut aliud renascatur illo peius.

Etiā

Etiam illud te admoneo, ne quid ullis literis cōmittas, quod si prolatū sit, moleste freamus. Multa sunt, quæ ego nescire malo, quā cum aliquo periculo fieri certior.

Nec te tam longæ nauigationi & uiae per hyemē nisi Cic. epist. fam. bene firmum cōmittas, ne ue nauiges, nisi explore. Qui cupide profecti sunt, multi naufragia fecerunt. Solēt nauatæ festinare quæstus sui causa, cautus sis mi T yro.

Accepi tuam epistolam uacillantibus literulis, nec mirum tam graui morbo.

Audio te animo angi, & medicum dicere, ex eo te laborare. Si me diligis, excita ex somno tuas literas, humanitatemq; propter quam tu es mihi charissimus.

Nunc opus est te animo ualere, ut corpore possis. Id quum tua, tum mea causa facias, à te peto.

Mihi crede, tuis literis perlectis, exilui gaudio.

Quid est enim negotij, continere eos quibus præsīs, si te ipse contineas? Nam ut quisq; est uir optimus, ita difficilime esse alios improbos suspicatur.

Multis enim simulationū inuolucris tegitur, & quasi uelis quibusdam obducitur uniuscuiusque natura. Frons, oculi, uultus, persæpe mentiuntur, oratio uerò sæpissime.

Quid enim ei præcipiam, quem ego in hoc præsertim genere intelligam prudentia non esse inferiorem me, usu uerò etiam superiorem?

Quapropter incumbe toto animo, & studio omni in eam rationem qua adhuc usus es, ut eos, &c.

At ille quidem princeps ingenij & doctrinæ Plato, tū denique fore beatas Respublicas putat, si aut docti, ac sapientes eas regere cōpissent, aut qui regerent, omne studium

dium in doctrina ac sapientia collocassent.

Mitigatio mo-
nitionis.

At ea quidem quæ suprâ scripta sunt, nō ut te instituerem scripsi (neque enim prudentia tua cuiusquam præcepta desiderat) sed me in scribendo, commemoratio tuæ uirtutis delectauit : quanquàm in his literis longior fui, quàm aut uellem, aut me fore putauī.

Sed te illud admoneo, ut te antè compares, quotidieq; meditare resistendum esse iracundiæ: quæ ea maxime animum mouet, tum diligentissime linguā esse continendam: quæ quidem mihi uirtus, non interdum minor uidetur, quàm omnino non irasci.

Mitigatio mo-
nitionis.

Nihil enim nec temere dicere, nec astute reticere debeo. Apud Xenophontē est Cyri et Agesilai summo impetrio nullum unquam uerbum asperius auditum fuisse.

De sorore quod scribis, testis erit tibi ista, quantæ mihi curæ fuerit. Utinam fratris in eum animus esset is, qui esse deberet. Quem quum esse offensioem arbitraret, eas literas ad eum misit, quibus et placarem ut fratrem, et monebam ut minorem, et obiurgarem ut errantem.

Tu pro tua prudentia, quid optimū sit factu, uidebis. Nisi mihi fortuna proprium consilium extorsisset, &c.

At uide quanto diligentius homines metuant, quàm meminerint.

Pecunia omnium dignitatem exæquat.

Nunc te obiurgari patere.

Plinius.

Neque enim tantopere mihi considerandum est, quid uir optimus, in præsentia uelis, quàm quid semper sis probaturus.

Quò magis te, cui uacat, hortor, cum in urbem proxi-
me

me ueneris , uerias autem ob hoc maturius , illi te expo-
liendum limandumq; permittas. Neq; enim ego , ut multi ,
inuideo alijs bonum , quo ipse careo , sed contrā sensum
quendam uoluptatemq; percipio , si ea quæ mihi denegan-
tur , amicis uideo superesse.

Quod tibi scripsi , ut te sortitū prouinciam præmone-
rem , plurimum tibi credas , nec cuiquam satis fidas : deinde
scias , si quis fortē te , quod abominor , fallat , paratā ultio-
nem : qua tamen ne sit opus , etiam atq; etiā attende. Neq;
enim tam iucundum est uindicari , quam decipi miserum.

Possū ego , quod pluribus uerbis , pluribus etiam uo-
luminibus philosophi docere conantur , ipse breuiter tibi ,
mihiq; præcipere , ut tales esse sani perseueremus , quales
nos futuros profitemur infirmi.

Lib. j. Tota epistola , cuius initium : Cōsulis an existimem.

Quorsum hæc ? ne tibi optimæ indolis iuueni , quorū-
dam immensa luxuria , specie frugalitatis imponat. Conue-
nit autem amori in te meo , quoties tale aliquid inciderit ,
sub exemplo præmonere quid debeas fugere . Igitur me-
mento nihil magis esse uitandum , quā istam luxuriæ , et
sordium nouam societatem , quæ cum sint turpißima , di-
screta ac separata , turpius iunguntur.

Lib. iij. Tota : Cum patrem tuum.

Quomodo principes sub specie laudis excitandi sunt
ad honesta , docet Plinius lib. iij. epist. Officium cōsulatus.

Rursum lib. vij. epist. Terret me hæc tua.

Eodem lib. Quæris quemadmodum , de ratione studij.

Item eodem lib. Deliberas mecum.

Rursum epist. Gaudeo quidem. Rursum lib. vij. Amor

in

in te meus cogit, non ut præcipiam (neque enim præceptore eges) admoneam tamen, ut quæ scis teneas, & obserues, aut scias melius. Nam tota usq; ad finem, huius argumenti est, & elegans.

Monitio mea.

DE malo principe tacendum censeo, nã si male loquaris, ingens periculum est: si bene, graue flagitiũ est.

Non te cuiusquam autoritas abducatur à recto. Est quidem consultum inhære maiorum uestigijs, siquidem illi recto itinere præcesserunt. Alioqui quid interest, inter hunc imitatore, & gregem, ducem illum suum, quoquò se conferat, sequentem?

Hoc ipso mihi places, quòd ipse tibi displices. Nam uerissime dixit Plinius: Magis in studijs homines timor, quàm fiducia decet.

Mitigatio ad-
monitionis.

Ede tandem aliquod indolis tuæ speciminen. Ostende te aula, ostende Reipub. patere te assignari famæ. Scis illud, occultæ musices, &c.

Ostēde, qđ in te, hoc est, in opere pulcherrimo desiderē.

Quem si sine exceptione laudassē, & fide caruisset laudatio, quæ in nullum competit mortalem, & tibi nihil profuissē. Nunc omnes intelligunt, & intelligis ipse, mihi cetera uere placere, quum non dissimularim, quæ mihi displiceant.

Sciebam tibi nihil opus esse monitore, sed tamen libuit admonere, ut quod facis, faceres.

Quod transactum est, reuocari iam in integrum non potest: quid in postcrum oporteat fieri, consulendum est.

Nunc monere te, scrum est: obiurgare, inhumanum:
utinam

utinam aut ego possim te ex istis malis eximere, aut tu monitis meis obtemperans, in ista non incidisses.

Quid faciam? Obiurgabo te, qui toties admonitus, ut caueres, uelut obstinato deuotoq; animo temet in istas calamitates conieceris? Sed ærumnosum amicum obiurgare, crudele est. Admonebo? seruum est. utinam seruum non esset. Scio quàm tu frustra soleas admoneri. Complorabo tuam infelicitatem: quid aliud quàm plagam exacerbauero? Vnum illud superest, si quid tamē superest, ne doloris impatientia, malis per se grauissimis grauius aliquid adiungas, & omnes ingenij consilijq; tui neruos excites, ut temet istinc euoluas.

Etiam atque etiam cura ualetudinem tuam. Et quam quàm est hyems, tamen memento te Auenione uiuere.

Deliberationem tuam ad amicos retuli, quorum una omnium est sententia, ut relictis istis nugis oratorum ac poetarum, te totum ad ius pontificium conseras.

Cicero id epistolæ pròprium esse putauit, ut cui scribitur, de ijs quæ ignorat certior fiat. At ego ad te ea quæ melius meipso tenes.

Quare aut amoris meo cōcedas oportet, aut hanc epistolam esse neget.

Responsio ad monitionem.

Raras tuas quidem (fortasse enim non perferuntur) sed suaues accipio literas, uel quas proxime acceperam, quàm prudentes, quàm multi & officij, & consilij. Et si omnia sic constitueram mihi agenda, ut tu admonerbas, tamen cōfirmantur nostra cōsilia, cum sentimus prudentibus, feliciterq; suadentibus idem uideri.

De

De amatoria epistola.

A Matoria epistolæ non omnes eodem in genere uersantur. Aliæ enim petunt, aliæ exposcunt, aliæ queruntur, aliæ blandiuntur, aliæ purgant. Quare commodè de his arte præcipi non poterat. Huius generis duas species nonnullos fecisse uideo, honestam & turpem. Nos bonestam, conciliatoriã appellamus, alterã amatoriã. Conciliatoria est, qua nos in beneuolentiam antea ignoti insinuamus. Eam sic instituemus. Principio causas, quibus ad ambiendã illius amicitia sumus accensi, probabiliter exponemus: id quãquã uix citra assentationẽ fieri potest, tamen assentationis suspitionẽ accurate amouebimus. Deinde si quid in nobis erit, quod illi ad nos mutuò amandum prouocabit, id sine arrogancia significabimus, hoc modo.

Santeranus Fausto S. D.

Exemplum epistolæ conciliatoriæ.

T VA carmina quæ passim apud nos incredibili omnium admiratione leguntur, iam pridem me accenderunt, ut in amorum tuorum numerũ ascribi uehemẽter arderem. Neq; enim diuinã modò ingenij quandam uim, uerũ etiam probitatem modestiamq; præ se ferunt. Incitauit me currentẽ (ut aiunt) Antonius, qui persæpe mecum & amantissime, & facundissime de tuis moribus colloquutus, ultro etiam hortatus est, ut ad te scriberẽ, te cum esse, qui non solum oblatas amicitias diligenter coleres, uerum etiã sponte tua soleas alios prouocare. In te quidem quum omnia summa ac diuina suspiciam, de me nihil affirmare possum, nisi hoc unum, nempe traditurum me tibi hominem tui obseruantissimum, parum quidem eruditum, cruditorum tamen candidissimum admiratorem,

¶

et prædicatorem simplicem: simulandi ac dissimulandi iuxta ignarum, et pertinacissimum amicorum cultorem: re quidē parum beatum, sed animo beatissimum, liberū, apertum, facilem, deniq; tui cupidissimū. Hunc si tu uicissim amplecti potes, uel ob hoc ipsum, quod te tam perditē amat, fac eum in tuum gregem recipias. Quod si feceris, rem palmariā me hodie arbitror adsecutum. Tu porro ut cæteris rebus omnibus superes, non committam ut amoris magnitudine tibi concedam. Vale, ac nos ama.

Quod si puellæ animum ad mutuum amorem sollicitabimus, duobus potissimum arietibus utemur, laude, et misericordia. Laude enim cum omnes homines, tum puellæ in primis gaudēt: potissimū autē à forma, in qua summum bonum constituunt, tum ab ætate, moribus, genere, cultu, et rebus consimilibus. Deinde quod molli sit animo id genus, et facile ad misericordiā cōmouetur, quā maxime supplices uideri studebimus. Quæ illius sunt, uehemēter amplificabimus, nostra extenuabimus, aut certē summa cum modestia proferemus. Summum amorem, cum summa desperatione coniunctum ostendemus. Nunc lamentabimur, nunc blandiemur, nunc desperabimus: nunc rursum nos ipsos callide laudabimus, pollicebimur: exemplis utemur illustrū, et honestarum mulierum, quæ ingenio amanti indulserunt, et iuuenū ipsarū fortunis longē inferiorum. Amore nostrum, quā honestissimum conabimur ostendere. Deniq; quā poterimus uerecundissime orabimus, ut si amantem redamare neutiquam dignetur, saltem amari se citra incommodum, æquo animo ferat: quod nisi impetremus, decretū est apud nos quouis modo
t crudelēm

De amatoria
præceptio.

crudelem abrumpere uitā. Exemplū huius præceptionis, ab Ouidio cæterisq; poetis petent, quibus ea res curæ est. Quanquā est genus amatoriū epistolarū quod abest à nequitia, ueluti quū adolescēs probus probam, ac bene educatā puellā ambit uxorē ducere, quanquā hoc quoq; blanditias habet, habet lacrymas, querimonias, suspiria, somnia, cæteraq; non turpia quidem illa, sed ineptiora tamen, & ad aliquā nequitie speciem accedentia, quæ nescio an expediat adolescentibus proponere. In his crit plus difficultatis, & uberior exercendī ingenij materia, quoties paup diuitis, obscurus claro genere natæ, deformis formosæ nuptias ambit: deniq; quoties senex puellæ. Omnes hæ formæ, quāquā ad genus suasiuū pertinent, tamen multū admiscetur ex genere demonstratiuo, quòd amor laude potissimum concilietur. Hic ingenij fuerit excogitare rationes, quibus seipsum prædicet aliquis, citra speciem arrogantiæ, aut stoliditatis. Nisi personæ tales fingentur, ut hoc ipsum sit affectandum. Qualis est apud Vergiliū Corydon, apud Terentium Thraso.

Amatoriæ sylua.

Cicero.

A Vdi igitur me hoc ἀποτέτυος dicentem, Ne uiuam mi Attice, si mihi non modo Tusculanum, ubi certe sum libenter, sed μακάριον vñq; tanti sunt, ut sine te sim totos dies.

Nihil enim est (mihi crede) uirtute formosius, nihil pulchrius, nihil amabilius. Semper amaui, ut scis, M. Brutum propter eius summum ingenium, suauissimos mores, singularem probitatem atque constantiam: tamen Idibus Martij tantum accessit ad amorem, ut mirarer locū fuisse augendi

augendi in eo , quod mihi iam pridem cumulatam etiam uidebatur . Quis erat qui putaret ad eum amorem , quem erga te habebam , posse aliquid accedere ? Tantum accessit , ut mihi nunc deniq; amare uidear , antea dilexisse .

Lib. vi. epist. Nunquam sum magis , rursum : Scribis de Plinius .
absentia mea .

Angeli Politiani epi. lib. ix. Cum superioribus diebus .

**De demonstratiui generis
epistolis .**

GENUS demonstratiuum raro quidē per se adhibetur , frequenter autem in alijs generibus incidit . Exempli causa : si quem cōmendare nitimur , in personæ demonstrāda laude uersari necesse est , quod idem accidit in consolatione , petitione , exhortatione , admonitione . Præterea in criminatione , defensione , inuectiua , et consimilibus generibus . Quod si cui suademus , ut in aliam urbem aut uillam cōmigrēt , demonstratiue , eius loci faciem ante oculos ponimus . Quoties autem per se adhibetur , totum est ad delectationē accōmodatum . Quare ut in pictura , ita in demonstratione conueniet adhibere sermonis uarietate , uerborum apparatus , exornationum festiuitate , annominationes , membra , cōparia , contraria , uerba poetica . Si personā describimus , ut regis , reginæ , principis , alterius uel ei cui ea sit ignota , rhetorū super hac re notissimas præceptiones ignorare non oportebit . In epistola satis erit uultus , totiusq; corporis habitū , figurā , gestum , motumq; tanquam pictura exprimere : deinde ad animum , fortunæq; commoda uenimus . Quod satis luculenter à rhetoribus præceptum , neque cognitu difficile , prudens prætereo . Si

Descriptio personæ .

Loci descri-
ptio.

locum quempiam describimus, perinde ac si hominē manu in eum duceremus, primum tanquam procul intuenti uniuersam loci faciem cogitationi subiiciemus. Situm tanquā depingentes, describemus. Num in edito, an humili, an decliui: in plano, an monte: nemoroso, an secus. Quo flumine, mari, aut lacu alluatur, aut cingatur. Quantum passuum in longum, in latum, in ambitu contineat. Hic consideratis cœli plagis, quem prospectum, quas urbes, quos agros, quos montes, quæ nemora in unanquamque partem habeat. Quo sole illustretur, quibus uentis trudatur, cui cœli portioni subiaceat, cuiusmodi cœlū habeat, salubre, an pestilens, amœnum, an secus, exponemus.

Vrbis & ædifi-
cij descriptio.

Deinde tanquam propius accedentes, singula accuratius ostendemus: & ut quicq; adueniētibz sese cōsuevit offerre, ita primum exponemus. Si uillam aut amplum ædificiū demonstrabimus, à primo ingressu exordiemur, cuiusmodi atrium, quantū, qua figura, quo lapide, quot habeat cubicula, et in quam partē uergentia, quem in quāq; partem habeat prospectum. Deinde arē, uestibulum, penetralia, cōclauia, triclinia, breuiter totum ædificium lustrabimus,

Fluminis aut la-
cus descriptio.

situm cuiusq; rei sine confusione exprimētes, ut is qui legit, cum locum uidere se oculis putet. Si flumen aut lacus erit, quā amplū, quā rapidū, quo colore, unde nascatur, unde augeatur, quā præterfluat, quò influat, diligēter exponemus: quos sinus faciat, quas insulas, quos agros, quæ nemora irriget, quod piscium genus, quæ piscandi, ac nauigiorū forma. Si ager erit, quid ferat, quantum, quo ritu colatur, cuiusmodi cultores, quod arborū genus, cuiusmodi uinū proferat. Si mons, à radicibus usq; ad ca-

Agro-
rum de-
scriptio.
Montis de-
scriptio.

cumen

cumen omnia diligēter perlustrabimus: & si quid habeat nouum, prodigiosum, aut alioqui memorabile: qualis est apud Pomponiū Melam descriptio montis Atlantis, apud Pliniū Aetnae. Ad hoc pertinet amphitheatrorū, animantium, pomparū, tabularumq; descriptio. Vocabulorū idoneorum uim, ex eorū libris qui de situ orbis Latine scripserunt, quiq; de architectura, facile cōparabimus. Et incidit hoc genus persæpe, quum peregrinantes ex itinere de nouis rebus trāscribimus. Si quē locum insignem, principem nobile, si quod animal inusitatū uidimus, id his rationibus, summa cum legentis uoluptate describemus. Loci describēdi exēplum erit, Tusculorum, ac Laurentis apud Plinium: & regiae Psyche apud Apuleium, & aliās descriptiones crebrae apud poētas & historicos: ueluti domus Somni & Famae apud Ouidium, Cleopatrae Cydno aduecta apud Plutarchū, picturarū apud Philostratum. Si genus hominū describimus, à corporū descriptione exordiemur, deinde ad uestiū genus, ad animorū habitus uenimus. Postremò uiuendi ritum omnē ante oculos ponemus. In hoc demum genere, siue laudemus, siue uituperemus, hypotyposim, effigiem, imaginē et exornationem, quam notationē appellat Cicero, & si quod aliud schema, quod ad energiam facit, scitē exhibebimus. Itaq; de hoc genere hæc præcepisse sat erit. Nā exēplis singula demonstrare, perlongū sit, & undecūq; magna uis exēplorū suppetit.

De ludicialis generis epistolis, &
primum de Criminatoria.

Si quem accusare uolumus, & causæ statum, & confirmationes, confutationesq; argumentandi rationes, &

quibus rem uerisimilem, aut dissimilem faciamus, quibus exaggeremus, quibus extenuemus, ea omnia è rhetorum præceptis præcepta habere conuenit. Neq; enim alio artificio scribitur epistola, quàm oratio. Tamen quoniam in epistola breuitas esse debet, & singulos locos persequi non licet, ea quæ potissimū ad rem spectant, excerpemus, multa in suspitione relinquemus. In criminatoria igitur epistola nonnunquā ab abrupto principio conueniet exordiri, quo statim et nostrum dolorem, & rei atrocitatem indicemus. Id erit, si uel à conuestione, aut dubitatione, uel ab exclamatione, aut alioqui figurata oratione initium capiemus. Quanquā idem apud Iudices fieri uetant rhetores. Deinde rem uerissimiliter narrabimus, argumentationes, & amplificationes eidem breuitatis causa admissascentes. Mox probabilibus argumentis rem docebimus. Postremò epilogū, aut aliquid epilogi loco subiiciemus.

Exemplum.

Pudet me, ita me Deus amet, præfeste iustissime, de mei hospitis, tui ciuis insigni contumelia queri. Quid autem dixi contumeliā? Non occurrit uocabulū, quo rem atrocissimā satis dignè explicem: neq; ulla tragœdia nephario scelere par inueniri poterit. Quod ubi acceperis, quæ tua est æquitas, innocentiaq; & meæ cōditionis misereſcet, & ciuis tui uehemēter pudebit: si tamen eiusmodi nebulones

Narratio. pro ciuibus tuis sint habēdi. E' tēpeſtate illa, omnium quās uel uidimus, uel audiuiſimus, ſæuiſſima, quæ pridie Idus Octob. ſexaginta onerarias naues, omni mercium genere refertiſſimas, in mari Adriatico oppreſſit, Varus Saxonius inter multa hominum milia, quæ naufragio periire, ſolus

lus, aut certe cū per paucis, emerſit, homo omnium quos ter-
 ra ſuſtinet impiſſimus. Credo uel in meā perniciē à Ne-
 ptuno mihi irato ſeruatum: uel certe quòd maris elemen-
 tum, peſtem talem ſub Tartara potius præcipitandam ex-
 horruerit. Excepi hominē nudum, egentē, ſquallidū, con-
 ſectum, ſeminecem. Cur, inquires, tale portētum in domum
 tuam uocabas? Irato genio, dijs iratis, mente leua, fateor;
 neq; enim poſtulo ut hanc appelles humanitatem & mi-
 ſericordiam, attamen ut hominem excepi: mouebat me ho-
 minis miſerāda conditio, & eò magis, quòd ipſe eiſmo-
 di calamitatis rudis non eſſem. Perpulit multorū cōmen-
 datio: hortabatur patria, quam tamen ſi mea non eſt, tamen
 nō ſecus ac meam ſemper ſum amplexus. Vincēbar ſuca-
 tiſſimi nebulonis, mira quadam, ſed falſiſſima ſpecie pro-
 bitatis, oratione, lacrymis, ipſa denique canicie. Hæc uel
 quemuis aſtutum hominem fallere poterant. Nunc quid
 ego commemorem, quæ mea fuerit in illum comitas, libe-
 ralitas, hoſpitalitas? In intimam familiaritatem admiſi de-
 mens. Omnes fortunas communes ſeci: familiam, & rem
 domeſticam eiſ manibus concedidi. Ita duos ferme men-
 ſes apud me eſt humaniſſime habitus. Hic ego dictum illud
 nimium uerum eſſe ſum expertus. Non minus eſſe pericu-
 lum malis benefacere, quàm bonis male. Nam ille bonus
 uir, repente ex hoſpite prædo, ex ſene factus eſt ſupra-
 tor. Cum ſamula domeſtica clām rem habuit, ac grauidam
 mihi reliquit. Indignum facinus clamabis, ſcio. Sed mane;
 nondū tragædiæ audiſti argumentum. Nam hætenus co-
 mœdia uideri poteſt. Quum iam ſœdiſſimā fugam conſti-
 tuiſſet, ſacra tiſſima ea nocte, quæ Chriſto eſt natalis (ui-
 t 4 de, ut

Verſimile
 facit.

de, ut scite sceleris artifex tēpus delegerit) quū iam uxor cum reliqua familia, ecclesiasticis uigilijs operā daret, me præter morem, & illo insperante, domi relicto, eò quòd subito dolore correptus essem, iam intempesta nocte, in proximo filiae cubiculo strepitum audio, nescio quē, deinde stridorē, tanquā ferro effringētis. Miror quid sit, puerum excitum iubeo uisere: offendit hominē. Mentitur se ab uxore missum ut preculas, quas filia reliquerat, adferat. Paulò pōst clariori etiā strepitu exit. Pōst horam ferē uxor anghela domū accurrit. Percontor quid nouæ rei sit: ait filiam inter frequentē turbam è suo comitatu dilapsam nusquam apparere. Oboritur utriq; certa suspicio: mihi quidem è strepitu, uxori uerò multo amplius, quòd eum aliquoties antea furtim cum ea cōfabulantem cōperisset, tum ea nocte, nescio quid consufurationis animaduertērat. Mihi quoq; tot res coniecturam facere poterant, nisi culpa cæcior fuissē. Pallebat mihi canus amator, macies uultum obduxerat. At ego illum aqua maris, non igni senili pallere putabam. Cubiculum ingressi, scrinium effratum offendimus, arma relicta, sublatum & uestium, & pecunie, & anulorū, ut quicq; occurrerat furto fugæq; cōmodissimū. Quid facerē, & spoliatus hospes, & plusquam orbus pater? & nox & hyems, & solitudo urbis, denique & ipsa diei religio prædoni fauebat. Hic animi mei curas facilius fuerit tibi æstimare, quàm mihi narrare. Ciues aliquot ægrè contraho, exilio, percontor, uestigo, audio unā cum puella cōspectum, uia quam obliquam uulgò nomināt, suffarcinatū, & admodum properantem. Intelligo infelix. Itum est ad portum, quò ea ducit uia,

nihil

nihil inuenio præter scalnū ulteriori in ripa, in citeriori zonam, quæ tumultuāti filiæ exciderat. Scdeo exanimatus, orta luce, quæ mihi tristissima lōge omnūq; funestissima illuxit. Vbi res in uulgum emanauit, passim querelæ seruēt. Ab alijs mutuum acceperat, alijs imposuerat: alius ex illius conuictu aliquid desiderabat, nemini nō aliquid adfuerat mali. Sed quid me cōsoletur? cōmunis cū multis iniuria? Audio, sed heu serō audio, huiusmodi flagitia apud illū noua non esse. His artibus ita à puero fuisse exercitatum, his rudimētis cœpisse, ut seipsum ne senex quidē unquā uincere potuerit. Nulla unquā honesta Venere delectatū, ne à cognatis quidē solitū abstinere. Nihil unquam sacrum illi fuisse: hominē semper fuisse alieni appetentissimum, suorū profusorem: simulandi ac diſsimulandi mirum artificem. Quid enim ego hīc optime uir, uel meā Epiloga. calamitatē, uel illius scelus uerbis exaggerem? Rem uides, qua quid unquā auditū est atrocius? Hospitium polluit, fidem per fide uiolauit, pro summis beneficijs summū maleficiū reddidit, familiam perdidit, uernaculam per ne- phas illectam constuprauit: scrinia cōpilauit, filiam puellam & unicam rapuit, me nudum, orbem, senē reliquit, à quo fuerat nudus, egensq; receptus. Quid illi posthac sceleratū uideri poterit, quem neq; hospitij religio, neque tanta in ipsum mea benignitas, neq; legum metus, neq; numinis ullius reuerētia, neq; ætatis pudor, aut canities, neq; tam sacræ noctis pietas à tā nephario flagitio potuit dehorrari? Quod portentum si quando in manus tuas inciderit, non orandus es, ut meo nomine pœnas tua seueritas sumat, sed ut optimā patriā teterrima peste liberet, quam

funditus extingui, & decorum intersit, & hominū. Vale.

Quum hæc recognoscere, optime lector, manifestò deprehendi me, quū illa scribere, quò libro utcūq; absoluto, satisfacere amico parū amico, q̄cquid ueniebat in buccā, chartis illeuisse. Alioqui nihil erat negocij aliud argumētū excogitare, epistolis accommodatius. Dicit aliquis, quid epistole cum tribunalibus? Imò frequenter & hoc genus incidit, ueluti quum nostrā, aut amici famam purgamus, & tuemur aduersus obrectatorū calumnias, nonnunquā recriminantes eos, qui crimen impingūt. Non ne D. Hieronymus, quum à se depellit intentatam stupri cum Paula suspicionē, totus uersatur in coniecturalibus argumentis, & locum communem tractat, à questionibus? Sed quoniam de nullo genere diligentius præceptum est ab artis scriptoribus, & hoc non admodū accommodum est pueris exercēdis, quibus hoc quicquid est operis petissimū paratur, pergemus ad alia, quæ magis cōgruūt huic instituto.

De expostulatoria epistola.

Expōstulatio inter amicos persæpe fieri solet, quoties officium eorū requirimus. Ea ne quid amicitiam exasperet mitigāda est uel laude, uel ioco, uel dissimulatione, nisi talis erit cui scribimus, ut apud illū nihil, nō liceat. Ipsam quidem rem damnabimus, sed uoluntatē quantū licebit, excusabimus. Mirari nos dicemus, quid in causa fuerit, quiduis suspicari malle, quàm illum ab officio cessasse.

Exemplum.

Cētenas iam ad te literas dedi, tu ne unas quidē reddidisti. quid coniecērē? quid diuinem? uiuere te, an sepultum esse? Sed uiuere, atq; etiam ualere, nuper mihi gener tuus nuntiavit

nuntiavit. Quonā uetus ille tuus in me animus euauit?
Ita ne potuit ob diuturnā absentia Guilichno Lucius ex-
cidere? Potuit ne illa tam uehemens flamma languescere?
Potuit extingui tantū amoris incēdū? Et quō nostri tibi
cura recessit? Ego, mirū est dictū, quāto tui desiderio ma-
cerer: & tu fortassis nostri securus, nouis amoribus te oble-
ctas. Ne mihi ueteres illas excusationes protuleris: non
fuit ocium, nō erat tabellarij copia. Quenam ista tam im-
portuna negotia, ut nec senū horā amico operam dare nō
sinant? Atqui hoc saltē scribe, distineor occupatione, non
licet scribere. Vale. An me planē uacuum credis? Quot
noctes iucundis susurris cōsumpsimus, & nunc tantulum
somnia defraudare, dum unum aut alterū uersiculum ami-
co scribas, piget? An uerō tot iam mensibus nemo unquam
oblatus est, cui literas committeres, præsertim familiares?
Nemo cui aliquid mandares, per quē me saluere iuberet?
Omnes istuc abeūt, istinc nemo emergit? Sed audio te nu-
per noua dignitate auctum: fortassis superbior nobis es fa-
ctus, postquam esse cœpisti pecuniosior. Quod si cōmodo
tuo sit, modestius silentium feram tuum: sin uel obliuione
nostri, uel aliquo incommodo detentus taces, grauitē, ut
par est, patiar. At ego quiduis suspicari malo, quā te offi-
cio tuo functum non esse. Vt cunque tamen res est, fac me
hoc scrupulo quam primū leues. Nolim hac in re tē cau-
sam habere nimium bonam. Malo iure questus de te uide-
ri, quā tibi uoletudinē aduersam, silentij causam fuisse.

Aliud exemplum.

Hem isti mandes, si quid recte curatum uelis. Tē ne ita
dormitasse in rebus amici tam serijs? Sed ego tibi non suc-
cenasco

censeo, mihi succēseo, qui tibi mea curanda mandarim, nō ignarus, quā in tuis ipsius negotijs soleas esse indiligēs.

Aliud exemplum.

Librum relegens, quum tot mendas offenderem, easq; non contemnendas, mi Scriboni, non potui non desiderare in te fidem illam, & uetere nostra necessitudine, & tuis pollicitis, & mea de te fiducia dignam.

Magnifice receperas, et ego maius quiddā expectabā, quā tu pollicebaris. Vt id sperare, fecit ista tua modestia, tuiq; mores ab omni fūco, leuitateq; uisi semper alienissimi. Quur hic tui dissimilis fueris, magnopere demoror: nisi qđ res ipsa clamitat, nō uulgariter abs te cessatū esse. Neq; enim potes in aliū reijcere culpā, quum in hoc pręfectus sis edēdo operi, ne liceret alijs operis deprauare librū. At qui nulla in re magis erat pręstandū officiū amico. Si nullo salario, aut iniquo prouinciā suscepisses, tamē amici causa par erat aduigilare, cuius famę periculo eras cessaturus. Si parū apud te ponderis habebat amicitie nostra ratio, tamen hoc officij studiosis omnibus largiri cōueniebat, quorū utilitati parabatur opus. Nunc quū larga etiā mercede typographus pset operā tuam: quū scires hoc amici non uulgaris summopere referre: quum non ignorares esse boni uiri, uel gratis de bonis literis, atque harū cultoribus bene mereri, nō possum satis admirari, qđ in re tanta, tantopere sit dormitatū. Qui literas tractat, rem tractat non modō publicam, uerum etiā sacram. Non potest esse leue cōmissum, quo lēdūtur tam multi: & quod alijs in rebus incuriē nomine damnatur, hic impietas est. Iniquū est non eius satisfacere animo, à quo mercedē plus
quā

quā equā accipis. Inhumanū, negligere famā amici: infidum, nō pręstare quod promiseris: impiū, oscitāter agere in negotio musarū. Vide igitur mi Scriboni, quot modis abs te peccatū est. Sed hæc nobis scra est querela, tantū obtestor, per omnia quę tibi sancta sunt, ut quod hic admissum est incogitātia, in ceteris cura diligentiaq; pensetur.

Expostulatoriæ sylua.

E Pistola famil. lib. v. Si uales, bene est.

Cicero.

Lib. v. epist. Pręposteros habes tabellarios.

Ad Atticum.

Sed abs te ipso, qui me accusas, unas scito mihi literas redditas esse, cum & otij ad scribendum plus, & facultatem dandi maiorem habueris.

Tu uelim ad nos sæpe scribas. Si rem nullam habebis, quod in buccam uenerit scribito.

Tu mihi, etiam si nihil erit quod scribas (quod fore ita uideo) tamē idipsum scribas uelim, te nihil habuisse quod scriberes, dummodo ne his uerbis.

Verberaui te cogitationis tacito dūtaxat cōuitio. Quod fasciculus alter ad me iam sine tuis literis perlatus est, non potes effugere huius culpæ poenā te patrono. Marcus est adhibendus: isq; diu & multis lucubrationibus commentata oratione, uide ut probare possit, te non peccasse.

Non possum te negligentie non accusare, qui tanta de re, tam breuiter, tam indiligenter scripseris.

Aut desidiosus, aut uehementer distentus sis necesse est, qui in tam copioso argumento epistolę tuę breuis sis.

Brutianum Laconismum mihi tibi proposuisse uideris, qui epistolam uix tribus uersibus scripseris.

Vix adduci possum, quod mihi de te ab autoribus alioquin

quin minime uanis adfertur. Est enim & à mea de te existimatione, & à tuis moribus pristinis longè alienum.

Is ne ut nos tanta impensa derideat?

Pilulus. Lib. j. epist. Olim nullas mihi epistolas, tota.

Lib. ij. epist. Irascor. tota.

Politianus. Lib. j. Ex postulationis iocose exemplum. tota epistola, cuius initium: Heus tu promittis.

Lib. ij. epist. Ex literis, & sermone multorum.

Eodem lib. epistola: Dederam commodum.

Expostulatio mea.

Antonius tibi diem dicit, & sponsores appellat. Non enim præstas quod receperas, te frequenter ad se scripturum.

Ego uerò tibi uehementer etiam irascerer, qui toties tam accurate monitus à nobis, non auscultaris, nisi parum esset humanum, irasci calamitoso.

Arcanum quod nuper tibi cōmisi, utpote ei quem nihil unquam celare solebam, id audio iam prolatum in lucem quotidie ad plures serpere. Te rumoris huius autorē esse necesse est, quādo ipse mihi sum cōsciū, nemini illud præter te unum mortaliū cōmunicasse. Quod si falso est mihi obnunciatū, est quod uehementer gaudeā. Malim enim in illis uanitatē accusare, quā in te amici fidem desiderare: sin uere, haud te dignū fecisti. Quid enim tam perfidū, quā amicorū arcana prodere? Res est non tam expostulatione, quā acri reprehensione digna. Sed nondū de tua fide diffido. Tu fac hoc scrupulo me quā primum leues.

Charior mihi es, quā ut tibi possim irasci. Sed tamen uehemēter et miror, et doleo, quòd contēpto meo consilio
& fideli,

et fideli, et salutari, in tantam turbā te ipsum cōieceris.

Tantus in te meus amor, ut nulla exhauriri possit iniuria, sed tamen non commoueri non possum.

Absolui non potes, ne Cicerone quidē patrono, in culpa tam manifesta. Vbi nam sunt tui fasciculi literarum, ubi sarcine ingentes, quas tu mihi abeunti promiseras, homo hominū qui uiuūt uanissime? at nūc istinc adfertur nihil.

Hec ad te scripsi liberius, fretus consciētia officij mei, Mitigatio ex-
beneuolentiaq; quam à me certo iudicio susceptam, quo- postulationis.
ad tu uoles, conscruabo.

De purgatione.

Expostulationem purgatione diluimus, ita ut nos ea expostulatione non modo nihil offensos, uerum etiam uehementer delectatos ostendamus. Deinde suspicionem obiectam grauitur abominabimur. Postremò rationes quā maxime probabiles, quibus eam purgemus, proferendae sunt. Quanquam huic generi mire uario, uix ulla certa ratio praescribi potest. Ex re, ex tempore, ex personis consilium sumamus oportet.

Exemplum.

Non tam molestum fuit me abs te immerentē accusari, quā iucundum officium meū requiri. Est enim immodici amoris argumentu, temere de amico suspicari. Quāquā tu meum tam diuturnum silentium, non sine causa miraris. Hic enim mensis est propē decimus, ex quo nihil ad te literarum dedi. Sed dii prohibeant quae tu scribis, ut Lucius Gulielmi obliuisci unquā possit. Vnquam ne Gulielmi possit Lucius nō meminisse? Ego ne nouis me oblectat amoribus? Ego ne successibus rerum elatus, te mino-

ris fac

ris faciã? Quasi uerò ulla mihi fortuna sine te dulcis aut fuerit unquam, aut esse possit. Caue uerò credas ulla negotia tanti apud me esse, quæ non faciliè posthabeam, si quando ad te scribendum erit. Cur igitur, inquires, nihil adfertur scriptorum? Audies. Scripseram bis, primum per Stilbontem affinem tuum Idib. Maijs: deinde per socrum meum Petronium Calen. Iul. Priores quidem tibi non esse redditas scio. Ait enim reuersus Stilbon, sibi eas in itinere excidisse, ideoq; ueritum te conuenire. Socer quum istuc iter instituisset, cõsiliu in profectione mutauit. Post hos nemo mihi contigit, cui recte committerem. Ne tuas quidem omnes accepi. Caterum hoc tibi etiam atque etiam persuadeas uelim, neminẽ uiuere aut tui amantiorẽ, aut æquẽ memorem, siue scripsero, siue non scripsero. Vale.

Hoc in genere, quoniã frequẽter incidit inter amicos, uarijs thematis exerceri cõueniet. Expostulatur enim cum amicis, quòd in officio scribẽdi cessauerint, quòd mandata non peregerint, aut serius, secius uẽ peregerint, quàm oportuit. Quòd per incogitantiam aliquid effutiuerint, quod præstiterat tacuisse. Quòd parcius aut neglectius scripserint, aut acerbius: quòd in re seria non cõsuluerint amicũ, quem non oportebat quicquam ignorare. Quòd de animo amici parũ magnifice sensisse uisi sint, qui quum egerent ope, dissimularint. Hoc genus minimum abest à monitione, quæ obiurgationem habet. Huic finitimum est illud, quoties querimur apud alios de quopiam.

Purgatoriæ sylua.

Clc. epist. iam.

SI esset in his fides, in quibus esse debebat, non laboramus.

Lib.

Lib. iij. epist. *Et si quantum ex literis.*

Quod si rarius fiet, quàm tu expectabis, id erit causæ quòd non eius generis meæ literæ sunt, ut eas audeam temere committere. Quoties mihi certorum hominum postestas erit, quibus recte dem, non prætermittam.

Sed tamen significatur in tuis literis, suspicio quædam et dubitatio tua, de qua alienum tempus est mihi tecum expostulandi: purgandi autem mei necessarium.

Quererer tecum, atq; expostularẽ, nisi (ut suprà scripsi) purgare me tibi hoc tuo tempore, quàm accusari te mallem, idq; putarẽ esse rectius. Itaq; nihil de te, quod credideris de me, quamobrẽ nõ debueris credere, pauca dicam.

Non obliuione amicitie nostræ, neque intermissione consuetudinis meæ, superioribus temporibus ad te nullas literas misi, sed quòd priora tempora in ruinis Reip. nostrisq; iacuerunt: posteriora autem me à scribendo tuis iniustissimis, atq; acerbissimis incommodis retardarunt.

Peto à te ne me putes obliuione tui rarius ad te scribere, quàm solebam: sed aut grauitate ualetudinis, qua tamẽ iam paululum uideor leuari, aut quòd absim ab urbe.

Habes epistolã uerbosiores fortasse, quàm uelles: quòd tibi ita uideri putabo, nisi mihi longiorẽ remiseris. Ego, si quæ uolo expediero, breui tempore te, ut spero, uidebo.

Quapropter eo animo sumus inter nos, quo semper fuimus. Quod de te sperare, de me præstare possum.

Lib. ij. epist. *Quanquam me nomine.*

Lib. v. epist. *Si tu exercitusq; ualetis. Tota.*

Lib. xij. epist. *Ita ne præter litigatores.*

Lib. xij. epist. *Quam antea capiebam.*

Sed est quod abs te mihi ignosci peruelim.

Cicad Attic.

Abs te peto, ut mihi hoc ignoscas, & me existimes humanitate esse prohibitum, ne contra amici summam exi-
stimationem, miserrimo eius tempore uenirem: cum is omnia sua studia, & officia in me contulisset. Quod si uoles in me esse durior, ambitionem mihi putabis obsti-
tisse. Ego autem arbitror, etiam si id sit, mihi ignoscendum esse, εἴτε γὰρ ἀγαθὸν ἢ πικρὸν.

Non commutatam posthac, ut me accusare de epistolarum negligentia possis.

Tu modo uideto in tanto ocio, ut par in hoc mihi sis.

Nimium raro nobis abs te literæ afferuntur, cum & multo tu facilius reperias, qui Romā profisciscātur, quàm ego qui Athenas: & certius tibi sit me esse Romæ, quàm mihi te Athenis. Itaq; propter hanc dubitationem meam, breuior hæc ipsa epistola est.

Idco sum breuior, quod ut spero, coram breui consere, quæ uolumus, licebit.

Excusatio: rari-
oris ac bre-
uioris episto-
læ.

Si fortè rarius tibi à me, q̃ à ceteris literæ reddātur, pe-
to à te, ut id nō modo nō negligētiæ meæ, sed ne occupa-
tioni quidē tribuas. quæ etsi summa est, tamē nulla esse po-
test tanta, ut interrūpat iter amoris nostri, & officij mei.

Quare uoluntatis meæ me nunquā pœnitebit, consi-
lij pœnitet.

Ex lib. ad Brutum Tota: Clodius Trib. pleb.

Meæ obiurgationes fuerunt amoris plenissimæ, sed
uereor ne hoc quod infectum est, serpat longius.

Plinius.
Excusatio pli-
nii.

De literarum missione sine causa abs te accusor.

Longius me prouexit dulcedo quedam tecum loquene-
di,

di, sed iam finem faciam, ne modum, quem etiam orationi adhibendum puto, in epistola excedam.

Lib. ix. epist. Facis iucunde. Tota.

Habes epistolā, si modum epistolæ cogites, libris, quos legisti, non minorem. Sed imputabis tibi, qui contentus libris non fuisti.

Lib. j. epist. Quod ad te iam diu.

Lib. iij. epist. Salue Politiane mi.

Lib. iij. epist. Utinam quas circa medium.

Lib. iij. epist. Neque desidia mea.

Politianus,

Lib. v. epist. Quātō tu erga. Eodē, epist. Non tu noua.

Eodem, epist. Herculem me uocas.

Lib. viij. Non causam dico.

Lib. xj. epist. Grate mihi omnino.

Lib. xij. epist. Offendit ut uideo.

Purgatoriæ.

SCio te quæ facis optimo animo facere. Quid enim mihi exploratius esse potest, quàm animus tuus erga me? Sed tamē, ut ingenue dicam quod sentio, uideris mihi quædam facere, non ausim dicere inconsultius, uirorum prudentissimus, non dicam inimicē, uir syncerissimæ fidei, sed tamen parum circumspectē. Non dubito quin ista facias amico animo, sed tamen mihi gratulor, inimicis meis non esse tantum ingenij ad ledendum.

As te fecisse amico animo, sed mea quid refert, utrum me amice iugules, an inimice?

Libet ex uniuerso hominum contubernio in extremas fugere solitudines, quoties istorum linguacissimorum hominum mores in mētem ueniunt, qui ad hoc unum se natos arbitrantur, ut alienam innocentiam, sua putida men-

daciq; lingua contaminent. Quòd si toties sim tibi literis purgandus, quoties illi falsò insimulabunt, & ego scribendo, & tu legendo defatigaberis.

Quid ego istis maledicentissimis nebulonibus, qui nostræ beneuolentiæ inuident, ac semper aliqua comminiscuntur, quo eam uel extinguât, uel diminuant, imprecer, nisi ut penitus obmutescant?

Quòd mandata tua ita ut tu iusseras, & ego receperā, nondū peregi, facultas mihi hætenus defuit, non uolūtas.

Literis consequi nequeam, quā uehementer meis negocijs, uel potius sātis indignor, quorum culpa nondum neq; meo studio, neq; tuis uotis, licuit satisfacere.

Et ipse mallem, & tu promeritus es, ut officio potius, quā purgatione apud te uterer, nisi utriq; nostrum fortuna mea inuideret.

In hoc tibi Iouem lapidem iurare non dubitem, me insciente ista facta omnia.

Tibi quidem fama publica refragatur, uerum ego uel sacramento contendebam, abs te rem tam illepidam profectam non esse.

Sancte tibi deiero, uel iuranti crede.

Crudelitas enim error est magis, quā culpa, & quidem in optimi cuiusq; mentem facillime irrepit.

Ad purgationem responsio.

Politianus lib. ij. epist. Et si literarum tua.

Lib. xij. epist. Literas accepi tuas. Eodem, epistola: Tu uero.

Tantum mihi dolorem cruciatumq; attulerunt errata etatis meæ, ut non solum animus à factis, sed aures quoq; à com

à commemoratione abhorreant.

Et si iusta & idonea usus es excusatione intermissione literarum tuarum, tamen id ne sæpius facias rogo.

Quare quum in primis tuas desiderem literas, noli committere ut excusatione potius expleas officium scribendi, quàm assiduitate literarum.

Ad purgationem respon. mea.

ANtea tibi non nihil irascebar, nunc sum uehementer iratus, nec iniuria. Hæc tua tam diligens purgatio effecit, ut uidearis aut parum nosse meum ingenium, aut certe de amicitissimo homine, non amicissime sentire.

Offensum me suspicaris, quod de uocula nescio qua, in meis scriptis fueris cauillatus.

Ego ne tam ferox sim, ut id ab amico moleste feram, quod si faciat amulorum quispiam, non iniuria, sed officio me affectum putem?

Tu uerò uel omnia mea scripta, me amico reprehendas licebit.

Ceteri quos purgas, debent mihi probati esse, si tibi sunt.

Nihil est quod uerere: ego enim ne pilo quidem minus te amabo. Hac de re, ut soles, scribe fraternè.

Ad hoc genus pertinent omnes illæ mitigationes, quibus excludimus suspicionem uel arrogantiam, uel odij, uel scuitiæ, uel cuiuscunq; rei, quæ uidebatur offensura.

Quum præpostero ordine respondemus, cōueniet illud ὑστερον προτερον ἀμεινῶς, quo usus est Cic. ad Atticum.

Sed quid ago? penè oblitus eram me epistolā scribere.

Quò rapior? penè exciderat, cui uiro scriberem.

De exprobratione.

VT cum amicis expostulamus, ita inimicis, & ingratissimis exprobramus. Quare illam mitigari debere, docuimus, hanc exaggerandam monemus. Et quoniam omnis exprobratio, ab humanitate uidetur recedere, coactos nos id facere dicemus, uel ob nulli tollerandam illius ingratitude: uel ob insignem stoliditatem hominis: uel quod nos maledictis quotidianis ad id cōpulerit: uel quod cum impudentissimis hominibus impudentius sit agendū, & malo nodo, malus querendus cuneus, & id ab optimis uiris sepe factitatum admonebimus. Et reliqua quæ ad hanc sententiam faciūt, proferemus: aut certe per dissimulationem ad exprobrationem uenimus. Conscientiam ipsius subinde testabimur. Rem ipsam artificiosa narratione ante oculos ponemus: in qua perpetuo & nostram in illum beneficentiā, & illius in nos ingratitudinē amplificabimus.

Exemplum.

Non tandem pudebit te tui, senex omnium qui uiuunt, ingratissime? Cupiebam, ita me deus amet, & meorum in te meritorum obliuisci, & tuam ingratitudinem silentio dissimulare, si quoquo modo patreris. Sed uincit meam modestiam tua improbitas. Audes hominis monstrum, tantam meam in te beneficentiam expertus, ultro etiam te iactare impudens, tanquā aliquid de nobis sis promeritus? Audes me ultro ingratum uocare, quum tu pro summis officijs, quantum potuisti maleficiorum reposueris? Hic ego tuam ipsius conscientiam appello, tuam inquam illam conscientiam, quam tu tot sceleribus pollutam intra te gestare cogis, eandē ingratitudinis tuæ, & testem, & carnisficem.

nificem. Dic mihi scelestissime senex, nunquam ne tibi succurrit quàm supplex apud me ambieris, ut uel aliqua ex parte apud me hærerēs, ut aliquid tibi mearum literarum impartirem? Peream, ni me ipsum tui pudet, quoties oris tui speciem illam arte sceleratissima compositam, cogitationis oculis intueor. Te hominem canum, rugosum, tantum blanditiarum, lacrymas etiam effudisse? Me quidem referre pudet. At quorsum attinet narrare memori? Narra ret tibi cōscientia, quæ feceris, quæ dixeris, quæ promiseris, quæ iuraueris. Vltro benignus obtuli, qd' homo alioqui impudentissimus, ne petere quidem audebas. Scis post ipse quàm fraterno sum te animo complexus, quantū laborum, uigiliarūq; tua causa susceperim. Ego meis postea habitis rebus asinum ad lyram duxi. In eo docendo (si dijs placet) tantum mensium triui demens. Dic mihi omnium, quos sol uidet, ingratisime, quis istos mores, uel unum diem pati posset? quis istud os, uel quantauis mercede uidere sustinuisset? Iam nunc animo meo ingens oboritur nausea, & tibi oboriretur, si faciem istam monstruosissimam meis oculis uidere possēs. Sedebas puer pulchellus, bos ad palastram exercendus, & me præceptorem oculis illis refugis, ac ferinis, per hirta, canaq; supercilia intuebare, defluente interim in canescentem barbam saliuā. Adde intractabile, spinosumq; ingenium, caput plus quàm marmoreum, sensum stupidum. Ego ista, quæ ne ipse quidem interdum ferre poterās, scis quàm patienter tulerim, deuorari, decoxerim. Quid à me præteritū est, quo tarditatem tuam uincerem? Audes inficiari homo frontis perfricta? Testabuntur laborum meorum apud te

monumēta. Non rubore perfunderis, quoties librum à me multis sudoribus euigilatum intueris? Non exhorrescis, non te ipsum refugis, si quando ad te redis, id est, si quādo ab ista phrenesi paululum resipiscis? Tu hominem sic de te meritum non amare, nō uenerari potes? Tu putida ista lingua insectaris, cuius tu linguā tā officiosam es expertus? Quid ego hic te tibi ostendam? Scis quod uirus, quam foeditatem ex ista contaminatissimi pectoris tui cloaca euomueris. Quum omnis ingratitudo sit execrabilis, nulla tamen detestabilior, quā in praeceptorem. Qui si parum officiosus fuissē, tamen tuum erat, ut parentis, ita praeceptoris uitia uel tegere, uel cōmode interpretari. Nunc talē ipse fuisse fateris, ut nūquam sis parem habiturus, & pro officijs ea reponis ingratisime, quae hostis non faceret hosti. Philippus rex Macedonum, duci cuidam, qui possessionem eius, à quo naufragus fuerat humanissime exceptus, à rege flagitatam acceperat, frontem ferro candenti hoc elogio insignijt, Hospes ingratus. An non tu dignior es, cuius fronti cauterio titulus hic inuratur, Discipulus ingratus? Sanctius est praeceptoris nomen, quā hospitis. Et sceleratius incescere famā, quā eripere praediū. Promittis satisfactionem, si redeam: minitaris atrociora, si non redeam. Quid insanius? Nunc tibi praedico omnium eruditissimus, rursus eodem ore praedico omnium qui uiuunt indoctissimus. Quid delirius? haec an non palam arguunt insignem animi tui peruersitatē, qui sciens, dataq; opera pessime facias illi, qui tibi fecit optime? Et audes istis cum factis solem intueri? Audes in hominū uenire coetus? Audes in templis ad aras sacras istas manus, istos oculos

osten

ostendere? Audes ista uiperea lingua, quam in hominē beneficētissimum toties uibrasti, precari superos ingratus-
dinis ultores? Num tu superos, aut inferos ullos esse crea-
dis? Sed ego exprobrandi finem faciam, quum tu laceffen-
di finem facias nullum. Vale ut mereris.

Exprobratoriæ sylua.

Huius generis exemplum erit illa Ciceronis ad Octa-
uium, cuius initium est: Si per tuas legiones, &c. Et
illa Hieronymi ad Iulianum. Apud Ouidiū item Medæ
epistola ad Iasonem.

Epist. famul. lib. 7. Et si statueram.

Cicero.

Exprobratio mea.

Quando aliam pro meis in te officijs abs te gratiam
expectabam, indignor non tibi, qui es omnium in-
gratissimus, sed mihi ipsi, qui hominem ingratum, & im-
probum deuinxerim.

Ego ea quæ ne sperare quidem unquam es ausus, in te
contuli.

Ego te nihil promeritum officijs cumulaui, tu me sic
meritum contumelijs oneras.

Desperatis etiam Hippoc. uetat adhibere medicinam.

De epistola inuectiua.

Inuectiuarum scribendarum artificium, partim ex
demonstratiuo genere sumitur, partim è iudiciali.
Nam in hominis uituperio uersari necesse est, in quo no-
tationibus frequentibus utimur. Præterea & obiecta di-
luimus, & fortiter regerimus crimina: quod ad iudicia-
le genus pertinet. Ea à rhetoribus didicisse debemus.
Nos solum hic admonendum putauimus, ut in ipso statim

inuestiue exordio, nō tolerandā stoliditatem, superbiam, importunitatem, maledicentiā aduersarij demonstramus. Nos præter ingenium ac morem nostrum, coactos id facere dicemus. Nos illum non imitatu- ros, ut confectis criminibus agamus, sed a conuitijs temperantes obiecta tantum diluamus. Deinde ex hominis descriptione uerisimile efficiemus, cum uel odio, uel innata maledicendi libidine, ea commentum esse. Vnum ex obiectis, quod quā rectissime dilui possit, proponemus. Id ubi diligenter refellerimus, cum recriminatione dicemus, hominis impudentiam, uanitatem ex eo uno spectari oportere. Tum ea ipsa, quæ nobis conatus est ingerere, in ipsum retorquebimus, et aut eadem, aut grauiora admisisse ostēdemus. Multa in suspitione relinquemus: uel quòd tam sint obscœna, ut ab homine uerecundo, nec aduersario lacessenti debeant obijci: uel quòd ob multitudinem flagitiorum, è plurimis pauca duntaxat dicere uoluerimus: ex uno, aut duobus facinoribus reliquam eius uitam facile posse æstimari. Deinde ubi incanduerimus orationis progressu, scommatis, salibus, di- cterijs hominem eludemus. Et non odiosum modo, sed et ridiculum ostendimus: nec minus contemnendum ob insignem stultitiam, quā detestandum, ob inauditam improbitatem. Multam ironiā adhibebimus. In fine tanquā ipsi nosmet reprimamus, hortabimur, ut aliquando resipiscat, ne cogamur et nos aliquādo modestiam relinquere. Exemplum qui querit, legat mutuas illas inuestiuas Demosthenis, et Aeschinis: Ciceronis, et Sallustij: Hieronymi, et Ruffini: Pogij, et Vallæ: Politiani, et Scalæ. Nos quoniam hoc in genere minime sumus exercitati, ueremur

ne huius scripti artificio parum possimus satisfacere. Atque utinam liceat semper esse rudem. Neque uero nos hic artem maledicendi docere uolumus : tametsi nihil est uitij, telum habere paratum, quo te defendas, si quis improbe lacessiuerit: nec ad hanc rem admodum sit opus arte, quum nulli frere non sint ad maledicendum disertum.

Inuēctiuæ sylua.

Politianus lib. xij. epist. Herculem factitium.

Item epistola: Vtrum pugnantia.

Literas tuas legimus similimas edicti tui, contumeliosas, minaces, minime dignas, quæ à te nobis mitterentur. Cicero.

De deprecatoria epistola.

Nunc ad deprecationem transeamus. Deprecamur, quum culpam manifestam fateamur, et tamen ignosci uel nobis, uel alijs oramus. Hic supplices erimus, culpam ingenue fatebimur. Extenuabimus postea, uel ab imprudentia, uel ab ætate, uel hinc quòd nunc primum deliquit, uel ab ipso commissi genere, solitam culpæ partem in alios transferemus. Eum qui peccauit, sic affligi pudore, metu, poenitentiaque dicemus, ut dignus sit misericordia. Eius, quem placare conamur, clementiam laudabimus, et implorabimus. Spem melioris uitæ ostendemus. Eam ex illius indole per se proba, alijsque eius qui peccauit benefactis reddemus probabilem. Sic enim agit suorum nepotum causam apud Terentium Mitio. Interponemus auctoritatem, et pro reconciliando fideiubebimus.

Exemplum.

Lacrymas excussit mihi filius tuus, adolescens non tam desperandus, quam institendus. Venit ad me, macie

& squalore confectus. Rogo quid haberet. Statim lacrymæ abortæ, singultim uix narrat, perisse se, quod patrē optimum amiserit sua stultitia. Rogo quid flagitij: Fatetur se sortem, quam ad negotium acceperat, in amicum insumpsisse: te offensum, animum paternum abiēcisse. Aduolutus est genibus meis, fleuit, promisit omnia se digna. quid multa? fecit mihi pœnitentiæ fidem. Confido hoc malo edoctum, posthac diligentiorē futurum. Quare quādo ille ad se rediit, te quoq; in patrem redire cōuenit. Satis iam graues huius flagitij pœnas luit: ita grauius fert iram tuā, ut prorsus hanc lucem cupiat effugere, nisi in gratiam recipiatur. Ego illū obiurgauī acerrime. Quid multa? ipse si uidisses, nec iratus lacrymas tenere potuisses. Quod reliquum est, clemēter corrigi potest. immodica seueritate ne frangatur animus imbecillis, cauendum est. Ne commiseris, ut te grauius in posterum pœniteat tue seuitiæ, quā illū nunc pœnitet suæ incogitantiæ. Ignosce uel ætati. Puer est, rerum imperitus, ab improbis conuictoribus impulsus est: lapsus est: & quidem nunc primū: culpā fatetur, orat, pollicetur, noxæ dedit sese. Quid quæris amplius pater à filio? Cogita & illum puerum esse, & te fuisse: atq; ita quod pater es, utere: ut memineris te hominem esse, & hominis patrem. Nunquā ne tu ista ætate lapsus es? Nunquam commisisti, quam ob rem pater tibi iure debuerit irasci? Non dubito quin commiseris, & fortasse grauiora. Hoc meritò uulgò iacitur in nos, quòd obliuati quales ipsi fuerimus olim pueri, filios nostros uolumus ilico nasci senes. Hæc inter nos tutò, ac liberè loqui licet. Multis profuit etiā lapsos esse. erit posthac hoc malo doctus,

Etus,cautior.Habebis filium,si huius delicti gratiam feceris, additiorem.Et hunc puerilem errorem officijs abūde pensabit.Amat, ac ueretur unice patrem: indolis est proba,pudicum ingenium,animus minime stupidus. Multa in eo signa uideo, quæ mihi certam spem faciunt,illum posthac talē futurum,qualē utriq; uolumus. Adlescētem igitur tibi in manus restituo, totam causam ad me recipio, pro illo fideiussores me constituo.quod si noxam addiderit,utrunq; abdicēs licebit, & filium, & amicum.Vale.

Alterum exemplum ex Cicerone.

Si quid in te peccaui, ac potius quoniā peccaui, ignore. In me enim ipsum peccaui uehementius. Nunquā putauī fore, ut supplex ad te uenirem: sed mehercule facile patior datum tempus, in quo amorem experirer tuum. Amabo te, da mihi & hoc: obliuiscere mea causa illū aliquando suo familiari, aduersario tuo uoluisse consultum: hoc ignoscere est humanitatis tuæ.Volo te, quū fortissimussis uir cognitus, etiam clementissimum existimari. Magno crit tibi ornamento, nobilissimum adolescentem tuo beneficio esse saluum.

Aliud exemplum ex epist.Pliniij.

Castigabat quidā filium suū, quod paulō sumptuosius equos et canes emeret. Huic ego, iuuenē digresso, Heus tu, nunquā ne fecisti, quod à patre corripī posset? Fecisti dico, non interdū facis, quod filius tuus, si repente pater ille, tu filius, pari grauitate reprehēdat? Non omnes homines aliquo errore ducuntur? Non hic in illo sibi, in hoc alius indulget? Hæc tibi admonitus immodicæ seueritatis exemplo pro amore mutuo scripsi, ne quando tu quoq; filium
tuum

tuum acerbius, duriusq; tractares. Cogita & illum puerū esse, & te fuisse, atq; ita hoc, quod es pater, utere, ut mēmineris hominem te esse, & hominis patrem. Vale.

Deprecatoriæ sylua.

Cic. epist. fam.

TV tuas inimicitias, ut Reip. donares, te uicisti, alienas ut contra Remp. confirmes, adducēris?

Hæc sylua pertinet ad consolationem.

Quantum dolorem acceperim, & quanto fructu sim priuatus, & forensi, & domestico, Lucij fratris nostri morte, in primis pro nostra consuetudine, tu existimare potes. Nam mihi omnia quæ iucunda ex humanitate alterius, & moribus homini accidere possunt, ex illo accidebant. Quare non dubito, quin tibi id quoq; molestum sit, cum & meo dolore moueare, & ipse omni uirtute, officioq; ornatissimum, tuiq; & sua sponte, & meo sermone amantem, affinem, amicumq; miseris.

Nunquam putauī fore, ut supplex ad te uenirem, sed hercule facile patior datum tempus, in quo amorem experirer tuum. Atticum quanti faciam, scis. Amabō te, da mihi & hoc: obliuiscere mea causa, illum aliquando suo familiari, aduersario tuo uoluisse cōsultum, cum illius existimatio ageretur. Hoc primum ignoscere est humanitatis tuæ. Suos enim quisque debet tueri. Deinde si me amas, omitte Atticum Ciceroni tuo, quem quanti facias, præ te soles ferre. Totum hoc, ut, quod semper existimaui, nunc planè intelligam, me à te multum amari.

Ad reconciliationis argumentum faciet epistola Plinij lib. viij. cuius initium: Nosti'ne hos.

Lib. ix. epist. Libertus tuus: tota, elegans deprecationis exemplum.

Responsio

Responsio.

E Pistolarum fam. lib. v. epistola: Si uales bene est. Sed huiusmodi uos clientes, & c.

Orat, confitetur, purgat, pœnitet. Quid queris? quod Nostra factum est, infectum fieri non potest. Non tam tibi hoc factum displicet, quam ipsi qui fecit. De reliquo futurum illum emendatum ego in me recipio: meo periculo pro illo fideiubeo. Si rursum peccauerit, uel me ipsum ad supplicium deposcito. Vt iure peccanti succensebas, ita pœnitenti æquum est ignoscere, præsertim puero, & aliena malicia ad delictum impulsio. Non quid huius stultitia, sed quid tua clementia postulet, tibi cōsiderandum puto. Eia ne nimium durus sis pater. Nihil'ne tu peccas uel senex? & puero nihil uis condonare? Vn' tuos continuo senes nasci? Adeo'ne excidit, qualis in ista ætate fueris?

De extraordinarijs generibus epistolarum, & primum de
Nunciatiōe.

QUæ sub aliquo trium generum, suasio, demonstratio, iudiciali contineri uidebantur, hætenus ab soluimus. Nunc ad reliquas epistolarū species uenimus: quæ quanquàm rhetorici artificij non ita multum desiderant, tamen frequentius ferè incidunt, quam illæ superiores. Rescretur igitur in primis ea species, qua significamus amico, si quid nouæ rei gestum sit apud nos, quod illius referat scire, aut quod illi uoluptatem sit allaturum, siue priuatum sit illud, siue publicum. Priuatum, ut quum absentem certiores facimus, qua uoletudine simus, quid agamus in studijs, quid rure, quid in aula, quid in ædificijs,

cijs, quid in litibus successerit, aut si quid alioqui noue rei moliamur, usq; ad conuiuiorum, & colloquiorum nugas. Publicum, ut de pace, de bello, de regum gestis, aut fœderibus, de pestilentia, aut inundationibus, terræmotibus, tempestatibus, alijsq; similibus. Nec huius generis, quoniam uarium est, certa ratio præscribi potest. Tantum illud in genere dicam, quòd nunciatio simplex, & lucida esse debet, breuis præterea & distincta, interdum gratulationem, aut consolationem habet admixtam. Narratione constat, de qua paulò inferius præcipiemus.

Exemplum.

Quoniam iam annum fere à nobis abes, quicquid hic interim nouorū est ortum, puto & me tibi debere scribere, & te scire uehementer cupere. Audies igitur ex me noua quidē permulta, haud omnia læta tamen. Non ignoras rerum mortalium conditionē, nihil tam beatū in humanis negotijs, quod non aliqua incommoditate temperetur. Patruus tuus incredibile est, quantum te amet, quantum tua gloria delectetur. Vetus, inquires, est illud. Audi igitur, quod nouum dices. Antiquus ille compotor tuus, ille, inquā, quem nosti. Nebridus, tantus amator, tam elegans, tam nitidus homo, tam mulierosus: ille strenuus aleator, inuictus potor, ille gurgēs, ille belluo, ille undequaq; perditissimus. Quid fecit, inquires, an uxorem duxit? Imò repente mutatus, omnibus nugis uale dixit, funigerorum institutum professus est. Locari me dices, scio, sed ita rem esse cōperies. Quid hoc? an tibi uetus uidetur? Quis nunc nō exclamat illud ἄνω ποταμὸς? Quis neget ouē è lupo fieri posse? Accipe quod magis mirere. Varus ille tuus carni-

fex,

fex, Varus esse desijt. Iā te amat, quod nunquā antehac:
 te laudat, tuos colit, tuū aduentū exoptat. Bene dicere di
 scit, homo maledicētissimus. Verū dicere incipit, homo ua
 nissimus. Fidē seruat, nebulo perfidissimus. Eamus nūc, &
 poēticas trāsformationes rideamus, quū tantam rerū mu
 tationem breui factam uideamus. Auunculus tuus pontifi
 cium Idibus Ianuarijs euicit, non sine maxima quidē cō
 tentione. Nosti cōpetitoris & improbitatem, & factio
 nes: euicit tamē. Id te quā primum scire uolui, ut illi per
 literas diligenter gratuleris. Hereditas ea, quæ tibi ē ma
 nibus pene erat extorta, mea tibi est: opera restituta. Ne
 mihi pro hoc officio gratias egeris. Facio enim tuis in re
 bus, quod tu in meis solebas. Voluptatē tibi ingentē nun
 tiabo. Postridie Nō. Mar. soror tua peperit marito filiū,
 patri, tibiq; nepotulum. Iam quid muneris abs te serā, si
 rem tibi aperiā multo festiuorem? Dī te omnes diligunt.
 Absenti tibi, ne expectanti quidem sacerdotium accepsit,
 & amplum, & in primis honestū. Ad v. Idus Febr. Cor
 nelius uir integerrimus, ē uiuis migravit. Hic egrotans,
 quum competitorēs non placerent (olscit enim iam tum
 inhiare) te successorē nominauit. Mēsem superuixit. Hu
 iusmodi thynnos dormiēti tibi fortuna retibus tuis impli
 cat. Tuū erit curare, ne quod incidit, elabatur. Non enim
 desunt, qui prædæ inhiant. Habes de rebus priuatis: de pu
 blicis credo istuc rumorem nostras literas præuertisse. Ca
 lend. Iul. regis unctio incredibili cum apparatu celebrata
 est. Calēdis Augustis ipse urbem Parisiorum inuectus est.
 Ad quartum Nō. Septemb. nuptiæ regia pompa peractæ.
 Legati multorū regū nomīne auditi: nemo non magnifi

ce donatus discessit. Britanni nescio quid tumultus ostenderant: sed res æquis conditionibus composita est. Audisti de statu publico. Quod reliquum est, non indicarem, nisi te scire tua magnopere interesset. Pestis menses iam aliquot apud nos sæuit. Ea cū permultos ex amicis, tum socium tuā, fœminā, omnium quas in uita uiderim, optimam absumpsit. Frater eodem morbo correptus, recreatus est. Sic uisum est illi, qui res humanas è duobus illis dolijs, pro arbitrio suo temperat. Aequo animo feras oportet, quod mutari non potest. Quid hac in re te facere conueniat, tu tecū statues. Habes frè quæ te scire uolebam. Si quid interea noui emerferit, faciā te quā primū certiorum. Tu cura ne quid ignoremus rerū tuarum. Vale.

Nunciatorix sylua.

Cic. epist. fami.

Quæ gerantur, accipies ex Pollione, qui omnibus negocijs non interfuit solum, sed præfuit.

A nobis agentur omnia diligenter: ut neque, si quid obtineri poterit, non contendamus; nec, si quid non obtinuerimus, repulsi esse uideamur.

De omnibus rebus quæ ad te pertinent, quid actum, quid constitutū sit, quid Pompeius susceperit, optime ex Emplatorio cognosces: qui nō solum interfuit his rebus, sed etiam præfuit: neque ullum officium erga te hominis amantiſſimi, prudentiſſimi, diligentissimi prætermisit. Ex eodem de toto statu rerum communium cognosces, quæ quales sint, non facile est scribere.

Hic tui omnes ualent, summaq; pietate te desiderant, & diligunt, & colunt. Tu & cura ut ualeas, & te istinc ne temere commoueas.

Lib. iij.

Lib. iij. epist. Et si scio non iucundiss.

Lib. vij. Si te dolor aliquis.

Lib. viij. epist. Tanti non fuit ar.

Lib. ix. epist. Caninius noster me tuis.

Nos de Dolabella quotidie quæ uolumus audimus, sed adhuc sine capite, sine autore, rumore nuntio.

Narro tibi plana. Relegatus mihi uideor, postquam in Phormiano sum.

Isti puero, quem ad te iussi recurrere, da ponderosam aliquam epistolam, plenam omnium non modo actorum, sed etiam opinionum tuarum.

L. Iulio Cesare, C. Martio Figulo consulibus, filiolo Cic. ad Att.
me auctum scito, salua Terentia, &c. Quanquam huius operis omnes ferme sunt huius generis, ut illa, cuius initium: *Queris ex me.*

Hæc res quæadmodum ceciderit, & tota res quo loco sit, uelim ad me scribas, & ita, ut instituiisti. Nam ista ueritas, etiam si iucunda non est, mihi tamen grata est.

Hæc tibi scripsi, quia æquum erat, te pro amore meo Plinius.
tuo, non solum omnia mea facta, dictaq; uerum etiam consilia cognoscere.

Lib. j. epist. cuius initium: Ridebis, & licet rideas. tota. nuntiatoriæ iocosæ exemplum est.

Lib. iij. epist. Solet esse gaudio tibi. Et item proxima.

Lib. iij. epist. Rem atrocem. Rei atrocis.

Lib. iij. epist. Tusci grandine excussi. Rusticationis.

Lib. iij. epist. Causam per hos dies. Actionis. Ac mox epistola: Audisti ne Val.

Lib. v. epist. Et tu rogas. tota.

Habes acta mea tridui, quibus cognitis uolui tantum te uoluptatis absentem, & studiorum nomine, & meo capere, quantum præsens percipere potuisses.

Hæc tibi scripsi, quia de omnibus quæ me uel delectant, uel angunt, non aliter tecum, quàm mecum loqui soleo. Deinde quòd durum existimabam, te amantiſſimum mei fraudare uoluptate, quam ipse capiebam. Neq; enim sum tam sapiens, ut nihil mea intersit, an ijs, quæ honeste fecisse me credo, testificatio quædam, & quasi præmiũ accedat.

Lib. vj. epistola: Petis ut tibi. Rursum huic proxima. Mox epistola: Ais te adductum.

Lib. vij. epist. Et mihi discendi, & tibi do. De spectro.

Lib. vj. epist. Quàm multum interest.

Lib. viij. epist. Vidisti ne aliquando. Descriptio fontis.

Eodem libro, epistola: Num istic quoque. Descriptio inundationis.

Eodem libro, epistola: Ad quæ noscenda. Descriptio lacus prodigiosi.

Inuicem tu, si quid epistola dignum, ne grauari scribere. Nam cum aures hominum nouitate latantur, tum ad rationem uitæ exemplis erudimur.

Lib. ix. epi. Incidi in materiã. De Delphino pæderasta.

Eodem, epistola: Queris quemadmodum. Quid agat toto die ruri.

Politianus. Lib. iiij. epist. Vulgare est.

Lib. iiij. epist. Accepi epistolam tuam.

Nunciatoria mea.

Scriberem ad te pluribus de rebus, sed uereor ne uel mea diligentia tibi sit molesta, uel ueritas acerba.

Scribito

Scribito ad me, quē nōsti curiosum, non solum quid gestum sit, aut geratur istic, uerū etiam quid diuines futurū.

Ad hanc formā pertinet & percontatoria, quoties nihil aliud agimus in epistola, quā ut sciamus, quid rerū agat amicus. Huius exemplum illa Plinij lib. ij. Studes, an piscaris? Item lib. iij. Recte ne omnia?

Quum rē quampiam ridiculam nūtiaturi sumus absolutis aliquot narrationibus, conueniet illud ex Homero, *ἔπειτα μοι ῥηῖ μῦθος*. Excitatur enim huiusmodi transitium culis lector, & mire conueniunt familiaribus epistolis.

De mandatoria epistola.

Epistola mandatoria nihil habet artificij, præter sermonis elegantiam, & breuitatem. Exemplum.

N. liberto suo S. D. P.

Vt præsens multum diuq; te admonui, caue quicquam meo iniussu tentaueris. Si quid existet noui, me per literas consules. Agrum de quo scribis, emendi tibi ius permitto, modo ne pluris trecentis scutatis ueneat. Petronium impudentissimum debitorē, semel atq; iterū appellatum, in ius uocabis. Si inficiabitur, chirographū tibi mitto: dies iam pridem excessit. Ab Asinio creditā pecuniam meo nomine repetes, eamq; si reddet, recipies. De permutādo sacerdotio, fac Stilbontē, uirū, ut scis, & consultissimum, & nostri amantissimū, in consiliū adhibeas. Is quod censebit factū opus, id perinde ac si ego autor essem, exequitor. Antē quā domū ædificandā cæmentarijs locaueris, prius cum Phidia communicato, deinde eius hac de re sententiam ad me scribito. Hos libros unā cū epistolis, Trebatij mei manibus reddendos curabis & diligenter, et quā primū.

Strabonio uerbis meis gratias ages quàm maximas. Genero meo meis uerbis gratulaberis. Lucium contubernalem meum plurimum saluere iubebis. Sed heus tu, penè præterierā, quod minime præteritū oportuit. Nepotem meum fac ut quàm primum ab isto præceptore tam inepto abducas, ac eruditiori cōmittito. Caue te pecuniæ ratio offendant, si modo idoneū doctorem nancisci poteris. Si qua unquam in re sedulò tuo functus es officio, in lite Verulana fac omnem fidem, industriā, diligentia, ingenium expedias. De uilla instauranda quiesce, donec meā sententiam acciperis. Vestes meas omnes unā cū anulis ad x l. Cal. Iulij transmittito. Nō pluribus te monebo. Tu fac ut quemadmodum et soles, et æquum est, tuo officio fungare. Erit apud me diligentia tue præmium. Vale.

Mandatoriæ sylua.

Cicad Attic.

Epistola fam. lib. xvj. Sunt aliquot huius generis. Pætus, ut antea ad te scripsi, omnes libros quos frater suus reliquisset, mihi donauit. Hoc illius munus in tua diligentia positum est. Si me amas, cura ut conseruentur, et ad me perferantur. Hoc mihi nihil potest esse gratius. Et tum Græcos, tum uerò Latinos diligenter ut conserues uelim. Tuum esse hoc munusculum putabo.

Sed omnia ut uoles. Ego enim quicquid feceris, id tum Plinius, recte, tum etiam mea causa factum putabo.

Peto autē ut pictorem quàm diligentissimum assumas. Nam cum est arduum similitudinē effingere ex uero, tum longe difficilima est imitationis imitatio. A qua rogo ut artificē, quē elegeris, ne in melius quidem sinas aberrare.

Est apud Horatium in cpistolis exēplum mandatoriæ iocosa:

iocose: Vt proficiscentē monui te sepe, diuq̃. Hoc genus minimum abest à petitorio. Mādamus enim cum auctoritate. Petimus ab ijs, in quos nobis mandandi ius non est.

Mandatorix mea.

Filium quantus est, tuæ fidei trado. Totam meam solitudinem in te transfero. Tu pater esto, ego me sic geram, quasi patruus sim, non pater.

De epistola collaudatoria.

Collaudatio est, qua filium, filiam'ue, miliitē, seruū, libertum, famulum, uxorem, aut alios in quos nobis ius est, ut officio suo functos, laudamus. Exemplum.

Nihil ex omni rerum genere potuit mihi nuntiari iucūdius, quā te ijs moribus agere, qui & te ipso, & tuo genere sint digni. Nunc ego te filiū agnosco meū, quum te audio toto animo literis incumbere: fugitare consuetudinem cessatorum: parcere rei paternæ, si modo non id falsò est mihi nuntiātū. Tu perge in officio mi fili, hocq̃ persuasum habe, si te qualem uolo præstiteris filium, me benigniorem etiam quam uoles, habebis patrem. Vale.

Epistola collaudatoria patris ad filium.

Alterum exemplum. Facis ut meritò te & amem, & collaudem, qui nō ut uulgus seruorum solet, absentis domini negotia impedias, sed omni cura, uigilantia, opera coneris expedire. Eum ego demum frugi ministrum, & bene spectatum iudico, qui absente domino, quum impune cessare possit, in officio se continet. Audiui qua fide, qua industria mandata peregeris. Tu fac cætera eodem animo persequaris, ut qui nunc meritò te amo, perpetuò possim amare. Officio bene cæpto, strenuè perfungere. Domini negotia, tua ipsius, ut sunt, esse credito. Tu si

Epistola domini ad seruū,

x 4 frugi

frugi ministri officio functus eris, ego domini liberalis partes haud præteriero. Vale, ac uigila.

De gratiarum actione.

GRatias agimus ijs, in quos nobis nullum est mandan-
di ius. Hæc forma subijci poterat petitorie, aut con-
solatorie, aut monitorie. Hic beneficiū quod accepimus,
erit modis omnibus amplificandum. Nam sæpe gratiā re-
tulisse uidetur, qui bene gratus egit. Amplificatur autem
his ferme rationibus: si ultro collatum est: si incontanter:
si citò. Bis enim dat, qui citò dat. Si in tēpore: si uberius,
quàm alter ausus sit petere: si nihil pro merito: si ne ex-
pectanti quidē: si ab eo cui libèter debemus, hoc est, ab eo
quem amamus ex animo: aut si in eum collatum est, cui
magis ex animo uolumus, quàm nobis ipsis. A genere
quoq; beneficij sumemus amplificationem: ueluti si quis
fidei consilio iuuat, dicemus illi plus deberi, qui consilio
iuuat, quàm qui pecunia. Neque rarò maius beneficium
præstat, qui obiurgat, quàm qui donat. Contrà si quis pe-
cunia iuuat, dicemus uulgare officiū esse, uerbis opitula-
ri: qui pecuniam prompte impartit, non potest non cer-
tissimus amicus uideri. Sunt & aliæ circumstantiæ, quibus
exaggeramus beneficij magnitudinē: ueluti si nos simus
prælati ijs, quibus ille ob affinitatem erat obnoxius: si no-
stra causa contempsit etiam simultatem aliquorum po-
tentium. His commemorandis, declarabimus nos scire be-
nificij magnitudinem. Est autem bona gratitudinis pars,
& scire quantum debeas, & debere libenter. Ostende-
mus etiam, si poterimus, quàm multos eodem beneficio
deuinxerit: quodq; eius beneficij utilitas, non tantum ad
unum

unum hominem pertineat, sed ad Reipubl. commodum. Deinde pollicebimur citra iactantiā, nos aut parem, aut uberiorem etiam gratiam relatu-ros. Si nulla referendi facultas erit, certe animum memorem & gratum pollicebimur, precabimurq; ut superi cumulatè referant gratiam bene merito, quod nobis ob fortunarum tenuitatem non licet. Et huius generis erit tractatio duplex, recta, & obliqua. Nam aliquoties non agendo gratias, maxime gratias agimus, quum ostendimus aut beneficium esse maius, quàm ut uulgari more uerbis oporteat gratias agere: aut amicitiam nostram esse maiorem, quàm ut alterum alteri oporteat gratias agere. Quòd in negotio meo rogari te passus non es, sed ultro studium tuum, operam, diligentiam & obtulisti, & prestitisti, ueterem tuam in me, meosq; humanitatē libens agnosco. Et facis tu quidē non meis meritis, quæ hactenus in te nulla extiterunt, sed tua uirtute dignum, qui nullis à me prouocatus officijs, tam prompto in me sis animo, ut beneficiū accepisse uidearis, quum prestititeris. Quare quum tuo officio plurimum adiuncti meis rebus attulisti, tum isto animo ita delector, ut dictu sit incredibile. Verè negāt referre quātū beneficiū, sed quàm amico animo prestititeris. Ex eius modo potius, quàm rei, officium est metiendū. Meum erit, quod referre nequeo, perpetuò meminisse. Nam quid ego tibi multis uerbis gratias agam? an hoc passurus es, qui ne moneri quidem te passus es? Vtinam eam mihi facultatē aliquando concedant superi, ut possim hunc animum tui ardētissimum, re potius, quàm uerbis declarare. Interim si quid erit in quo mea uicissim opera utendum putabis, caue ro-

Exemplū gratiarū actionis.

gaueris, sed ut tuo m̄cipio præcipito: inuenies ad quid
 & promptum, & alacrem. Vale. Aliud exemplum.

Accepi munus tuū, re quidem magnificum, sed te auto-
 re longe mihi tum pretiosissimum, tum iucundissimum.
 Rectē enim à Nasone tuo scriptum est: Sic acceptissima
 semper Munera sunt, autor quæ preciosa facit. Quo qui-
 dem quid me tibi deuinctū esse fatear, quum sim iam olim
 deuinctissimus? Totus in ære tuo sum: ætioribus uincu-
 lis me tibi astringere nō potes? Quod reserā, uel isto mu-
 nere, uel potius tuo isto in me animo, qui mihi munere
 ipso longe est suauior, dignū, nihil habeo, nisi me ipsum:
 quem si alicuius esse precij putas, totum peculio tuo ad-
 scribito. Crede mihi, nihil habes in omni genere posses-
 sionum tuarum, quo tu tam proprie possis, & uti, & ab-
 uti, quā Nicolao tuo. Vale. Aliud exemplum.

Multa sunt tua erga me officia: at nullum omnium mihi
 fuit aut opportunius, aut uicinius, quā q̄ fratrem meū in
 causa difficilima tuo patrocinio iuueris. Qui ut est mihi
 propemodū me ipso charior, ita quicquid in illū cōtulisti,
 id mihi gratius etiam uideri debet, q̄ si in me ipsum esset
 collatum. Sed ne diligētius tibi gratias agā, nostra fami-
 liaritas flagitare uidetur. Neq; enim tu noui quicquā fe-
 cisti, & ego re, q̄ uerbis beneficiū repēdere malim. Vale.

Agendi gratias sylua.

Cic. epist. fami.

Multum enim interest, utrū laus minuatur, an salus
 deferatur: me meæ tamen ne nimis pœniteret, tua
 uirtute p̄fectū est. Curasti enim, ut plus additū ad memo-
 riā nominis nostri, quā adeptū de fortuna uideretur.

Amoris quidē tui quoquē me uerti, uestigia uel pro-
 xime

xime de Tigellio. Sensi enim ex literis tuis, ualde te laborasse. Amo igitur uoluntatē. Immortales ago tibi gratias, agamq; dum uiuam: nam relaturū me affirmare non possum. Tantis enim tuis officijs non uideor mihi respondere posse, nisi forte, ut tu grauissime, disertissimeq; scripsisti, ita cēsurus es, ut me referre gratiam putes, cum memoria tenebo. Facere nō possum, quin in singulas res, meritaq; tua tibi gratias agam. Sed mehercle facio cum pudore. Neq; enim tanta necessitudo, quantam tu mihi tecum esse uoluisti, desiderare uidetur gratiarum actionem. Neque ego lubenter pro maximis tuis beneficijs tam uili munere defungor orationis: et malo præsens obseruantia, indulgentia, assiduitate, memorem me tibi probare. Quòd si mihi uita cōtigerit, omnes gratas amicitias, atq; etiam pias propinquitates in tua obseruantia, indulgentia, assiduitate uincam. Tantum me tibi debere existimo, quantum persolvere difficile est.

Iam non ago tibi gratias. Cui enim re uix referre possum, huic uerbis non patitur res satisfieri.

Te tamē, mi Brute, sic amo, ut debeo, quòd istud, quicquid esset nugarum, me scire uoluisti. Signum enim magnum amoris dedisti.

Lib. xiiij. epistola: Et si libenter petere à te.

Cic. ad Att.

Gratæ mihi tuæ literæ sunt, quibus accuratè perscripsi omnia, quæ ad me pertinere arbitratus es.

Noli expectare, dum tibi gratias agam. Iampridem hoc ex nostra necessitudine, quæ ad summam beneuolentiam peruenit, sublatum esse debet.

Studium tuum, curaq; de salute mea, nulla me noua uoluptate

luptate affecit. Non solum enim usitatum, sed etiam quotidianum est, aliquid audire de te, quod pro nostra dignitate fideliter atque honorifice dixeris, aut feceris.

Neque enim mihi in omni uita res tam erit ulla propofita, quam ut quotidie uehementius te de me optime meritum esse leter.

Plinius. Certatim ergo tibi gratias agimus. Ego quod illam mihi, illa quod me sibi dederis, quasi inuicem elegeris.

Lib. v. epistola: Accepi pulcherrimos. tota.

Cum plurima officia tua mihi grata et iucunda sunt, tum uel maxime quod me celandum non putasti, fuisse apud te de uersiculus meis multum copiosumque sermonem, cumque diuersitate iudiciorum longius processisse.

Amaui curam et sollicitudinem tuam, quod cum audisses me astate Tuscos meos petiturum, ne facerem suasissti, dum putas insalubres.

Bene fecisti, quod libertum aliquando tibi charum reducentibus epistolis meis, in domum, et in animum recepisti. Iuuabit hoc te. Me certe iuuat: primum quod te talem uideo, ut in ira regi possis: deinde quod tantum mihi tribuis, ut uel auctoritati mee pareas, uel precibus indulgeas. Igitur et laudo, et gratias ago, simul in posterum moneo, ut te erroribus tuorum, etsi non fuerit, qui deprecetur, placabilem praestes.

Ad agendas gratias pro liberalitate, qua aliquis usus est in tenuem, et a quo non speretur nutua liberalitas, faciet epistola Plinij lib. ix. cuius initium: Laudas mihi.

Politianus. Lib. j. epistola: Tu uero Hermolaem.

Lib. xj. epist. Ain' uero. Eodem, epist. Ago tibi gratias.

Mca.

Mea.

Quid tibi, quid inquam pollicear? num me ipsum quantus sum dedam? At exiguum est ijs me dedere, qui nisi fuissent, ipse non essem.

Pergratum mihi est, quòd crebrò certior per te fio de rebus quæ istic geruntur, et tuam erga me beneuolentiam facile perspicio.

Ceteris omnibus uinci me patiar, certe beneuolentia mutua non cedam. Nam, ut recte dixit Plinius, Vinci in amore turpissimum est.

Quòd audio te istic pro mea dignitate fortiter digladiari, nihil quidem adfertur noui: sed tamen hoc audio libentius, quò sæpius.

Quòd referre gratiam, ita ut uolebam, non possum, fortunæ debes imputare.

Hoc quòd mihi reliquum est, te amabo, te colā, te uenerabor.

Mea enim mihi fortuna eripere potuit, me ipsum non potuit. Mea enim, non me ipsum mihi fortuna ademit.

Quid ego te hortor, ut tui similis esse pergas, quum in dies te ipsum ultro benignitate superes? quid tibi gratias agam, id quod neutiquam expectas?

Quod uon modo non negabo, sed etiam semper et munero, et prædicabo libenter.

Non est alius quisquam, cuius officijs me tam esse deuinctum, non solum fatear, uerum etiam gaudeam.

Ad gratiarum actionem respon.

Cic. epist. fam.

Quòd autem grata tibi mea erga te studia scribis esse, facis tu quidē abundantia quadam amoris, ut etiam grata sint ea, quæ prætermitti sine nefario scelere non

non possunt.

Officium meum erga Rhodonē, ceteraq; mea studia, quæ tibi ac tuis præstiti, tibi homini gratissimo, grata esse uehementer gaudeo: mihiq; scito in dies maiori curæ esse dignitatē tuam, quæ quidem à te ipso integritate, & clemētia tua sic amplificata est, ut nihil addi posse uideatur.

Quanquam gratiarum actionē à te non desiderabam, cum te re ipsa, atq; animo scirem esse gratissimum, tamen (fatendum est enim) fuit mihi periucunda. Sic enim uidi, quasi ea quæ oculis cernuntur, me à te amari. Dices, quid antea? Semper quidem, sed nunquam illustrius.

Ex Plinio.

Gratiarum actio pro libera admonitione.

Epistolarum, quas mihi, ut ais, aperto pectore scripsisti, obliuisci me iubes: at ego nullarum libentius meminī. Ex illis enim uel præcipue sentio, quanto pere me diligas, cum sic egeris mecum, ut solebas cum tuo filio. Nec dissimulo hoc mihi iucundiores eas fuisse, quod habebam bonā causam, quā summo studio curassem, quod tu curari uolebas. Proinde etiam atq; etiā te rogo, ut mihi semper eadem simplicitate, quoties cessare uideor, nunquam enim cessabo, conuitium facias. Quod & ego intelligā à summo amore proficisci, & tu non meruisse me gaudeas.

Lamentatoria epistola.

Exemplum lamentationis.

Inter commoditates, quas multas adfert amicitia, commemoratur & illud, quod si quid dolet, licet in amici sinum effundere: quæ res solet bonam ægritudinis partem adimere. Genus hoc affīne est consolatorio: sed in hoc nihil opus est arte, quum unumquemlibet dolor soleat redde-

dere disertum.

Non possum tibi, quales uterq; uolumus, epistolas mittere, quum mihi nihil rerum omnium ex sententia procedat. Sed quid ego, mi Laurēti, te meis querelis ex animo? nisi quod iuuat apud familiarissimum amiculum graues animi mei curas deponere. Credo omnes & superos, & inferos in meam perniciem coniurasse: ita ubi hoc malum uix effugi, succedit aliud multo acerbius. In morbum iam iterum atq; iterum incidi, decidi, recidi. Multo uix sumptu recreatus, en senex ille Sogdianus, pestis omnium quas unquam irati dii mortalibus immiscere, longe teterrima, se mihi erudiendum dedit. Quid ibi miseriarum non uidi? Quantum luctus, quantum lacrymarum summus meus laboribus mihi consciui? Id monstrum iam biennium me exercet. Fugio, quando uinci nō potest. Iam deorum aliquē mihi propitium factum arbitrabar, quod Antonium, hominem candidissimum essem nactus, cuius humanitas illius feritatem leniebat. Inuidit mihi rursus, nescio quod numen, iucundissimi sodalis conuictum: distrahitur inuitus ab inuito. Inde solus, & destitutus, dum omnia tento, nihil non experior. Deum immortalem, in quos fluctus, in quae monstra incidi? His tantis, tam perpetuis malis, uel Hercules ipse, aut si quid Hercule fortius, uinci poterat. Obdurui tamen, sic mecū cogitans, Aduersam fortunam, etsi infesta esset, aliquando malis meis satiatam, equiorem futuram. Nemini perpetuò acerbam aut fuisse unquam, aut esse posse. Et ecce de integro morbo capitali corripior miser: qui quod erat diuturnus, & corpus, & loculos penitus exhaustis. Nec erat cui meus doleret dolor: quos

quos iuuaret, permulti. Sogdianum autem illum, præter cæteros, delectabat malū meum, cui molestissimū ut esset, eram meritis. Ne tum quidē animū deieci, non quod sperare quicquā, sed ne teterimo illi seni uoluptatē augerē. Seruatus sum, sed superis, opinor, iratis, si miserijs frēdis seruatum esse uoluerunt. Quid enim postea uel maximis, uel minimis in rebus à me tentatum est? Quid tam dextro consilio institutum, quod nō infelicissime euenerit? O' me omnium qui sunt, quiq; fuerunt, infortunatissimū. Ego ne unus ex uniuerso hominum numero, præposterus ille Polycrates extiti, cui omnia aduersarentur, cui nihil unquā obtigerit optatum? Hic tu me, scio ueris, ut aiunt, bonis cōmemorandis, nimirū literis, & ingenio consolari incipies. Tolle mihi inanes istas cōsolationes, quæ ægritudinē meā exasperat etiā, tantū abest ut leniāt. Odi iam ego meū hoc ingenū: odi literas: quibus si carerē, minus miser essem, minus sentire, minus angerer. Sed querelarum plus satis. Tu cura ut recte ualeas, quando nos dii noluerunt.

Lamentatoriæ sylua.

Cic. epist. fami.

Libro v. epistola: Omnis amor tuus.
Si liber exisset, quādo nō tam interest, quo animo scribatur, q̄ quo accipiat, ne ea res inepte mihi noceret, cum præsertim adhuc styli poenas dem: quā qdē in re singulari sum fāto. Nam cū mēdū scripturæ litura tollatur, stultitia fama multetur: meus error exilio corrigitur, cuius summa criminis est, q̄ armatus aduersario male dixi.

Rempub. lugebā quæ non solum suis erga me, sed etiā meis erga se beneficijs erat mihi charior: & hoc tēpore, quanquā me non ratio solum cōsolatur, quæ plurimum debet

debet ualere: sed etiam dies, quæ stultis quoque mederi solet: tamen doleo ita communem rem esse dilapsam, ut ne spes, quidem melius aliquando fore relinquatur.

Lib. ix. epistola: Vel meo ipsius interitu.

Lib. xiii. Ad Terentian pleraque.

Quantum dolorē acceperim, et quāto fructu sim priua Cic. ad Attic.
tus et forensi, et domestico, Lucij fratris nostri morte, in primis pro nostra consuetudine tu existimare potes. Nam mihi omnia quæ iucunda ex humanitate alterius, et moribus, homini accidere possunt, ex illo accidebant. Quare non dubito, quin tibi quoque id molestum sit, cum et meo dolore moueare, et ipse omni uirtute, officioque ornatisimum, tuique et sua sponte, et meo sermone amantem affinē, amicūque amiseris. Quod me ad uitam uocas, unū efficis, ut à me manus abstineā. Alterū nō potes, ut me nō nostri consilij utique poeniteat. Quid enim est quod me retineat, praesertim si ea spes non est, quæ nos proficiscētes prosequatur? Premimur cum luctu, tum desiderio omnium rerū, quæ mihi me chariores semper fuerāt. Cura ut ualeas.

Velim pro tuo in me amore, hanc inanem meam diligentiam, miserabilem potius, quam ineptam putes.

Ita sunt res nostræ, ut in secudis, fluxæ: ut in aduersis, bonæ. In re familiari ualde sumus, ut scis, perturbati.

Amisimus mi Pomponi, non omnē modo succū, ac sanguinem, sed etiam colorem, et speciem pristinā ciuitatis.

Ego uerò, quem fugiam, habeo: quē sequar, nō habeo.

Solicitem esse te, cum de tuis communibusque fortunis, tum maxime de me, ac dolore meo sentio: qui quidem dolor meus, non modo non minuitur, cum sociū sibi adiungit
y dolorem

dolorem tuum, sed etiam augetur omnino. Pro tua prudentia sentis, qua consolatione leuari maxime possim. Probas enim meum consilium, negasq; mihi quicquam tali tempore potius fugiendum fuisse.

Qui sit omnium rerum status noster uides. Nihil est mali, quod non et suslineam, et expectem. Quarum rerum eo grauior est dolor, quo culpa maior.

Omnia tamen sunt feliciora, quam peccati dolor, qui et maximus est, et aternus. Cuius peccati, si socios essem habiturus ego, quos putavi, tamen esset ea consolatio tenuis. Sed habet aliorum omnium ratio exitum, mea nullum.

Quam ob rem, quonia neq; consilij tui, neq; consolationis cuiusquam spes ulla mihi ostenditur, non queram hac a te posthac: tantum uelim, ne pristinum hoc officium intermittas. Scribas ad me quicquid ueniet tibi in mentem, cum habebis cui des, et dum erit ad quem des, quod longum non erit.

Quid restat, nisi ut miser fiam?

O rem perditam, o facinus indignum, o me infelicem, quid hoc statu uel desperatius, uel foedius? O me afflictum.

De praedio per calumniam erepto, grauius angerer, nisi iam animus diuturna desperatione ad nouum dolorem obduruisset. Ita animus multis malis obstupuit, ut sensu etiam molestiae carere coeperit, quod ipsum est omnibus miseris miserius. Quid queris? nihil me infortunatius. Nos tamen in his etiam miseris, erecto animo, et minime perturbato sumus, honestumq; et dignitatem nostram magna cura tuemur. Plura scribere non possum, ita sum animo perculso et deiecto.

Non faciam ut enumerem miseriae omnes, in quas incidi

cidi propter summam iniuriam, & scelus, non tam inimicorum meorum, quam inuidorum, ne & meum mœrorem exagitem, & te in eundem luctum uocem.

Ego & sepius ad te & plura scriberem, nisi mihi dolor meus, cum omnes partes mentis, tam maxime huius generis facultatem adenisset.

Itaq; quæ meum me mœror quotidianus lacerat & conficit, tū uerò hæc addita cura, uix mihi uitā reliquā facit.

Nec tam miserum quicquam est, quod non in fortunam nostram cadere uideatur. Quare quando me afflictum & confectum luctu audies, existimato me stultitiæ meæ poenam ferre grauius, quam euenti, quod ei crediderim, quem esse nefarium non putaram.

Nos non inimici, sed inuidi perdidierunt. Nam quod me tam sæpe & uehementer obiurgas, & animo infirmo esse dicis, quæso ecquod tantum malum est, quod in mea calamitate non sit? Ecquis unquam ex tam amplo statu, tam bona causa, tantis facultatibus, ingenij, cōsiliij, gratiæ, tantis præsidij bonorū omnium concidit? Possum obliuisci qui fuerim, nō sentire qui sim? Quo careā honore, qua gloria, quibus liberis, quibus fortunis, quo fratre? Quem ego, ut nouum genus calamitatis attendas, quum pluris facerem, quam me ipsum semper fecissem, uitæui ne uiderem: ne aut illius luctū, squaloremq; aspicerem: aut ne me, quem ille florentissimum reliquerat, perditū illi, afflictumq; offerrem. Mitto cætera intolerabilia, etēnim fletu impediōr.

Dies autem non modo nō leuat luctum hunc, sed etiam auget. Nam cæteri dolores mitigantur uetustate: hic non potest, & sensu præsentis miseriæ, & recordatione præ-

teritæ uitæ non continuò augeri. Desidero enim non mea solum, neque meos, sed me ipsum. Quid enim sum? Sed non faciam, ut aut tuū animum angam querelis, aut meis uulneribus sæpius manus adferam.

Magis opto quàm spero, ut ægroto dū anima est, spes esse dicitur. Non mediūsfidius præ lacrymis possum reliqua nec cogitare, nec scribere.

Aut quis me non solum infelicioꝝ, sed iam etiā turpior?
 Plinius, Lamentationis exēplum erit tota illa epistola lib. j. Iacturam grauiſſiman. Rursus lib. iij. epist. tota, Modo nuntiatus est. Rursus: Audio Valerium Martialem.

Lib. v. epist. Tristiſſimus hæc tibi tota.

Lib. viij. epistola: Omnia mihi studia.

Mihi autem uidetur acerba semper, & immatura mors eorum, qui immortale aliquid parant. Nam qui uoluptatibus dediti, quasi in diem uiuunt, uiuendi causas quotidie finiunt; qui uerò posteros cogitant, & memoriam sui operibus extendunt; his nulla mors non repentina est, ut quæ semper inchoatum aliquid abrumpat.

Triste illud, quòd Iulius Valens grauius iacet: quamquam ne hoc quidem triste, si illius utilitatibus æstimeretur, cuius interest quàm maturiſſime inexplicabili morbo liberari. illud planè nō triste solum, uerū etiam luctuosum, quòd Iulius Auitus decessit, dum ex quæstura redit: decessit autem in naui, procul à fratre amantiſſimo, procul à matre, à sororibus. Nihil ista ad mortuū pertinet, sed pertinuerunt, cum moreretur. Pertinet ad hos, qui supersunt. Iam quidē in flore primo tantæ indolis iuuenis extinctus est, summa cōsecuturus, si uirtutes eius maturuiſſent. Quo
 ille

ille studiorū amore flagrabat? quātum legit, quantū etiā scripsit, quæ nunc omnia cū ipso sine fructu posteritatis abierunt? Sed quid ego indulgeo dolori, cui si frēnos remittas, nulla materia non maxima est? Finē epistolæ faciā, ut facere possim: etiam lacrymis, quas epistola expressit.

Est enim quædam etiam dolendi uoluptas, præsertim si in amici sinum desleas, apud quem lacrymis tuis uel laus sit parata, uel uenia. Lib. viij. epist. Et gaudium mihi.

Lamentatoria mea.

SI in malum hoc fortunæ iniquitate incidissem, honestior esset plaga: nunc nostra culpa uidemur accersisse, quod commode uitari poterat.

Res meæ in eum locum deductæ sunt, ut si uclis officiosus esse, epitaphium pares tuo Lucilio.

Degratulatoria epistola.

Quemadmodum in rebus afflictis, amici dolorem cōsolatione mitigamus: ita si quid accidit lætæ rei, uoluptatem amici gratulatione conduplicamus. His modis omnibus exaggerabimus animi nostri uoluptatē, quam ex amici successu cepimus, cuius omnia uel commoda, uel incommoda pro nostris ducamus: imò cuius rebus pro incredibili quadam erga illum beneuolentia, magis etiam con moueamur, quàm nostris ipsorum. Deinde dignitatem, aut si quid aliud obtigit, uarijs rationibus attollemus: siue quòd per se sit eximia: siue quòd à multis frustra ambita: siue quòd ultro nō ambienti delata sit: siue quòd bonorū iudicio contigerit, non cæco fauore fortunæ: siue quòd eiusmodi principis fauore, qui nō solet nisi spectatos magis honoribus ornare: siue quòd totum hoc, quicquid est

boni, nulli ferat acceptū, nisi suæ ipsius industrie, ut hinc nihil laudis sibi uindicare possit fortuna: siue quod præter spem obtigit, nam hæc solent esse gratiora. Mox ubi rem satis auxerimus, ostendemus: tametsi sit amplissimum quod obtigit, tamen inferius esse meritis illius. Hunc tantū esse gradū ad maiora, si modo fortuna uelit hominis uirtutibus respondere. Postremo loco bene ominabimur, beneq; precabimur, ut quod obtigit, bonis auibus sit ipsi, amicis, ac Reip. perpetuū faustum, ac felix. Est & obliqua gratulandi ratio, quando negamus nos amico gratulari honorem, qui contigit, sed ipsi honori talem uirū, qui tum demum uidebitur splendidus, ac magnificus, postea quā ei delatus est, qui suis uirtutibus, & ornamentis sit dignitatis, quam suscepit, multū dignitatis allaturus. Quemadmodum enim magistratū obscurat, qui gerit indignus, ita illustrat uir omni decorum genere clarus & illustris. Aut negabimus nos illi gratulaturos dignitatis accessionem, quam ille nec ambit, nec miratur: utpote uir prudens, qui intelligat, quāto cum onere honor ille sit coniunctus: prætereā modestus, qui nihil minus affectet, quā populares glorias: sed tamen gaudere, quod illi seges ac materia data sit exercendæ uirtutis suæ, ut qui antehac semper uoluerit prodesse quā plurimus, nunc etiam possit ob autoritatis accessionem. Licebit utranq; rationē adhibere per occupationē, quum prius narrabimus, quid alij essent illi gratulaturi, nos non eadem gratulari, sed ea potius, quæ iam diximus, in obliqua gratulatione dici solere. Frequenter hic incidit genus encomiasticum, ueluti in his, quæ modo recensuimus: aliquādo non incidit, ueluti quū amico gratulamur,

tulamur, qui incolumis domum redijt ex itinere longina-
 quo: quum amico gratulamur filium natum, nisi fortè di-
 cemus hoc Reipub. interesse, ut optimi quiq; uiri, & pro-
 bisimæ quæq; matronæ, quàm maxime sint fœcundæ, quòd
 ex bonis fere nascantur boni. Porro felicitatē ciuitatis non
 hinc pendere, si quàm plurimos habeat ciues, sed si quàm
 optimos. Exemplum. Incredibilem animo cepi lætitiā,
 quum te summo principū, collegijq; cōsensu, miro populi
 applausu præsulē creatū esse intelligo. Gaudeo aliquādo
 eum honorem tibi ultro delatū esse, quo tu te semper di-
 gnissimū præstitisti. Nec tibi tantum gratulor, qui hono-
 re isto (quanquā tuis moribus, tuæ cruditioni debito) non
 multum delectaris, sed multò magis patriæ gratulor, quæ
 talem sit pontificē habitura, qualem antehac habuit nun-
 quā. Gratulor tuis omnibus, quos quū semper morū in-
 nocētia decoraris, nunc etiā honoris claritate, & muneris
 autoritate illustrabis. Gratulor mihi ipsi, te amplissimis ho-
 noribus esse auctū, cuius omnes fortunas semper meas esse
 duxi. Sacerdotio quidē isto in uniuerſa Hetruria neq; ho-
 nestius aliud, neq; magis opimū, neq; tuis rebus cōmodius
 contingere poterat. Tu tibi qua es modestia, onus, haud
 honorem obiectum dices. At ego sic existimo, superos &
 patriæ per te consultum esse uoluisse, & tibi uirtutis ma-
 teriā illustrandæ paratā. Quæ res precor ut primū tibi, de-
 inde gregi tuo, deniq; & nobis omnibus uertat benc. Me
 totū quātus quātus sum, ad tuū obsequium offero. Vale.

Gratulatoriæ sylua.

Libro ij. epistola : Scra gratulatio. Eodem, epistola: Cic.epist.lam.
 Primum tibi ut de.

Lib. iij. epist. Quasi diuinarem. tota.

Qua in re gratulor tibi ita uehemēter, ut te quoq; mihi gratulari, quā gratias agere malim: alterū non omnino desidero, alterum uere facere poteris.

Gratulor tibi mi Balbe, uerēq; gratulor. Nec sum tam stultus, ut te usura falsi gaudij frui uelim; deinde frāgi repente, atq; ita cadere, ut nulla res te ad æquitatem animi postea possit extollere.

Sapienter hæc reliquisti, si consilio: feliciter, si casu.

Gratulor tibi affinitate uiri medijs fidius optimi.

Lib. xy. epist. Te et pietatis in nos, et plurimæ sequētes.

Cic. ad Attic.

De Cic. q̄ scribis, iucūda mihi sunt: uelim sint p̄sp̄era.

Et si cōtentus eram, mi Dolabella, tua gloria, satisq; ex ea magnam letitiam, uoluptatemq; capiebam, tamen non possum non confiteri, cumulari me maximo gaudio, quod uulgò hominū opinio socium me adscribat tuis laudibus.

Sum enim audior, etiā quā satis est, gloriæ, & tamē non alienum est à dignitate tua, quod ipsi Agamemnoni regi regum fuit honestum, aliquem in consilijs capiendis Nestorem habere: mihi uerò gloriosum, te iuuenē c o s. florere laudibus, quasi alumnum disciplinæ meæ?

Plinius.

Lib. iij. epist. Magnam cepi uoluptatem.

Lib. v. epist. Concesseram in municipium. tota.

Eodem, epist. Bene est mihi.

Politianus,

Lib. ix. epist. Magna me sollicitudine. tota.

Lib. j. Explicare non possum.

Gratulatio mea.

Lucium tibi generum obtigisse maiorem in modum gaudeo, speroq; & opto, istam coniunctionem tibi

& uo

et uoluptati, et ornamento fore.

Neq; nobis præsul optatior, neque tibi munus magis optandum potuit obtingere.

Nuncius neq; optatior, neq; iucundior adferri potuit, quàm qui nuper est de noua dignitate tua allatus.

Ex tuis literis, quibus te consulem declaratum significas, tantum cepi uoluptatis, quantum te semper amaui.

O factum bene, rem uoluptarian nuncias, pulchre nuncias, præ gaudio uix me capio.

Voluptatem incredibilem mihi tuis literis nuncias.

Literæ tuæ suauissimæ, quibus te nouis honoribus ornatum nuncias, tanta me letitia impleuerunt, ut prorsus dubitè, cui potissimū gratulari debeā: tibi ne cui tanta dignitas nec petēti, nec cogitanti cōtigerit: an patriæ, quæ talē sit præsulem habitura: an principi, qui talem consiliariū: an mihi potius, qui tuis fortunis perinde ac meis delector.

Scio te istiusmodi ornamenta nec desiderasse, nec delectari, et ita prorsus existimare, onus, non honorem tibi iniectum. At tanto es isto honore dignior, quo delectaris minus, eoq; magis uirtuti tuæ gratulor. Natum tibi bellum puerum, uxore salua, uehementer gaudeo.

Quòd ex itinere difficilimo et diuturna peregrinatione patriæ sis redditus incolumis, tuo nomine ex animo gaudeo.

Rem tibi ex sententia tua euenisse, incredibile dictum quantum later.

Caue putes te ipsum ex ista tua fortuna, plus cepisse uoluptatis, quàm ego ex tuis literis ceperim, quæ me de noua dignitate tua certiores fecerunt.

Quòd nouis honoribus sis auctus,
 Quòd magistratum assequutus,
 Quòd legatio tam splendida delata,
 Quòd doctoris titulo ornatus,
 Familiam tibi feliciter domi crescere,

} maiorem in mo-
 dum gaudeo.

Hæreditatem amplissimam obuénisse uolupte est: te tam certis, tam charis amicis orbatum nonnihil doleo.

Ego abfuisse te tandiu à nobis & doleo, quòd carui fructu iucundissimæ cōsuetudinis tuæ: & lætor, quòd absens omnia cū maxima dignitate es assequutus, quodq; in omnibus tuis rebus meis optatis fortuna respondet.

Gratulor, quòd qui semper episcopus fuisti, nunc etiā uideberis.

Responsio ad gratulationem.

Cic. epist. fam.

GRatulatio tua etsi mihi probatissima, quòd ab optimo fit animo, tamen hoc mihi multò iucundius est, & gratius, quòd in summa paucitate amicorum, propinquorum, ac necessariorum, qui uerè meæ saluti fauerent, te cupidissimum mei, singularemq; mihi beneuolentiam præstitisse cognoui.

Responsio mea.

O Diem lætum, non tibi solum, sed tuis etiam omnibus candidissimo notandum calculo.

Si quid esset in rebus meis unione uel candidius, uel preciosius, hac nota signarem eum diem, quo mihi nūciatum est te nobis è periculosissimo bello redisse, non solum incolumē, uerum etiā uictorē, & quidē summa cū laude.

O diem terq; quaterq; lætum, nec unico margarito mihi signandum.

Precor

Precor superos , ut hoc gaudium , quod nobis omnibus largiti sunt , perpetuum esse uelint.

Si casu te contulisti in aulam , gratulor fortunæ tuæ : sin iudicio , magis etiam gratulor tuæ sapientiæ.

De iocosa epistola.

IN unoquoq; epistolarum genere , quoties res patitur , iocum admiscere debemus . Quo in genere & Cicero nem plurimū ualuisse , & Ioannem Campanū fere immodicum , ac solutū esse uidemus , sæpe proximum scurrilitati . Argutius iocatur Ausonius . Cuiusmodi uerò debeat esse iocus , Cicero in libris de oratore , & Quintilianus capite de risu monstrauit . Exemplā suppeditabit Macrobius , & Athenæus . Primum illud curandum , ut tempestius sit iocus , ut liberalis , ut decori meminerit . Qui si apte adhibebitur , plus sæpenumero habet momenti , quā oratio quālibet seria . Sed cauendum erit , ne quādo nobis eueniat , quod asino Aesopico catelli lusus infeliciter emulato .

Iocosa sylua.

Libro vij. epist. In omnibus meis.

Cic. epist. fa.

Nam de Cornelio nihil audeo dicere , cuius tu periculo stultus es , quando te ab eo sapere didicisse profiteris : quin tu urges istam occasionem , & facultatem , quā melior nunquā reperitur .

Lib. vij. epist. I legi tuas literas.

Eodem , epistola : Nisi antè Roma proxima : Mirabar quid esset . Ac cetera pleræq; ad Trebatium .

Lib. ix. epist. Num tu homo ridiculus es ? Et aliquot sequentes ad eundem . Eodem , epist. Accubueram .

Tui desiderium , spe tuorum commodorum consolor .

Nos

Nos planè diuites sumus, sed ne erres, Stoico more,
qui omnes diuites putant, qui cælo & terra frui possunt.

Lib. j. epist. Næ tu homo es. Item proxima: Pici.

Politianus.

Lib. v. epist. Ita respondebo. Item epist. Si tu edentulus.

Lib. vij. Breues aliquot epistolæ sunt, partim iocosa,
partim arguta. Quin & Ausonius multus est in iocan-
do, nec minus Gulielmus Budæus, Gallus & hic.

Conciliatoria.

Est genus epistolarum non dissimile commendato-
rio, quod nobis uisum est appellare conciliatorium.
Nam ut commendatione concilianus alijs fauorem, ac
beneuolentiam apud amicos, ita quum studemus nobis
conciliare uiros, quibus cum antehac nulla intercessit no-
titia, aut amicitia, quodammodo nosmet ipsos commenda-
mus. Hoc argumentum frequens est inter eruditos, dum
aliquoties totis regionibus disiuncti, tamen mutuis episto-
lis sese prouocant ad sodalitatem literariam, ac fœdera
musarum. Et nescio quomodo uix unquam abest hic le-
nocinium assentationis, à quo tamē nec sanctimonia pro-
bato uiros uidemus abhorruisse. Illud erit obseruandum,
ut ita laudemus eum cuius ambimus amicitiam, ne uel adu-
lari, uel fingere, uel insidiari, uel nostrum negotium agere
uideamur. Rursus ita laudemus nos ipsos, ut ne nobis ob
arrogantiam pro beneuolentia conciliemus odium. Dice-
mus similitudinem esse conciliatricem amicitia. Nos illius
eximij dotibus ad amandum inflammatos, quas partim
celebri fama, partim ex prædicatione laudatissimorum
hominum, partim ex ipsius libris cognouerimus. Nos
tamen si multum absimus ab illius uirtutibus, tamen semper
huc

huc annixos, ut quod in illo suspicimus, assequeremur, & aliorum iudicio aliquò usq; progressos esse. Suspicionem assentationis subinde deprecabimur. Obtestabimur illius modestiam, ut amoris nostro ignoscat, cui temperare non possumus: etiã non ignari, quanto opere uir omni laude superior, prædicatione suarum uirtutũ offendatur. In nobis rem attenuabimus, animum, studium, amorem optimarum rerum exaggerabimus. Orabimus, ut nos in suorũ numerũ ascribat. Pollicebimur, nos tametsi novos amicos, nulli ueterum cessuros, studio certe, ac fide, quãtũuis reliquis in rebus impares. Nos ipsos, opes nostras, & quicquid opera nostra præstari poterit, totum illi defremus, amicos etiã cõmunes pollicebimur. Poterat hoc genus amatorio subijci, quo quidẽ loco nõnihil attigimus. Nonnunquam & alios inuicem conciliamus, ac tum quidẽ hoc intererit inter commẽdationem, & conciliationẽ, quòd qui commendat, petit nonnihil: qui cõciliat, nihil petit officij, sed tãtum conglutinat amicitiam. Ad hoc genus pertinet laudatio certæ personæ. Syluam modo subijciemus, nam & in descriptione nonnihil hac de re meminimus.

Laudatoriæ sylua.

Mihi quidem humanitas tua, uel summa potius sapientia, non iucunda solum, sed etiam admirabilis uisa est. Virum enim excellentem, & tibi tua præstanti in eum liberalitate deuinctum, nonnihil suspicantem, propter aliquorũ opinionem cupiditatis suæ, te ab se abalienatum illa epistola retinuisti.

Cic. epil. fam.

Sed nimirum, quæ sunt in manu hominum, & mihi & multis contigerunt. Illud uerò, ut adipisci arduum, sic etiam

Plinius.

etiam sperare nimium est, quod dari nō nisi à dijs potest.

Ego uerò Rufum nostrum laudo, non quia tu ut ita facerem, petisti, sed quia est ille dignissimus. legi enim librum omnibus numeris absolutum, cui multum apud me gratiæ amor ipsius adiecit: iudicaui tamen. Neque enim soli iudicant, qui maligne legunt.

Lib. j. epistola, cuius initium: Si quando urbs nostra.

Laus hominis. Eodem, epist. Amabam Pompeium.

Lib. ij. epist. Post aliquot annos.

Eodem, epist. Magna Iſæum fama.

Lib. iij. epist. Nescio an ullum iucundius.

Eodem lib. epist. Annotasse uideor. Laus poëtæ.

Lib. vj. epist. Sum ex his. Lib. ix. epist. Vnice probo.

Lib. j. epist. Mirum est. Laus uitæ rusticanae.

Lib. ij. epist. Assẽ para. Vituperatio personæ.

Politianus.

Lib. j. cpi. Tãti mihi sunt. Lib. iij. cpi. Et si magnũ te.

Eodem: O' decus Italiæ. Laus puellæ.

Lib. iij. epist. Scribis Marianum. Laus concionatoris.

Lib. xij. epist. Quàm uellem. Laus pueri.

Responsio ad laudem.

Cic. epist. fami.
Plinius.

Lib. xv. epist. Latus sum laudari.

Si laudatus à te, laudare te cœpero, uereor ne non tam proferre iudicium meum, quàm referre gratiam uidear. Omnia scripta tua pulcherrima existimo, maxime tamen illa, quæ de nobis. Accidit hoc una eademq; de causa. Nam & tu quæ de amicis optime scribis, & ego quæ de me ut optima lego.

Laudem pariter & gratias agam? Neutrum satis possum, & si possem timerem, ne arrogans esset ob ea laudare,

laudare, ob quæ gratias agerem. Vnum illud addam, omnia mihi tantò laudabilia uisa, quantò iucundiora: tantò iucundiora, quantò laudabilia erant.

Lib. j. epist. Quod proximis literis.

Politianus.

Item epist. Quod ex sequendis rebus.

Item epistola: Lucretium Petreio.

Lib. ij. epist. Legit epistolam. Rursum: Non tu munus.

Eodem, epist. In epistola quadam.

Lib. iij. epist. Et si uideo. Eodem, epist. En ad te reuertitur. Rursum epist. Misit ad me. Eodẽ, epist. Vtinam quas.

Lib. iiij. epist. Ignosce occupationibus.

Lib. v. epist. In calce. Lib. vij. epist. Legit epistolam.

Eodem, epist. Honorifica mentio. Item proxima.

Responsio ad laudem, mea.

Laudes istas quas affatim in me congeris, sic equidem interpretor, quasi non me depingere uolueris qualis sum, sed optimũ exemplar præscribere, qualis esse debeã.

Hoc effecit ista tua tam magnifica laudatio, ut iam mihi minus incipiam placere, qui planè uideam, quantum absim ab ista perfectæ uirtutis imagine.

Dum istam imaginem pingeres, non à me, sed abs te ipso sumebas exemplum.

Sentio quid agas, falsis istis laudibus nostram ignauiam extimulare uoluisti.

Aut planè falleris, aut nobis blanditur tua laudatio. Sed blandiatur sanè, dummodo mihi mea studia commendet. Nec enim alio consilio te blandiri scio.

Ideo summa tribuis, non quòd ea sim assequutus, sed quòd huc me summis uiribus uelis eniti.

Hoc

Hoc agis laudando, ut aliquando uidear laudandus. Ipse summis ac maximis uirtutibus abundet oportet, qui in alijs paucas ac mediocres sic amat.

Quòd in laudādo me plus quàm immodica benignitate es usus, nō ignoscere, nisi iam olim ex Homerica lege, poëtis mentiri liceret. Ait enim, *τομὰ ἡδονὴν ἀνίσδι*.

Non est mihi cornea fibra, quēadmodum ait Persius: nec apud me sanè incredibile est esse uerum, quod scripsit Xenophon, *ἡδιστον ἄστυα ἱκανον ἐῖνα*, utique si promerear. Nunc nihil aliud quàm rideri me puto. Est hoc fere solenne inter eruditos, ut sese mutuis laudibus quasi scababant. Nec in totum damnandas arbitror has assentationunculas, quibus alitur beneuolentia, & excitantur studia.

Officiosa.

NEC infrequens est & illud epistolarum genus, quo amicis, etiam si nihil petant, operam nostram ultro offerimus, propterea quòd sunt quos pudet rogare, quum egeant amicorum subsidio. Hos oportet ultro delato officio, ad postulandam operam amici prouocare, & ea causa genus hoc officiosum uocare placuit.

Officiosæ sylua.

Cic. epist. fami.

EGO omni officio, uel potius pietate erga te, ceteris satisfacio omnibus, mihi ipsi nunquam satisfacio. Tanta enim magnitudo est tuorum erga me meritorum, ut quoniam tu nisi perfectā re de me non conqueisti: ego quia non idem in tua causa efficio, uitam mihi esse acerbam putem.

Nostram fidem omnes, & amorem tui absentis, praesentes tui cognoscant. Si esset in his fides, in quibus esse debebat,

debebat, non laboraremus.

De cæteris rebus quicquid erit actum scribam ad te: & ut quàm rectissime agantur omnia, mea cura, & opera, diligentia, gratia providebo.

Ego neq; de meo studio, neq; de nonnullorū animo mihi scribēdū arbitror. Quid enim aut me ostentē, qui si uitam pro tua dignitate profundā, nullā partē uidear tuorū in me meritorū assequutus: aut de aliorū iniurijs querar, qd' sine summo dolore facere nō possum? Ego tibi in hac præsertim imbecillitate magistratū præstare nihil possum: at ea excepta, possum cōfirmare, te & senatus, & populi Romani summo studio amplitudinē tuam retenturum.

De Alexandrina re, causaq; regia, tantum habeo polliceri, me tibi absenti, tuisq; præsentibus cumulate satisfacturum. A nobis agentur omnia diligenter, ut neq; si quid obtineri poterit, non contendamus, nec, si quid non obtinuerimus, repulsi esse uideamur.

A me nullum tempus prætermittitur de tuis rebus & agendi, & cogitandi, utorq; ad omnia Qu. Selicio. Neq; enim prudentiorem quenquam ex tuis, neq; fide maiore esse iudico, neq; amantiorem tui.

A me omnia summa in te studia, officiaq; expecta. Non fallam opinionem tuam.

Tu uelim tibi ita persuadeas, nullā rē esse minimā, quæ ad te pertineat, quæ mihi non charior sit, quàm meæ res omnes: idq; cum sentiam, sedulitate mihi met ipse satisfacere possum, re quidem ipsa ideo mihi non satisfacio, quòd nullam partem tuorum meritorum, non modò referenda, sed ne cogitanda quidem gratia, consequi possum.

Cetera quæ ad te pertinebunt, cum etiam plus contenderimus, quàm possumus, minus tamen faciemus, quàm debemus.

Omnia uolo à me et postules, et expectes. uincam meis officijs cogitationes tuas.

In hoc toto genere plura faciam, quàm scribere audeo. Cetera, quæ tibi à multis prompta esse certò scio, à me sunt paratissima. Nihil in re familiari mea est, quod ego malim meum esse, quàm tuum. Hac de re, et de hoc genere toto, hòc scribo parcius, quòd te id, quod ipse confido, sperare malo, te esse usurum tuis.

Ego quæ pertinere ad te intelligam, studiosissime omnia, diligentissimeq; curabo, tuorumq; tristissimo meo tempore meritorum erga me memoriam conseruabo.

De mea autè in te uoluntate, sic uelim iudices, me quibuscùq; rebus opus esse intelligam, quanquàm uideā, quis sim hoc tēpore, et quid possim, opera tamen et consilio, studio quidem certe rei, famæ, salutis tuæ præstò futurum.

Quam ob rem tu, quantū tuo iudicio tribuendum nobis esse putes, statues ipse: et, ut spero, statues ex nostra dignitate. Ego uerò tibi profiteor, atq; polliceor eximium et singulare meum studium, in omni genere officij, quod ad honestatem et gloriam tuam spectet, in quo etiam si multi mecum contendunt, tamen cum reliquis omnibus, tum crassis tuis iudicibus, omnes facillè superabo.

Quam ob rē uelim ita et ipse ad me scribas de omnibus, minimis, maximis, mediocribus rebus, ut ad hominem amicissimum: et tuis præcipias, ut opera, consilio, auctoritate, gratia mea sic utantur in omnibus, publicis, priuatis,

tis, forensibus, domesticis tuis, amicorum, hospitum, clientum tuorum negocijs, ut quoad eius fieri possit, presentiae tuae desiderium meo labore minuatur.

Tu tamen ei uelim scribas, ut nullam rem neq; tam magnam, neq; tam paruam putet, quae mihi aut difficilis, aut parum me digna uideatur. Omnia quae in tuis rebus agā, & non laboriosa mihi, & honesta uidebuntur.

Tu si quid ad me fortè scripseris, perficiam ne te frustra scripsisse arbitrare.

Quotiescunq; filium tuum uideo (uideo autem frē quotidie) polliceor ei studium quidem meum, & operam sine ulla exceptione aut laboris, aut occupationis, aut temporis: gratiam autem atq; auctoritatem cum hac exceptione, quantum ualeam, quantumq; possim.

Lib. vi. epistola: Vereor ne desideres. multos habet locos consolatorios.

Singula persequi non est necesse: uniuersum studium meum & beneuolentiam ad te defero.

Tibi gratulor, mihi gaudeo, te amo, tua tucor: à te amari, & quid agas, quidq; agatur, certior fieri uolo.

De me autem sic uelim iudices, quantum ego possim, me tibi, salutis tuae, liberisq; tuis summo cum studio praestò semper futurum.

Ego quid possim, nescio, uel potius me parum possentio. Illud tamen tibi polliceor, me quaecunq; salutis, dignitatiq; tuae conducere arbitrabor, tanto studio esse facturum, quanto semper tu & studio, & officio in meis rebus fuisti. Hanc meam uoluntatem, ad matrem tuam optimam scēminam, tuiq; amantiſsimam detuli. Si quid

ad me scripseris, ita faciam, ut te uelle intellexero. Sin tu minime scripseris, ego tamen omnia, quæ tibi utilia esse arbitror, summo studio, diligenterq; curabo.

Interim uelim sic tibi persuadeas, mihi cū Reip. quam semper habui charissimam, tum amoris nostri causa, maxime curæ esse tuam dignitatem. Da operam ut ualeas.

Sed ego tuis neq; desum, neq; deero, q siue ad me reserūt, siue nō, mea tibi tñ beneuolētia, fidesq; præstabitur.

Iniuriam enim fieri putabam, quum rogabar.

Quæ ad me de tuis rebus domesticis scribis, quæque mihi commendas, ea tantæ mihi curæ sunt, ut me nolim admoneri.

Illud profectò cognosces, mihi te neq; chariorem, neq; iucundiorem esse quenquam.

Perficiam profectò, ut longi temporis usuram qua caruimus, intermissa nostra consuetudine, gratia, & charitate, & officiorum meorum magnitudine sarciam.

Cic. ad Attic.

Perficiam profectò, ut neq; resp. ciuis in me animum, neq; tu amici desideres.

Consolatio est.
Non est suo loco,
uizio scrib.

Sed hæc fors uiderit ea quæ talibus in rebus plus quam ratio potest. Nos autem id uideamus, quod in nobis esse debet, ut quicquid acciderit, fortiter, & sapienter feramus, & accidisse hominibus meminerimus: nosq; cum multum literæ, tum non minimum Idus quoq; Martiæ cōsolentur.

Ego quæ te uelle, quæq; ad te pertinere arbitror, semper sine ulla dubitatione summo studio faciam. Hoc uelim tibi penitus persuadeas.

Ego quæ te uelle, quæq; ad te pertinere arbitror, studiosè, diligenterq; curabo. da operam ut ualeas.

Nec uero

Nec uerò ulla res erit unquam, in qua ego non uel uitæ periculo ea dicam, eaq; faciam, quæ te uelle, quæq; ad te pertinere arbitrabor.

Lib. iij. Deprehenderūt me. Lib. x. Quāq; nec fortuna. Politianus.
Plinius.

Nō mehercule tam mea sunt, quæ mea sunt, quā quæ tua. Hoc tamen differunt, quòd sollicitius, & intentius tui me, quā mei excipiunt. Idem fortasse eueniet tibi, si quando in nostra diuerteris, quod uelim facias. Primum, ut perinde nostris rebus, ac nos tuis, perfruaris: deinde, ut mei expergiscantur aliquando, qui me securè ac propè negligenter expectant.

Lib. vij. Calestrium tyronem familiarissimum.

Nihil est quod uerearis, ne sit hoc illi molestū, cui orbē terrarū circumire nō erit longum mea causa. Proinde nimiam istam uerecundiam pone, teq; quid uelis consule: illi tam iucundum, quod ego, quā mihi, quod tu iubes.

Officiosæ mea.

Nihil mihi magis in uotis est, quā ut primum abs te ipso, deinde à cæteris omnibus quā gratissimus esse cognoscar. Sed eiusmodi sunt tempora, ut & tuis in me meritis, & meo in te animo, satisfacere uelim magis quā possim.

Me incolumi, nullam accipies iniuriā: & si mauis me uerbis Homericis tibi meum patrocinium polliceri,

Οὐδὲς ἐμὸν ἴδεντο, καὶ ἐπὶ χθονὶ δὲ κερμένειο.

Τοὶ καίλης παρὰ νηυσὶ βαρύντας χερσας ἐπείσθη.

Pollio uidetur in te offensior. Hoc quanti æstimes ubi cognoro, tū eadē opera sciero quid mihi sit elaborandū.

Cæteri solent operam polliceri in licitis & honestis,

Et in his quæ præstare possint. Ego uerò tibi omnem meam in omni re sine exceptione polliceor, quæ possis tuo arbitrato uel uti, uel abuti. In his quæ perfici non poterunt, tamen efficiam, ut intelligas nec studium, nec fidem usquam defuisse.

Si officiosum est, ultro polliceri opem, aut operam, multo officiosius est, ultro mittere pecuniam. Huius argumenti tametsi rari, exemplum reperies apud Plinium lib. vi. epistola: Quamuis et ipse.

Sum quidē studiorum laboribus ita districtus, ut nemo magis: sed mihi nihil erat in studijs tam cordi, quod non postpositurus sim, si tali amico præstandū erit officium.

Non omnibus dormio, ita non omnibus uaco. Tibi nunquā non ero ociosus, si quid per me fieri uoles.

Non æquum arbitror, ut literarū pretexto me excussem amico: quum hoc ipsum me doceant literæ, non esse deserendum amicitie officium, quo nihil oportet nobis esse antiquius, aut religiosius.

Hoc unum tibi etiam atq; etiam persuadeas uelim, nihil existere posse tam durum, tam periculosum, quod non sim tua causa libenter etiam subiturus.

Nihil erit tam arduum, tam asperum, quod non sit iucundum futurum tua causa.

Opes quas tibi pollicear, nec mihi adsunt, nec tibi desunt. Hoc corpusculum, hunc animum tibi totum, quantus est, deuoueo.

Hoc tibi spondeo mi Lucilli, neq; animum, neq; diligentiam mihi defuturum.

Nec animo, nec studio, nec beneuolentia, nec patientia cuiusquam

cuiusquam pro uobis cedam.

Disputatoriæ genus.

Est epistolarum genus non infrequens inter eruditos, quo studiorum suorum inter se agunt commercia, quum aut sciscitantur de re quapiam, aut respondent sciscitanti: aut si qua de re parum conuenit, disputant. Huius generis, quoniam uarium est, certa ratio reddi non potest. Tantum exempla quædam indicabo.

Disputatoriæ sylua.

Lib. vii. epistola: Illuseras heri inter.

Cic. epist. Fam.

Lib. ix. epistola: Amo uerecundiam.

Lib. j. epistola, cuius initium est: Frequens mihi disputatio. tota. Plinius.

Lib. iij. epistola: Attuli tibi.

Lib. j. epistola: Ostendet plenum.

Politianus.

Lib. ij. epistola: Dictata illa tua.

Lib. iij. epistola: Irascere obrectatoribus.

Lib. v. epistola: Et tu mihi.

Lib. ix. epistola: Ego quidem mi Hermolæ. Item proxima.

Lib. xij. epistola: Quantopere me semper.

Libri de Ratione conscribendi epistolas, D. Erasmo Roterodamo autore, finis.

LVGD. APVD GRYPHIUM
M. D. XLI.

Amibal abbasinus possidet. Cu
fratribus q suis p qui
pergit ad d. lugu. an
Magistri Nicolai de
an. facis de voe
goma



publi. S. u. d. m. la. el. os. n. s. m. m. pon. for. p. e.
u. ad. rom. u. p. p. x. e. de. qua. d. ab. u. s. s. i. q. n. i. s. s.
a. s. s. e. n. t. m. e. l. i. d. c. n. o. s. c. a. t. l. u. m. u. t. n. i. t. u. e. d. e. f. e. n.
s. o. r. e. m. e. t. i. t. e. s. q. u. m. e. n. s. u. e. e. e. p. o. s. t. m. o. d. u. a. p. a. t. u. i.
p. f. u. t. h. o. c. p. a. p. u. l. u. s. e. n. m. a. g. n. o. h. o. n. o. r. e. e. u. s. d. u. c. e. r. e. t.
i. n. e. q. d. q. d. i. n. t. u. l. i. n. e. x. m. e. t. r. o. n. e. e. a. d. e. i. n. p. o. e.
f. e. n. t. a. r. e. t. q. u. i. p. u. e. d. e. e. o. e. l. i. c. o. r. u. o. t. i. s. n. o. t. u. o. l. e. n. s.
f. e. s. t. i. n. a. d. a. u. l. m. o. n. a. s. t. i. u. i. c. u. c. u. r. e. i. t. i. b. q. a. b. s. e. t. e.
u. o. a. n. t. i. q. u. a. r. u. i. f. e. r. i. b. e. t. e. r. e. q. u. i. t. u. r. a. b. b. a. s. i. e.
q. u. i. s. u. m. q. u. i. d. i. x. o. r. i. u. a. l. e. h. u. c. q. u. i. m. o. n. a. s. t. i. o. s. b. i. a. c. c. t.
f. e. n. u. s. e. c. c. a. t. i. d. e. u. s. i. u. l. i. a. n. s. u. p. b. i. u. u. a. l. d. e. i. t. a. q. i. c. o. n.
a. m. a. c. e. p. u. e. n. i. h. u. i. t. c. u. i. u. i. r. p. r. i. a. t. u. l. u. q. d. i. a. n. i.
h. u. e. g. m. o. s. t. a. t. u. t. c. u. a. d. l. e. s. u. b. c. e. l. e. r. i. t. a. t. e. p. d. u. c. t. e.
p. u. e. x. i. t. p. u. e. x. i. t. u. t. i. n. o. s. p. i. u. p. r. i. a. t. u. i. u. e. l. o. a. t. i. s. i. o. r. e. s. s. u. l.
o. i. n. e. l. i. p. u. l. i. c. i. t. a. e. n. i. f. e. n. u. i. s. e. r. i. t. e. s. r. e. s. s. u. l. q. u. i. n. a. n.
e. s. s. i. e. q. u. i. t. u. s. i. t. u. r. q. u. i. u. t. a. n. d. u. n. t. q. u. i. s. e. s. t. c. u. i.
i. d. h. i. e. l. o. n. t. a. p. o. r. t. u. l. a. s. p. o. r. t. u. i. n. i. s. o. a. m. o. r. e. c. o. m. p.
e. s. t. e. q. u. i. s. e. s. t. i. m. e. l. a. s. c. e. l. e. s. e. q. u. i. p. u. e. n. i. a. t. i. o. n. i. o. s. s. i.
t. a. t. e. p. o. s. s. e. p. o. r. t. a. t. e. q. u. i. t. e. m. e. s. a. d. d. e. i. h. o. i. e. m. p. u. e. n. i.
a. t. e. u. l. i. b. u. s. h. u. m. i. l. i. t. e. u. i. s. o. e. n. u. a. d. e. o. s. t. i. l. i. s. s. t. r. i. c. t. i.
u. l. i. q. d. i. n. i. m. e. i. o. c. c. u. r. r. i. s. s. e. d. e. m. i. t. t. a. u. i. c. u. i. r. e. s. a. l. u.
t. a. t. e. d. e. f. r. o. m. u. l. u. s. p. r. o. e. p. t. d. i. c. e. n. s. l. e. n. i. f. e. n. u. i. u. i. n. d. e.
r. o. m. p. u. b. u. l. u. i. u. i. n. t. i. s. i. q. u. i. b. u. e. i. n. c. i. s. t. i. s. e. c. c. e. e. o. o. q.
s. u. r. u. s. a. p. e. s. t. o. p. e. e. x. p. l. e. t. o. t. e. s. u. b. s. e. q. u. o. r. i. s. o. q. u. i. t. e.
q. u. i. m. i. s. s. u. s. f. i. c. i. a. t. u. l. i. a. n. i. d. e. f. e. n. s. o. r. i. n. i. b. o. n. i. d.
q. u. i. d. n. i. e. e. t. q. u. i. r. e. d. i. r. e. m. o. n. a. r. e. t. p. u. e. c. C. u. e. c. c. e.
i. t. e. n. t. e. p. a. r. u. i. a. s. p. i. c. i. t. l. i. q. i. c. o. l. l. o. f. e. n. u. i. e. x. p. r. o.